

Profet Esekielgo Po Aseai Buku

Hasia nedebo po dao

Esekiel aga te pris bidi me deli da, tama aga te profet bidi te boi bidi dabego te taun Jerusalem dolali sogo bidali. Aga te boi bidi dabego te Babilonba kalabus sela pali hani we bidi dali bidali, tama agai te profet po te hani siba pusubo se yalio. Gasa hani me da, te Juda dabe aga dali te Babilonde bidali, tama gasa me da te Jerusalemde bidalubadi taga pali hani we bidi augwali dao.

Te me badu habu badu Esekielgo te dua dao wabo bomai po mayu, te Godigo te Juda hani dabeba dene mabo se yaibao wali. Te me badu pedai badu agai te tiwai po wali, Godigo te Juda hani dabe dene mani hani we bidi augwaligo ebo kolesaga dagalama, tama agai te hani augwaliba sege mawaibao wali. Te gasa me badu wali po, Esekielgo te tiwai po walio, Godigo te we bidi dabe augwali haliga nagame ilama bidaibao. Agai te tama po wali, te wiegi yai sogo Godigo te nosali pedelaibao po olama walio. Te Israel dabe augwa to pedai kantri ma hodolama, tama Godigo gesi be elalueibao po wai dao.

Te Babilonde bidali Juda dabe augwaligo homu hauwa yalio. Augwali te Godigo taunde bidibe da homu yali, te augwali Godigo tempel be digibulu bidalio. Tama tiyu, augwaligo konebeo, te God augwali dali bidibowe, ma meniwe, te augwaligo konebeo. Esekielgo po te augwaliba pusulama, te augwaligo konealubo homu daq walobo po weyu, augwaliba te tiwai po ola mayu, te God augwali dali bidibao wali. Tama agai te deli deli we bidi augwali homu hodolama te wiegi yai kolesaga naga yao po walio.

Hauwa sogo Godigo Esekielbolo po mayu, te nade ebo se tiwai yali, tama Esekielgo agai te nade suali se po dabe augwaliba pusali po dabe te hania mu koneama, te dago odobo homu pemene yali, tiali goli meba po te kuna mu konesiqbaso, te po page koneainu sinabo se dene dwasianu eyu yai dao.

Godigo profet şe Esekielbolo mawai

(Dqı 1-3)

Esekielgo Godigo sia king sualio

1 ¹Ena Esekiel, ena te Juda dabe dali te wę Kebar pąde bidai, te Babilon tų kantri pedaide. Te Babilon dabe augwaligo da kalabus elama, tama da te augwa page bulu tųba sela pai dao, polobadu. Tama te nanobo me si me si wabo polua, dei a naga wabo side, te kibu be bidi sese deli olama, nogo si wabo 30 yiade, te dagalu buga pabo side eno te nade ebo tiwai te God sualio.^a ²Te şe pedelali, te Babilon dabe te Juda tų kantriba pelama, te hwiąagaselama, te Jerusalem king bidi Jehoiakin augwa tų kantriba kalabus igi pomainu selasa pabo kibu be a naga nosali elalubo sogo te şe pedelai dao.^b ³Ena Esekiel, ena te pris Busigo ogwa da, ena te tų kantri Babilonde bidali, te aı Kebar pąde da, tama enaba te Godigo po wabo eno odama, te Godigo bomo enaba asida walio.

⁴Eno ugwaba tonobadi, eno te genuai wali me haowa te not badu asobo suali, te be sele hauwa dali asobo suali. Te genuai ulago te haowa mu bagua selama, tama te ula te isi dabo tiwai bomu umagi mu yali, tama te haowago ula tomode te tigidaliba usu te brasgo ula ebo tiwai yalio. ⁵Te genuai wali me haowa si tomode eno te bidi tiwai nai me si me si elalubo suali. Augwaligo tigi te bidigo tigi tiwai elaluali,^c ⁶tiali goli te tigidali deli delide te gesabidi me si me si badi, te bogo me si me si elaluali. ⁷Augwali saęa te doloba pai elaluali, te augwaligo saęa dani te gesi kibu bulmakaugo saęa dani tiwai si elaluali. Te augwaligo saęade ula ebo te umabo mu eyu, te bras augwaligo meda holali gegemane tiwai yalio. ⁸Te tigidali bogo deli deli dologode te bidigo nogo aųo tiwai elaluali. Te augwaligo bogo te tama tiwai elaluai. ⁹Tigidali deli deligo augwa bogo si diniginani, te deli deligo bogo sabigo te gasa mego mego bogo sabiba pomono pelama, tama augwali te halobage me deli tiwai te nogo habu me si me si pedelai. Te augwali gasaba me painogo ebo sogo da, augwa te tama tiwai naga elalubadi palio. Augwa tigi begelibo şe eyu me ebeo.

¹⁰Tigidali deli deligo te tobage gesabidi me si me si elaluali. Te edaba begelama elalubo badu te bidigo gesabidi elaluali, te dolo nogo badu gesabidi te hasa nogi laiongo gesabidi tiwai yali. Te pobase nogo badu gesabidi te kibu bulmakau omai gesabidi tiwai elaluali, te tudi badu gesabidi te genuai ba kemodage gesabidi tiwai yalio.^d ¹¹Te augwa gesabidigo kolesaga te tama da. Tigidaligo augwa bogo si diliginama, te deli deligo bogo te gasa mego mego bogo sabiba pomono palio. Te augwa

^a 1:1 Ped 19:11 ^b 1:2 2 Kin 24:10-16; 2 Sto 36:9-10 ^c 1:5 Ped 4:6 ^d 1:10 Ese 10:14; Ped 4:7

gasa bogo me sigo, te augwa tigi mesega salio. ¹²Tigidali deli deligo gesabidi te me si me si gesabidigo te me si me si pedaiba tononaluali. Tama augwali deli homu naga elalubaso, augwali gasaba me painogo da, te augwaligo gesabidi gasaba me begeligobeo. Augwali paboba naga tama paibao. ¹³Te nai dabego kolesaga te tama elalubao.^e

Eno suali, te nai dabego ula te isi ula me sole tiwai ula te bidi tiwai nai me si me si tomode iba peyu, eda asu yali. Tama te sia bogoli genuai pedelama, te be sele ula te isi pedelama, te pepeda pabo şe ela palio. ¹⁴Tama te me si me si bidi tiwai nai dabe te polo asesa iba peyu, eda asu yalio, te be selego ula tiwai yai dao.

¹⁵Eno te bidi tiwai nai dabe subo şe elama, te eno suali, tigidali deli deligo te tşde augwa şağ şağde te wil me deli dolalubo suai dao. ¹⁶Te tigidali wil deli tigi poai naga elalu, te ula umagia mu yali, te şewa yai tedali gasagi yai masigi mu tiwai yalio. Te wil tigidali deli deligo te gasa gasa wil te augwa tomode elalu, te gasa tononalua palio. ¹⁷Tama tialima, te wil dabe te tigidali me si me si pedai badu te iba soyu, eda soyu emainu ebo dao. ¹⁸Eno suali, te wil dabe moni dobo dwai mu yai baso, ena wi yalio. Te wil tigidali deli deli sabi badu te tononalubo gedu hauwa mu elalualio.^f ¹⁹Te bidi tiwai nai dabe iba soyu, eda soyu ebo sogo da, teda te wil dabe me augwali dali iba soyu, eda asiyu yali. Tama te nai dabego te tş tagalama, ugwaba holobo si da, teda te wil dabe me ugwaba holoyu yalio. ²⁰Te nai dabe augwa menaba pabo deli homu ebaso da, teda augwali pelawaibao. Tama te wil dabe me augwali dali paibao, magi baso meni, te me si me si nai dabego me, te wil dabego me te deli homu naga elalubo dao. ²¹Te nai dabe augwali gasa me pabo homu ebaso da, teda te wil dabe me paibao. Tama te nai dabe te me badu pedaide bidibaso da, teda te wil dabe doligi pai elalueibao. Te nai dabe augwali hogodama, ugwaba holobaso da, teda te wil dabego me tama tiaibao, magi baso meni, te me si me si nai dabe dali te wil dabe dali augwaligo deli homu naga elalubo dao.^ş

²²Tama eno suali, te dagalu ugwadu tede te genuai daş tiwai elalubo suali. Eno suali, te nai ula mu yali, te wiegi yai dula tiwai elalubaso, ena wi yali. Te nai te bidi tiwai nai me si me si te nai daide ugwadu munalubo suali.^h ²³Te me si me si nai dabe te genuai bagua sai nai dologode elaluali, te augwaligo bogo si diligina palalio. Te me deli deligo bogo sabi badu ununulu palio. Te augwa tigi dabego digi te augwa bogo sigo mesega salio. ²⁴⁻²⁵Te augwali bola pabo sogo eno odali, te augwaligo bogo kulukulu wali, te tamu aş genuai aş dini holama, degasa dulu bugusu wabo tiwai yali, tama te genuai ami bidi hanigo pesagede bidu posolu dala sabo tiwai yalio. Te augwaligo bogo u wabo te Tigidali Bomo

^e 1:13 Ped 4:5 ^f 1:18 Ped 4:8 ^ş 1:21 Ese 10:9-13 ^h 1:22 Ped 4:6

Elalubo Godigo i wabo tiwai yalio. Te augwali me badu pedai badu doligi pelama, te augwa bogo bea sali. Tialima megı da, te bagua sai naide ugwadu daide te bidigo po wabo odai.ⁱ

²⁶Te bagua sai nai daide ugadu te nai me deli king dugabo sia sai tiwai augwaligo te gasa tedali sisi dagalu tiwai masigigo nigai elalualio. Tama bidi te dugabo sia kingde dugulalubo tiwai elaluai.^j ²⁷Te bidigo tigi ugwadu te bras pedai me deli ula te tomode elalubo tiwai yali. Te tigi pedai aiyadu te sia ula tiwai yali. Te genuai ulago aga bagulai elaluali.^k ²⁸Tama te ula te dagalude unigi bidi elalubo tigi poai tiwai hauwa elaluali. Te ula ebo eno sualı, te ula te God agade digi genuai ula asobo tiwai yai dao.

Godigo Esekiel te profet pedalumainogo daj ilalio

2 ¹Eno te tama tebo sulama, ena kidu sugunama, te gesabidi tıba pıgulali. Tama eno odali, Godigo enabolo te tiwai po wali, “Tıde bidio, nage hogodao. Eno po nage dali wainogo ebao,” wali. ²Te Godigo enaba te po wabo sogo, te agai Moba Noma Bidi enaba aselama, te ena hodolobaso, ena dolugulali. Tama eno odali, Godigo enabolo te tiwai po ma wabo odalio, ³“Tıde bidio, megı eno nage te Israel dabe augwaliba tagala palaibao, te augwali eno po sela sayu, hagoma eyu, te ena tudiba mubo we bidi dabe da. Augwali te augwa waj nıu dabego hagoma ebo tiwai yai bidi dabe dao. ⁴Augwa tobolu dili dagana sigı pelama, te augwaligo eno po me odobeo. Megı da, eno te nage augwaliba pomaina homu elama, te eno po augwaliba magı pao. Te augwaliba te tiwai po walao, “Te e da Tigidali Bomo Elalubo Godigo po digi eno dageba obao.” ⁵Te augwaligo nago po odobaso, ma odisabaso da, te tagalao, teda te hagoma ebo hani we bidigo te tiwai konemainao, te eno profet bidi me deli augwali dali bidiba homu yaibao,” te po wai dao.

⁶“Tialima nage, te tıde bidi, nage augwalide wi elama, te augwaligo nageba wabo pode nage wi me igio. Te augwaligo nago po aiyaba elaluama, nage begela dolaibao. Te nage augwali tomode bidiyu, te tiwai dwai haliga yaibao, nage te dwai sesane elalubo bono sili tomode bidibo tiwai yaibao. Ma, nage te dwai marasin elalubo hwı dabe tomode bidibo tiwai elalueibao. Tiali digi tagalao, nage augwalide wi eyu, te augwaligo pode me wi igio. Menio. ⁷Nago koneani, augwali te hagoma bidi naga elalubao. Te augwaligo nago po odisabadi goli, tagalao, te eno nageba mabo po tigidali te nago augwaliba walao,” te po wai.

⁸“Tıde bidi, eno te po bugagia odao. Te gasa Israel bidi dabego ebo tiwai nago hagoma elamuo. Nago pedauwali diliginama, eno nageba

ⁱ 1:24-25 Ped 1:4-15; 19:6 ^j 1:26 Ese 10:1; Ped 4:2-3 ^k 1:27 Ese 8:2

te mabo nai nago tuao,” wali. ⁹Agai te po ola silama da, teda eno te nogo me deligo te buku me deli ena pađe tolalubo sualio. ¹⁰Te buku te pepa me deli tiwai augwaligo te bebe pelama, te keąi elalui. Tialima, nogo te buku diliginama, tama eno suali, te bukude te si badu po aşai elalui. Te bidi dabe augwali te haliga seęę eyu, dwai gela weyu, homu dene ebo teąbi ebo po dabe augwaligo aşai elalubo suali. Te tobage po te pepade aşani paęanalualio.^l

3 ¹Te Godigo enabolo te tiwai po wali, “Tąde bidio, nago te buku tuao. Tama nosali nage pelama, te bukude po te Israel we bidi augwaliba pusugi pao,” wai dao. ²Tialima, eno pedauwali a olama, agai te buku enabolo mawai dao. ³Tama agai te tiwai po wali, “Tąde bidio, megi eno nagebolo te mabo buku nago tuao. Nago haliga tego paęanao,” wali. Te eno tuali, te eno pusu mu yali, te ganima bunu ge pusu ebo tiwai yalio.^m

⁴Nosali Godigo enabolo te tiwai po wali, “Tąde bidio, nage te Israel we bidi augwaliba pelama, te eno nagebolo pusali po tigidali pusao. ⁵Eno nage te haniani gasa gasa po wabo we bidi haniba me nage tagala palobeo. Menio. Eno nage te Israel we bidi augwali naga bidiboba tagala palobao. ⁶Te eno nage te genuai genuai tą pedai kantri te nago konesiąwai we bidi hani augwaliba nage eno tagala paligi sogo da, teda te tą pedai kantri we bidi augwaligo nago po wali pigi dao. ⁷Tiali digi, te Israel dabego da, me tegobeo. Te augwali me deligo nago po wali me pogobeo. Augwaligo te eno wabo po digi me odisąwaibao, te magi elama augwaligo nago po odaibawe? Magi baso meni, augwaligo tobolu te masigi dila pai tiwai elalu, te tigidaligo po naga sela sąbo bidi dao. ⁸Tiali goli, megi te eno nago homu kolesaga te augwaligo homu kolesaga dila pai elalubo tiwai ilama, te nage augwalide didibili homu me egobeo. ⁹Te eno nage te masigi daimon dila pai tiwai pedalomaiu yaibao, te nago bomogo te augwaligo bomu aiyaba elalueibao. Te nage augwalide wi elama, didibili me igio. Menio. Augwali te po sela sąbo bidi dabe naga dao,” te po wali.

¹⁰Te Godigo gasa po me weyu, te tiwai wali, “Tąde bidio, te eno nageba wainogo ebo po tigidaliba olo bugagia muao, te nago po me deli homugo me gegeda pelamu dao. ¹¹Tialima, nage te nage abagi dabe te boi bidi dabego Babilonba sela asali bageba pelama, tama nago te tigidali po ena Genuai Bidi, eno nageba mani po te nago pusao. Te nago augwaliba te tama po wao, ‘Te po God aga po digi dao.’ Nago eno po augwaliba mao, te augwaligo olo bugagia munama odobaso, ma menisąbaso, te tagalao, te nago eno po augwaliba pusa mao.” Te po wali.

¹²Nosali Godigo Mobo Noma Bidigo ena ugaba sagoasa holali. Te ena tudi badu, te pedauwali me delidu te tiwai i bomonama wabo odali,

“Genuai ula me bomo te dagalude bidibo Genuai Bidi elalubao. Te aga nogi ugaba sao,” walio. ¹³Te me si me si nai te bidi tiwai te bola pabo gagalali, te deli deligo bogo sabi ununulu pelama, te mego bogo sabigo mego bogo sabi badu elali, tama eno te gosege wabo odali. Tama eno te wil kidagalo wabo odalio. Te tigidaligo te kidagalo wabo genuai mu pedalama, te genuai wali u wabo tiwai pedelai dao. ¹⁴Tama Godigo Mobo Noma Bidigo ena ugaba sagoa selama, te ena tolasa palio. Te Godigo genuai bomo enaba pedalama, te ena dwai dene ebaso, ena şeşeyu palio. ¹⁵Te Godigo Mobo Noma Bidigo ena te taun me nogi Telabipba odasa pali, te aşı Kebar paşde da, te Israel augwali te taunde kalabus bidali. Eno te suali nai dabego ena haliga şeşeyu dwai mu ilibaso, ena te taunde dugulalu bididualio, tama eno te magi şeşeyu me deli yabo bomo meni baso bididubadi, te Sarere deli, te a naga olama, si sogo tama bidai dao.

Godigo Esekiel te Israel dabe tonalubo bidi daşı ilalio

(Ese 33:1-9)

¹⁶Te a naga olama, si, te Sarere deli tiwai wali sogo silibo si da, teda Godigo po enabolo ma mawai dao. ¹⁷Agai te tiwai po enabolo wali, “Tşde bidio, eno nage te Israel dabe tonalubo bidi pedalumainu ilalio. Te eno augwaliba pusabo bomai po elalubaso da, teda eno nageba munama, te nago augwaliba pusagameo. ¹⁸Te eno suali, bidi me deligo dwai kolesaga ebaso, eno te po weyu, aga isimainao po obaso da, teda nago te dwai kolesaga yali bidi agabolo pusao. Nago agabolo waliyu, te aga homugo ebo kolesaga hasegelibaso, te aga me hagagobeo. Te nago agabolo walisaşbaso da, teda aga şeşeyu te tiwai naga elalubadi, te aga isaibao. Tialima, te eno gedude da, te aga isabo page nagede elalubaso te aga isali dao. ¹⁹Tialima, nago te dwai şeşeyu yali bidi agabolo te po pusao, tama aga te dwai kolesaga tagalisaşbaso da, teda te dwai kolesagago aga dolama, te aga isaibao. Tiali goli, te page nagede me elalubeo, tiyu nage me isigobeo,” wali.

²⁰“Te eno magi usu sabo şeşeyu me deli te wiegi yai bidiba pedalumai hagede sula tagalabaso, tama agai te doloba pai kolesaga tagalama, te dwai kolesaga ebaso da, teda te tebo sogo nago te bidibolo te dwai kolesaga ebo tagala po walao. Te nago agaba wasaşbaso da, teda aga dolama isaibao. Eno agai polobadu te yali wiegi yai kolesagade homu kone me palogobeo. Menio. Te eno agai megi te ebo dwai kolesaga sulama, te eno aga dolomainu sula tagalobaso, te aga dolama isaibao. Tialima, eno gedude te aga isabo page te nagede elalubaso aga isali dao. ²¹Tialima, nago te wiegi yai bidi me deliba te po bomonama, te dwai şeşeyu igio po obadi, tama agai te po wali pelama, te dwai şeşeyu me isaşbaso da, teda aga me isigobeo. Te nage me nage bugagia bidaibao.” Godigo te po enabolo wali.

Godigo Esekiel te pedauwali paniai

²²Ena te bulude bididubadi, tama te Genuai Bidigo bomo enaba asida walio. Tama agai enabolo te tama po wali, “Nage hogodama, nage te odogo buluba pao,” wali. “Nage teba sabalobo si da, teda eno po nage dali waibao.” ²³Tialima, ena hogodama, ena te odogo bulu pali, tama te badu eno te Godigo genuai ula pedalubo suali, eno te wê Kebar pade suali sê tiwai yalio. Tama tibaso, eno gesabidi te t̄ba p̄gulai dao. ²⁴Tialima, te Godigo Mobo Noma Bidi enaba aselama, ena hodolobaso, ena dologulali. Tama Genuai Bidigo enabolo te tiwai po wali, “T̄de bidio, naga buluba pelama, te naga be tomoba bula sigi pelama, te sunumi paliao,” wali. ²⁵“Tama nosali bidi mebago te dila pai haliga seselama, tama tego nage k̄naibao. Tama nago te be tagalama, te we bidi dabe augwali sugi painu ebo usu me egobe dao. ²⁶Te eno nago pedauwali pania somainogo ilama, tama te po sela şabo bidi dabeba te nago po bomo elama, augwaliba me weyu, augwaligo te dwai kolesaga tagalao po bomo elama me wagobeo. ²⁷Tiali digi me sogo eno homugo nago eno po te we bidi dabe augwaliba pusumainogo ebo sogo da, teda te eno nago po wabo usu ilaibao. Te nago augwaliba te tama waibao, ‘Te po da, te Genuai Bidi God aga po da.’ Te nago po augwaliba pusubo si da, te mebago nago po odaibao. Tiali digi, mebago nage tudiba mueibao, magi baso meni, augwali te po sela şabo we bidi dabe naga bidibao,” te po walio.

Esekielgo te Jerusalem dolabo po pusali

(*Dq̄i 4-24*)

Te boi bidi dabe augwaligo Jerusalem dolaibao po wai

4 ¹Te Godigo te tiwai tama po wali, “T̄de bidio, nago te brik me deli sigi pelama, te t̄ba munama, te Jerusalem piksa noma tiwai te daide ugadu todogo pao,” wai dao. ²“Tama te brik pade, nago te amigo te taun me deli bagua selama, te we bidi augwali dali boi hw̄inama, te taun sainu eyu, te tigidali s̄ yabo nai piksa nigibo tiwai yao. Te t̄ te taun obo pade te t̄ du tiwai me nigao, te ami bidi dabe augwa te daiba bugagia dolugulama, boi hw̄abo pesage tiwai piksa nigao. Te ami dabego bidabo pesage te taun pade nigibadi, te taun aluabo masin dabe piksa me nigao,” wali. ³“Nigila silama da, teda te aingo nigai nai ulubo pou me deli selama, te nage dali te brik dali tomode ugaba dodolama, te obo dodolao. Tama nago te taunba tonaluao. Te Israel we bidi augwaligo nago te tebo s̄ sulama, te augwaligo konemainao, nosali te ami bidi dabe asama, te Jerusalem aiyaba elalueibao,” wali.

⁴⁻⁵“Nosali nage te naga pobase nogo badu pigusao, te nago naga we bidi Israel augwaligo seş̄e ebo koneaibao. Nage pilamubadi, te 390 dei te

sogoba usu naibao. Te 390 dei wali, te 390 yia  aj ilama obao, te tama kibu bede usu nama, te Israel t  kantri we bidi augwa yali se e se e tolaibao,” po walio. ⁶“Te nago silibo sogo da, teda nage te naga dolo nogo badu te 40 dei piao. Tama nago te naga we bidi Juda t  kantri dabego se e pedalubo koneao. Te 40 dei wali, te kibu be 40 yiade te Juda dabe augwa yali dwai se e se e tolaibao,” te po olama, wai dao.

⁷“Te nage pila mubo sogo da, teda nago te boi bidi dabego te Jerusalem sainu ebo piksa nomaba tonalua. Tama nago te hwjabo sisi elalubo tiwai elalu, te nago te tiwai po wao, ‘Te taun da dolaibao,’ wao. ⁸Te nago tigi te eno haligago keņama, te nago tigi begelainu ebaso usu egobeo. Nage te tiwai tama me pila mudubadi, te eno nage  aj ilali sogoba usu nubaso da, te usu dao.”

⁹“Megi da, nago te wit meba sobadi, te rais bali me, te tobage tegabi si me sobadi elama, te wit tiwai nai si me sao. Te nai tigidali deliba sisinama, te belegelama, bret nigao. Nago te tobage bret naga pibo badu munama tudubadi, te 390 dei wali sogoba usu nubo sogoba usu naibao,” te po walio. ¹⁰“Nago te tiwai 200 gram tobage bret te deli deli sogo tudao, te wali nago edelamu dao. ¹¹Te nago  aj tuabo me  aj elalueibao. Nago te  aj kap delide deli deli sogo tuao. ¹²Tama nago te bidigo di selama, elalua. Tama te di wa pabo si da, teda nago selama, te nago isi tiwai elaluyu, tego te bret ulao. Tama nago te tama se  ebo te we bidi augwaligo sumainao,” wali.

¹³Te Genuai Bidigo po te tiwai ma walio. “Nago te tama tebo kolesaga te Israel dabego yabo kolesaga  aj ilibao. Nosali eno te boi bidi dabe te Jerusalemba hwjgi pomainu sula tagalaibao, tama te Israel dabe augwali te gasa t  kantriba sela paibao. Tama augwali te t  kantri dabede bidalu, augwaligo te eno gedude dwagi yai is wai meda yai nai dabe tueibao,” Genuai Bidigo te po wali. ¹⁴Ena Esekiel eno te tama po odama, eno te tiwai po wei ponani, “God Genuai Bidi, hobede mu ebao. Eno te tama kolesaga munu me ebeo. Mu menio. Eno digi eno meda yai se  nago gedude me ebeo. Te ena dwasianu ogwade bidali sogo, te eno te kibu aga digi isai kibu me, ma hasa mi, te uni hasa dabego ela muani tusi badi, te megı bidıbo sogoba usu nagasobao. Te bomo yai pode habu seleyu, te nago gedude meda yai nai, te tiwai nai deli eno me tubeo,” eno te po wali. ¹⁵Godigo te po wabo odama, te po wali, “Te nago tama homu ebaso da, teda nago bret te bidigo di olali iside te nai ulugobeo. Menio. Nago te kibu bulmakau dide naga ulagameo,” te po wai dao.

¹⁶Te Godigo po ma weyu, te tiwai po wali, “T de bidio, eno te Jerusalem dabe te nai mu s  pabo se  ilaibao. Tama te we bidi augwali dwai midigi selama, te se e haliga se e mu yaibao. Tama te we bidi dabe augwa te nai me we bugagia dagalaibao, te augwaligo deli deli side tuabo nai dagalobo se  eyu, tama yaibao. ¹⁷Awe, te augwali nai me we mu s  paibao, tibaso

te augwali haliga seęę dwai mu yaibao. Augwali te dwai seę ebo bidi naga da, tibaso te eno augwaligo nai sqa palaibao, tibaso augwali mu nomona selama, dili pulu hania mu pedelaibao,” te po wai dao.

Esekielgo aga tobolu nisi togali

5 ¹Godigo te tama po ma walio, “Tqde bidio, nage pelama, te bainat hwa poa pai mu me deligo te nago penane nisi poayao, me tobolu nisi tigidali poayao. Tilama, nago te penane nisi me tobolu nisi te skelba muao, te dobolama, sela badu dagala muao,” walio. ²“Eno nage te pila muao wali sogo tigidali silibaso da, teda nage hodolalua. Te tama tebo seę ebogo te we bidi augwaliba te tiwai ola mawaibao, te boi bidi dabego te Jerusalem sagasali tiwai ebao. Nage hodalubo si da, teda nago te tobolu nisi me penane nisi hasia me badu te Jerusalem dqj ilali brik daide munama, nago te nisi dabe isi ulao. Te nago si wali pedai tobolu nisi selama, tama te brik baguasa bilama, nago te bainat hwaęo te penane nisi me tobolu nisi togwa saşa pao. Tama te sela wali tobolu me penane nisi selama, te saşayao, tama waligo sela paibao. Tama eno te bainat hwa selama, te saşani tobolu me penane nisi pobeasa paibao. ³Tiali goli, te nago dwasianu tobolu nisi me penane nisi elalumainao, te nago naga ugwa sabi badu munama, te keęao. ⁴Tialima, nago te keęani nisi deli deli selama, te isiba şanama, te siago domainao. Tama nosali te isi genuai deyu, te Israel tigidali daibao,” wali.

⁵Te God Genuai Bidigo enabolo te tiwai po wali, “Nago te Jerusalem taun suao. Eno aga selama, te tigidali tq pedai kantri tomode mu munama elaluali, tama genuai nogi elaluali. ⁶Tialima, te Jerusalem dabego eno po sela şanama, te augwali dwai we bidi mu pedelalio. Te Jerusalem dabe augwaligo yali dwai kolesagago te gasa tq kantri we bidi augwaligo ebo dwai kolesaga te aiyaba mu elaluali. Te Jerusalem augwaligo eno po me eno bomai po dabe te tudiba mu muanio. ⁷Tibaso, eno augwaliba te tama tiwai po wainogo ebao, ‘Dage Jerusalem dabego odao. Ena God Genuai Bidi, eno dagede po elalubao. Dagego eno po odisama, te dagego eno bomai po dabe sela şanama, te dage pade bidibo tq kantri pedaigo ebo dwai kolesaga wali pai dao. Tialima, te dagego hagoma kolesaga hauwa elama, tama dagego dwai kolesagago te dage pade bidibo tq kantri dabego dwai kolesaga aiyaba elaluai dao. ⁸Tama tialima, ena God Genuai Bidi, eno te tiwai po dageba obao, eno dageba wiegi yai homu pemene me ebeo. Menio. Eno dageba boi bidi ebao. Tama dage eno te tigidali tqde we bidi gedude po tq ilaibao. ⁹Dagego eno godolo isabo kolesaga hauwa yalio, te tama tibaso, te eno dageba polobadu isawani kolesagago te eno dageba dwai dene mu mawaibao. Te tudi badu nosali, eno te tobage dwai dene mabo seę ma egobeo. ¹⁰Te eno dwai dene dageba mabo sogo da, te aya ida mebago te augwa digi wai dabe elama tueibao, me te wai dabe mebago

te augwa aya ida ela tubadi yaibao. Te eno dwai dene mabo seęę dageba ebaso, te dage hauwa isaibao. Te me badu bidibas da, teda eno augwali te gasa bulu tų pedai tigidaliba tedela palaibao,' eno te tiwai po waingo ebao," Genuai Bidigo te po wali."

¹¹Tama po ma weyu, agai te po wai, "Eno augwalibolo te po obao, 'Ena God Genuai Bidi, ena sesemane sogo bidada paibao, eno po dolo dagebolo obao, te eno dage mu dolaibao. Magi baso meni, dagego te tibo god dabego dwai piksa noma dabe elaluyu, dwai kugumini ebo kolesaga hauwa elama, tama tebo kolesagago te eno gedude dagego eno be meda mu ilai dao. Tama tiyu, te eno dage olo tau sabo wiegi yai kolesaga eyu, te hobede me egobeo. Te eno dageba dwai seęę mabo seę eyu, te bidigo tobolu nisi tigidali togolama poala şawani tiwai yaibao. ¹²Te eno dage hani sela dobawaibao. Te polalubo hanide te nai sili mu bidu, te gasi genuai saibao, tama augwali te taun tomode isaibao. Tama te si wali hani, te boi bidi dabego te taun bulu badu te bainat hwągo ela wialaibao. Te sela wali hani we bidi, te augwali eno te tigidali bulu tų pedaiba ela gudulama, tedela palaibao. Te eno boi bidi dabe tagala palama, te pobeasa pelama, te augwali ela mueibao. ¹³Te tama tebo kolesagade te eno sebę genuai eyu, te haliga sebę yali kolesaga silaibao. Te tigidali seę pedalubo sogo da, teda dagego eno te wali po homude kone palagasu, te dagego koneaibao, ena Genuai Bidi, te tibo god me deligo ena hasegelemainogo me ebo menio. ¹⁴Dage dolobo si da, teda te dage pađe elalubo tų kantri pedai we bidi augwaligo dage te tama tebo seę sulama, te augwaligo te tama po waibao, "Suao. Augwali dwagila mu dolalio. Genuai Bidigo te augwaligo dwai kolesaga ebo sulama, te agai augwali dolali dao," augwaligo te po waibao.' Eno te po obao," Genuai Bidigo te po walio.

¹⁵"Ena Genuai Bidi, eno te po obao. Eno dageba dwai haliga sebę mu elama, te eno dageba dwai seęę umagia mu yaibao. Tama dage pađe bidalubo tigidali we bidigo te dage te tama tebo sulama, te augwali homu hauwa elama, te wi dwai mu yaibao. Te augwaligo dage begela dolobo posobo po obaso, te dage hale yaibao. ¹⁶Te we bidi augwali eno te nai şąq palobo seę mu elama, te dage nai nasi mu yaibao. Tama dage te seęę sabo dene ebo te enesigigo te ene dageba enama, te dage dolobo tiwai yaibao. ¹⁷Tama me, eno te bulu uni hasa dageba tagala palama, te augwaligo dagego wai dabe ela mueibao. Te eno dageba gasi dwai pedelabo seę ilaibao. Te eno dageba boi bidi tagala palama, hwįagaselama, te dage ela mueibao. Ena Genuai Bidi, eno te po wai dao," wali."

Genuai Bidigo te tibo god wali pabo we bidi augwaliba wado ilali po

6 ¹Genuai Bidigo enabolo te tama po wai, ²"Tųde bidio, nago te Israel dabe augwaligo bulu du dabeba tonono eyu, te eno po augwaliba

pusao. ³Te Israel dabe augwaligo bulu du dabe, me odogo bulu dabeba te tama po wao, augwaligo te ena God Genuai Bidigo, eno augwaliba wainogo ebo po ođiāo po wao. Eno te boi bidi dabe tagala palama, te Israel dabe augwaligo te tibo godiba lotu wagi pabo bulu du dabe dolaibao. ⁴⁻⁵Te boi bidi dabe augwaligo te kibu dabe ofa ebo alta tigidali, me te wiegi yai denami ilibo ofa ebo alta me tigidali dolaibao. Tama augwaligo te Israel we bidi hauwa ela munama, te augwali tigi dabe te augwa te tibo god dabego piksa noma elalubo pāba şaşawaibao. Tama te augwali dili dabe augwa te alta tōde pāde wilalua paibao,” te po wai dao. ⁶Agai po ma weyu, te po wai, “Te boi bidi dabe augwaligo te Israel tō kantri taun tigidali dolobadi, te tibo godiba lotu wabo pesage tigidali me dolaibao. Augwaligo te dagego alta tigidali dolama, te duga gedude meda yai mu elalueibao. Te augwaligo te dagego tibo godigo piksa noma dabe mu dola silama, te wiegi yai denami ebo pauda ulubo pesage dabe aluama, besela şawaibao. Tama te Israel dabego yali dwai kolesaga tigidali te sia saibao,” po wali. ⁷“Te boi bidi dabe te Israel tō kantri pedai tigidaliba pelama, te we bidi hauwa ela mueibao. Tama te gasa Israel dabego te tama tebo şe bugagia te tiwai koneyu, ena digi ena te Genuai Bidi dao po waibao,” wali.

⁸“Tiali goli, te boi bidi dabego te we bidi tigidali ela mumainogo me egobeo. Me badu we bidi bidalubadi, te eno gasa tō kantriba ela gudulama, tedela palaibao. ⁹Augwali te digibulu bulude bidibo sogo augwaligo ena homu kone palaibao, tama augwa te tiwai koneaibao, te augwaligo tibo godiba gedu eyu, te wali pali kolesagago ena haliga şeşe mu ilama, tama ena augwaligo mu tagalalio. Tama augwa te yali dwai kugumini yai kolesagade hale dwai mu eyu, tama tiai şeşe yai dao. ¹⁰Tama augwa te tiwai tama koneagasu, ena digi ena augwa Genuai Bidi bidibadi konesiāma iduai yabo po waibao. Tama augwa te tiwai koneama, eno megi e wabo bomai po, te olo po me ola tagalu wabe da homu yaibao,” te po walio.

¹¹Tama God Genuai Bidigo te tama tiwai po enabolo ma walio, “Nogo hogwayu, te haliga şeşe ebo iliyu, te tiwai po wao, ‘Hobede mu ebao, te Israel augwaligo dwai kolesaga hauwa mu yalio,’ te po wao. Awe, augwaligo te tobage kolesaga ebaso, tama tiyu, te boi bidi dabe aselama, augwali ela muagasaibao. Tama te nasigo me gasigo augwali dolaibao. ¹²Te tigidali isimainu yaibao. Te boi bidi dabego augwali ela muagasaibao. Tiali goli, te me badu digibulu bidali da, augwali te gasi selama isaibao. Te we bidi me badu bidalubadi yai baso da, te augwali me te nai mu şaş pelama, te nasi elama isaibao. Te tebo kolesaga ebogo te eno haliga şeşeşe yali mu usu naibao. ¹³Te boi bidi dabego te Israel dabe augwaligo tigi te augwa tibo god dabe me te alta dabe pāba şaşawaibao, tama te lotu wabo pesageba me, te bulu du dabe daide me, te tigidali genuai ni dabe

dologoba me, te augwa tibo god dabeba te ofa dabe ula mabo pesage tigidaliba te augwali isasa pali bidi dabego tigi şaşş paibao. Te sogo te tigidali Israel dabego koneama, ena digi ena Genuai Bidi bidibao po waibao. ¹⁴Awe, te eno augwaligo tş kantri pedai mu dolaibao. Te eno augwaligo tş pedai tigidali te olo bulu pesage tiwai pedalubo yaibao, te tş wa pai bulu Diplatde gagalaibao. Eno te Israel dabe bidibo bulu pesage deli me sula tagalogobeo. Menio. Te eno tigidali dolama, te tigidali olo bulu pesage naga elalueibao. Tialima, te we bidi tigidaligo bugagia koneama, ena digi ena Genuai Bidi mu bidibo yabo po omainu yai dao,” te po wai.

Godigo te Israel dabe augwali silimainu yalio

7 ¹Genuai Bidigo enabolo te tiwai po wali, ²“Tşde bidio, ena God Genuai Bidi, eno te tiwai po Israel augwalide elalubao. Te e side da, te tigidali Israelgo bodolu sia sabo side elalubao, te augwaligo tş pedai tigidali badu te tama tiaibao. ³Dage Israelgo, odişo. Te daş yali bodolu pedelalio. Eno haliga şeşş dwai mu elalubo, te megi eno dwai dene dageba pedalubo şş ilaibao. Dagego te tama dwai kolesaga ebaso, tama tialima, megi eno dage po tş ilaibao. Te eno dagego dwai kugumini yai kolesaga dabe te dolo dageba wei ponaibao,” wai dao. ⁴“Te eno dage bugagia bidimainu me sula tagalogobeo. Te eno dagede olo mu tau sabo wiegi yai kolesaga me egobeo. Menio. Dagego te dwai kolesaga dabe ebaso, tialima te eno dageba dwai dwai dene mabo şş yaibao. Tama dagego te tiwai bugagia konemainu ebaso, te ena digi ena Genuai Bidi da waibao,” te po wali.

⁵God Genuai Bidigo te tiwai po wali, “Te gasa tobage dolobo şş mu dageba pedelaibao. Tama te dolobo şşgo te dage tigidali silabo şş pedelaibao. ⁶Megi da, te dage dolabo bodolu side te pşba pedelalio. Te sogo pedalubo si da, te pşde mu tama pedelaibao. ⁷Dage Israel tş kantri we bidi dabego odişo. Te dage dolabo si te sabi badu pşba pedelalio, te dage dolaibao. Te dage te bulu du dabeba sisinama, te wiegi yai pemene eyu lotu wali tiwai ma egobeo. Menio. Te dage megi da sisinama wi umagia naga eyu, wabo pabo bidi tiwai yaibao,” walio.

⁸“Eno haliga şeşş dwai mu dageba ebaso, bidigo wş gelebo tiwai yaibao, tama tibaso megi da eno dageba te dwai tigi dene mabo şş te eno haliga şeşş ebo usu nama yaibao. Dagego te dwai kolesaga ebaso, te dage eno po tş ilaibao. Eno te dagego dwai kugumini yai kolesaga ebo dolo wei ponaibao. ⁹Te dage eno gogolama, bugagia bidimainu me sula tagalogobeo. Te eno olo mu tau mabo wiegi yai kolesaga dageba me egobeo. Menio. Dagego te tama dwai kolesaga ebaso, te eno dwai şşşş mabo dene dageba mawaibao. Tama dagego te tiwai bugagia konemai hagede ebaso, ena digi ena Genuai Bidi, te eno tama eno te dwai şşşş mabo şş dageba tagala palobo dao,” te po wali.

¹⁰Tama Genuai Bidigo po enabolo ma weyu, te tama po wali, “Te dolabo genuai se pedelabo bodolu paba yagasalio. Sesemane sogo te Israel dabe augwa abagi dabe dali dwai se idualio. Tama augwaligo te hagoma ebo kolesaga ebo se bombo yai dao. ¹¹Tama augwaligo te dwai kolesaga genuai mu pedelai. Tialima, eno te augwali tigidali ela silaibao, te dwai kolesaga yali bage tigidali dolaibao. Te eno augwaligo nogi aiyaba elaluama, tama augwaligo gana pai nai dabe dolama, tama augwaligo te dwai kolesaga dabe ma egobeo,” wali.

¹²“Te dolabo sogo pade yagasalio. Te sogo te nai doado bage abelebo bidi dabe augwaligo homu pemene me egio, te nai doado bage maketde mubo bidi dabego me haliga sege me elamuo, magi baso menio, eno te sege mabo se te tigidali bageba yaibao. ¹³Te bidi mego te gasa bidi me deligo agaba te nai me deli abelemainogo yali bidi, aga te sesabi elama, bobobage sogo bidali goli, te tagalao, agai te nai wei ma sainu ebo usu egobeo. Magi baso meni, eno te tiwai po wai dao, eno te tigidali bidi dolaibao, te eno po me hasegelegobeo. Tigidaligo dwai kolesaga ebaso, tialima tigidali te dolaibao. ¹⁴Augwaligo te hwjabo sisi ebo biugel bu obaso, te tigidali ami bidi dabe sisi ebo da. Tiali goli, te bidi me deli hwigi pogobeo, magi baso meni, eno te hani tigidaliba haliga sebe elama, te augwali eno wi dwai mu ilai dao,” te po walio.

Godigo te Israel augwaliba te sege mabo se yabo po wali

¹⁵Genuai Bidigo po ma weyu, te tiwai wali, “Boi bidi dabego te Jerusalem bagua salio. Te taun bulu badu bidali we bidi dabe augwali te boi bidi dabego bobobage hwago ela mueibao. Te taun moni obo tomode bidali we bidi augwali da, te augwali nai menia selama, te haniani gasi selama, te augwali isaibao. ¹⁶Te me badu usu yali da, te augwali bulu duba wi pelawaibao. Tama te tigidali wi pali we bidigo te augwa yali dwai kolesagade homu kone palama, te augwa haliga sege elama, dwai gela waibao, tama augwaligo gela wabo te odogo bulude bidibo ba dabego gela tiwai pedelaibao. ¹⁷Te augwaligo nogo bombo kimi meniama, te augwaligo saqa didibili dogia paibao. ¹⁸Tama augwa te homu dene ebo ugwa dabe gudama, te augwali didibili umagi mu yaibao. Tama te tigidali te hale ebaso, te augwa tobolu nisi poala sawaibao. ¹⁹Tama augwa te gol me silva dabe te olo nai pobele bage tiwai te sunumiba sasawaibao, magi baso meni, te Genuai Bidigo haliga sebe augwaliba pedalubo sogo te gol me silvago augwali tau sogobe homu yaibao. Augwaligo te gol me silva tuabo usu egobeo, tama me te gol me silvago te magi se me delide augwali tau me sogobe homu yai. Augwaligo te gol me silva gedugo suali godolo ebaso, te kolesagade augwali kekebaso, te augwaligo dwai se yali dao. ²⁰Polobadu augwaligo te gol me silvago nigali au dobage elalu, tama augwa te naide gana pai mu bidaluai dao.

Tama augwaligo te gol me silva selama, tama te haniani tibo god dabe piksa noma nigali. Te kolesaga eno godolo homu mu meni baso, tama tialima megı da, eno te gol me silva dabe te augwa gedude dwai nai tiwai mu pedalumainu yai dao,” wali.

²¹Te Genuai Bidigo po te tiwai ma wali, “Eno te bidi dwai dabe mu hodolama, te augwaligo augwa tı kantri pedai tagalama asu, te Israel dabego nai doado bage wi saibao. Te augwaligo sela pelama, tede augwa dwai ş haniani yaibao. ²²Te augwali eno te wiegi yai genuai be tomoba pomainogo sula tagalama, tama eno gedude te be dwai meda pedalubo ş ilaibao. Te augwali eno me paligobeo. Mu menio,” wali.

²³“Te Israel we bidi augwaligo subigila ş yali. Te augwa tı kantri tıgdali pedai badu augwaligo te gasa we bidi dabeba dwai ş eyu, te hauwa we bidi ela muani. Tama tialima, te augwali kınabo sen dabe nigıbo sogo da po wai dao. ²⁴Tama tialima, eno Genuai Bidigo po odisıbo hani bidi dabe sesaibao, augwali te bidi dwai mu dabe, tama augwali te Israel tı kantriba aselama, te Israel dabe augwa be dabede sela şanama, te be dabe saibao. Tama augwaligo te Israel dabego lotu wabo pesage dabe dolaibao. Te Israel bomai bidi dabe augwali te wi naga elama, te augwaligo hagoma me ma egobeo. ²⁵Te dwai sogo mu te Israel augwalıba asaibao. Te augwa halıga nagame elama bidabo homu godolo yaibao, tiali goli augwaligo te tiwai ebaso usu egobeo. Mu meni yaibao. ²⁶Te dolobo ş haniani augwalıba pedaludu geaıbao, tama augwalıba te dwai nai dabe hauwa pedelabo po odu geaıbao. Tialima, augwali wi ebaso, augwali te geme nosali pedelabo ş po pusubo bidi profet dabeba pelama, tama augwalıba hanalu te eno homude ebo yabo ş po hanılabo po koneai hagede yaıbao, tiali goli te eno po augwalıba me magobeo. Te pris dabego augwali ola mabo po meni yaıbao, te tobolu bidi dabe augwaligo te wiegi yai homu kolesaga augwalıba maiabo meni yaıbao. ²⁷Tama augwa king da, te halıga şęę elama, te aga homu kolesaga da te tıgdali dolaıbao. Tama te we bidi augwali da wi elama, noma saıbao. Eno augwaligo ebo dwai kolesaga tıgdalide homu kone palama, te eno augwalıba dwai şęę mabo dene mawaıbao. Te augwaligo gasa we bidi dabe po tı ilali kolesaga tiwaigo te eno augwali po tı ilaıbao. Te tiwai augwaligo bugagia konemai hagede yaıbao, ena digi ena Genuai Bidigo te ş yai dao,” te po obao.

Israel augwaligo Godigo bedede dwai kolesaga yali

8 ¹Te 6 wabo kibu bedede da te Babilon tı kantride kalabus bidali sogo, te polua 6 wabo, te dei namba 5 wabo side, ena te ena bedede dugulalu bididubadi, te Juda tobolu bidi dabe ena dali dugayagaselama bidali. Te da bidaludubadi, te God Genuai Bidigo bomo enaba asalio.

²Te nade subo tiwai nai me deli eno ugaba tonono ebadi, tama te bidi

tiwai naigo te ula isi dabo ula tiwai suali. Te aga tigi aiya badu te isi ula ebo tiwai yali. Te tigi ugaba te bras pedai augwaligo te meda hola şawai gegemane yai ula tiwai yalio.^p ³Eno te aga nogo tiwai suali, agai te nogo debelama te ena tobulu nisi tola selama, ugwaba kegai dao. Tama te nade subo tiwai yali nai dabe, te Godigo Mobo Bidigo ena ugwaba mu sagoasa holama, ena te Jerusalemba sela palio. Tama agai ena te Godigo beba odasa pali, tama ena te be bagulali obo te not badu elalubo sunumi tomode doligi pali. Te pesagede te Israel augwaligo te tibo god piksa noma dodolai elalui, tama Godigo haliga şeşę dwai mu te naide yai dao.

⁴Te da Israelgo Godigo genuai ula eno suali. Ena te wę Kebar pade bidali sogo eno te suali tiwai tobage ula yalio.^q ⁵Tama Godigo enabolo te tiwai po wali, “Tode bidio, nago te not badu pedaiba tonono bilao,” wali. Tialima, eno tonono bilibadi, tama eno te tibo god piksa noma suali, te sunumi pade elalubo alta pade dolalubo sualio. Tama Godigo haliga şeşę dwai mu te dwai nai dali yai dao.

⁶Godigo enabolo te tiwai po walio, “Tode bidio, nago te Israel we bidi augwaligo dwai kolesaga ebo suo. Te tebo kolesagade augwaligo ena te eno bede ela gudulama, te ena augwalide digibulu bidabo şę ilibao. Te nosali nago augwaligo te gasa dwai kolesaga mu ebo sueibao, te nago megi subo dwai kolesaga te aiyaba mu elalueibao,” te po wai dao.

⁷Godigo po ola simanobo si da, teda agai ena selama, te Godigo be obo bagulali te bulu badu solama, tama agai ena te genuai sunumi oboba odasa pali. Tama agai enabolo te obode elaluali dedage me deli ola manio. ⁸Godigo enabolo te tama po wali, “Tode bidio, nago te obo aluama, te dedage genuai pedalubo şę ilao.” Tialima, eno aluama suali, te sunumi me deli elalualio. ⁹Godigo te tiwai po enabolo walio, “Nage te tomoba pelama, augwaligo te dwai kugumini yai kolesaga ebo suo,” te po wai. ¹⁰Agai po ola siminibo si da, teda ena te be habu me deli tomoba pelama, te eno tonaludalio. Iya, eno te hasamani dabe piksa noma, me te God gedude meda yai gasa tobage hasa dabe augwali te obo tigidali habude paşanalubo sualio. Tama te Israel dabego lotu wabo tibo god piksa noma dabe me elalubo suai dao. ¹¹Te Israel tobolu bidi dabe augwali te 70 bage te be habude bidibo suali, tama Jasia, te Safango ogwa, te augwali bidibo tomode aga deli bidali. Tigidaligo te wiegi yai denami ebo pauda ulubo plet pou tolalubadi, eno suali, te hano ugaba holali. Tama te bidi dabe augwaligo te piksa noma dabeba lotu udalio. ¹²Te Godigo enabolo te tiwai po wali, “Suo,” wali. “Te Israel tobolu bidi dabe augwali geme dualalu, te dwai kolesaga ebao. Tigidali augwa te be daga habude te dwai piksa noma haniani elalubo madi aselama, augwa te lotu obao. Augwa po waibao, ‘Genuai Bidigo da me sugobeo. Menio. Agai

dago t̄o kantri tagalalio, tama agai da homu kone me ebeo.' Augwaligo tama po olama, tama augwa te dwai kolesaga yai dao," wali.

¹³Te Genuai Bidigo enabolo te tama po ma wali, "Te megi nago subo augwaligo gasa dwai kolesaga mu eyu, te megi nago suali dwai kolesaga aiyaba elalueibao," te tama po wai dao. ¹⁴Tialima, agai ena selama, te Godigo be bagulali obo sunumi elalubo te not badu pali. Tama te we mebago augwa tibo god agai enabolo ola mawai, aga nogi Tamus, te isali homu elama, te augwa agade homu dene ebo gela walio. ¹⁵Godigo enabolo te tiwai po wali, "T̄ođe bidio, nago te suali, agawe? Tialima, megi da, nago suali te gasa dwai kolesaga dabe mu ebogo te nago megi suali dwai kolesaga aiyaba mu elalueibao," wali. ¹⁶Tialima, agai ena te aga be sunumi dolo p̄aba sela palio. Te pesagede, te alta me sunumi si tomode, te 25 bidi bidali. Augwaligo te be tudiba ilama, te giliga pedaluboba tonalualio. Te augwa bogoli sugunama, te gesabidi t̄oşa p̄ogulama, te giliga geba lotu wabo ş̄ eyu tama yalio.

¹⁷Tialima, Genuai Bidigo te tiwai po enabolo wali, "T̄ođe bidio, nago te ş̄ ebo suali da, agawe? Te Juda we bidi augwaligo te dwai kolesaga dabe mu eyu, te augwaligo te tigidali Israel habu badu gasa we bidi augwaliba boi ebo kolesaga ebao. Tibaso, eno augwaliba haliga ş̄beş̄ yali. Tiali goli, augwaligo te kolesaga olo nai da homu elama, te augwa dwai ş̄ umabo ş̄ elama mu ebao. Augwali eno be p̄aba aselama, te megi nago subo dwai kolesaga yali. Te bidi dabego ena te olo nai tiwai da homu elama, tama augwa te dwai kugumini yai kolesaga yalio. Tialima, odao. Augwaligo ebo dwai kolesagade eno haliga ş̄beş̄ dwai mu ebo dao. ¹⁸Tibaso, eno augwaliba dwai dene umagia mabo ş̄ eyu, te eno haliga ş̄beş̄ yaliba usu naibao. Te eno augwali bugagia bidimainu me sula tagalogobeo. Te eno olo mu tau sabo wiegi yai kolesaga te augwaliba me egobeo. Te eno augwali tau somainu i bomonama obadi goli, tialima eno te augwaligo gedu haluasa po wabo me odogobeo," te po wai dao.

Godigo Jerusalemba dwai dene mawai

9 ¹Godigo ena dali wali po silama da, agai bomonama i weyu, te tama wali, "Te taunde bidaluali we bidi dabe elibo ş̄ yabo bidi dabe, dage aşı̄o. Te bainat hwaş̄ dabe dali sesao," po wai. ²Te polo mu tama, te not badu te Godigo be obo bagulali badu te bidi nogo a naga, me deli te tomoba asalio. Tigidaligo te bainat hwaş̄, me te bidi elabo gasa nai dabe sela asali. Te gasa bidi me augwali dali asali. Aga te wiegi yai ugwa bea selama, tama aga dwasianu gamugi dage te kukulude keş̄ salio. Te aşı̄abo doado bage te gamugi dage tomode elaluali. Te tigidali bidi aselama, augwaligo te brasgo nigali alta sai p̄aba dolagasalio.

³Tialima, te Israelgo Godigo genuai ulago te bidi tiwai me si me si nai tagalama, te ula hogodasa pelama, te Godigo be sunumi p̄aba palio.

Tama Genuai Bidigo te wiegi yai ugwa elalubo bidi i olama, ⁴tama agabolo te tama i walio, “Nage te Jerusalem taun pedai tigidaliba pelama, te augwa abagi dabego te taun tomode dwai kolesaga ebaso, te dwai haliga eyu, te moni homu ebo we bidi tigidalide nago te augwali gesabidide te dađ muna muna pao,” po walio.^f

⁵Tialima, eno odali, Godigo te bainat hwa tolalubo bidi a naga, me deli bageba te tama po wabo odali, “Dagego aga wali pelama, te tigidali we bidi ela muao. Dagego te me delide te olo tau mabo wiegi yai kolesaga eyu, me sula tagalama me bidimainu elamu dao. ⁶Tigidali monu dabe ela muao, te tigidali gesi ogwa bidi me, gesi wegi ogwa we me ela mubadi yao, te ida dabe, te wai puluba me, tigidali mu elao. Tiali goli, dagego te eno augwali gesabidide dađ ilali bidi ma we me deli, te munu me elamuo. Te eno bede bidibo bidi dabe augwali bolo hasia ela muao,” wali. Tama tialima, augwaligo te şę gagalama, hasia augwaligo te Godigo be pađe bidibo tobolu bidi dabe ela muai dao. ⁷Tama Godigo te nogo a naga me deli te bidi dabebolo te tama po wali, “Te eno be bagulali obo tomode bidibo bidi tigidali ela muao,” po wali. “Te tama tibaso da, eno be ena gedude meda yai mu pedelaibao. Te şę silama da, teda dage te taunde bilaluama, te tigidali we bidi ela muao. Ae, dagego şę iyao,” te po wali.

Tialima, augwali pelawalio. ⁸Tama augwaligo te we bidi elala pali sogo, ena deli naga te Godigo be pađe bidai. Te eno kidu sugunama, te eno gesabidi tōba pogulama, te eno i te tiwai wali, “God Genuai Bidio, nago te Jerusalem we bidi augwaliba wado po genuai mu ebaso, bidigo we gelebo tiwai ebaso. Te tiwai homu ebaso, tama te Israelde bidalubo we bidi tigidali silaiba homu eyu eba, agawe?” ⁹Tama Godigo te tiwai po wei ponani, “Te Israel me Juda we bidi dabe augwaligo dwai şę hauwa mu elama, te augwaligo yali şę page genuai mu elalubao. Augwaligo tō kantri te eno augwali tagalali da homu elama, te eno augwali homu kone munu ma ebe homu eyu, te augwali eno sube homu yali. Tama tiyu, augwa te dwai kolesaga hauwa mu ebaso, te Jerusalem we bidi ela mubadi, te gasa tō kantri pedai bage me tigidali ela muai dao. ¹⁰Tama tibaso, eno augwalide te homu dene elama tau sabo kolesaga eyu, te eno augwali me deli gogola sula me tagalogobeo. Menio. Te augwaligo gasa bidi dabe augwaliba yali dwai kolesaga tiwai te eno augwaliba me yaibao,” te po wai dao. ¹¹Genuai Bidigo po ola silibo si da, teda eno suali, te wiegi yai nami ugwa elalubo bidi ma aselama, te Genuai Bidiba te tiwai po wali, “Eno te nago enabolo mani şę siminani dao,” te po wai dao.

Te Godigo genuai ulago te Godigo be taga soali

10 ¹Tama eno te dagalu ugwadu tede te genuai dađ tiwai nai ma suali, tama te bidi tiwali nai me si me si te dađ dologode elalubo

^f 9:4 Ped 7:3; 9:4; 14:1

eno suali. Tama te ugwadu daŋgo ugwadu daide eno te bidi dugulalubo nai sia king me deli augwaligo te sisi dagalu masigi te gasa sawi yai mugo nigai sualio.^s ²Tama Godigo te wiegi yai nami ugwa bea sali bidibolo te tiwai po walali, “Nage te bidi tiwai nai me si me sigo elalubo te wil me si me si tomodu pelama, nago nogo sigo te sia meba selama, nage pelama, te taunba şaşş biligi pao,” wali.^t

Godigo wali po silibaso da, teda eno suali, te bidi te me si me si nai dabe dologo badu palio. ³Augwali te saut badu te Godigo bede dolaluali. Tama te genuai haowa me deligo te Godigo be bagulali obo pedai badu tigidali mesega selama, elalui dao. ⁴Tialima, Godigo genuai ulago te me si me si bidi tiwai nai taga soyu, te be sunumi paba dolagasalio. Tama Godigo te genuai ulago te be bagulali obo tigidali una selama, te ula umabo mu elalui dao. ⁵Te bidi tiwai nai dabego bogo dabego pala pala wabo bomo yali, te genuai obo badu bidali we bidi augwaligo te augwali odobo usu yalio. Tama te pala pala wali, te Tigidali Bomo Elalubo Godigo i wabo tiwai yalio.

⁶Tama Godigo te wiegi yai nami ugwa bea sali elalubo bidiba te tama po waliyu, te pelama, isi meba sigi pao wali sogo da, teda te bidi pelama, te wil tiwai nai me deli paba doligi palio. ⁷Te me si me si wali bidi tiwai nai dabe me deligo te augwali tomode elalubo isiba nogo munama, agai te isi meba selama, te bidigo nogo siba muanio. Tama te bidigo te isi selama, palio. ⁸Eno te me si me si nai dabe suali, te bidi nogo abo tiwai te augwa bogo dologode elalui suai dao. ⁹Tama eno suali, te me si me si nai dabe pade te wil deli delide elalua palio. Tama te me si me si wil dabede te ula umabo te şewa yai tedali sawi yai masigide tama elalubo suai dao. ¹⁰Tigidali deli deli wil te deli tigi poai elalu, te gasa tomode me elalubo wilgo te gasaba me tononaluali. ¹¹Tibaso, te tigidali wil te tigidali pedai iba peyu, eda asu yali. Te bidi tiwai me si me si nai te menaba pabo homu yali da, teda augwali te peyu naga yalio, te augwali begeleyu me ebeo. ¹²Te bidi tiwai me si me si nai dabego tigi, me tudi, me nogo, me bogo dabe, te tigidali te augwa wil dabego me, te tonobo gedu hauwa elaluali.^u ¹³Augwaligo te wil dabe nogi te tiwai polali eno odali, “Te bebege ebo wil dabe da,” po walio.^v

¹⁴Te tigidali me si me si nai deli deligo te me si me si gesabidi tobage elaluali. Te polalubo gesabidi te ensel me deli gesabidi tiwai yali, te si wali te bidigo gesabidi tiwai elaluali. Te sela wali te hasa laiongo gesabidi tiwai, te me si me si wali gesabidi te ba kemedagego gesabidi tiwai yai dao.^w ¹⁵Eno te megı suali me si me si nai dabe augwali, te me si me si nai dabe polobadu eno te wę Kebar pade suali. Augwali hogodasa pabo sogo,

^s 10:1 Ese 1:26; Ped 4:2 ^t 10:2 Ped 8:5 ^u 10:12 Ped 4:8 ^v 10:13 Ese 1:15-21

^w 10:14 Ese 1:10; Ped 4:7

16-17te wil dabe augwa dali palio. Te me si me si nai olo dolalubo si da, te wil dabe me olo dolalueibao. Te me si me si nai ugaba bola holobo sogo da, te wil dabe me augwa dali ugaba paibao, magi baso meni, te me si me si nai dabego te wil dabe tonalubo dao.

18Tialima, te Godigo genuai ulago te Godigo be sunumi tagalama, te ma geasa pelama, te bidi tiwai me si me si nai daide ugadu bidalio. 19Eno tonalubadi, te me si me si nai dabe augwa bogo diniginama, te ugaba bola holali. Te me si me si wil augwa dali palio. Augwali te giliga pedalubo badu te Godigo be bagulali obo sunumi paşa dolalugi pali. Te Godigo genuai ula augwali daide ugadu elalualio. 20Eno koneani, eno te nai dabe suali, tialima augwali te Israelgo God dologode te aşı Kebar paşe bidali. Te megı da, eno koneanio, te nai dabe augwali te Godigo mobo ensel tobage me deli dao.

21Tigidali deli deli mobo enselgo gesabidi me si me si elalu, bogo me si me si elalualio. Te nai me deli te bidigo nogo aşı tiwai te augwa bogo dologo deli delide elaluai. 22Ena te aşı Kebar paşe bidali sogo polobadu eno te mobo bidi ensel dabe suali. Te eno megı ma suali, te augwali polobadu elaluali gesabidi tiwai yalio. Te me si me si mobo bidi ensel dabe te augwali me badu deli painu ebo sogo, augwali peyu naga yaibao. Augwa tigi begeleyu me egobeo.

Te Israel dabe augwali yali şe pagede te augwali dolaibao

11 1Te tudi badu nosali da, te Godigo Mobo Noma Bidigo ena ugaba sagoa selama, tama ena te sia asobo badu te Godigo be bagulali obo sunumiba odasa pali. Tama eno suali, te 25 bidi te sunumi paşe bidali. Eno augwali sulama, eno koneani, te bidi dabe bidibo tomode te bidi si te Israel augwaligo polalubo bidi bidali bidi si da. Augwali si nogı da te Jasanıa, te Asurgo ogwa, me te Pelatıa, te Benaıago ogwa dao.

2Tama Godigo te tiwai po enabolo wali, “Tşe bidio, te bidi dabe augwaligo dwai kolesaga yabo sunumi nigabo homu ebao. Tama augwaligo te we bidi dabeba te geda muai mobo mabo po mabo dao. 3Augwaligo te tiwai po wabo dao, ‘Da te wiegi yai we bidi da, tialima dago te be dabe şenama, te dena e taunde bugagia dugulalu, te wiegi yai kibu mi sene tomode elalubo tiwai yalio.’ Augwaligo te tama po wabo dao. 4Tialima, tşe bidio, nago te tama po wao, augwali te wiegi yai we bidi dabe meni, tibaso te augwali dolaibao,” wali.

5Genuai Bidigo Mobo Noma Bidi enaba bomonama pedelali, tama Genuai Bidigo enabolo te po manio, “Dage Israel we bidi dabe, eno te dagego mobo mabo po wabo odali. Me eno dagego te elalubo homude te dagego yabo şe tigidali koneai dao. 6Dagego te taunde we bidi hauwa ela muani, te augwaligo tigi dabe te sunumi tigidalide paşana sai dao,” wali.

7“Tama tibaso, ena God Genuai Bidi, eno dageba te tiwai po obao. Mu tama, te e taun te sene me deli tiwai da, tiali goli dage te wiegi yai

kibu mi tiwai elalubeo. Menio. Te wiegi yai mi da, te dagego ela muai we bidi dabe tama dao. Tama dage da, te eno dage te taun bulu badu ela gudulaibao. ⁸Eno koneani, dage te boi bidi dabede, me te bainat hwade dali wi ebao. Tialima, ena God Genuai Bidigo, eno po dolo dageba obao, eno te augwaligo dage elagasomainogo tagala palaibao,” wali. ⁹“Te eno dage te taun buluba sela pelama, tama dage te gasa t̄ kantri bidi dabego nogoba menama, te augwaligo dage dolaibao. Te tama kolesagade eno te dwai dene dagebolo mawaibao. ¹⁰Te augwaligo dage te duga t̄ daide digi ela mueibao. Te tiwai ebaso, dagego koneama, ena digi ena Genuai Bidi omainu tiaibao. ¹¹Dage te senede elalubo wiegi yai kibu mi tiwai elalubeo. Menio. Te eno dage ela gudulama, tama dage te duga t̄ daide digi ela muaibao,” po wali. ¹²“Eno te tama tiwai ebo dagego bugagia konemainu ebao, ena digi ena Genuai Bidi da. Dagego te yali kolesagago te hania hanilai dao, dagego ena me konebeo. Dagego eno bomai po bolama, te eno po dagego wali me pabeo. Dagego te gasa t̄ kantri dabe augwaligo bomai po dologoba pelama, te augwali dologode naga dage bidibao,” wali.

¹³Eno Godigo te po pusubo ş̄ ebadi, tama eno te polalubo bidi Pelatia isibo suali. Tialima, eno kidu sugunama, te t̄ba gesabidi p̄gulama, tama eno i te tama po wali, “God Genuai Bidio, magi yaliwe? Nago homugo te Israel bidi tigidali silaiba homu eyu eba, agawe?” Eno te po hanalu wali.

Godigo bomai po daş̄ olama, te Israel dabe augwa t̄ kantriba ma odasa paibao wali

¹⁴Genuai Bidigo enabolo te tiwai po wali, ¹⁵“T̄de bidio, te Jerusalemde bidalubo Israel dabego te nagede me, te nago we wai dabede homu koneama, te bulude kalabus bidibo gasa Israel dabe augwalide te homu eyu, augwaligo te tiwai po wali, ‘Genuai Bidigo augwali ela gudulama, tama augwali te digibulu buluba pelama, bidigi palio. Genuai Bidi augwali dali me bidibeo. Menio. Agai e t̄ dabolo mawai.’ Te Jerusalemde me bidibo bage augwaligo te tiwai po wali, ¹⁶tialima, nago augwaliba te tiwai po walao,” walio, “ ‘Ena Genuai Bidigo, ena digi eno te dagego abagi dabe te gasa t̄ kantriba besela palali. Mu tama, te p̄wadage sogo augwali kalabuside bidali, te enaba dolo augwaligo lotu wabo be meni yai. Tialima, ena digi ena augwali dali bidali, tialima augwaligo enaba lotu udubu usu igi dao,’ nago te po augwalibolo pusao,” wali.

¹⁷“T̄de bidio, nago eno po te nage dali kalabuside bidibo abagi dabe augwaliba pusao. Ena God Genuai Bidi, eno te dage tedela palama bidibo t̄ pedai kantride bidalubo te eno ma selama, te eno dage te duga t̄ kantriba ma odasa aselama, tama te t̄ kantri pedai dugaba ma mawaibao. ¹⁸Te dage ma asobo sogo, teda dagego te tibo god tigidali

sela şabadi, te tde elaluali dwai kugumini yai gasa nai tigidali sela şayagameo. ¹⁹Tama eno gesi homu kolesaga me gesi homu dageba mawaibao. Polobadu dagego tobolu te masigi dila pai tiwai elaluali. Te elalubo homu kolesaga eno sela şanama, te eno gesi wiegi yai homu kolesaga dageba mawaibao. Tama eyu, dagego enade te homu si ma egobeo, te duga homugo enaba keę peyu bidaibao. ²⁰Tialima, dagego te eno bomai po, me eno po dali te dagego bugagia wali paibao. Tama dage eno we bidi hani dabe dolo mu pedelebaso da, teda ena dagego God bidaibao.^x ²¹Tiali goli, eno te dwai dene mabo şe ebo kolesaga te tibo godiba lotu olama, te dwai kugumini ebo kolesaga wali pabo we bidi augwaliba te tama şe yaibao. Ena God Genuai Bidi, eno te po wai dao,” wali.

Godigo genuai ulago te Jerusalem taga palio

²²Te tudi badu nosali, te bidi tiwai me si me si nai dabe te bola pabo gagalali, te wil dabe augwa dali palio. Te Israelgo Godigo genuai ula augwalide ugadu elaluai dao. ²³Tialima, Godigo ulago te Jerusalem taun tagalama, te bulu du elalubo badu te giliga asobo badu te bulu duba pai.^y ²⁴Tialima, te nade ebo şe tiwai nai te Godigo Mobo Noma Bidigo ena ugaba sagoa selama, tama ena odasa, te Israel dabe kalabus bidibo pesage te bulu Babilonba ma sela asali. Tama te na silalio. ²⁵Tama te tigidali şe Genuai Bidigo enabolo ola mani po tigidali te eno augwaliba pusai dao, Esekielgo te po walio.

Esekielgo te bidi kalabus igi pabo şe ebo kolesaga yali

12 ¹Genuai Bidigo enabolo te tama po wali, ²“Tde bidio, te abagi dabe augwali megı nage dali bidibo bage, augwali te hagoma elama, po sela şabo bidi dabe da. Augwaligo gedu elalubadi, tiali goli te augwaligo bugagia me tonogobeo. Augwaligo olo elalubadi digi, tiali digi augwa bugagia me odobeo, magi baso meni, augwali te hagoma elama, po sela şabo bidi dabe bidibaso tebo dao.^z ³Tialima, megı da, tde bidio, nago doado bage sisi ilama, te bidi aga bidali page bulu tagalama, te digıbulu buluba kalabus igıbu pabo tiwai yao. Te nage be hulıa sışabadi pabo gagalama pobaso, te tigidali we bidigo nage sueibao. Eno homugo nago te şe ebo page te augwaligo konemainu ebao. Tialima, augwali te hagoma ebo bidi dabe da, tama augwaligo te şe ebo page konegobe, eno te homu ebo dao. ⁴⁻⁶Te giliga nanalubadi te nago doado bage dodolao, te tiwai ebaso augwaligo nage sueibao, augwaligo tononalubadi, teda nago te naga be paialide dedage dogolama, tama te dedagedu te naga doado bage selasa buluba teda soao. Te be pio mu ebadı, te nago doado bage te

^x 11:20 Ese 36:26-28 ^y 11:23 Ese 43:2-5 ^z 12:2 Ais 6:9-10; Jer 5:21; Mak 8:18

nagede tolasa te bidibo pesage tagalao, te nage digibuluba kalabus painu ebo tiwai yao. Tama nago ebo şe dabe te we bidi augwaligo sumainu yao. Nage pabo sogo da, naga gesabidi mesega selama, te nago sunumi susabo tiwai yao. Nago te tama tebo şe dabe ebogo, te we bidi augwaligo homu hodolobo şe ebo dao,” wali.

⁷Genuai Bidigo po ola simini baso da, teda eno agai enabolo te po wali tiwai şe yali. Te siade eno doado bage dodolali, tama te be pio mu ebo side te eno be paialide te dedage dogali. Eno te nai me deli tolalu te dedage dogobeo. Menio. Eno nogogo naga şe yali. Tialima, ena te dogali dedagedu buluba dıa soalio. Tama te be huliainu ebo sogo, eno ena doado bage selama, te naba munama, tolasa palio. Tama te we bidi augwaligo eno tama tebo suai dao.

⁸Te kigamu Genuai Bidigo enabolo te tiwai po walali, ⁹“Tode bidio, te hagoma ebo Israel we bidi augwaligo nagebolo nago te yali şe po page nageba me hanaluba, agawe? ¹⁰Tialima, nago te God Genuai Bidigo po augwaliba mao. Eno te kingba dali, te Jerusalemde bidalubo we bidi dabeba pedelabo şe po elalubao. ¹¹Nago te nage dali bidalubo we bidi dabe augwaliba te tama po walao. Nago te tiali şe page te Jerusalem dabeba pedelabo piksa begelama, ela mabo şe yali. Boi bidi dabe te Jerusalemba pelama, te augwali selama, te augwali gasa to kantriba odasa pelama, te kalabus bidi dabe pedelabo şe tiwai page ola mani dao. ¹²Tama te hulide te Juda king bidi aga doado bage dabe selama, wi paibao. Tama te bidi dabego te taun bagulali obo badu te king bidi te taundu buluba dıa soabo obo dedage dogaibao. Te aga gesabidi mesega selama, te aga pabo sunumi naga sulama paibao.” Te po wai dao. ¹³“Tiali goli, eno ba bono gaga kekelama, tama king tego tola saibao. Tialima, eno aga te Babilon taunba sela paibao, tiali goli agai e bulu gesabidi me sugobeo. Aga te Babilonde bididubadi aga isibo sogoba usu naibao.” ¹⁴Te eno aga dali bidali bidi tigidali ela gudulama, te augwali tedela paibao, te aga ami polalubo ofisa dabe, me aga tonaluali ami bidi dabe me, te aga gasa ami bidi dabe me. Eno te boi bidi dabe tagala palama, te augwali pobeasa pelama, te augwali ela muna muna pelawaibao,” po wai dao.

¹⁵⁻¹⁶“Tialima, te hwıbogo me, nasigo me, gasigo me, te Juda tigidali me isila siminigobeo. Menio. Te eno dwasianu hani bidimainu sula tagalama, te augwali eno gasa to kantriba tagala palaibao. Augwa te tiwai tama konemainu yaibao, ena digi ena Genuai Bidi da. Tama te Juda dabego augwa te yali dwai kolesaga po te gasa hani dabeba po mimi paibao. Tama me, te eno tama augwaliba te dwai dene mani po te gasa hani augwaliba pusaibao. Te hani augwaligo me odama, te tiwai augwaligo me bugagia koneama, ena digi ena te Genuai Bidi da omainao,” wali.

^a 12:13 2 Kin 25:7; Jer 52:11

Esekiel midigi yai

¹⁷Tialima, nosali Genuai Bidigo enabolo te tama po walali, ¹⁸“Tode bidio, nage te nai tuyu, aı tuyu ebo sogo nage midigi yao, tama nago te nage wi dwai mu ebo tiwai mu yao. ¹⁹Te nago naga abagi dabeba te tiwai po walao, ena God Genuai Bidi, eno te Jerusalemda bidalubo we bidi dabe augwalide pedelabo se po obao. Te we bidi augwaligo te augwa abagi dabeba sesemane sogo dwai se ebao. Tama tialima, te dwai se ebo bidi dabe augwali te nai me we tubo se ebadi, te augwali wi dwai mu elama, midigi saibao, magi baso meni, te boi bidi dabego hwıagaselama, te augwaligo doado bage tigidali te to kantride elalubo da selama saibao. ²⁰Tama augwaligo te taun dabe mu dolama, te to kantri olo pesage tiwai pedelaibao. Te tebo sogo te Israel dabego te tiwai koneama, ena digi ena Genuai Bidi da, augwa te po waibao,” wali.

Te sesabi isaıbadi, te paıde sogo te profetgo po mu pedelaibao

²¹Genuai Bidigo enabolo te tama po wali, ²²“Tode bidio, te Israel dabego sesemane sogo wabo po me deli elalubao wali. Te po e tiwai da, ‘Te profet dabego te po weyu, te nai dabe pedelaibao wali. Tialima, te kibu be hauwa palima, te dago subo augwaligo te wali po mu po menio, geda mubao,’ wali. Tialima, eno te Israel dabego wabo po eno godolo me egobeo. ²³Megi nago God Genuai Bidi, eno po augwaliba mao. Te eno augwaligo te wabo po tigidali tagalomainu elama, augwaligo te tama po ma omainu me egobeo. Nago te po hasegeleyu, augwaliba te gesi po me deli mao. Gesi po e tiwai wali, ‘Te profet dabego po weyu, te nai dabe pedelabo po wali. Te megı da, augwaligo po mu pedelaibao,’ wai dao.”

²⁴“Megı da, te Israeldı bidalubo profet dabe augwaligo te nade subo tiwai wabo te tıbo po obao, te augwaligo we bidi tıbo po ola mabo po pusubao. Tialima, eno te kolesaga ebo mu siminaibao,” te po wai. ²⁵“Te ena God Genuai Bidi, ena digi eno te Israel dabeba te po menama, tama eno te po wali se dabe polo tama pedelaibao. Dage hagoma ebo bidigo, odıo. Te dage bidıbo sogo, eno te se dabe yaıbao. Ena God Genuai Bidi, eno te po wai dao,” wali.

²⁶Te Genuai Bidigo enabolo te tama po ma wali, ²⁷“Tode bidio, te Israel dabego te tama po wai, ‘Esekielgo te nade subo nai tiwai sulama, tama agai te nai dabe pedelabo po pusali. Tialima, agai te po wali nai dabe, augwali te me pedalubeo. Menio. Augwali te nosali mu pedelai dao.’ Augwaligo te po wai. ²⁸Tialima, ena God Genuai Bidi, eno te Israel dabe augwaligo po te tiwai wei ponaiıbao,” wali, “‘Te eno ma tonalubo se me egobeo. Eno dageba te po wali nai augwali megı naga eno te se yaıbao.’ Ena God Genuai Bidigo, eno te po wai dao,” wali.

Godigo tıbo profet dabe augwaliba wado po wali

13 ¹Genuai Bidigo enabolo te tiwai po wali, ²“Tode bidio, nago te Israelgo profet dabe wado ilao. Te profet augwaligo te nosali nai

dabe pedelabo po obao. Tiali goli, augwaligo tibo po obao. Te po augwa homude nigilama wali. Nago augwaliba te po walama, te augwaligo ena Genuai Bidi eno poba naga olo bugagia muao wao. ³Ena God Genuai Bidi, eno te po obao. Te wabo pabo po wabo tiwai ebo profet dabe te dolaibao. Augwaligo te nade subo nai tiwai me sugobeo. Menio. Augwaligo te pusubo po dabe, te augwa homude digi augwaligo nigilama, pusai dao. ⁴Dage Israel dabego odia. Dagego te profet dabe te uni yowi dabe te dolali taun me delide bilalu wabo po tiwai po obao wali. ⁵Augwaligo te taun bagulali obo alula pai elalubo te bugagia tonalusia, tama te obo ma nigibo ş egobeo. Tialima, ena Genuai Bidi, eno dwai dene maiabo ş dageba pedalubo sogo, tama eno te boi bidi dabe tagala palobo sogo da, teda dage Israel te boi hwibode bomonama me dolalugobeo.” Te po wai. ⁶“Te profet dabe augwaligo na ebo mu menio, te nai dabe pedelaibao po augwaligo obaso da, te tibo naga waibao. Augwaligo te tama po weyu, ‘Dago te Genuai Bidigo po pusubao,’ wali. Tiali goli, eno augwaliba te po me mabeo. Tialima, magi elama augwaligo te homu eyu, te augwaligo po mu pedalugowe homu yaliwe?”

⁷“Megi eno te tiwai po dage profet dabeba obao, dagego te po weyu, dagego te nade subo nai tiwai suali po olama, tama dagego te nai dabe pedelaiba po obao. Tialima, dagego te wabo mu po me wabeo. Te tibo po naga obao. Dagego te we bidi augwaliba te tiwai po waliyu, ‘Te e po da, Genuai Bidigo po obao,’ wali, tialima ena God, eno po me deli dageba me mabeo. ⁸Tama tibaso, megı ena God Genuai Bidi eno dage profetba te tama po obao, dagego te we bidi augwaliba tibo po ola mobaso, te eno dageba wabo po ebo homu genuai elalubao. ⁹Megi da, te we bidi augwaliba tibo po ola mabo profet dabe dageba eno dwai dene mabo ş yaibao. Te eno we bidi dabe augwali deliba sisinibo sogo, dage augwali dali me bidigobeo. Tama dagego nogi te tigidali Israel we bidigo nogi elalubo bukude me elalugobeo. Eno dage ela gudulama, tama dage te Israel tş kantri pedaiba ma begasa asogobeo. Te tiwai ebo dagego bugagia koneama, ena digi ena God Genuai Bidi da po waibao,” wali.

¹⁰“Dage eno we bidi dabe tibo po ola mani tibo profet bidi dabe da. Dagego te tama po augwaliba walali, ‘Tigidali nai bugagia elalubao.’ Tiali goli, te tama me telalubeo. Tigidali nai bugagia me elalubeo. Te eno we bidi augwaligo dwai ş eyu, te augwaligo bomo meni yai obo te masigigo nigai tiwai yali. Te nosali dage profet dabe aselayu, dagego augwalibolo te ‘Dagego dwai ş yali,’ te po wasiawai dao. Tede dagego te tedela yai pen te dwai obode pilama, tama te obo tonobo gasa sawi yai ebaso, te augwaliba dagego tama po walali, te obo boma pai elalubao wali.^b ¹¹Tialima, megı eno dage profet dabeba te tama po walobao, te obo da, alua paibao.

^b 13:10 Jer 6:14; 8:11

Eno te genuai tulubage tagala palama, te ais talua ge tulubage te oboba tulama, te bomai waligo te obo degelebaso, ¹²tama te obo toga pelama, tulalueibao. Tama tigidali we bidigo dageba te tama po waibao, ‘Te dila pai obo da, agawe? Mu menio. Dagego te tedela yai pen pilaligo naga da tibo po ola mani dao,’ te we bidi dabego te po waibao,” wali.

¹³“Tama tibaso, ena God Genuai Bidi, eno te tama po obao. Eno haliga şeḅę dwai mu elama, eno te genuai tulubage, me te talua ge ais tulubage, me bomai wali tagala palama, te obo dolomainu yaibao. ¹⁴Tama eno te dage profet bagego te obode pilali pen tigidali aluama, dolaibao. Tama te obo dolaluali madi te pesage olo elalueibao. Te obo alubo sogo, te dageba degasa dulama, te dage tigidali ela mueibao. Tama dage tigidaligo te tama tebo şe ebo te bugagia konemainu yali, ena digi ena Genuai Bidi dao,” wali.

¹⁵“Dage Israel we bidi dabeba eno haliga şeḅę dwai mu ebao, tama eno te obo dolama, tama te obode pen pilali profet dabeba dwai dene mawaibao. Tebogo te eno haliga şeḅę usu naibao. Tialima, eno te tama po dageba walobao, te obo dolali, tama te pen pilali profet dabe, augwali me dolaibao. ¹⁶Te profet dabego te Jerusalemba te tama po wali, tigidali nai bugagia elalubao, te megi te boi pibo sogo dao, te po walio. Tialima, te sogo te tigidali nai bugagia me elalugobeo. Tibaso, eno augwali dolaibao. Ena God Genuai Bidigo, eno te po wai dao,” wali.

Godigo te pobi po wabo we dabe augwaliba wado ilibo po wai

¹⁷Genuai Bidigo te tama po wali, “Tode bidio, nago te Israel we dabeba wado ilao, augwaligo te nosali pedelabo nai dabede po obao. Magi baso meni, te po da, augwa homude digi koliasa wabo dao. ¹⁸Ena God Genuai Bidi, eno po te we dabede elalubao. Eno po te tiwai, ‘Dage we dwai dabe, te dage dolaibao. Dagego te yesi bubo şęgo te nogo mo ebo tiwai elama, te we augwali nogoba mubao. Tama dagego te yesi bubo ugwa hobolama, te augwali toboluba mubao. Augwaligo te nai dabe mubo te gasa we bidi augwali tonaluabo bomu somainu ebo dao. Dage we dabego dugade digi naga homu koneama, tama dagego we bidi dolobo dao. Dagego homugo te wiegi yai kolesaga da homu eba, agawe?’ te po wao,” wali.

¹⁹“Dagego tibo po weyu, te we bidi augwaliba waliyu, dago te Godigo po pusubao po wali. Tiali goli, menio. Dagego eno nogi aiyaba elaluyu ebao. Dagego yesi bubo şe ebo kolesagade te we bidi meba ela muyu, te meba tau sobao. Te bidi meba eno homugo augwali isigobe da homu yali, te bidi dabe dagego ela mubao. Te eno homugo meba isimaina homu yali bidi dabe, te dagego augwali tau sobaso, te augwali bugagia bidali. Tama te we bidi augwaligo dagego te tama tebo kolesaga godolo ebao. Augwaligo dage te bret delagego abelebaso, me te dwasianu sasabi rais baligo abelebo si da, tama te kolesaga dagego yai dao,” wali.

²⁰“Tama tibaso, ena God Genuai Bidi, eno te po obao, dagego te we bidi augwali tonaluabo te yesi bubo mobo nigibo se ebo dabe te eno homugo hagela elama, godolo me ebeo. Dagego te se tonaluabo we bidi dabe gegebao, te bulu tomode te bidi dabego ba gegebo tiwai ebao. Te dagego nogode eno te mo dabe todoga şanama, dagego te yesi bubo kolesaga me egobeo. Tama dagego te tonaluali we bidi dabe, augwali te dage dologode munu me bidigobeo. ²¹Tama te yesi bubo ugwa dabe dagego tobolude keşlubo, te tigidali eno peda şawaibao. Te dagego bomo eno we bidide elaluali tagalomai eno da, te dagego augwali tonalubo se munu ma egobeo. Tama dagego te tiwai se ebo bugagia koneama, ena digi ena Genuai Bidi da po waişo,” wali.

²²“Dagego te tibo po hauwa weyu, te dagego wiegi yai bidi dabego homu kolesaga dolobao. Tama dagego te dwai bidi dabe tau sobaso, te augwaligo dwai kolesaga ebo me tagalobeo. Te augwaligo dwai kolesaga tagalobaso da, teda augwali bugagia bidigi dao. ²³Tama tibaso, dagego te we bidi augwali tibo po ola mabo po te tiwai weyu, dagego te nađe subo tiwai nai suali po me wagobeo. Eno te ena we bidi dabe augwali dagego nogode ma selama, tama augwali te dagego bomo dologode munu ma bidigobeo. Tama dagego te tiwai tama bugagia koneama, ena digi ena Genuai Bidi da po omainu ebao,” te po wai.

Godigo te tibo god dabeba lotu wabo bidi dabe godolo homu me egobeo

14 ¹Te Israel tobolu bidi dabe mebagu te homu seşe me deli elaluali. Tibaso, augwali ena paşa duayagaselama, enabolo hanalu, te Genuai Bidigo mena homu elalubo, te hania koneainu yai dao. ²Tialima, Genuai Bidigo enabolo te tama po wali, ³“Tode bidio, te bidi dabe augwaligo te tibo god dabeba sesemane homu kone elama, te augwaligo seşe genuai pedelali. Tialima, augwaligo te tibo god dabe homu godola pelama, te augwali tagalabo homu me ebeo. Tialima, augwali odolali naga asali. Eno augwaligo hanalubo po wei me ponogobeo,” te po wali.

⁴“Augwaligo te kolesaga ebaso, megi nago ena God Genuai Bidigo e po te tobolu bidi augwaliba mao. Te Israel bidi me deligo te tibo god dabeba naga homu kone elama, tama agai te seşe page elalubo kolesaga tagalobo homu işabadi, te aga profet me deliba aselama, te eno homu kolesaga koneainu enaba hanalu wagasobaso da, teda eno po agade elalubao. Te agai tibo god hauwaba lotu wabo eno homugo te koneama, te eno homu kolesaga mu te agaba ola mawaibao,” po wai dao. ⁵“Te Israel dabe augwaligo eno homu kolesaga mu konebo si da, augwaligo te tibo god dabeba homu konebo homu ebo tagalama, te augwaligo ena deliba naga homu konealuaibao. Augwaligo tama timainu eno megi e po obao.”

⁶“Tama tialima, eno homugo nago te Israel dabe augwaliba te tama po walao. Ena God, Genuai Bidi, eno dagego te tibo god dabe wali pabo

te eno hagela homu mu ebao. Tialima, dagego ge neyu, te dwai nai dabe tagalama, tama dage enaba ma begasa asişo,” wali.

⁷“Te dage Israel bidi me deligo, ma te dage dali bidagasali gasa tş kantri bidi me deligo me, agai ena tudiba munama, te tibo god dabeba naga homu kone elama, tama aga seęę sali seę page tagalabo homu isabadi, te nosali aga pelama, te profet me deliba eno homu kolesaga koneainu hanalugi pobaso da, teda ena Genuai Bidigo eno homu kolesaga mu ola mawaibao,” po wali. ⁸“Te eno agade boi bidi elama, te eno hani we bidide aga ela gudulaibao. Tama dage Israelgo eno te seę agaba ebo sulama, tama dagego te po waibao, ‘Genuai Bidigo te tiwai seę aga tudiba mubo bidi daba yalio.’ Eno te tiwai seę ebo si da, teda dagego te tiwai bugagia koneaibao, ena digi ena Genuai Bidi da po waibao” wali.

⁹“Te tobage bidi me deligo te profet homu bega sabo po obaso, te profetgo po me deli agaba pusa mawai baso da, teda te seę page e tiwai, ena digi eno te profet bidigo homu kone tuş palobaso, agai te po pusubao. Tama te profet bidibolo eno dwai dene menama, te eno hani we bidide aga ela gudulaibao,” te tiwai po wali. ¹⁰“Eno te deli tigi poş dwai dene mabo seę te profetba eyu, te profetba pali bidiba me te tiwai dene mabo dwai seę yaibao,” te po wai dao. ¹¹“Eno te tama tiwai seę ebogo te dage Israelgo sunumi palibao, te dagego ena tudiba munu me musişma, te dagego seęę sabo seę me isşma, tama dage eno gedude meda yai me pedalugobeo. Te dage eno we bidi dolo pedelama, te ena dagego God bidaibao. Ena God Genuai Bidigo eno te po wai dao,” wali.

Godigo tigidali deli deli bidigo dwai seęę sabo subo dao

¹²Genuai Bidigo enabolo te tama po wali, ¹³“Tşde bidio, te tş kantri me deli we bidi dabego te seęę selama, te augwaligo haliga enaba mu musişbaso da, teda eno te tş kantriba dwai dene mayu, te eno augwali nai şaş pabo seę mu ilaibao. Te eno tigidali we bidi dabe, me te hasa sibi te nasi dwai mu ebo seę ilama, te augwali isaibao. ¹⁴Te Noa, me Danel, me Jop, te wiegi yai bidi sela te tş kantride bidigi sogo da, te tagalao, eno te sela bidide homu kone elama te dwai seę ebo we bidi augwaliba eno olo tau mabo wiegi yai kolesaga me igi menio. Menio. Te doloba pai bidi sela naga bugagia bidimainu eno sula tagalaibao, tama te we bidi augwali da isimainao homu igi dao. Ena God Genuai Bidigo eno te tama po wai dao.”^c

¹⁵“Ma, eno te bulu uni hasa dabe te tş kantriba tagala palama, te we bidi dabe augwali ela mumainu yaibao. Tama te badu pabo homu yali bidi meni yaibao,” te po wai. ¹⁶“Tama te Noa, me Danel, me Jop te tş

^c 14:14 Te Noago po te buku Gag Daş 6-9 tede elalubao, te Jopgo po te Jop aga bukude elalubao. Te Baibel bukude te bidi Danelgo yali seę po dabe aşani me elalubeo.

kantride bidigi sogo da, te tagalao, eno te sela bidide homu kone palama te olo mu tau mabo wiegi yai kolesaga te dwai şe ebo we bidi dabeba me egobeo. Te bidi selago augwa wai dabe digi tau me sigi menigi dao. Menio. Eno te sela bidi naga sula tagalama, bugagia bidaibao, te we bidi augwali da, isimainao. Tama te t̄q da, olo bulu pesage elalu, te genuai dulu bulu elalueibao. Ena God Genuai Bidi, ena te sesemane sogo bidada paibao, tama eno te po da mu po wabo dao,” wali.

17“Ma, eno boi bidi dabe te t̄q kantriba hw̄igi pomainu tagala palama, tama augwaligo te we bidi dabe mu ela siminama, te hasa dali elaiba,” wai dao. 18“Tama te Noa, me Danel, me Jop te t̄q kantride bidibadi goli, tagalao, te augwali selago augwa wai dabe digi tau me sogobeo. Eno te bidi sela naga bugagia bidimainu sula tagalu, te we bidi augwali da isaibao. Ena God Genuai Bidi, ena da sesemane sogo bidada paibao, tama eno te wabo da mu dao,” te po wai.

19“Ma, eno te dwai gasi te t̄q kantriba tagala palama, te eno haliga şeḅe yali usu nainu, te we bidi dabe me, te bulu hasa dabe dali elabo homu ebao. 20Tialima, tagala, te Noa me Danel me Jop te t̄q kantride bidibadi, te bidi selago augwa wai dabe digi tau me sogobeo. Menio. Te wiegi yai bidi sela naga bugagia bidimainu yaibao. Ena God Genuai Bidi, ena sesemane sogo bidibao, tama eno te wabo po te mu po dao.”

21“Tialima, ena God Genuai Bidi, eno tama po obao. Eno te tobage dwai nai me si me si tigidali te Jerusalemba tagala palama, te Jerusalemba dwai dene mabo şe elama, te augwali mu dolomainu ilaibao. Te boi bidi dabe eno augwaliba hw̄igi pomainu tagala palama, te eno augwali nai şq̄ palobo şe mu ilama, tama eno te bulu uni hasa dabego augwali elemainu tagala palaibao, tama eno te dwai gasi augwaliba tagala palaibao. Te tama tebo kolesagade eno te we bidi dabe augwali me, te hasa dabe dali, ela silaibao,” te po wai dao.^d 22“Tialima, te sogo te dolis̄awani Jerusalem bage meba, te boi bidi dabego augwali te dage bidibo buluba odasa asaibao. Tama augwali dage dali bidibo sogo, te dagego augwaligo dwai kolesaga ebo bugagia osola suao. Te dagego augwalide hobede me egobeo. Menio. Te dagego koneama, te Jerusalem augwaligo kolesaga dwai mu ebaso, te eno augwali dolai yabo, te homu dagego yaibao,” wai dao. 23“Dagego te tiwai tama koneama, eno odolali augwali me dolobeo. Menio. Te eno augwalide yali şe page mu elalubao. Ena God Genuai Bidi, eno te po wai dao,” wali.

Godigo te ni wainde po begelama wali

15 ¹Genuai Bidigo enabolo te tama po wali, ²“T̄qde bidio, te wain bono ni wiegi yai me elalusīawai, te gasa ni dabe tiwai ebeo.

^d 14:21 Ped 6:8

³Te bidigo te wain bono ni delage selama, te magi nai me deli nigainu ebaso, usu egobeo. Awe, te wa walabo bonomai nigibo te usu egobeo. ⁴Te sia naga noğabo wiegi yai yaibao. Te isigo te wain ni deli te si dali badu delama, te aga tomo badu dwasianu isi dali da, teda dego mu te nai me deli nigibaso usu yaibawe? ⁵Te isigo disaşbadi, te ni wain dwai elaluali. Te isigo dabo si da, te ni dwai mu pedelai dao,” wali.

⁶“Tialima, ena God Genuai Bidi, eno tama po obao. Te wain ni da, te gasa buside elalubo ni dabe wiegi yai tiwai elalubeo. Tama tialima, eno aga te isi sabo homu naga elama, sa muai. Tama eno e tobage deli tigi poai tiwai kolesaga te Jerusalem taun we bidi augwaliba yai dao. ⁷Eno augwaliba boi bidi elama, dwai dene mawaibao. Mu tama, te hasia siago augwali ulusişwani, tiali goli megi gasa isi dabogo te augwali mu ulaibao. Te eno augwaliba dwai dene mena silama da, tialima nage dali, te Israel nage dali bidibo bage, te dagego te tiwai bugagia koneaibao, ena digi ena Genuai Bidi dao. ⁸Te Jerusalem dabe augwaligo enaba haliga mu mubeo, tibaso eno augwaligo tş te olo pesage tiwai pedalumainu yaibao. Ena God Genuai Bidi, eno te po wai dao,” wali.

Jerusalem te bidigo sai wego bidi tagalobo tiwai ebaso

16 ¹Genuai Bidigo enabolo te tama po ma walio, ²“Tşde bidio, nago te Jerusalem dabeba po dolo weyu, te augwaligo dwai kolesaga haniani augwa digi ebaso, te po augwaliba bugagia walao. ³Eno po da e tiwai, Jerusalem, ena God Genuai Bidigo, eno po nagede elalubao. Nage te we me deli tiwai. Nago aya ida te dwai kolesaga wali pabo hani dabedu asali. Nago aya te Amor hani dabe da, tama nago ida te Hit hani dabe da. Tama naga nage te Kenan tşde ame nai dao. ⁴Te idago nage ame nani sogo augwaligo nage mosogobe togobeo. Te augwaligo nage aş telabe, ma nago tigide tamu mubeo. Te nage augwaligo ugwa namego belama mubeo. ⁵Te mena bidi me deligo nagede dwasianu hobede elama, te tama şş dabe nagede me ebeo. Nage pedelali sogo, augwaligo nage godolo isaşma, augwaligo nage te kala dasuba şşwai dao.”

⁶“Tialima, te ena asu, eno nage suali. Eno suali, te kanemego nage mesegasa elaludu, te nage uga begelu, eda begelu iduali. Eno homugo nage isidali te homu elama, te eno tama po wali, ‘Nage bugagia bidali da, ⁷te genuai pedelama, te sawi wiegi yai plaua tiwai yao.’ Tialima, nage genuai pedelama, te boma pai elalu, te nage gasa wiegi yai sawi yai wegi pedelalio. Te nage ame elama, aguli nisi holai. Tiali digi nage habu olo bidai dao,” wali.

⁸“Tialima, te sogo ena ma aselama, tama eno nage te bidigo sabo usu yai elalubo suali. Tialima, eno nageba dilapi holobo ugwa saket bulama, te nage tigi mesegelali. Te ena God Genuai Bidi, te eno bomai po nage dali olama, te eno nage sabo po daş olama, te nage eno we pedelai dao.”

9“Eno aşı selama, te nage tigde elalubo kaneme aşı telawali. Tama eno nago tigma te oliv wel muani. 10Tama eno nage te gasa sawi yai te haniani au dogia pai ugwa augwaligo hobigo au yai ugwago te eno nage au ilalio. Tama eno nage te wiegi yai su te nadoba dabe mawai. Tama eno nage toboluba te wiegi yai ugwa nami muani. Tama eno nagebolo te gasa sawi yai dila pai holobo ugwa saket me deli mawai dao 11Tama eno te tobage wiegi yai au dobage dabe nagebolo mawai. Eno nagebolo te nogode holabo nogo mo dabe mayu, te magede domabo beli dabe me mawai dao. 12Tama eno nage te gunide me olode walabo ring mani, tama wiegi yai sawi yai tobolu madi, te kwin wego madi tiwai mawai dao. 13Tama nago au yabo gol me silva hauwa elaluali. Tama nago te wiegi yai sawi yai ugwa dabe augwaligo te hobigo hobolama nigali ugwago nageba au ilama muani. Tama augwa te wiegi yai plaua mugo nigai bret eno nage mawai. Tama eno nage te pusu ebo bunu ge hani me te oliv ni du mani. Te nai dabe nago tuali. Tama nage te gasa sawi wiegi yai mu pedelama, nage te nogi yai we kwin pedelai dao. 14Tama te tigidali bulu tş pedai we bidi augwaligo te tama po odali, nage te gasa sawi yai we deli mu pedelali. Nage polalubo we mu da, magi baso meni, ena God Genuai Bidigo, eno nage au ilai dao.”

15“Tialima, nage sawi yai mu da, nago te tama homu yali. Tigidali bidigo nage godolo yai. Tialima, nage hagoma eyu, nago pemene elama, te nageba asali tigidali bidi dali pagela piali dao. 16Te nago naga ugwa dabe meba selama, tama nago te tibo godiba lotu wabo pesage dabe au ilalio. Te kolesagade nago te bidi dabego homu bega selama, tama augwali nage dali te pesage dabeba piagasali. Te tobage kolesaga dwai mu yai dao. 17Eno naga au yao olama mani te silva me gol nago te selama, tama nago te bidi piksa noma dabe nigilama, tama nago augwali dali penani şş ebo kolesaga ebao wali. 18Tama te au hauwa dogia pai elalubo ugwa name nago te selama, tama nago te piksa noma dabe au ilali. Tama nago te oliv wel me, te wiegi yai denami ebo hano ilibo pauda me sali, te nage eno mani, tama nago te piksa noma dabeba ofa yai dao. 19Eno te wiegi yai nai nage mani, te wiegi yai plaua mu tiwai, te oliv wel me, te pusu nai bunu ge hani me mani. Tialima, nago te nai dabe da selama, tama te tibo god dabe piksa nomaba ofa ilali, te augwali homu bega sabo şş yali. Tama Jerusalem nago te kolesaga ela pidu, me ela pai dao.”

20“Nago te wai dabe ame nani, tiali goli nosali nago te ena God Genuai Bidi eno te wai dabe selama, te nago augwali ela munama, te tibo god dabeba ofa yalio. Nago koneao, nago penani ebo kolesaga te wiegi yai me ebo. Tialima, te kolesaga usu meni da, nago te homu elama, 21tama nage te we dwai mu pedelabo homu yali. Tialima, nago eno wai dabe ela munama, tama augwali te tibo god dabeba ofa tiwai yali dao. 22Nago

te penani şe ebo kolesaga me, te dwai kugumini yai kolesaga wali peyu ebao, tama nage te dwasianu wai bõde elalubadi, te nageba pedelali sege po, te eno nageba mani po nago homu kone palisawani. Te sogo nage te habu olo mu elalu, te kanemego nage mesega sai elaludu, te nage tpe bulude uga bebege, eda bebege iduai dao.” Genuai Bidigo te po wai.

Jerusalem penani we mu tiwai pedelali

²³Genuai Bidigo po te tama ma wali, “Ena God Genuai Bidigo, eno te tiwai po nageba walobao, nage mu dolaibao. Nago te dwai se tigidali yaligo da, ²⁴teda nosali nage te tigidali sunumidu pelama, te tibo god dabeba lotu wabo pesage dabe me te penani ebo kolesaga yabo pesage dabe nigaibao po wai dao. ²⁵Nago homugo nage sawi yai we da homu elama, tama te bidi me deli te sunumidu asobo nago subaso da, teda nago aga i olama, nage dali piagasali. Tama nago penani ebo kolesaga umabogia mu pedaludu geai dao. ²⁶Isip dabe, te augwali pade bidali bidi dabe, augwali te haliga hogodalubo bidi dabe mu da, tama nago augwali nage dali pagela piagasomainu yalio. Nago ena hagela sebe ilibo se eyu, te nago penani se yali kolesaga te umabogia mu ela palio.”

²⁷“Tialima, polobadu eno dwai dene nageba menama, te eno nageba mani wiegi yai nai hauwa sela sawani. Tama te Filistia dabego nageba dwai se yagasomainu eno nage sula tagalai. Augwaligo nage homu godolo mu isama, tama nago dwai kolesaga tigidali ebaso, te augwaligo nagede haliga dwai yalio,” wali.

²⁸“Te bidi dabe nage dali piagasali, te augwaligo nago godolo ebo homuba usu nusiabaso, tama nago penani se ebo kolesaga te Asiria bidi dabe dali yali. Tialima, augwaligo me nago godolo ebo homuba me usu nubeo homu yali. ²⁹Tibaso, nage te Babilon bidi dabego penani we pedelali, te augwali mone sabo bisnis se ebo bidi dabe da. Tiali digi, augwaligo me te nago wei ebo homuba me usu nubeo.”

³⁰“Tialima, ena God Genuai Bidigo, eno po nagede elaluali. Nago naga te homu godolo ebo wali pidu, tama nage te hale menisabo we me deli tiwai pedelai dao. ³¹Te tigidali sunumide nago te tibo god dabeba lotu wabo pesage nigiyu, te penani ebo kolesaga ebao. Tialima, nage da, te gasa penani we dabego ebo kolesaga tiwai ebeo. Menio. Nago te kolesaga ebadi, tiali goli nago augwaligo te sabo mone tiwai me sabo homu ebeo. ³²Nage da, te tiwai we me deligo aga bidi tagalama, te gasa bidi dabeba penani igi pabo we tiwai ebo dao. ³³Tigidali penani ebo wego mone saibao. Tialima, nago me tebeo. Nago te tigidali badu bidiba te wiegi yai homu ilibo nai tiwai mayu, te nage dali piagasomainu homu bega sabo se ebo dao. ³⁴Nage gasagi yai tedali penani we mu da. Te bidi me deligo nage homu bega sabo se ebaso, nage te penani we pedalubeo. Tama nago te mone me siyu ebeo. Menio. Nago mone augwaliba mobao. Awe, nage tedali gasagi yai mu dao,” te po wai.

Godigo Jerusalemba dwai dene mabo şe ilaibao wali

³⁵⁻³⁶ Genuai Bidigo po ma weyu, te tama po wali, “Jerusalem, nage penani we da, ena God Genuai Bidigo po odao. Nago naga ugwa dabe pepeda şanama, tama naga digi naga tigi te godolo ebo tigidali bidiba mobao. Tama nago te kugumini ebo kolesaga wali peyu, te tibo god dabeba lotu obao. Te nago naga wai dabe ela munama, te tibo god dabeba ofa tiwai mabo dao. ³⁷Tialima, eno te nago godolo yali abagi augwali me, nago godolo isawani me tagalao, te tigidali eno deliba sisinaibao. Te eno augwali odasa aselama, te augwaligo nage bagua sagasaibao. Tialima, eno nago ugwa peda şanama, te nage habu olo elalubo augwaligo sueibao. ³⁸Nago te penani kolesaga ebo we tiwai bidiyu, tama nago te we bidi meba ela muani. Tama tibaso, eno nago yali dwai şe dagalama, tama tede şeşe posolo mu eyu, nage dolo mu wei ponoyu, dwai dene mawaibao. ³⁹Nago te abagi dabego nageba dwai şe ilibo eno sula tagalaibao. Tama augwaligo nago te tibo godiba lotu weyu, te aga dali penani kolesaga ebo pesage dabe aluaibao. Te augwaligo nago ugwa dabe, me beli, me ring te au dobage pepeda şanama, te nage habu olo elaluaibao.”

⁴⁰ “Te abagi dabego te we bidi dabe homu hodolobaso, te augwaligo nageba masigi şayagaselama, tama augwaligo te bainat hwa selama, te nago tigi dwasianu denegene mimiaibao. ⁴¹ Tama te abagi dabego nago be dabe isi ulaibao. Tama te we hauwago nageba te ebo şe augwaligo sueibao. Nago te dwai kolesaga ebo eno mu silimai hagede ebaso, tama nago te bidi dabe nage dali piagasomainu homu bega sabo şe me egobeo. ⁴² Tialima, te tama tebo kolesagade te eno wado genuai ebo po me eno haliga şeşe ebo silaibao. Te ena dua digi bidaibao. Te eno nageba wado po me haliga dwai munu ma egobeo, te po wai dao. ⁴³ Te nage gesi wegı elalubo sogo eno wiegi yai şe nagebolo yali. Tialima, te nago homu kone gegeda palama, nago te tobage dwai kolesaga dabe ebao. Tibaso, eno wado po nagebolo wali, te ena God Genuai Bidi, te eno nago dwai şe tigidali wei ponoyu, te nageba dwai dene mu ilaibao. Nago dwai kolesaga hauwa yalio. Magi baso nago te penani yabo homu kolesaga me elalubo dawew?” te po wai.

Wegigo te idago kolesaga wali paibao po wali

⁴⁴ Genuai Bidigo po te tiwai ma wali, “Jerusalem, nosali te we bidi dabe augwaligo nage sulama, te tama po waibao, ‘Wegigo te aga idago kolesaga wali pabo dao,’ waibao. ⁴⁵ Mu tamao, nago kolesaga te naga idago, me naga ama dabego kolesaga tiwai tobage ebao. Augwaligo augwa bidi dabe me, augwa wai puluba dabe dali homu godolo me isawai. Nago ida te Hit hani we me deli da, nago aya te Amor hani bidi dao,” wali.

46 “Te Samaria taun te not badu elaluali, te nago ama genuai we me deli tiwai da. Te aga pagede elaluali bulu dabe augwali te aga wegı dabe tiwai yali. Tama te taun Sodom polobadu te saut badu elaluali, te nago abe gesi ogwa bidi tiwai da. Tama te aga pađe elaluali bulu dabe te aga wegı dabe tiwai dao. 47 Polobadu te wegı ama nami sigo dwai kolesaga mu yali, tama nago augwali sigo te kolesaga wali pali. Tiali goli, tego nago godolo ebo homuba usu nubeo. Menio. Te sesabi menisabadi, te pađe sogo te nago kolesaga te dwai mu umagi elama, tama te wegı ama nami sigo yali dwai kolesaga aiyaba elaluai dao.”

48 “Ena God Genuai Bidi, ena sesemane sogo bidaibao, eno te tama tiwai po dolo dageba obao. Nago ama Sodom, te aga wai dabe dali, augwaligo te nago naga wai dabego dali ebo kolesaga tiwai me ebeo. 49 Aga te aga wai dabe dali augwaligo te nai hauwa elalubaso, te augwa bugagia dugulalu te me hwıbeo, tibaso augwali te hagoma elama, te augwaligo nai sqa pali bidi dabe bugagia tonalubeo. 50 Augwali te hagoma elama, te augwaligo tobolu te masigi dila pai tiwai elalu, tama augwaligo te eno godolo menisabo se yali. Eno augwaligo te kolesaga ebo sulama, te eno augwali dolai dao,” wali.

51 “Samariago me te nago ebo kolesaga tiwai te dwai se hauwa me ebeo. Te nago dwai kugumini yai kolesaga mu ebogo te nago ama dabego ebo dwai kolesaga te aiyaba elalubao. Eno te dage selago dwai kolesaga ebo subao, te tonobo nago kolesaga naga te dwai mu ebaso, tama naga ama dabego dwai kolesaga da, te olo bage tiwai ebao. 52 Nage hale umagi mu yao, magi baso meni, te eno nago kolesaga dali, te naga ama sigo kolesaga me dagalobo sogo, eno sualı, nago kolesaga te dwai mu eyu, te nago ama dabe augwali te segeı meni yai we dabe tiwai pedelali. Tialima, megi da, naga te hale ebo kolesaga yali segeıde te segeı tolobaso, te nage dwai haliga yagameo,” wali.

Godigo wiegi yai se te Sodom dali Samaria siba yaibao

53 Genuai Bidigo po ma weyu, te tiwai po wali, “Jerusalem, megi da, Sodom me Samaria te augwa si wai dabe dali dolali elaluai. Tialima, eno naga te ama si tau selama, te augwali si bugagia bidaibao. Te nage eno dolaibao, tiali goli nosali nage me eno tau selama, te augwali dali bugagia bidaibao. 54 Tama naga te yali dwai kolesaga dabede nage hale ebo se yaibao. Te ama sigo nage sulama, tama augwali sigo te homu elama, augwaligo segeı te genuai ebe homu yaibao, te po waibao. 55 Te eno augwali talu si tau selama, te augwa polobadu bidali tiwai bugagia ma bidaibao, te nage naga wai dabe dali, dage bugagia bidaibao. 56 Te nage eno dolisawani sogo, nago hagoma elama, nage te wiegi yai we da homu yai, tama nago Sodom te we dwai mu da homu yai dao. 57 Tialima, megi da, nago dwai kolesaga te hanilama, hania pedelai. Tama te gasa

hani we bidi augwaligo nage gisugu mani, te nago Sodom gisugu mani tiwai yali. Te Siria me Filistia we dabego, me te nage pađe bidali gasa hani dabego, augwaligo te nage magi nai meni yai we da augwa te homu eyu, te augwaligo posobo po nage dolo wai dao. ⁵⁸Te tama kolesagade ena Genuai Bidigo te eno naga te penani ebo kolesaga, me te tobage gasa dwai kolesaga ebo seęę te naga tolomainu yai dao,” po wali.

**Te Godigo gesi daę wali bomai po te sesemane
sogo elalua pidu, elalua paibao wali**

⁵⁹Genuai Bidigo po ma weyu, te tama po wali, “Jerusalem, ena God Genuai Bidi, eno nageba maiabo gasa po me elalubao. Te nage gesi ogwa bidi bidali sogo, te eno nage dali daę wali bomai po wali paibao po wai. Tiali, nago te daę wali po olo nai da homu elama, te nago bolalio. Tialima, eno nago te yali dwai kolesaga wei dolo ponani. ⁶⁰Tialima, eno digi nago te bolali bomai po daę wali te eno homu kone me gegeda palogobeo. Tialima, eno gesi bomai po nage dali daę walama, tama te daę wali gesi bomai po te sesemane elalua paibao,” wali. ⁶¹“Tama eno te we ama nani si te nageba ma asobo seę ilaibao, tama eno augwali si te naga wegi si dolo tiwai pedelaibao. Mu tamao, eno te yainogo ebo kolesaga te daę wali bomai pode elalubeo, tiali te ena digi homugo yaibao. Eno te tama tebo sogo, te nago naga yali dwai kolesaga haniani te homu kone paligisu, te nage hale umagi mu yai dao,” po wai. ⁶²“Eno te gesi bomai po nage dali daę walobaso, te nago te tiwai bugagia koneaibao, ena digi ena Genuai Bidi da po waibao. ⁶³Tama eno nago te yali dwai kolesaga dabe sela şanama, tama tede homu kone ma palogobeo. Tiali digi, te nago te nago yali dwai kolesagade ma kone paliyu, hale dwai mu ebaso, te nago po me deli wagobeo. Ena God Genuai Bidi, eno te po wai dao.”

**Te bono me delide, me te ba kemedage side
Genuai Bidigo po digi po begelama wali**

17 ¹Genuai Bidigo enabolo te tama po wali, ²“Tode bidio, eno homugo te po me deli begelama, te nago te Israel dabeba po digi po pusumainu homu ebao,” wali. ³“Ena God Genuai Bidigo po te augwaliba mao. Te moni dobo dwai ba kemedage me deli bidali, aga boma pai bogo da, te bobobage mu elama, te aga nisi da, te dodobolo pai hauwa elalu, te sawi yai mu da. Aga te Lebanon bulu du dabeba bola pelama, tama agai te dwagi yai ni sida tobolu bubu me deli toga sigi palio. ⁴Tialima, agai te ni tobolu te mone sabo bisnis seę ebo bidi dabego bulu tų kantriba tolasa pelama, tama agai te magi nai dobu si ebo bidi dabego taun me deliba buligi pai dao. ⁵Tama aga te tų kantri Israelba bola pelama, te hogodo nai me deli sigi palio. Tama agai te nai wai te tų

ili hauwa elalubo digi bulali. Tama te badu te ni genuai holabo ađ mabo weđ hauwa elaluai. ⁶Tialima, te nai genuai bono pedelama, te aga nologo tigidali te bobobage mu pedelali. Te ni nologo tigidali te ba kemodage bidibo pesageba gealu tononaluai. Te aga pedali dabe te tđ tomoba mu dulalio. Tama te bono nologo me yabe hauwa elaluai dao,” wali.

⁷“Tiali goli, te gasa moni dobo dwai ba kemodage me bidali. Agai me te boma pai bogo bobobage elalu, te nisi hauwa elalualu. Megi da, te bonogo aga te bidali tđ hagela mu ebaso, te aga pedali dabe me nologo dabe te gasa ba kemodage bidibo badu begeligi soabo seđ ilali. Te bonogo te gasa ba kemodagego aga ađ hauwa mawaiba homu yalio. ⁸Tialima, te bono hasia elalualu tđ da, te wiegi yai mu da. Te ađ me ili hauwa elalubo tđde da, te bono wiegi yai holama, te nologo hauwa pedelama, te ni du hauwa walama, te polalubo ni mu pedalumainu eyu, te hasia ba kemodagego aga tede bulai dao.”

⁹“Tialima, ena God Genuai Bidi, eno hanalubo po me deli te tiwai elalubao, te bono bugagia elalu, te genuai pedalubo da, agawe? Menio. Te hasia ba kemodagego wado ebo homu elama, te bono pedali dali gudulama, agai te du dabe sela şanama, te gesi pedalubo honu dabe te siago boga sabo seđ ilaibao. Bomo meni yai bidigo, ma dwasianu hanigo naga, augwaligo gudubaso, usu yaibao. Tama tialima, te bomai ba kemodagego te gudubo seđ dene me egobeo,” wai. ¹⁰“Te bono wiegi yai tđde elalualu, tiali goli aga bugagia elalu, te genuai holabo usu ebeo. Te posola pai wali te sia ge asobo badu asama, te bono aiyaba elalubaso, tama te bono aga elalualu pesagede sasia paibao,” te po walio.

Te begelali po page e dao

¹¹Te Genuai Bidigo po enabolo te tiwai ma wali, ¹²“Te po sela şanama, hagoma ebo bidi dabeba hanalu wao, augwaligo te po page koneaniwe, ma meniwe? Te po page e tiwai da. Babilon king te Jerusalemba aselama, tama agai te Juda king dali, te ami ofisa bidi dabe dali selama, te Babilonba kalabus sela pai dao. Aga da te hasia asali ba kemodage tiwai dao. ¹³Aga te tđ kantri Judade bidali sogo, te Babilon kingo te dađ walobo po me deli te Juda king aga hani bage me deli dali te po dađ wali. Agai tama po wali, te bidi Juda gesi king bidi pedalumainao wai. Te Juda king da, te bono tiwai dao. Agai te gesi kingba bomai po dađ waliyu, aga te aga dologode bidaibao wali. Te Babilon king aga tđ kantriba ma pali sogo, agai te Juda dabe genuai polalubo bidi dabe aga dali sela pai dao. ¹⁴Te Babilon king bidigo tama po wali, te gesi kingo te dađ wali bomai po wali pişama, te aga tđ kantri bomai ma pedalubo seđ elama, te Babilon dali ma boi hwıainu ebaso da, teda Babilon kingo te genuai bidi dabe dolaibao. ¹⁵Tialima, te Juda kingo agai dađ walali bomai po wali pabeo. Agai te Isipba po ola tolama, te hos dabe me te

genuai ami bidi hani dabe aselama, aga tau sagasao wali. Te Isip king bidi da, te si wabo ba kemodage tiwai dao. Tialima, te king aga bugagia bidaiba homu elama yali da, agawe? Menio. Agai te Babilon kingo po sela şabaso, tialima te Babilon king aselama, te agabolo dwai dene mawaibao,” wali.^e

¹⁶“Ena God Genuai Bidi, ena sesemane sogo bidibo da, eno po dolo tama obao, te Juda king da, Babilon t̄ kantriba kalabus igi pelama, tede bidibadi, aga isaibao,” wali. “Te page te tiwai elalubao. Te Babilon kingo aga te king pedelao obaso pedelali, tialima agai te daŋ wali bomai pode hagela homu eyu, te po sela şayu, te agai te Babilon king daŋ wali bomai po bolai dao. ¹⁷Tialima, te Babilon ami bidi dabe asama, te hw̄ibo nai hauwa nigilama, te Jerusalem bagua sabo t̄ du holaiobao. Tama augwaligo te Jerusalem dabe dali boi hw̄inama, te we bidi hauwa ela mueibao. Te sogo, te Isip kingo bomai ami bidi dabe, augwaligo te Juda king tau sabo usu meni yaibao. ¹⁸Te Juda kingo te eno nogi weyu, te Babilon kingba nogo mayu elama, tama agai po daŋ walali. Tama agai te Babilon king dali daŋ walali po, te bomai po bolaligo te aga dene saibao. Tialima, aga bugagia bidabo usu meni yaibao,” te po wali.

¹⁹“Ena God Genuai Bidi, ena sesemane sogo bidibao, eno mu po tama obao, eno te Juda kingba dwai dene mawaibao. Agai te po daŋ wali sogo agai eno nogide bomai po daŋ weyu, te daŋ wali po wali paibao wali, tiali goli agai wali pabeo. ²⁰Tama tialima, eno aga tola sabo ba bono gaga mueibao. Tola selama, te aga eno Babilonba sela pelama, te agabolo dwai dene mawaibao, magi baso meni, agai ena dali daŋ walali bomai po wali pabeo. ²¹Te boi bidi dabego te aga hani ami bidi dabe augwa geme duala sigi pabo pesage dolaibao. Te isis̄awani ami bidi dabe, augwali te gasa pedai tigidaliba wi tedela paibao. Tama dage Israelgo te tama şe ebo bugagia koneama, ena Genuai Bidigo digi, eno wali me po da te homu yaibao,” te po wali.

Godigo te Israel dabe tau sabo bomai po daŋ walio

²²⁻²³God Genuai Bidigo te tama po wali, “Ena digi te bobobage ni sida honu me deli toga saibao. Tama eno te Israel bulu du uganu igulai bulu dude bulaibao, te Israelde elalubo gasa bulu du tigidali aiyaba elalui bulu du da. Tama te ni genuai holaiobao. Te agai nologo bobobage elama, tede te wai du walaibao. Te aga polalubo ni sida mu pedelaibao. Te haniani ba dabe te ni tiwaŋ madi aga nologoba geme duala sagasaibao. Tama augwa be dabe te ni nologo dabede şe yaibao. ²⁴Tama te t̄de elalubo ni dabe tigidaligo te tiwai bugagia konemainu yaibao, ena Genuai Bidi, eno te bobobage ni gela mubo dao, me eno te dwasianu

^e 17:15 2 Kin 24:15-20; 2 Sto 36:10-13

ni dabe bobobage pedalumainu ilibo dao. Eno te yabe elalubo ni dabe sasia palobo şe ilibo dao. Me te sasia pali ni dabe da, te augwali yabe ma holobo şe ilibo dao. Ena Genuai Bidi, eno te po walio, tama eno te wali po gilama te tigidali şe ela silaibao,” wali.

Godigo tigidali bidi deli deligo kolesaga subo dao

18 ¹Genuai Bidigo enabolo te po pusao po walali, ²“Dage Israelgo godolo ebo po begelama wabo po me deli e tiwai da, “Te aya idago te tau isawai ni wain du tubo da. Tiali goli, te augwaligo wai dabego pedauwalide ha ebo da.’ Magi baso dagego te tobago po wabo dawe?’ ³Ena God Genuai Bidi, ena sesemane sogo bidaibao, eno mu po dagebolo obao, eno dagego te wabo po mu tagalabo şe ilaibao,” wali. ⁴“Te aya idago bidibo ula tigidali, me te wai dabego bidibo ula eno nogode naga elalubao. Tama tibaso, te bidi deligo te şeş sabo dwai şe ebaso, te bidi naga isaibao,” te po wai.

⁵“Te wiegi yai bidi me deli elalu, te aga kolesaga doloba pai mu elalubaso da, teda te bidi bugagia mu bidaibao. ⁶Te tobago bidigo te Israel dabego tibo god dabeba lotu me wasiama, tama agai augwaligo te tibo godiba ofa tiwai elama mabo nai dabe me tugobeo. Tama agai te gasa bidigo we penani me isiama, tama agai te we poluago elali gasi ebo sogo te we dali me pigobeo. ⁷Agai gasa bidi dabeba dwai şe ilama, te augwaligo nai dabe wi sabeo. Te gasa bidi dabego agaba negeli ilama, te agai we ponabo usu nama augwaligo mani nai, agai te nai dabe tolalubo şe mu egobeo. Menio. Agai te agaba negeli ilali bidi dabeba ma mabo dao. Agai te nasi ebo bidi dabe nai mayu, te ugwa meni yani bidi dabeba te ugwa mabo dao. ⁸Te abagi me delibolo agai negeli ilibo sogo, te negeli wei ponobaso da, teda agai te gasa ugadu daganobo mone dali me sogobeo. Te agai po tu odobo sogo, agai doloba pai kolesaga naga eyu, tama agai te po tuşa asali bidi dabe dali po bugagia dodolobo dao. ⁹Tama agai te eno po tigidali bugagia wali pelama, te eno bomai po me wali peyu, te doloba pai kolesaga naga yaibao. Te tobago bidi te doloba pai bidi da, tialima mu tama, aga bugagia bidaibao. Ena God Genuai Bidi, eno tama po obao,” walio.⁸

¹⁰⁻¹¹“Tama te tiwai bidigo ogwa me deli elalu, te ogwa genuai pedelama, te agai nai wi dabe siyu, te bidi dabe ela muyu, ma tobago dwai kolesaga me deli te aga ayago isawani şe me ebaso da, teda aga isimainao. Te ogwago te augwaligo tibo god dabeba ofa yali nai dabe tubo dao, te agai gasa bidi dabego we dabe penani ebo dao. ¹²Agai te magi nai doado bage meni yai bidi dabeba dwai dwai şe eyu, te agai nai wi siyu, tama te gasa bidi dabego agabolo mani nai dabe daş olama

tolalu, te augwaligo mani negeli ponabo daıba usu nubo tiwai yali. Tama agai te tibo god dabeba lotu weyu, tama te lotu wabo pesagede te tobage dwai kolesaga dabe mu eyu ebo dao. ¹³Tama aga abagi dabego te negeli wei ponobo sogo, agai te gasa ugadu daganobo mone dali sabo dao. Te tobage bidi da, te bugagia bidaibao homu eba, agawe? Mu menio. Agai te yali kolesaga dabe eno godolo homu mu isaıbaso, te aga isimainao,” wali. “Te aga yali kolesaga pagede te aga isaibao po wai dao,” wali.

¹⁴“Tama te tomo bidigo te ogwa me deli ame nani, te wai genuai pedelama, te aga ayago yali dwai kolesaga tigidali suali goli, aga ogwago te kolesaga wali pisıbaso da, teda aga bugagia bidaibao. ¹⁵Te tobage bidigo te Israel dabego tibo god dabeba lotu wagobeo, tama agai augwaligo te tibo god dabeba ofa yali nai dabe me tugobeo. Agai te gasa bidi dabego we dali penani me isaıma, ¹⁶te gasa bidi dabe dolobo se isaıyu, te gasa bidi dabego nai dabe wi siyu me ebo meni. Agai te bidi dabego wei ponabo usu nama nai deli me sabeo. Agai te nasi ebo bidi dabe nai mayu, te ugwa dabe meni yani bidi dabe te ugwa dabe mayu ebo dao,” wali. ¹⁷“Agai te magi nai meni yai bidi dabe dolobo se me isaıyu, tama agai te abagi dabede te wei ponobo mone gasa dali ugadu daganama me sabo menio. Agai eno tigidali bomai po, me eno gasa po dali wali pobaso, te tobage bidi te bugagia bidaibao. Mu tama, aga ayago te dwai se hauwa yali, tiali goli wai da, te ayago yali dwai segeıde me isigobeo. ¹⁸Aga ayago te gasa we bidi dabeba dwai se eyu, te anoma bomonama eyu, te augwaligo nai siyu, te tobage dwai kolesaga dabe yali. Tialima, aya aga yali se dagede te aga isimainao,” wali.

¹⁹“Tiali goli, dage Israelgo enabolo te tama po hanalu wali, ‘Magi baso ogwago te aga ayago segeı tolabo usu egobe da po obawe?’ Tialima, eno dagego po te tiwai wei ponobao. Te ogwago doloba pai kolesaga eyu, te eno bomai po tigidali wali pobaso da, teda aga bugagia bidaibao. ²⁰Te segeı sali bidi, te aga naga isaıbao. Te ayago segeı sai baso da, teda te ogwago mena dwai se me isaıwani, tama agai te ayago yali segeı tolabo usu munu me egobeo. Te ogwago dwai se ebaso da, teda ayago te magi dwai se me isaıbaso, te ogwago segeı agai me tologobeo. Doloba pai bidigo te aga yali doloba pai kolesagade te wiegi yai mone sabo tiwai eyu, te dwai se ebo bidigo te aga yali dwai kolesagade segeı tolobo dao,” wali.^h

²¹“Tiali goli, te dwai bidi me deligo aga dwai se yali tagalama, te agai eno bomai po wali peyu, te doloba pai kolesaga naga ebaso da, teda mu tama, aga tede me isigobeo. Menio. Aga bugagia bidaibao. ²²Te agai polobadu yali dwai se eno homu kone ma palogobeo. Megi da, agai doloba pai kolesaga ebaso, te aga bugagia bidaibao. ²³Ena God Genuai Bidi, eno dageba hanalu wabo homu yali, te dwai bidi me deli isibo sogo

^h 18:20 Bom 24:16

eno homu pemene eba homu dagego eba, agawe? Mu menio. Te bidi me deligo aga dwai şe ebo tagalama, bugagia bidibaso, tede eno wiegi yai pemene yaibao,” wali.

²⁴“Tiali goli, te doloba pai bidi me deligo te doloba pai kolesaga tagalama, te tobage eno godolo menişabo dwai dwai kolesaga eyu, te dwai bidi dabego ebo kolesaga tiwai ebaso da, teda aga bugagia bidaiba homu ebo da, agawe? Mu menio. Te eno agai wiegi yai kolesaga yalide homu kone munu ma palogobeo. Agai te enaba homugo keş pai kolesaga togolama, tama ena tudiba munama, te dwai şe yali, tibaso te aga isimainao,” wai dao. ²⁵“Tiali goli, dagego te tama po obao, ‘Genuai Bidigo ebo te kolesaga, te dolo menio,’ wali. Tialima, dage Israelgo, eno po wabo bugagia odao. Dagego homude eno kolesaga te dolo meni da homu eba, agawe? Menio. Te dagego ebo kolesaga da, te dolo me ebe dao. ²⁶Te doloba pai bidigo te doloba pai kolesaga yali tagalama, te dwai kolesaga ebaso da, teda aga te yali dwai kolesaga pagede te aga isabo elalubao. ²⁷Ma, te dwai şe yali bidi aga te yali dwai kolesaga tagalu, te doloba pai kolesaga ebaso da, teda aga me isigobeo. Menio. Te aga bugagia bidaibao. ²⁸Agai koneanio, te agai kolesaga wiegi yai isaşbaso, tibaso aga te dwai kolesaga tagalama, te wiegi yai kolesaga wali pali. Tiali da, te aga me isigobeo. Menio. Aga bugagia bidaibao. ²⁹Tiali goli, eno te kolesaga wali pobaso, te dage Israelgo te po obao, eno kolesaga dolo meni po wali. Dagego eno kolesaga dolo meni da homu eba, agawe? Menio. Dagego kolesaga naga te dolo ebe dao,” wali.

³⁰“Megi da, ena God Genuai Bidi, eno dage Israelde po elalubao. Te eno dage po tų ilibo sogo te dage deli deligo kolesaga eno dagalaibao. Tama tibaso, dage homu begelama, ge neyu, dagego te ebo dwai kolesaga tigidali tagalao. Te dagego tama tibaso da, teda duga te yali dwai kolesagago dage me dologobeo. ³¹Magi baso dage Israel isainu ebawe? Te dagego ebo dwai kolesaga tigidali te dagego tagalişo, te dagego poloba meda haliga elalubo kolesaga hasegelama, te dagego gesi noma haliga, me gesi noma mobo bidi sao. ³²Ena God Genuai Bidi, eno te bidi me deli, ma we, ma wai, te isibaso eno homu pemene me ebeo. Tama tibaso, dagego te ge neyu, dwai şe tagalama, te haliga begelama, te dage bugagia bidişo,” te po walio.

Esekielgo hobede ebo balia yali

19 ¹Godigo po enabolo walali, te Israel king side homu dene ebo e balia po wao po wali.

²“Nago ida te wiegi yai hasa laion sou mu da.
Aga te hasa laion omai dabe tomode bidu,
tama agai aga wai dabe negelama,
te augwali genuai pedelalio.

- 3 Aga ogwa me deli te wiegi yai
ogwa bidi laion pedelali.
Idago agabolo te hasa gegebo kolesaga ola mani,
tama nosali aga te bidi ela tubo hasa laion pedelalio.
- 4 Te t̄ kantri bidi dabe hauwago
te hasa laiongo ebo kolesaga po odali.
Augwaligo te t̄ dedage dogagaselama,
tama laion te t̄ dedageba tulaluali.
Augwaligo agai penane dilide
te gaḡ yai nai huk munama,
tama aga te t̄ kantri Isipba kekasa palio.”
- 5 “Te aga idago aga ma asobo tonaluali sesabi mu yali,
tiali goli te wai ma begasa me
asisabaso, aga homu seḡe yali.
Tialima, agai gasa ogwa me daḡ ilali,
tama aga me te wiegi yai boma pai
hasa laion tiwai pedelali.
- 6 Aga genuai pedelama
te aga gasa hasa laion dabe dali uda wali,
tama idago agabolo te hasa gegebo
kolesaga ola mani,
tama nosali aga te bidi ela tubo hasa
laion pedelai dao.
- 7 Agai augwaligo te bomai be dabe koneama,
tama aga pelama, te boi bidi dabego
taun dabe dolali.
Agai i hae umagia bomonama mu obaso,
te tigidali we bidi wi yai dao.
- 8 Te tigidali paḡde elaluali t̄ kantri pedai
bidi dabego te hasa laion dali boi hw̄agasali.
Augwaligo te ba bono mubo wa munama, aga tola salio.
- 9 Augwaligo agai penane dilide te gaḡ yai
huk munama, te aga kekasa pali.
Augwaligo aga te halobage me delide kalabus elama,
tama augwaligo aga te Babilon kingba odasa pali.
Augwaligo aga te bomai kalabusiba muani,
te aga te Israel bulu du dabeba wi ma
painu ebo usu egobeo.
Tama te we bidi dabe augwaligo
agai i wabo ma odogobeo.”

- 10 “Dage si, duga ida aga te wain ni tiwai
 augwaligo te aŕi sesege pađe bulali.
 Tama te ni genuai pedelama,
 tama nologo hauwa elama, te nai du hauwa walali.
- 11 Te ni nologo dabe boma pelama,
 tama augwaligo te nologogo
 te kingo tolasa bilibo dono nigibaso, usu yaibao.
 Te ni bobage mu holama,
 te pađe dagalu diagulainu yali.
 Tigidali we bidigo suali, aga bobage mu holali,
 te nologo me yabe hauwa elalui dao.
- 12 Tiali goli, te bidi dabego wado po weyu,
 aga maga gudulama, te aga t̄ba degelai.
 Te giliga asobo badu te posolai wali aselama,
 te agai wai dabe tigidali boga pai.
 Te bidi dabego te ni nologo tigidali tologolama,
 tama te ni nologo dabe sasia pali
 te augwaligo isiba ulai dao.
- 13 Tama augwaligo te ni te wa pai buluba
 mu sela pelama,
 tama augwaligo te aŕi meni yai t̄de bulalio.
- 14 Isi te ni pedelama, te ni nologo tigidali
 dobadi, te ni wai du dabe me dalio.
 Tama te bomai nologo me elalusiawai,
 te kingo tolasa bilibo dono tiwai
 pedelabo ni nologo tiwai me pedalubeo.
 E po da, te homu dene ebo balia po da. Te balia po
 augwaligo hauwa sogo odu geaibao,” wali.

Israel dabe augwaligo God wali me pabeo wali

20 ¹Da te Babilonde bidibadi te kibu be 7 wabode, tama te kibu bedede, te polua a naga, te dei nogo si wabode, te Israel tobolu bidi dabe augwali ena Esekiel pageba duayagasali. Augwaligo homude po me deli elalubaso, te augwaligo enaba hanaluama, te Genuai Bidigo homu mena tama elalubo page koneainu yai dao. ²Tialima, Genuai Bidigo enabolo te tama po walio, ³“T̄de bidio, nago eno e po te Israel tobolu bidi dabe augwaliba mao. ‘Ena God, Genuai Bidi, eno dage tobolu bidiba te tama po obao. Dagego eno homu mena tama elalubo koneainu asali po oba, agawe? Ena te Sesemane Bidibo God da, eno po dolo dagebolo obao, dage odolali naga asalio. Eno dagego hanalubo po deli wei me ponogobeo. Ena God Genuai Bidi, eno te po wai dao.’ Te po augwalibolo mao,” wali.

4“Tq̄de bidio, nago augwali po tq̄ ilaibawe? Awe, eno homugo nago te bidi dabe po tq̄ ilao. Te augwa waī nq̄ dabego dwai kugumini yai kolesaga yali ma homu kone palao, nago te po augwaliba walao. 5Augwaliba tama po wao, ‘Ena God Genuai Bidi, dage Israel dabe ena hani we bidi dabe pedalumainu daj̄ ilali sogo, te eno duga waī nq̄ dabe dali dila pai bomai po daj̄ wali. Augwali te Isipde bidibadi, ena digi ena augwaliba ola menama, te eno tama po wai, “Ena digi ena God, dagego Genuai Bidi dao,” te po wai dao. 6Tama te sogo eno dila pai bomai po augwali dali daj̄ olama, te augwali eno Isipde selama, te eno augwaliba maiabo te daj̄ ilali tq̄ba odasa asali. Te tq̄ te polalubo sawi yai tq̄ mu elaluali, te gasa badu tq̄ pedai tigidali aiyaba elaluali. Te tq̄go ili hauwa elalu, te nai wiegi yai mu holai dao.’ 7Te eno augwaliba te tama po wali, tigidaliba te tama po wali, tigidali deli deligo te augwaligo godolo mu ebo te Isipgo tibo god dabe sela şayao wai. Eno te po augwaliba waliyu, augwaligo te dwai nai dabeba lotu weyu, te ena God, augwa Genuai Bidi, eno gedude augwa digi meda ilibao wali. 8Eno augwaliba te tama po walali, tiali goli te bidi me deli mego te po me odobeo. Menio. Tigidaligo eno po sela şayu, tama augwaligo te Isip dabego tibo god dabe sela şabeo. Tama tibaso, te augwali Isipde bidali sogo te eno haliga şeḅe dwai mu augwaliba eyu, te paḅe eno haliga şeḅe yali usu nama, augwaliba te dwai dene magi dao. 9Tialima, eno te şe isawani, magi baso meni, tego eno nogi aiyaba elaluidali weyu yali. Eno te Israel augwaliba te tama bomo yai po daj̄ walama, te eno augwali eno Isipde selama, odasa asaibao wali. Tama eno te daj̄ wabo bomai po te gasa hani we bidi gedude daj̄ wali, te Israel augwali tomode bidali. Eno te daj̄ wali bomai po wali pişabaso da, teda ena digi ena nogi te augwaligo gedude aiyaba elalueibao,’ te po wao,” wali.

10“Tama tibaso, eno te Israel dabe te Isipde selama, te tq̄ wa pai buluba odasa asai dao. 11Te eno po augwaliba mayu, te eno bomai po augwali ola mawai. Te bugagia bidabo homu ebo we bidi dabe da, augwaligo te bomai po wali peyu, bugagia bidaibao. 12Tama eno te Sabat side bodolu muani, te eno po daj̄ walobo daj̄ tiwai augwali dali yali. Augwali te side toma neyu, tama augwa te tiwai konemainu yali, ena Genuai Bidigo eno augwali ena wiegi yai we bidi dabe pedalubo şe yalio.’ 13Tiali goli, te masigi tq̄ wa pai bulude me, augwaligo eno po sela şawani. Augwaligo eno po wali pabo hagela homu elama, te augwaligo eno bomo yai po dabe sela şawani, te bomo yai po dabe augwaligo wali peyu, te augwali bugagia bidimainu yali. Tama te Sabat side bomo yai po mu augwaligo bolalio. Tama tibaso, haliga şeḅe dwai mu augwaliba elama, te paḅe eno augwali te masigi tq̄ wa pai bulude dwai dene menama, te augwali

† 20:6 Sai 6:2-8 † 20:12 Sai 31:13-17

tigidali dolainu yai digi dao.^k 14 Tialima, eno te tiwai şe isawani, magi baso meni, te tama şego eno ena nogi te gasa hani dabe gedude aiyaba elalueiba homu yali. Eno te Israel dabe augwali te Isipde selama, odasa asobo augwaligo suali, tialima eno te Israel dabe me dolobeo. 15 Tialima, Israel dabe augwali te masigi tş wa pai bulude bidali sogo, te eno po bomo yai augwaliba weyu, eno augwali daş ilali, te wiegi yai sawi yai tşba augwali odasa pabo usu mu me egobeo wali. Te polalubo tş mu te tş ili hauwa mu elalu, te gasa tş dabe aiyaba mu elaluai dao,” te po wai.^l 16 “Eno te po page e tiwai da, augwaligo eno po wali pabo homu me ebeo. Menio. Augwaligo te augwa tibo god dabeba naga lotu wabo homu yali. Tialima, augwaligo eno bomo yai po bolobo şe eyu, tama te Sabat side bodolu muani bomo yai po me sela şayu yai dao.”

17 “Tiali goli, eno augwali homu dene me ebaso, te augwali masigi tş wa pai bulude bidali sogo te eno augwali mu sia somainogo ebeo. 18 Tialima, eno te augwa hani wai dabeba te tama po walali, ‘Dagego te duga aya dabego yali dwai kolesaga wali peyu, tama dagego te augwaligo tibo god dabeba lotu weyu, te duga digi eno gedude meda pedalubo şe elamu dao. 19 Ena digi ena God, duga Genuai Bidi da, tama eno tigidali po, me eno bomo yai po dali bugagia wali pao,’ te po walio. 20 ‘Dagego te haniani Sabat bodolu side bugagia homu kone palama, te gasagi yai tedali sogo da homu eyu, te eno bodolu side tiwai mu daş ilao. Te bodolu side te eno dage dali bomai po daş walobo daş tiwai yali. Dage te bodolu side toma neyu, tama dagego te tiwai bugagia koneama, ena digi ena God, dagego Genuai Bidi da,’ eno te po wai dao,” wali.

21 “Eno te tiwai po augwaliba wali, tiali goli te we bidi hanigo me ena dali hagoma yali. Te augwaligo eno po wali me pişama, te augwaligo eno bomo yai po dabe bolali, te bomo yai po dabe te augwaligo wali pigi sogo da, te augwali bugagia bidigi da. Tama augwaligo te Sabat side bomo yai po mu bolali. Tialima, eno haliga şeşę dwai mu augwaliba elama, te paşde eno dwai dene menama, te augwali tigidali mu dolabo homu yai dao. 22 Tiali goli, eno tama tebeo, magi baso meni, te tiwai eyu da, te gasa hani we bidi dabego gedude te eno nogi aiyaba elaluidali homu yali. Te hani dabego eno te Israel dabe Isip tş kantride selama, odasa asobo suali, tibaso eno te Israel dabe dolainu yali homu hagela yai. 23 Tialima, eno te tiwai po bomonama wali, te eno augwali sela şanama, te tş pedai tigidaliba tedela palaibao walio.^m 24 Eno te po wali, magi baso meni, augwaligo eno po sela şawani. Tama augwaligo te Sabat side bomo yai po, me gasa bomai po dabe dali bolama, tama augwaligo te augwa waş nõş dabego tibo god dabeba lotu wabo homu bomonama mu yali,” wali.

25 “Tama me, eno gasa tobage po me te dwai bomai po meba augwaliba mani, te bomai pogo augwali tau selama, bugagia me bidigobeo wali.

^k 20:13 Prs 18:5 ^l 20:15 Nam 14:26-35 ^m 20:23 Prs 26:33

²⁶Te eno augwa te tibo god dabeba ofa emainu sula tagalu, te augwa eno gedude meda pedalubo şe ilali. Te augwa gomunai ogwa dabe te tibo godiba ofa tiwai yainu te elebo eno sula tagalali. Te augwa tama şe emainu eno sula tagalali, magi baso meni, augwa te tebo kolesagade te augwa dwai noma siyu, hagela mu yabo şe eno digi ilali. Te augwa te tiwai bugagia koneama, ena digi ena Genuai Bidi da omainu yai dao,” wali.

**Godigo te Israel dabego te agai po wali
pişabo kolesaga tagalomainu ilali**

²⁷Genuai Bidigo po te tiwai ma wali, “Tqde bidio, eno homugo nago eno po te Israel dabeba momainu yali. Te po e tiwai dao, ‘Ena God Genuai Bidi, eno po dage Israelde elalubao. Te duga wai nõq dabego gasa dwai kolesaga me eyu, te augwaligo eno po sela şanama, te eno nogi aiyaba mu elaluali. Te kolesaga te tiwai dao. ²⁸Te eno augwali mawaibao olama po daq wali tqba te augwali odasa asali sogo, augwaligo te genuai ni dabe te genuai bulu du dabe sulama, te augwaligo te homu eyu, te tibo god dabeba lotu wabo pesage dabe wiegi yai elaluba homu yali. Tama augwaligo te hasa dabe me wain dabe hauwa seselama, augwaligo ofa yali, te tiali kolesagade augwaligo ena haliga şeşę dwai mu ilai dao. ²⁹Tialima, eno te tiwai augwaliba hanalu wali, “Magi baso dage te bulu du ugaba mu pelama, te tibo god dabeba lotu wagulubawe?” Tialima, te Israel dabego te lotu wabo pesage dabe augwaligo te tiwai nogi yali, “Te uganu elalubo pesage mu dao,” augwaligo te po walio,’ eno po te Israel dabeba mao,” wali.

³⁰“Megi da, dage Israelde eno po elalubao. Dagego te duga wai nõq dabego tibo god dabe wali pobao. Magi baso dagego augwaligo te dwai kolesaga wali pabo dawo? ³¹Dagego te tibo god dabeba ofa ebo şe me idubao. Dagego me te duga wai dabe elama, augwaliba ofa ebo dao. Te tebo kolesagade dage eno gedude meda yai mu pedelebao. Tialima, dage Israel hale dwasianu me isama, te eno mena homu elalubo te hania koneainu dage enaba asobo şe idubao. Tiali goli, dage odolali asobao. Ena God Genuai Bidi, ena sesemane sogo bidaibao, eno po dolo mu megi dagebolo obao, eno dagego hanalu wali po deli wei me ponogobeo,” wali.

³²“Dage te gasa tq kantri we bidi dabe tiwai mu pedelabo homu godolo eyu, te bagego te ni dabeba me masigi dabeba lotu obao. Tialima, eno dage te tiwai pedalumainu me egobeo. Mu menio. ³³Ena God Genuai Bidi, ena sesemane sogo bidaibao, eno dageba te tiwai po bomonama obao. Eno dagede haliga şeşę eyu, ena digi ena dagego king pedelama, te eno dageba dwai dene mayu, te dage eno bomonama umagia tonalueibao. ³⁴Megi dage te tq kantri hauwade te kalabus bidada pobao, tialima eno dage te bulu dabede bidali ma oda selama, te deliba sisinaibao. Te

eno haliga şeþe ebo bomo dali, te eno dageba dene mabo kolesaga dali dageba pedalubo koneagameo. ³⁵Dage te sisinabo pesage da, te masigi kemi wa pai bulu da, aga nogi e tiwai elaluali, ‘Te Tigidali We Bidi Hanigo Wa Pai Bulu Pesage dao.’ Tama tede eno dage te duga yali dwai kolesagade po tų ilaibao, ³⁶te eno duga wų nõ dabe te masigi kemi tų wa pai bulu du Sainaide bidali sogo, te augwali eno po tų ela mani tiwai yaibao. Ena God Genuai Bidi, eno tama po wai dao,” wali.

³⁷“Tama te bulude te dagego eno bomo yai daų wali po wali pomainogo yaibao. Te eno dage deli deligo kolesaga dagalaibao. ³⁸Tama eno te hagoma ebo bidi dabe me, te dwai şeş elalubo bidi dabe me sela şanama, te augwali dage tomode munu ma bidimainu me egobeo. Te eno dage Israel tigidali te kalabus bidali bulude selama, dage te po tų ebo madi odasa asaibao, tiali goli te hagoma eyu dwai şe ebo bidi dabe, augwali Israelgo te tųba me pogobeo. Eno te tiwai ebaso, te dagego bugagia koneama, ena digi ena Genuai Bidi da waibao,” wali.

³⁹“Te dage Israel hani da, ena, God Genuai Bidi, eno te tama po te dageba obao, te dagego homu godolo ebo wida, dagego duga te tibo god dabe wali pao. Tegobao, te dagego godolo yali homu simina ela siminao. Tiali goli, dagego te tiwai ebaso da, teda nosali dagego eno po odoyu, mu wali paibao. Dagego te duga tibo god dabeba ofa eyu, eno nogi da aiyaba munu me elalugobe dao,” wali.

⁴⁰“Magi baso meni. Te ena God Genuai Bidi, eno tama po obao. Te po tų yali tudi badu, dage eno we bidi te Israel eno tųba ma pelama, te dage tigidaligo enaba te genuai tedali gasagi yai bulu dude digi lotu obaso, te eno dageba wiegi yai homu pemene yaibao. Te dagego enaba wiegi yai homu eyu, polasa inayai wiegi yai ofa yabo nai dabe selasa aselama, te dagego enabolo maiagameo,” te po wai dao.

⁴¹“Te dage bidali tų kantri dabede eno dage selama, tama dage ena te bulu duba odasa asobo sogo da, teda eno bugai haliga pemene dageba eyu, te eno wiegi yai ofa ebo denami ebaso pemene homu ebo tiwai yaibao. Te gasa hani bagego eno te tama şe dageba ebo selama, te tiwai augwaligo koneyu, eno kolesaga te dolo mu ebaso po waibao. ⁴²Te eno duga wų nõ dabeba mawaiba olama, te bomu yai po daų wali tųde dage te dugulalubo sogo da, teda dagego te tiwai bugagia koneaibao, ena digi ena Genuai Bidi da po waibao. ⁴³Tama dagego duga te tobage dwai kugumini yai kolesaga dabe eyu, dage te eno gedude meda pedelali teba homu kone palaibao. Tama duga te yali dwai kolesaga dabede dage hale mu yaibao. ⁴⁴Dagego te tiwai bugagia koneaibao, eno dagego te dwai kolesaga yali şe pagede wei ponobo şe dolo me ebeo. Menio. Eno ena wiegi yai nogide homu kone palama, te eno dageba wiegi yai şe mu yali. Tama dagego te tiwai bugagia koneaibao, ena digi ena Genuai Bidi da. Ena God Genuai Bidigo, eno te po wai dao,” wali.

Isi te saut badu pedelaibao wali

⁴⁵Genuai Bidigo enabolo te tiwai po walio, ⁴⁶“Tqde bidio, eno homugo nago te saut pedai badu tonalu, nago te tq kantri dali, te buluba me, wado ilao,” po wai. ⁴⁷“Nago te buluba po walu, te Genuai Bidi, ena Godigo poba olo bugagia muao po walao. Eno po e tiwai, ‘Odao. Eno isi nogobao, te siago nago ni tigidali daibao, te sasia pai dabe, ma sasisawai me, tagalao. Te mena nai me deligo te isi sula sawainu ebo usu egobeo. Te isi dabo te saut badu gagalama, te not badu pedaiba usu nigi pelama, te isigo tigidali we bidigo tigi posolo yaibao. ⁴⁸Tigidaligo te tiwai ebo koneama, ena Genuai Bidi, eno te isi nogali, te mena bidi me deligo te isi sula sawainu ebo usu me egobeo,’ te po wao,” te po wai dao. ⁴⁹Genuai Bidigo po ola simanobo si da, tialima eno te tama po wei ponani, “Hobede ya, God Genuai Bidio, eno te po augwalibolo pusubo si, magi yaibawe? Tigidali we bidigo eno te tobage begelama pusubo po odobo hagela ebo dao.” Ena Esekiel eno te po wali.

Godigo Israel dabe agai bainat hwago elaibao wali

21 ¹Genuai Bidigo enabolo te tiwai po wali, ²“Tqde bidio, nago te giliga degasa pabo badu te Jerusalemba tonama, te Israel we bidi augwali po tq ilibo po weyu, augwali te dwai se ebo we bidi da po wao. Tama me augwaligo te tibo god dabeba lotu wabo pesage dabe eno godolo homu me egobe dao, te po me wao. ³Ena Genuai Bidigo te po augwaliba mao, ‘Ena dage Israelgo boi bidi pedaliyu, te eno bainat hwagaga bulubo bedu selama, te dage tigidali elaibao, te dage dwai we bidi, ma dage dwagi yai we bidi, te eno me sula tagalogobeo. ⁴Te eno bainat hwago dage enama, dage tigidali ela mueibao, te saut badu gagalasa, te not badu pedaiba usu nugi paibao. ⁵Tama tigidali we bidi te tiwai koneagameo, ena Genuai Bidigo digi, eno ena bainat hwagaga selama, tama eno te bainat hwagaga bulubo beba ma bulugobeo. Menio. Te eno dage dene mayu, ela silaibao,’ eno te po nago augwalibolo pusao,” Genuai Bidigo enabolo te po wai.

⁶Genuai Bidigo po wadolama, te tiwai wali, “Tqde bidio, nage te pepeli diliba pelama, te bomonama, hwawa wao, te nago homu hobolu du alua pabo tiwai yao, te tigidali bidigo sumainao. ⁷Te augwaligo nage hanalu magi baso nago te tiwai hwawa obawe po obaso da, teda nago augwaliba te tiwai po walao, ‘Genuai sege mu pedelainu ebaso, te ena hwawa obao,’ po wao. ‘Te sogo dage wi dwai mu eyu, te dagego sagadidibili elama, te dage bomu mu meni yaibao. Te dwai sogo megida pedelainu ebao. Te Genuai Bidi Godigo po dao.’ Nago augwalibolo te po wao,” wali.

⁸Tialima, Genuai Bidigo enabolo te tiwai po ma wali, ⁹“Tqde bidio, megieno nagebolo te po digi po begelama ela mani po pusao. Ena

Genuai Bidi, eno tama po obao. Bainat hwa me deli elalubao. Augwaligo te hwa elego bugagia dulama, te meda bugagia holali. ¹⁰Te hwa poa pai mu pedelali, te gegemani ula emainu augwaligo meda holali, te dagalu ula tiwai yali. Dage eno we bidi dabe, dagego homugo te dage bugagia bidaiba homu eyu, te wiegi yai pemene eba, agawe? Mu menio. Eno dila pai po dageba mani, tiali goli dagego hagoma ebo se me iduai dao. ¹¹Megi tama augwaligo te bainat hwa meda holobao, te agai bidi elabo sisi elalueibao. Augwaligo te elego dulama, meda hola silai elalubao, tialima augwaligo te we bidi dabe elabo bidi nogoba muaiba. ¹²Tode bidio, nago i hae weyu, hobede ebo gela wao, magi baso meni, te bainat hwa go te Israel dabe polalubo bidi dabe eleyu, te eno we bidi dabe dali elaibao. Nago gela weyu, te bidigo hobede mu yabo kolesaga yao. ¹³Megi da, eno ena we bidi dabe usu sabo se mu yaibao. Te augwaligo augwa dwai se ebo kolesaga me tagalisabaso da, teda ena God Genuai Bidi, eno po dolo obao, te tigidali se augwaliba pedelaiba,” po walio.

¹⁴“Tode bidio, eno po te tiwai pusao. Nago nogo bada elu, meg i da te bainat hwa go te we bidi dabe elebo gagalobao. Te bainat hwa go augwali pobelama, te hauwa elebo dao. ¹⁵Te bainat hwa go te taun sunumi tigidalide tonalu, te we bidi dabe wi ilama, te hauwa ela mubao. Te bainat hwa gegemani umagi mu eyu, te dagalu be sele ula tiwai eyu, te bidi dabe ela muabo sisi elaluai dao. ¹⁶Nage bainat hwa, nage te tigidali badu pelama, te we bidi dabe ela muao. ¹⁷Te eno digi me, eno nogo bada elama, te eno haliga sebe yali usu naibao. Ena Genuai Bidigo eno tama po wai dao,” wali.

Babilon kingo te Jerusalemba boi hwi yagasaibao wali

¹⁸Genuai Bidigo enabolo po weyu, te tama po wai dao, ¹⁹⁻²⁰“Tode bidio, nago te to kantri me deliba asabo sunumi dai ilao, te bulu me delide te sunumi tunu mage si badu pedasa palio. Te Raba teba pabo sunumi me deli elaluaibao, te Amon dabego genuai taun da. Te sunumi me deli te Jerusalemba pabo elaluaibao, te masigigo nigai bomai obo elalubo taun, te to Juda kantrigo genuai taun da. Tialima, nago te sunumi age side te koneabo po aseao. Te Raba taunba pabo sunumidu te gasa dai ilibo po aseyu, te Jerusalem taunba pabo sunumidu te gasa dai ebo po aseao. Te Babilon king aga ami bidi dabego dali te bainat hwa selama, tama augwaligo te sunumi wali asu, tama te sunumi mage siba sabolaibao. ²¹Tama kingo aga te mena sunumidu pabo konesiawai, tibaso agai te hanilibo se ebo kolesaga yaibao. Hasia bolo agai te ene beledide elaluali ene dabe memenege ilaibao. Gasa enego te Raba taunba nogo to eyu, te gasa ene mego te Jerusalem taunba nogo to iliyu, te kingo deli naga sabo homu yaibao. Te aga tibo god dabeba me hanalu olama, tama nosali agai te elali kibu hasago homu hobolu duba bugagia tonaluama,

te augwa ofa yainu elali hasa dao. ²²Tialima, kingo te dolo nogo badu sali enego, te taun Jerusalem daŷ eyu, nogo tų ilaibao, tama agai te tiwai koneyu, augwaligo te Jerusalem taunba boi hwıgi paiba homu yaibao. Tama augwali te Jerusalemba dolo pelama, te taun bagulali sunumi aluabo masin dabe nigilama, augwali peyu, te we bidi dabe elainu yaibao. Te masin nigali simanobo si da, teda te ami dabego i hae bomonama weyu, te taun sunumi alumainu te masin pogolobo şe yaibao. Augwaligo te obode tų du holama, te Jerusalem bagulama, te moni hanude bidibo bage dali haniani hwıbo kolesaga yaibao,” wali.

²³“Nago te po Israel dabeba pusaibao, tiali goli augwaligo te po da te tibo po oba homu elama, te Babilon kingo augwaliba boi hwıgasogobe da homu yaibao, magi baso meni, augwali te aga dologode bidabo bomo yai po daŷ wai da, te homu yali. Tialima, augwaligo dwai kolesaga hauwa ebaso, te king asama, augwali kalabus yagasomainu eno sula tagalaibao. Te aga asobo augwaligo subo sogo da, teda augwa te tiwai koneaibao, augwa digi yali şe dage te dwai şe pedaluba homu yaibao,” te po wali.

²⁴“Tialima, dage Israelde, ena God Genuai Bidigo eno po dagede elalubao. Sesemane sogo dagego dwai şe ebaso, te eno dagego te ebo kolesagade homu kone me gegeda palobeo. Tigidali bidigo dagego dwai şe ebo koneani, magi baso meni, dagego te kolesaga bulu ulade hanilama ebaso. Dage dwai şe ebo şeşe genuai elalubaso, tialima eno te boi bidi dabego boi hwıgasomainu sula tagalama, te dage kalabus emainu yaibao,” wali.

²⁵“Israel king, nago eno po sela şayu, dwai kolesaga mu ebo bidi da. Te eno nago ebo dwai şe tigidali wei ponabo sogo megı pedelalio. ²⁶Ena God Genuai Bidi, eno te po obao, nage te king munu me bidilamuo. Tialima, nago te kingo madi me, te tobolude bagulali ugwa nami me, peda muao. Megı da, eno te tigidali nai hasegelebo şe ebaso. Te olo bidali bidi dabe te genuai bidi pedalu, te genuai bidi bidali bidi da, te olo bidali bidi tiwai pedelaibao. ²⁷Te dwai mu dolai elalubao! Te bidi dabego polobadu susawani kolesagade, te Jerusalem mu dolaibao. E bulu pesage olo tama elalubadi, te bidi me deli asobo sogoba usu naibao. Eno te bidi sa munama, agai te Jerusalem tonalumainogo, eno te taun agabolo mawaibao,” wali.

Godigo te Amon dabe dolaibao wali po

²⁸Genuai Bidigo po ma weyu, te tama wali, “Tųde bidio, eno homugo nago po me deli te Amon dabe pusao homu ebaso, te augwaligo Israel dabeba dwai po wabo bidi dabe da. Ena God Genuai Bidigo eno te tama po augwaliba obao. Augwaligo eno bainat hwı meda bugagia mu holama, te gegemani ula gasagi yai eyu, te dula gegemani ula tiwai yali. Tama

agai te bidi elabo sisi elalubao,” wai dao. ²⁹“Dage Amon dabego te nade subo nai tiwai sulama, tama dagego te tama po pusali, dagego digi te bainat hwa nogo tolama, te eno po sela şayu dwai kolesaga ebo bidi dabe elaiwa wali. Tialima, te yali na tigidali, me te profet po wali, te tibo po naga po walio. Te mu da, te bidi dabego yali dwai şe wei ponabo sogo te pedelalio, tialima te şe dagego me egobe dao,” wali.

³⁰“Nebukatnesar, nago te bainat aga bulali beba ma bulao. Te eno dage te duga page bulude digi dolo po tu ilaibao. ³¹Eno dagede haliga şeşe ebaso, te dage eno dolaibao, te genuai isi bogoligo te kala isi dala sabo tiwai yaibao. Tama eno te bidi dabe dolobo koneai bidi dabe tagala palama, te augwali aselama, dageba dwai dene magasaibao. Te bidi dabego te gasa bidi dabeba dwai kolesaga ebo godolo mu ebo dao. ³²Tama dage te isigo sia ulama, te dela silibo tiwai yaibao. Dagego kaneme te duga tõe digi gelaibao. Te mena bidi deligo dage homu kone ma palogobeo. Ena Genuai Bidi, eno te po wai dao,” te po wali.”

Jerusalem dabego dwai şe hauwa yali

22 ¹Genuai Bidigo enabolo te tiwai po wali, ²“Tõe bidio, eno homugo nago te Jerusalem we bidi po tu ila homu ebao. Augwaligo te bidi hauwa ela muani. Nago augwa te yali dwai kugumini yai kolesagade augwali po tu ilagameo po wao. ³Eno po te tiwai obao, ‘Ena God Genuai Bidi, eno dage Israelde po elalubao. Dagego duga we bidi digi hauwa ela muani. Te dagego te tibo god dabeba lotu weyu, te duga digi eno gedude meda yai mu pedalubao. Tialima, te dage dolabo sogo paşa yagasai dao. ⁴Dagego te dwai kolesaga dabe yaligo, te dagede şeşe elalubao. Tialima, dwasianu sogo naga elalubao, tama dage dolaibao. Te pagede naga tama, te gasa hani we bidi dabego dage gisugu mayu, te dageba posobo po omainu te eno sula tagalaibao. ⁵Te gasa hani te digibulu bidibo, me paşe bidibo bage dabe, augwaligo koneani, dage te tobage dwai kolesaga ebo we bidi da homu eyu, te augwaligo dageba posobo po waibao,’ te po augwalibolo wao,” wali.

⁶“Te Israel polalubo bidi dabe, augwali tigidaligo te augwa bomode tigidali şe ebo usu da homu yali. Tiyu, augwaligo te bidi dabe ela mubo şe yai dao. ⁷Te Jerusalem taunde mena bidi me deligo te aga aya idago po dologoba me pabeo. Te dage dali bidibo gasa tõe kantri bidi dabeba dagego dwai şe ebao. Te wilawe we dabeba te dagego dwai şe yali, te tiana wai dabeba me te tiwai dwai şe ebo dao. ⁸Dagego te homu eyu, enaba te lotu wabo nai dabe te olo nai da homu ebao. Tama me, dagego te Sabat bodolu muani side bomu yai po mu bolobo dao. ⁹Dage bidi mebagu

tibo po gasa bidi dabeba kisilama weyu, te po tude augwali isimaina po omainu tebao. Te meba te tibo god dabeba lotu wabo pesageba pelama, te ofa ebo kibu mi dabe tubo da. Te mebago te lotu wabo pesagede penani se ebo dao. ¹⁰Mebago te augwa ayago we dali pagela piali. Te meba bidi dabego te augwa we dabe te poluago elali gasi elalubadi bomo elama, pagela pi ai dao. ¹¹Te mebago gasa bidigo we dali penani eyu, te mebago hale isiayu, augwa ogwago we dabe dali pagela piyu yali, te mebago augwa ayago wegi dali pagela pialio.⁹ ¹²Te mebago augwa abagi dabe ela muabo mone sabo dao. Te mebago augwa abagi dabego te negeli ilali wei augwaliba ponobo sogo te gasa ugwadu daganobo mone dali sabo dao. Te mebago augwa abagi dabe wi ilibo se elama, te augwaligo mone kekebo se yalio. Dagego te ena God Genuai Bidi homu kone isama, kegeda pali da,⁷ te po augwalibolo wao,” wali.^r

¹³“ ‘Eno wado po te dage nai wi sabo bidi dabeba, me te gasa bidi ela mubo bidi dabe, dageba eno wado ilaibao. Tialima, eno nogo bada bomonama eleyu, te eno dwai dene dageba mawaibao. ¹⁴Te sogo dage wi dwai mu eyu, te dage dili elama, me dolalugobeo. Mu menio. Ena Genuai Bidi, eno te ena wali po tiwai gilama yaibao. ¹⁵Te dage eno tigidali to kantri pedaiba tagala palaibao. Tama eno dagego duga te dwai kolesaga tigidali tagalomaiu ilaibao. ¹⁶Dagego te ebo kolesagago te duga nogi aiyaba elalubaso, tama te tiwai dagego bugagia koneyu, ena digi ena Genuai Bidi da po wagameo,⁷ nago te po te we bidibolo pusao,” Genuai Bidigo te po wali.

Godigo haliga sebe te genuai sia dabo tiwai yali

¹⁷Genuai Bidigo te tiwai po enabolo ma weyu, te tama wali, ¹⁸“Tode bidio, te Israel we bidi dabe augwali eno hagela mu ebao. Te bidi dabego te kapa nogi silva elalubo masigide te silva sainu eyu, te genuai isiba ulama, te dwai hogomu sela sabo dao. Te Israel we bidi dabe augwali te sela sabo dwai nai naga tiwai dao, eno gedude. Bidi dabe augwaligo te tiwai pobe bage hogomu selama, sayu naga ebo dao. ¹⁹Tialima, dage Israel, te ena God Genuai Bidigo e po odiao. Dage da, te bidi dabego te silva isiba ulama, te pobe bage hogomu tiwai ebao. Tialima, eno dage tigidali te Jerusalemba odasa pelama, te dwai dene dageba mawaibao. ²⁰Eno haliga sebe da, te genuai isi dabo tiwai ebao. Te dage eno ulaibao, te bidi dabego te masigi dabe genuai isiba ulama, te silva sainu ebo tiwai ebao. Augwaligo te isi ponobaso, te isi bogoli umagi posolo yai mu pedelama, tama silva te ai tiwai pedalubo dao. Tama eno dageba te tiwai yaibao. ²¹Mu tamao, eno dageba haliga sebe ebao. Tialima, dage eno te Jerusalemba sisinama, te dageba dwai dene ilaibao. Eno haliga sebe te

⁹ 22:11 Prs 18:7-20 ^r 22:12 Sai 22:25; 23:8; Prs 25:36-37; Bom 16:19; 23:19

genuai isi dabo tiwai pedelama, te dage mu ulaibao. ²²Te dagego eno bomo asobo hania mu sueibao. Te sogo dagego te tiwai bugagia koneyu, ena digi eno dageba dwai dene mabo dao,” Genuai Bidigo te po wali.

Te Israel polalubo bidi dabego dwai kolesaga yali

²³Genuai Bidigo po ma wadolama, te tiwai po wali, ²⁴“Tq̄de bidio, nago te Israel dabeba te po walao, augwaligo dwai kolesaga hauwa eyu, te augwaligo tq̄ eno gedude meda pedelali. Tialima, eno haliga şeşę dwai mu augwaliba eyu, eno te tulubage paliama, te kalaba tulubage me paliama, te dene mabo şę augwaliba mobao. ²⁵Te profet dabego dwai kolesaga po mia selama, augwali te laion dabego te hasa ela munama, te hasa dili tologa tuyu i wabo tiwai yali. Te bidi dabego te augwa abagi dabe hauwa ela munama, tama augwa te abagi dabego mone me doado bage sali. Tama te isali bidi dabego we dabe sibi, augwaduba odolo bidibao. ²⁶Te pris dabego eno bomai po bolama, tama augwaligo homugo enaba te lotu wabo nai te olo nai tiwai da homu yali. Augwaligo te tobage deli kolesaga eno nai dabeba eyu, te augwaligo eno nai da weyu, sa musişwai naiba ebo kolesaga tiwai yalio. Tama eno gedude te mena nai dabe te meda meni yai, me te mena nai dabe te meda yai da, te po te we bidi dabeba bugagia me ola mabo meni. Tama tiyu, augwaligo te Sabat side bomu yai po me wali pabo meni. Tama augwaligo te tama tebo kolesaga tigidalide te ena nogi aiyaba elaluai dao,” wali.^s

²⁷“Te gegunai bidi dabe augwali te bulu uni yowi dabe tiwai eyu, te hasa elama, te tologolama tubo şę tiwai yali. Te gegunai bidi dabe augwaligo te mone me doado bage hauwa sabo homu eyu, te bidi dabe augwali ela munama, te augwaligo doado bage sabo dao. ²⁸Te we bidi dabe augwaligo dwai kolesaga ebaso, te profet dabego wado po augwaliba wabeo. Menio. Augwa te tama po wabo dao, te we bidi dabego wiegi yai kolesaga naga ebao wabo. Te wabo pogo te we bidi dabego dwai şę ebo geme dualubo dao. Te profet augwali da, te dila pişşwai obo nide te tedela yai pen pilibo bidi dabe tiwai elama, te bidi dabego te dila pai obo da homu emainu yalio. Augwaligo na dabe yali, te tibo na naga yali, augwaligo te pedelaiba po wali nai dabe, te me pedalubeo. Te profet dabego te po weyu, te God Genuai Bidi eno po pusabao wali, tiali goli eno po me deli augwaliba me mabeo. ²⁹Te bidi dabego augwa abagi dabe wi ilama, te augwaligo mone doado bage bisigi elama sabo dao. Te augwaligo nai dabe me wi siyu ebo dao. Augwaligo te magi nai meni yai bidi dabe, me gasa tq̄ kantri bidi dabe te Israelba bidagasali bidi me, augwali dolobo şę dwai mu ebo dao,” wali.

³⁰“Te eno po pusulama, te we bidi dabe enaba ma odasa asabo bidi deli me eno gegebo usu sali. Tialima, eno gegebo şę ela pali, menio. Te tobage

bidi bidigi sogo da, aga te taun dolainu asobo boi bidi dabe asobo sunumi paligi da, te taun bagulali obo tiwai pedaligi da. Tama aga te obo alua pali badu dolalu, te boi bidi dabe taun tomoba asainu ebo sogo, te hwıbo bidi tiwai pedaligi da. Ena digi eno te Israelgo boi bidi tiwai pedelali, te eno augwaligo tı kantri dolainu yali, tiali goli te tobage bidi bidigi sogo da, eno tama şe igi menio. Tialima, eno te tiwai bidi me subeo. Mu menio. ³¹Tialima, eno augwalide haliga şeşę ebaso, te augwali eno mu dolainu ebao, te isi dage kalaba munama, dala sabo tiwai yaibao. Te eno augwa yali dwai kolesaga dolo mu wei ponaibao. Ena God Genuai Bidi, eno te po wai dao,” wali.

We sigo penani ela bilali po

23 ¹Genuai Bidi te tama po enabolo walio, ²“Tıde bidio, polobadu we si bidali. Augwaligo ida deli naga elaluali. ³Te augwali wegi ogwa we elalubadi, augwali si te Isipde bidali. Te bidi dabego augwali sigo tigde gagali eyu, augwali si dali penani elama, augwali si te penani we pedelalio. ⁴Te gomunai wegi nogi Ohola, te Samariade po kisilama wali, te Israel tı not badu kantrigo genuai taun da. Te tomo wegi nogi da, Oholiba, te Jerusalemde po kisilama walio, te Juda tı kantride saut badu elalubo genuai taun dao,” wali.

“Tialima, eno te wegi si sali, te augwali sigo eno wai dabe ame nanio. ⁵Ohola aga eno we da, tiali goli agai penani ebo kolesaga eyu, te agai te Asiria dabe dali gedu elama, te augwali agai abagi dabe pedelalio. ⁶Te abagi dabe augwali te gegunai Asiria gavman bidi dabe da, augwali te ami polalubo ofisa bidi dabe augwaligo te wiegi yai husugu ugwa gudali. Te sawi yai ami dabe augwa te hosde dugulama boi hwıani. Ohola agai te gesi ogwa bidi dabe sulama, te aga haliga hogodasa holalio. ⁷Tama aga te polalubo Asiria bidi dabego penani we pedelali. Tama agai augwaligo te tibo god dabe lotu wabo şe yali, tama aga eno gedude meda yai mu pedelai dao. ⁸Agai te penani şe te aga Isipde bidu, te gesi ogwa bidide bidali sogo yali tiwai yali. Te sogo te bidi dabego aga ame tolama, te gagali eyu, aga penani elama, te augwa homu godolo yali te silalio. ⁹Agai te dwai kolesaga Asiria dabe dali yali, te agai godolo mu yali abagi dabe mu da. Tama eno te Asiria dabe aselama, aga dolagasomainu ilai dao. ¹⁰Te augwaligo agai ugwa peda şanama, te aga habu olo mu bidali. Tama augwaligo Ohola te bainat hwıgo ela munama, te agai wai naga tigidali sali. Te we dabe sibigo te tiwai şe te we Oholaba pedelali po mibo odama, tama augwa te po wali, ‘Agai te aga yali dwai kolesagade seşę tolobo şe yai dao.’ Augwaligo te po wali.”

¹¹“Te tomo wegi Oholibago te seşę dabe te Oholaba pedalubo suali, tiali goli agai tede homu kone palobeo. Menio. Agai te penani şe ebo bomo umagi mu eyu, tama agai te Oholago yali dwai kolesaga aiyaba

elalui dao. ¹²Oholibago me te Asiria gegunai bidi dabe me, ofisa dabe dali gedu eyu yai. Tigidali te sawi yai gesi ogwa bidi, tama te wiegi yai ugwa gudai au elalu, tama augwali hwjbo hos kibu dabede dugulama hwjani. Tama Oholibago haliga augwalide hogodama, te aga augwali dali pagela pidu geai dao. ¹³Eno suali, agai aga amago yali kolesaga tobage yalio. Augwali sigo kolesaga te meda yai mu yai dao,” wali.

¹⁴“Tiali goli, Oholibago dwai kolesaga yali te umabogi mu yalio. Agai te Babilon gegunai bidi dabego piksa noma suali. Te bidi dabego te piksa te bagulali be dagade te mama yai pengo pilalio. ¹⁵Te piksa dabe da, te gegunai bidi dabego te kukulu gudama, te augwaligo wiegi yai au yai ugwa dabe selama, te augwa tobolude bagulali. Oholibago te Babilon ami polalubo ofisa dabe piksa suali, te gasa sawi yai mu ebaso, ¹⁶te aga haliga augwalide mu hogodaluali. Tibaso, agai te Babilonba po ola tolama, te aga dali piagasomainu augwaliba hanalu wai dao. ¹⁷Tialima, augwali asama, aga dali pagela pilama, tama te augwa godolo yali homu silalio, tama augwaligo Oholiba te meda mu ilali. Augwaligo te tama şe ela pidu ela pali, te nosali agai augwalide hagela mu yai dao. ¹⁸Oholiba aga te we dwai mu da. Agai dwai kolesaga te hania hanilama ebaso, tigidali bidigo koneani, aga te penani we da homu yalio. Te eno agade hagela mu yali, te eno agai ama hagela homu yali tiwai yalio. ¹⁹Tiali digi, aga penani yali kolesaga genuai eyu, umabo mu yalio. Aga te Isipde bidu te penani yali te sogoba homu kone palama ebo tiwai yai dao. ²⁰Tede polobadu bididubadi aga te Isip bidi dabede haliga hogodali. Te augwaligo nai da, te kibu donkigo nai tiwai genuai elalu, te augwaligo tigi aşı te umagia mu pedalu, te kibu hosgo aşı tiwai yalio,” wali.

²¹“Augwali te tiwai bidibasoo, Oholiba, nago te nage Isipde te gesi wegide bidali sogo yali kolesaga tobage yabo homu godolo ebaso. Te sogo te bidi dabego nago ame tolama, te gagali eyu, te nage dali pagela pidu geai dao,” Genuai Bidigo te po wali.

Godigo Oholiba dolabo po wali

²²Genuai Bidigo po te tiwai ma wali, “Oholiba, nago te tobage dwai kolesaga ebaso da, teda ena God Genuai Bidi, eno po nage dali elalubao. Eno koneani, nago naga te abagi dabe nosali hagela homu yali, tiali digi augwaligo te nagede wado yabo şe eno ilibaso, te augwali tigidali badu asama, nageba dwai şe yagasaibao. ²³Eno te gegunai gavman bidi dabe dali, te ami polalubo ofisa dabe dali te bulu tş kantri Babilonde, me Kaldia, me te Pekot hani dabe, me Soa, me Koa, me Asiria, te tama bulu bidi dabe selama, tama augwali te kibu hos dabede dugulama, te augwali eno odasa asaibao. Polobadu nago te bidi dabe te ogwa bidide bidibo suali, te gasa sawi yai mu bidibasoo, te nago augwalide gedu yai dao. ²⁴Tiali goli, megi da, augwa te not badu tş pedai bidali taga soyu, te nage dali

boi hwı̄ yagasaibao. Augwali te genuai ami hani dabe dali asu, te augwa hwı̄bo karis dabe me, te walu doado bage tolobo karis dabe dali asaibao. Augwa te hwı̄bo doado bage me selama, te hwı̄bo kapa madi munama, te sabele dabe dali, awa dabe dali tolasa asu, te augwaligo nage bagua sagasaibao. Te augwaligo nage aiyaba elalubo şe eno ilama, te augwaligo nage te augwa kolesagade digi po tı̄ elama, te augwaligo nageba dwai dene mawaibao. ²⁵Nago ena tudiba mubaso, te eno nage dali wado po wali. Tialima, te bidi dabego nageba dwai şe mu yabo şe eno ilaibao. Te augwaligo nago guni me olo togolama, te nago wai dabe me saibao. Te nago tı̄ kantride me badu bidali we bidi dabe, te bidi dabego augwali te bainat hwı̄go ela muyu, ma te augwali isiba ulaibao. ²⁶Te bidi dabe augwaligo nago ugwa pepeda şanama, te nago wiegi yai beli me nogode muani ring dabe saibao. ²⁷Eno te şe dabe ebaso, te nago penani şe ebo kolesaga munu ma isı̄ma, te nage Isipde bidu yali gagalasa, te tiwai megı̄ e sogoba usu naga nagasalio. Te nago naga te tibo god dabeba lotu munu ma wası̄ayu, tama nago te Isip dabeba homu kone ma egobe dao,” wali.

²⁸“Magı̄ baso meni. Ena God Genuai Bidi, eno te tama po nagebolo obao, te nago godolo isı̄ma hagela homu yali bidi dabe, te nageba dwai dene mabo şe yagasomainu eno tamadi tama sula tagalaibao. ²⁹Te bidi dabego nage godolo isı̄wai, te bidi dabe augwaligo nago doado bage tı̄gidali saibao. Te nage olo mu bidaibao, te penani we aga bolu olo bidibadi te bidi dabego aga subo tiwai ebao. Nago penani dwai kolesaga hauwa ebaso, ³⁰tama nageba te seşe dabe pedelaibao. Nago te gasa tı̄ kantri dabego tibo god dabe tı̄gidali wali peyu, te naga digi eno gedude meda ilali, te penani we aga yali kolesagago meda ilibo tiwai yalio. ³¹Nago naga amago dwai kolesaga ebo wali pobaso, te eno nageba dwai dene mabo te agabolo mani dwai dene tiwai mawaibao,” walio.

³²“Ena God Genuai Bidigo te tama po obao, Oholiba, te eno nageba dwai dene mu mawaibao, te naga amabolo mani dwai dene tiwai tobage nageba me mawaibao,” te po wai. “Te eno nage te bomai wain ı̄ı̄ te genuai kabude tumainu ebo tiwai ilama, te nage wabo pabo bidi tiwai yaibao. Te gasa hani we bidi tı̄gidaligo nage sulama, te nage gı̄sugu mayu, te nageba dwai posobo po waibao. ³³Te wain ı̄ı̄ eno te Samaria mani tobage wain tiwai da, te naga nagebolo mawaibao. Nago tulama, te nage geş page eyu, te nage haliga seşey eyu, te wi dwai mu elama, te nage dolaibao. ³⁴Ena God Genuai Bidigo eno po dolo obao, nago tulama, te wain mu siminama, tama te kabu nago aluama, te aga pepedai me badu selama, te naga digi naga ame togaibao,” wai dao.

³⁵“Ena God Genuai Bidigo eno te tiwai po nagebolo obao, nago ena homu konebo tagalama, te ena tudiba munama, te tobage dwai kolesaga dabe mu yali. Tibaso, naga te yali dwai penani kolesaga dabede seşey tolao,” wali.

Godigo te dwai we si dolabo po walio

³⁶Tialima, Genuai Bidigo enabolo te tama po wali, “Tq̄de bidio, eno homugo nago te Ohola me Oholiba sigo dwai kugumini yai kolesaga yalide dagalama, tama po tq̄ ilao,” wali. ³⁷“Augwali si te penani we da, te bidi me ela muai dao. Augwali sigo te tibo god dabe dali penani tiwai yali. Augwali sigo eno wai dabe ame nani, tiali digi augwali sigo augwali elama, te tibo god dabeba ofa eyu yalio. ³⁸Te kolesaga naga me ebeo. Menio. Augwali sigo te tiwai gasa dwai kolesaga me yali. Augwali sigo eno be te eno gedude meda mu ilali. Te augwali sigo te Sabat bodolu muani side bomai po bolali, te eno bodolu muani side digi mu dao. ³⁹Augwali sigo te wai dabe te tibo god dabeba ofa ela silama da, teda augwali si te sogo naga hogodasa aselama, te eno beba lotu wagasali. Te tiali kolesagago augwali sigo eno be meda mu ilalio. Augwali sigo te kolesaga dwai mu eno bede digi yai dao,” wali.

⁴⁰“Te augwali sigo gasa dwai kolesaga mu me yali. Augwali sigo te digibulu bulu bidi dabeba po ola tolama, hanaluama, augwali asao wali. Tialima, augwaligo te po odama, te augwali asali. Te we si aq̄ paluama, te gedu au ilibo pen pilama, te beli dabe me nogode ring dabe muanio. ⁴¹Te augwali sigo bet me deli au ilama, tede dugulalu, tama augwali sigo te tobage wiegi yai nai dabe te bet paq̄de elalubo tebolo sai me deliba muani. Tama augwali sigo te eno augwali siba mani te wiegi yai denami ilibo hano ebo pauda me, te oliv wel me, augwali sigo te tebolo saiba muanio. ⁴²Augwaligo te tq̄ wa pai bulude bidali bidi dabe hauwa selama, te augwali odasa aselama, tama te we si dali augwaligo nai da tuali. Te augwa wiegi yai pemene eyu, i hae subigila wali. Te bidi dabego te we sigo nogoba ring muyu, te augwali sigo toboluba te kwin wego madi muanio. ⁴³Eno sulama, eno te homu yali, te sesabi mu elama, te we sigo bidi tagalobo kolesaga elama, te megi da augwali si te penani we pedelama, tama te bidi dabe augwali siba naga pai dao. ⁴⁴Augwaligo te Ohola me Oholiba siba penani s̄ igi piduali, te penani we si da po wai dao. ⁴⁵Augwali sigo te sali bidi dali bidali tagalobo kolesaga eyu, bidi dabe ela muani, tibaso te doloba pai bidi dabego augwali po tq̄ ilama, te tama po weyu, te augwali si isimainao,” po wai dao.

⁴⁶“Tialima, ena God Genuai Bidi, eno te tiwai po obao. Te genuai hani bidi i olama, te we si penani yagasomainao. Te augwaligo augwali si wi dwai mu ilabo s̄ elama, te augwa te augwali sigo doado bage bisigi elama, sainu yaibao. ⁴⁷Te augwaligo te we siba masigi şanama, te augwali si bainat hwągo enama, te augwali si isaibao. Te augwali sigo wai dabe augwaligo ela munama, te augwali sigo be tigidali isigo domainao,” wai dao. ⁴⁸“Te tiali kolesagade eno te tq̄ kantride penani yali kolesaga mu sela şawaibao, tama tigidali wego eno te s̄ ebo sulama,

augwa te tiwai konemainu yaibao, te we sigo penani kolesaga yali tiwai se te augwaligo munu me egobe dao waibao. ⁴⁹Dage ama nami we sigo, odao. Dage sigo penani se hauwa eyu, tama dage sigo te tibo god dabeba lotu po wali. Tibaso, eno te dwai dene dage siba mawaibao. Te tiwai dage sigo bugagia koneao, ena digi ena God Genuai Bidi, eno te po wabo dao.” Te po wali.

Jerusalem te sene me deli tiwai da

24 ¹Te kibu be 9 da te kalabuside bidali, te dei 10 wabode, te 10 poluade, te bidali kibu bede,^t Genuai Bidigo enabolo te tiwai po wali, ²“Tode bidio, te side naga gagalasa, te Babilon kingo te Jerusalem bagulubo se yali. Tialima, nago te side te Israel dabego koneyu, te nago po te mu po yabo te po wabo dei aşao,” wali.^u ³“Nago te Israel hagoma bidi dabeba nago te po digi po begelama, augwaliba pusao. Te God Genuai Bidi eno po da e tiwai, ‘Nai ulubo bidi, nago sospen te isiba ugadu munama, te sospenba aı tabilao. ⁴⁻⁵Te sipsip me deli wiegi yai mu me deli selama, elama, te togao. Te agai polalubo mi me badu sao, te wiegi yai na mi, me saıa mi da, te wiegi yai dili dabe selama, te sospenba tigidali buao. Te dili dabe te mi dologode munama, te kibu mi me dili dabe bugagia posolo aıba ulao,’ eno te tiwai po aşao,” wai.

⁶“Ena God Genuai Bidi, eno te po obao. Jerusalem taun te brasgo nigai sene me deli tiwai elalu, te aga tomode meda mu elaluali, te bidi dabego aga wiegi yai pedalumainu yabo usu egobeo. Te senede kibu mi pedai tigidali, me kibu dili me teda muao, te senede deli me elalusiıwai. Magi baso meni. Te Jerusalem dabego gasa bidi dabe ela muani, tialima te augwali mu dolaibao,” wali. ⁷“Augwaligo te augwa dwai kolesagade homu kone me tuıa pabeo. Menio. Augwaligo hanilama, bulu ulade yali. Te augwaligo te bidi dabe elama, te kaneme te masigi elalubo pesage daide gealu tiwai yali. Augwaligo kaneme te tıba gealumainu me ebeo, te toıo geme dualumaina wabeo. ⁸Tiali digi, ena eno te masigi elalubo pesagede augwaligo kaneme gealumainu ilali, te eno sumainu yali. Te eno augwaligo yali dwai seıde homu kone palama, te augwaliba eno haliga seıbe eyu, te eno augwaliba dwai dene mawaibao,” wali.

⁹“Tialima, ena God Genuai Bidi, eno te tama po obao, eno te kaneme paıanalubo taun mu dolaibao. Te taun ulabo isi ena digi pesage holaibao. ¹⁰Isi hauwa pesage holama, te sia nogolama, ula ilao. Te sene posolo aı kulukulu olala pidu genama, wa pelama, te kibu mi dabe me dili te isigo mu tigidali dela pelama, te senede mu silao. ¹¹Tialima, te bras sene te iside ulalumainu elama, te posolo hobulu mu yai pedalumainao. Te sene

^t 24:1 Te dago megı elalubo kalendade, te deli wabo poluago 15 dei, te kibu be 588 te Kraıs e tıde ame nisiıbadi bidali sogo dao wali. ^u 24:2 2 Kin 25:1; Jer 52:4

meda mu yali, te eno homugo te isigo te dila pai pobele bage hogomu silimainu elama, te sene wiegi yai meda meni yai ma pedalumainu yao. ¹²Tiali goli, ena odolali şe dene yali. Isigo te pobele bage dela silabo usu meni yai dao. ¹³Dage Jerusalem, te yaba yali po wali page te dagego dwai meda yai kolesagade daş elasa walio. Eno dagego dwai kolesaga sela şabo usu sali, tiali goli dagego hagela yali. Dage meda dali bidabo homu naga yali. Tialima, te ena haliga şeşe ebaso, te eno dageba dwai dene mabo şe ebaso, te eno dageba dwai dene mabo şe mu yaibao. Tama dage te meda dali me tama bidaludubadi, te eno haliga şeşe yali silibo sogoba usu naibao,” wai dao. ¹⁴“Ena Genuai Bidi, eno mu po obao, te dage eno dolaibao. Te dagego meda yai kolesaga ebode te tigidali eno homu kone ebo gegeda palogobeo. Te dage eno homu dene me isama, te eno dageba olo mu tau sabo wiegi yai kolesaga me egobeo. Mu menio. Te eno dage po tu ilama, te dagego yali dwai kolesaga tigidali dolo wei ponaibao. Ena God Genuai Bidi, eno te po wai dao,” wali.

Profet Esekielgo we isali

¹⁵Genuai Bidigo enabolo te tama po wali, ¹⁶“Tode bidio, eno koneani, nago naga we godolo homu mu yai, tiali goli te polo tama eno te we dagala selama, te nage olo bidaibao. Tiali goli, nago agade gela weyu, te hobede ebo balia me olamu dao,” wali. ¹⁷“Nago haligade naga hwaşa wao. Te bidi dabego nage odomainu me ilamuo. Tama nago te isai bidi dabede hobede ebo kolesaga dabe tiwai me elamuo. Te nago tobolude mubo ugwa name belama, te şagaşe nadoba gudao, te naga sesemane sogo au ebo tiwai yao. Te nago pedauwali panigio. Te abagi dabego hobede ebo kolesaga wali peyu, te nageba nai sela asobo şe tiwai nago me elamuo dao.” Genuai Bidigo enabolo te po wali.

¹⁸Te kigamu te we bidi dabe dali eno po miani, te pio eno we isalio. Te do tama kigamude, eno te Genuai Bidigo enabolo po wali şe dabe yai dao. ¹⁹Te we bidi augwaligo ena sulama, te augwaligo enabolo te tiwai hanalu wali, “Magi baso nago te homu dene ebo kolesaga wali pabewe? Te nago magi nai me deli dabolo ola maiabo homu eyu eba, agawe?” te po wali.

²⁰Tama tibaso, eno augwaliba te tama po wei ponani, “God Genuai Bidigo enabolo waliyu, ²¹te dage Israelba te po pusao wali, Godigo te tama po wali, ‘Dagego God eno moni tempel bede wiegi yai homu pemene eyu, tama dagego te po weyu, te bomai dila pai be mu da, wali. Tama te be dagego godolo mu ebao. Tiali goli, eno te be dolaibao. Te dage hani wai dabe te Jerusalemde me bidalubo te boi hwişnama dolaibao. ²²Tialima, te Esekielgo yali kolesaga tobage te dagego me yaibao. Te dagego duga pedauwali me panigobeo. Tama te duga abagi dabego te hobede ebo kolesaga eyu, te dageba nai dabe sela asobo şe dagego

iligobeo. ²³Te dagego ugwa tobolude belama, te sağade nadoba bulama, paibao. Dagego te isali we bidide homu dene elama, gela wabo homu eyu tigobeo. Magi baso meni, te dagego duga digi yali seğede homu kone hauwa tųa pelama, te dagego tigi dabe te nomona saibao. Tama dagego duga haside digi hwawa weyu tiaibao. ²⁴Esekiel te dagego dağ tiwai ilali, magi baso meni, dagego me agai te yali kolesaga tobage naga yaibao. Te tigidali se pedalubo si da, dagego te tiwai tama koneagameo, ena digi ena Genuai Bidi dao.’ Godigo te po dagebolo pusao po wai dao,” eno te po wai.

²⁵Te Genuai Bidigo po enabolo weyu, te tama po ma wali, “Tode bidio, eno be augwaligo be tomode elaluali, tialima te augwali bomo elama, dolalueiba, te homu augwaligo yali. Augwaligo te be godolo homu elama, tede wiegi yai pemene eyu, teba sesemane homu kone elaluali. Tiali goli, eno ena te be dolama, tama eno augwaligo wai dabe ela muaibao,” te po wai dao. ²⁶“Eno te tama se ebo sogo, te bidi me deli te Jerusalemdu wi aselama, te se dabe pedelali po nageba walagasaibao. ²⁷Te bubugade naga, te eno nago pedauwali usu ma ilama, te nage pedauwali pania sai munu me elalugobeo. Tialima, te nageba po sela asali bidi dali te nago po ma miaibao. Te Israel augwaligo sueibao, te nago po ma obaso, te Israel dabego te tiwai koneama, ena digi ena Genuai Bidi bidibo dao,” po wai dao.

Esekielgo te gasa to kantri dabe dolabo po pusali

(Dağ 25-32)

Godigo te Amon dabe dolaibao

25 ¹Genuai Bidigo enabolo te tama po wali, ²“Tode bidio, nago te Amon dabego toba tonao, te augwali dolabo po wao. ³Augwaliba te tama po walao, ‘Dage Amon dabego ena God Genuai Bidigo poba bugagia olo muao. Dagego eno be dolali, me te boi bidi dabego te Israel dabego to dolali me, dagego suali, te Juda dabe selama, te digibulu buluba kalabus igi pali. Tama dagego te se dabe ebo sulama, tega weyu, wiegi yai homu pemene eyu, dili elebo kolesaga yai dao. ⁴Tialima, eno te bidi hani me deli te giliga asobo badu asomainu ilama, te augwaligo dage dali boi hwagaselama, te dagego to saibao. Te augwaligo sel ugwa be dabe te dagego tode se elama, tede bidaibao. Te augwaligo nai dagego tode sela tuyu, te dagego bulmakau ame pe dabe sela tuyu yaibao. ⁵Te eno taun Raba, te dagego genuai taun, te dolama, te kibu kamel dabego nosai tubo pesage pedelaibao. Te to kantri Amon te kibu sipsip dabego obo dabe nigibo pesage pedelaibao. Tama dagego te tiwai koneyu, ena digi ena Genuai Bidi mu da po wagameo,’ te po te Amon bagebolo wao,” te po wali.

6“ Te eno te şe dage dali magi baso yaibawe? Te ena God Genuai Bidigo te tama po obao. Eno koneani, dagego te Israel dabe godolo homu meni işawani, te Israel tş kantri dolali sogo, dage wiegi yai pemene elama, nogo bada eliyu, wele siyu, keşş wai dao. 7Dagego te tama kolesaga yali, tibaso te eno dageba dwai dene momainogo te gasa hanigo dage sagasomainu elama, te dageba dwai dene momainu yali. Te eno dage dolobo şe mu elama, tama dage te tş kantri me deli bidibo tiwai me egobeo. Te tiwai dagego bugagia koneyu, ena digi ena Genuai Bidi da po waiagameo, te po te Amon we bidiba pusao,” Genuai Bidigo enabolo te po wai dao.’

Godigo po weyu, te Moap kantri dolaibao wali

8Genuai Bidigo po ma weyu, te tama po wai, “Ena God Genuai Bidi, eno po obao, te Moap dabe me Seir dabe, augwaligo te homu yali, te Juda dabe te gasa hani bidi dabe tiwai si da homu yai dao. 9Tialima, eno te boi bidi dabe aselama, te tş kantri daş paşde elalubo te Moap dabego bomai taunba hwıgasomainu yaibao. Te augwaligo te wiegi yai taun dabe dolaibao, te taun Bet Jesimot, me taun Balmeon, me taun Kiriataim dao. 10Te boi bidi dabe te giliga asobo badu asama, te Moap dabeba me, Amon dabeba dali siba boi hwınama, te augwali aiyaba elaluama, te augwaligo tş saibao. Tama te Amon dabe te tş kantri pedai tiwai me deli ma bidigobeo. 11Awe, eno te dwai dene mabo şe te Moap dabeba ebaso, tama augwa te tiwai bugagia koneama, ena digi ena Genuai Bidi mu da po omainu yaibao,” wali.”

Godigo po weyu, Idom tş kantri dolaiba wali

12Genuai Bidigo te tama po wali, “Ena God Genuai Bidi, eno po obao, Idom dabego dwai kolesaga mu te Juda dabeba wei ponani, tialima te Idom dabego yali dwai şe te genuai mu igi pai dao. 13Te eno megı te po obao, eno te Idom dabeba dwai dene umabo mu menama, te tıgdalı we bidi ela munama, te augwa kibu sibi dabe tıgdalı me elaibao, te not badu te distrik Temande gagalama peyu, te saut badu te taun Dedanba usu naibao. Te tş kantri Idom olo mu elaluaiabao. 14Eno te Idom dabego dwai kolesaga wei ponabo homu yali, tibaso te eno ena we bidi augwali te Israel dabe, te augwali elalı boi hwıgi pomainu tagala palaibao. Te kolesagade te Idom dabego eno haliga şeşş genuai ebo koneaibao. Tialima, te Idom dabego te tiwai bugagia koneaibao, ena digi eno augwaligo dwai şe yalı wei ponobao homu yaibao. Ena God Genuai Bidi eno te po wai dao.”^x

ˆ 25:7 Jer 49:1-6; Ese 21:28-32; Amo 1:13-15; Sef 2:8-11 ˆ 25:11 Ais 15:1-16:14; 25:10-12; Jer 48:1-47; Amo 2:1-3; Sef 2:8-11 ˆ 25:14 Ais 34:5-17; 63:1-6; Jer 49:7-22; Ese 35:1-15; Amo 1:11-12; Oba 1-14; Mal 1:2-5

Godigo po weyu, te Filistia dabe dolaibao wali

¹⁵Genuai Bidigo po ma weyu, te tama po wali, “Ena God Genuai Bidi, eno te po obao, te bobobage sogo te Filistia dabego te Israel dabe godolo homu me isiama, te augwaliba boi bidi ebo se yalio. Te Filistia dabe augwaligo dwai se wei ponobo se umabo mu eyu, te augwali mu dolai dao. ¹⁶Tibaso, megi da, eno te po obao, eno te Filistia dabe augwaliba dwai dene mabo se mu elama, tama eno te nambisde bidibo we bidi tigidali mu silabo se yaibao.

¹⁷Eno haliga sebe dwai mu augwalide elama, tama augwaligo yali dwai kolesaga tigidali dolo wei ponaiabao. Tama augwaligo te tiwai bugagia koneama, ena digi ena Genuai Bidi dao,” te po wai dao.^y

Godigo po weyu, te Tair taun dolaibao wali

26 ¹Te da Babilon tode kalabuside bidibadi te kibu be 11 wabode, tama te poluade deli wabo side, Genuai Bidigo enabolo te tiwai po pusalio, ²“Tode bidio, eno te tamu ai tomode elalubo tode elalubo taun Tair we bidide po elalubao, te to te tamu ai sesege pade elalubao. Te Tair taunde bidibo we bidigo homu pemene eyu, e tiwai i hae obao, ‘Jerusalem dolobaso, te gasa to kantri bidi dabe teba pelama, te mone sabo bisnis se yali te ma igi pabo usu me egobeo. Megi da, te augwali aselama, da dali naga te nai dabe dobu si ebo bisnis se yagasaibao, tama tiyu dago doado bage hauwa saibao,’ po wabo dao, te Tair we bidi.”

³“Tama tibaso, megi God, ena Genuai Bidi, eno te po obao, ena dage Tair hanu bidi dabego boi bidi pedelaibao. Te eno bidi hani hauwa odasa aselama, dage dali boi hwiagasomainogo yaibao, te tamu ai genuai pepeda pelama, dini gisigilibo tiwai yaibao. ⁴Tama te augwaligo dagego taun bagulali bomai masigigo nigali obo dolama, tama augwaligo te obo bagulali bobobage be taua dabe tigidali pepedama, aiyaba tudulaibao. Tama eno dagego taunde elalubo to dabe tigidali sela sanama, tama masigi bulu naga olo tede elalueibao. ⁵Tama te sugu sabo se ebo bidi dabe aselama, te ai tomode elalubo masigi bulude sugu sabo wa dinigina munama, te giligago te wa omainogo yaibao. Te ena God Genuai Bidigo po obao. Te gasa hani bidi dabego dage sagaselama, te dageba dwai se mu yaibao. ⁶Tama te boi bidi dabe aselama, te genuai bulu te taun dabe bidalubo we bidi dabe ela mueibao, te taun Tair elalubo pade bulu dabede bidibo we bidi me ela mueibao, te nambisde bidibo bage. Tama dage Tair hani, dagego bugagia te tiwai page kone peyu, ena Genuai Bidigo digi eno te tama se eba homu yaibao,” wali.

⁷“Magi baso meni. Ena God Genuai Bidi, eno te tama po obao. Eno te bomai king me deli odasa asaibao, te king Nebukatnesar te to pedai

^y 25:17 Ais 14:29-31; Jer 47:1-7; Jol 3:4-8; Amo 1:6-8; Sef 2:4-7; Sek 9:5-7

Babilon king dao, tama agai te gasa t̄o pedai kantri dabego king dabe tonalubo dao. Tama agai dage Tair dabe dali boi hw̄jaibao. Te aga not badu pedaide bidali tagalama, te genuai ami hani dabe dali aselayu, tama te boi hw̄bo nai kibu hos dabe, me karis dabe dali asiyu, te kibu hos dabede dugulama boi hw̄bo ami hani bidi dabe dali asaibao. ⁸Tama augwali aselama, te nago nambisde elalubo taun bidi hani dabe dali hw̄jagaselama, te taun dabe dolaibao. Tama te tamu āi tomode elalubo t̄ōba aselama, augwaligo te taun Tairgo obo bulu badu te t̄ō du holama, te dagego taun tomoba hw̄jainogo tiwaibao. Tama augwa awa dabe te augwa seselalubo obo tiwai elalu, te augwaligo hw̄jaibao. ⁹Tama augwaligo genuai masin selama, tama te taun bagulali obo pepedelama tulaibao. Tama te ain tigi dage selama, te bagulali obo aluama, pebedama mueibao. ¹⁰⁻¹¹Tama te ami bidi dabe te kibu hos dabede, me te kibu hosgo kekebo nai karis dabede dugulama, te taun bagulali obo sunumi dabedu tomoba paibao. Te augwaligo genuai kulukulu wabo ş̄ eyu, te bagulali obo mumunu yaibao. Augwaligo te kibu hos dabe te taun sunumi dabe tigidalidu udabaso, te t̄ō hogomu genuai pedelama, te taun tomode be dabe halueibao. Tama te ami bidi dabego te bainat hw̄a nogo tulama, te taunde we bidi tigidali ela mueibao. Tama augwaligo te taunde dila pai pos dabe tologolama, te t̄ōba ş̄awaibao. ¹²Te boi bidi dabe augwaligo te dagego mone dabe me doado bage tigidali sobadi, tama dagego mone sabo bisnis ş̄ ebo nai dabe tigidali saibao. Tama augwaligo te taun bagulali obo dabe aluama, te dagego wiegi wiegi yai be dabe mu dolaibao. Tama augwaligo te masigi dabe me, ni dabe me, t̄ō dabe me, tigidali selama, te tamu āiba ş̄awaibao. ¹³Tama dagego te t̄ēabi po wabo me, te gita elebo ş̄ ebo me, te ma egobeo.^z ¹⁴Te eno dagego bulu t̄ōde te masigi dabe naga elalumainu yaibao. Tama te ş̄ūḡu gegebo ş̄ ebo bidi dabego te ş̄ūḡu hagane togobo wa te masigiba manama, te wa dabe giligago omainogo tiaibao. Tama bidi dabego te taun ma nigainu ebaso, usu egobeo. Magi baso meni. Ena God Genuai Bidi, eno te po wai dao,” wali.

¹⁵“Ena God Genuai Bidi, eno te Tair dabeba te tama po obao. Te boi bidi dabego dagego taun dabe dolobo sogo, te gasa taun te tamu āi p̄ade bidalubo we bidi dabego te ami bidi dabego te tama kulukulu wabo odaibao. Tama te ami bidi dabe augwaligo dage te taunde elama, tama te tigi selai bagego hw̄awa wabo genuai mu pedelama, tama te gela u wabo te gasa taunde bidibo bage augwaligo odaibao. Tama te we bidi dabe augwali wi eyu, dwai noma mu saibao. ¹⁶Tama te tigidali t̄ō pedai kantri te tamu āi p̄ade bidibo king bidi dabego dagede te pedalubo ş̄ dabe sulama, wi dwai mu eyu, te augwa king ş̄ eyu, te dugulalubo

^z 26:13 Ped 18:22

sia sai tagalama, aiyaba duagulu, tama augwa te king şe eyu gudubo sawi yai ugwa dabe pepeda şanama, tama olo te tşba duagulama, tama didibili eyu bidaibao. ¹⁷Tama augwali te king dabego te dagego taun dolali şede te e tiwai hobede ebo balia po waibao, ‘Hobede mu da, genuai nogi yai taun, nage dolalio. Te taun nago we bidi dabe te tamu aşıba asai, te polobadu augwaligo sip hauwa elalu, te augwali tamu aşıde şe yali polalubo hani dabe bidali. Tama te tamu aşı pade bidalubo taun we bidi dabe, te augwali nago taun we bidide wi dwai mu yali. Tiali goli, megi da, nago sip dabe iba soyu, eda asiyu eyu, te bisnis şe iduali munu ma egobe dao. ¹⁸Magi baso meni, te side naga nage dolalio, tama te tamu aşı tomo bulude bidalubo we bidi dabego sulama, tama augwali wi dwai umagi mu eyu, tama didibili ebao,’ augwaligo te balia po waibao,” wali.^a

¹⁹“Ena God Genuai Bidi, eno te tama po obao. Tair, te eno nage te olo bulu pesage nigilaibao, te bidi meni yai taun tiwai elalueibao. Tama eno nage te genuai tamu aşıgo mesegelama, te nage aiyadu dologode mu bidimainu yaibao. ²⁰Te sogo eno nage te isai bidi dabego bulu pesageba tagala palaibao, tama nage te polobadu bidi dabe dali bidaibao. Te eno nage te tş dologode te dolali taun dabe dali sesemane sogo bidimainogo yaibao. Tama nagede te bidi dabe bidimainogo me egobeo. Tama nage te tşde wiegi yai taun ma pedelama bidainogo ebaso, te usu munu ma egobeo. ²¹Te eno nage mu dola silama, tama gasa we bidi hanigo nage sulama, wi emainu yaibao. Te eno nage mu silimainogo ilama, tama te we bidi dabe augwaligo nage sueinu gegebo sogo da, te augwaligo nage me sugobeo. Ena God Genuai Bidi, eno te tama po wai dao,” wali.^b

Te taun Tair dolaide Esekiel gela wali

27 ¹Genuai Bidigo te tiwai po enabolo wai, ²“Tşde bidio, Tair taun dolaibao, tama tibaso, nage gela weyu, tama hobede ebo balia po wao. ³Te taun tamu aşı pade elalu, te tamu aşı pade elalua pabo tş pedai kantri dabe dali te mone me doado bage dobu si eyu, bisnis şe iduali. Ena God Genuai Bidi, eno homugo nago te balia po agaba pusao homu ebao,” wali.

“Tair, nago te tama po weyu,
nage te wiegi yai sawi yai polalubo
taun mu da homu ebo dao.

⁴Te taun nigibo bidi dabego,
te augwaligo nage te wiegi yai sip mu
tiwai pedalumainu ilali,
tama te tamu aşı te nago bidibo pesage tiwai elaluali.

- 5 Augwaligo te ni pain te bulu du
 Hermonde selama, tama te sip nigai.
 Tama augwaligo te wiegi yai ni sida
 te Lebanon tde selama,
 tama te name ugwa walobo ni
 te bobobage dulai dao.
- 6 Tama augwaligo te ni kali te bulu Basande selama,
 te a togobo habesege dabe nigai.
 Tama augwaligo te sip aiyaba mubo
 soyame ni te tobage wiegi yai ni
 me deli te bulu Saiprusde selama, nigali.
 Tama augwaligo te genuai kibu nogi
 elefango genuai kele dabe selama,
 te sip aiyaba sabo soyame saidu au ilali.
- 7 Tama augwaligo te gasa sawi yai name
 ugwa pedai te bulu Isipde selama,
 tego te waligo pogolabo sel nigai.
 Te name ugwa pedai te haniani augo
 dodobolo pai selama, te sel nigai.
 Te sel te sipde walobo ugwa plak tiwai muani.
 Tama augwaligo te husugu yai me mama
 yai name ugwa te bulu Saiprusde selama,
 te sip guni tolasa pabo bidi dulalubo
 madi seselalumainu muani.
- 8-9 Tama te sip tomode se eyu,
 habesege togobo bidi dabe,
 augwali te bulu Saidon taun bidi dabe,
 me te bulu Arvat taun bidi dabe da.
 Tama me badu te taun Biblos bidi dabe
 te sip tomode se eyu,
 te sip aiyaba paliali ni name agebeledu
 te a sip tomoba holobaso te sebelebo se eyu yai.
 Taun Tair, te sipba po kisilama wali,
 te taun Tair nageba digi po olama walio.
 Te nago kolesaga koneai bidi dabe te sip tomode
 tau sabo ebo bidi dabe tiwai da.
 Te gasa t kantri sip dabe tigidali nageba asali,
 tama te sipde se yai bidi dabe te taun
 tomoba pelama,
 te doado bage nago stua dabede abeleyu yai dao.
- 10 Te t kantri Persia, me Lidia,
 me Libia bulu bidi hani dabe,

augwali te nago ami bidi dabe bidali.
 Tama augwaligo te hwıbo sabele dabe,
 me tobolude mubo kapago nigai madi dabe me,
 te nago taun bagulali obode walali.
 Te hani dabe augwaligo te boi hwınama,
 nage tau sabo şe eyu,
 te nago genuai nogi somainu yai dao.

11 Te taun Arvat ami bidi dabe augwali
 te nago taun obo bagulali obode dolalu,
 tama augwaligo te boi bidi dabe asobo
 suainu tonaluali.

Tama te taun Gamat ami dabe
 te obo bobobage nigali taua dabe tede dolalu,
 te boi bidi dabe asobo suainu, no bidibo.
 Tama augwaligo hwıbo sabele dabe
 te nago obode walali.

Te hani dabe augwaligo naga nage tau sobaso,
 te nage wiegi yai sawi yai taun mu pedelai dao.”

Genuai Bidigo enabolo te tama balia po te taun Tairbolo wao, wali.

12 “Tair, te nago mone sabo bisnis şe te bulu tı kantri Spen dali yali.
 Tama augwaligo nagebolo te silva, me ain, me kapa, me soda, te tama
 nai mani, te augwaligo nagede te nai hauwa sainogo tiai dao. 13 Tama
 nago mone sabo bisnis şe te kantri tı pedai Grik dali, me Tubal, me
 Mesek, te tama bulu dabede bisnis şe yali, tama nago nai dabe augwaliba
 mayu yali, te olo mu şe yabo bidi dabe me, te tobage gasa nai dabe me,
 te hanigo te brasgo nigali nai dabe mayu yai dao. 14 Tama nago mone
 sabo bisnis şe te taun Togarma dali yali. Nago nai doado bage augwaliba
 mayu, te nago te hos dabe, me donki dabe, me te boi hwıbo hos dabe
 dobu si eyu yai. 15 Tama te taun Dedan bidi dabego me te nage dali
 mone sabo bisnis şe yali. Tama te tamu aı pade bidibo bulu tı kantri bidi
 dabe hauwago te mone sabo bisnis şe ebaso, tama augwaligo nageba te
 elefango kele dabe mayu, te augwaligo nageba nago doado bage sainu
 te husugu yai ni ebonigo dobu si yalio. 16 Tama te bulu Siria we bidi
 dabe, augwaligo nageba te wiegi yai mama yai name ugwa dabe mayu,
 te augwaligo haniani au yai hobolai name ugwa dabe mayu yali, tama
 te wiegi yai tedela yai name ugwa dabe me, te haniani au ilai mobadi,
 te haniani gasagi yai dila pai masigi dabe me mayu yali, te augwaligo
 nagede doado bage hauwa sainogo tama tiai dao,” wali.

17 “Tama Tair. te Juda me Israel dabego nageba te wit hauwa mayu,
 te pusu nai hani, me te ni oliv wel, me te tobage gasagi yai marasin, me
 gasa nai dabe mobadi yali, te augwaligo nagede sabo nai dobu si abeleyu,
 tama tiai dao. 18 Te taun Damaskus bidi dabego te mone sabo bisnis şe

nage dali eyu, te augwaligo wain ađ dabe nageba mani, te augwaligo te taun Helbonde sali, tama te sipsip nisi dabe augwaligo te bulu Saharde sai dao. ¹⁹Te bulu Wedan, me Grik, te hani dabego me, te hani Usal hani dabego me, te mone sabo bisnis şe nage dali yali. Augwaligo te ain, me sanda te tobage ni me deligo nigai wel, me te tobage nai nogi awi diligo nigai te wiegi yai denami ebo nai, te tama nai dabe sesali, te augwaligo nage dali dobu si ebo hauwa sainu tama yali. ²⁰Te Dedango hani bagego nagebolo te hos dabe tуди dilide dugabo nai satel dologode munama dugayabo ugwa blanket dabe mani, te nago augwali maiabo nai dabe dali dobu si eyu tiali.”

²¹“Te bulu kantri Arebia bidi dabego me, te tđ kantri Kedar tobolu bidi dabego me, te augwaligo nagebolo te kibu sipsip wai dabe me, te omai kibu sipsip me, te meme kibu dabe me mobadi yali, te augwaligo nago mabo nai dabe sabo homu eyu, tama tiai dao. ²²Te bulu Sebade bisnis şe ebo bidi dabe me, te taun bulu Rama bidi dabego me, te gol me, te wiegi yai denami ebo tobage nai nogi pauda me, te wiegi yai sawi yai masigi dabe me sesali, te nage dali dobu si eyu, nago mabo nai dabe sabo eyu, tama şe yai dao. ²³Te taun Haran, me Kane, me Iden, te tama bulu bidi dabego me, te kantri Seba me, Asur me, Kilmat me, te tama bulude te mone sabo bisnis şe ebo bidi dabego nage dali te mone sabo bisnis şe yai dao. ²⁴Tama augwaligo sesali nai dabe te sawi wiegi yai ugwa dabe me, te sisi yai name ugwa me, te augwaligo wiegi yai au ilama hobolai name ugwa dabe me, te tobage wiegi yai dila pai haliga bono, me te tobage au hauwa yai ugwa blanket dabe, me te be soiyameba salobo dodobolo pai somo ugwa dabe augwaligo sesali. Te tobage blanket dabe au wiegi yai hauwa elaluali. Tama augwaligo te nai dabe nagebolo mayu, te nago nai doado bage dabe augwaligo siyu yainogo te tiwai dobu si yalio. ²⁵Te genuai sip dabego te nago walu dabe gasa bulu tđ kantriba sela peyu yalio,” wali.

“Tama naga digi nage te genuai sip me delide te doado bage hauwa pađanalubo tiwai nagede elalui dao. ²⁶Tama te wę habesege bomo elama togobo bidi dabego te ađ bomonama togobaso, te nage genuai tamu ađ tomoba tugi pali. Tiali goli, bomai wali pedaliyu, tama nage dolaibao. ²⁷Tama nago mone tigidali me, au doado bage me, te tigidali sip guni tubo tau sabo bidi me, te sip tomode şe ebo kamda bidi me, te tigidali bisnis şe ebo bidi me, te nago ami bidi tigidali me, te nage dali bidali gasa bidi tigidali, augwali me nage dolali side te tamu ađde hagawaibao. ²⁸Tama te sip guni tubo bidi dabego i dwagila mu i waibao, tama augwali dolobo şe yali te tđ mumunu yali şego te tamu ađ sane nambis me mumunu yaibao,” wali.

²⁹“Tama tialima, te gasa sip te sip tugi pabo madi tugi pelama, tama te sip guni tubo bidi dabe me, te sip tomode şe ebo bidi dabe dali, augwa sip dabe tagalama,

tama augwali tigidali pelama, te tamu aġ saneba doligi paibao. ³⁰Te tigidaligo nagede haliga hobede eyu, dwai gela nagede waibao. Tama augwa te homu dene ebo kolesaga wali peyu, te augwa tobolude pu pilama, tama kelide pila muyu, tama te kelide ugwa begelu, eda begeleyu iduaibao. ³¹Tama augwa tobulu nisi poala şanama, te wane ilaibao. Tama augwa te homu dene ebo side mubo ugwa gudama, te augwali dwai haliga mu eyu, te gela oladu bidaibao. ³²Tama augwa te bidi isaide wabo balia po waibao. Tama augwaligo e tiwai balia po waibao,

‘Tair, te taun me deli
 te nage dolali tiwai gilama me ebeo.
 Nage te tamu aġ tomode elaluali,
³³ tama nago naga walu doado bage
 te gasa t̄ pedai kantriba te tamu aġdu tolali.
 Te we bidi dabe augwaligo te nai dabe
 doado bage siyu,
 te augwa wiegi yai homu pemene yalio.
 Te king dabe augwaligo mone sabo
 bisnis şe nago te naide yali,
 tama augwali te mone sabo bidi mu tiwai pedelali.
³⁴ Tiali goli, megi da, nage te tamu aġde dolobao.
 Tama nage te tamu aġ tomoba mu dulali.
 Te nagede bidali bidi tigidali,
 me te nago doado bage walu dabe dali,
 tigidali te aġde hagawai dao.’

Augwaligo te tiwai balia po waibao.

³⁵ ‘Te tamu aġ p̄de bidibo taun we bidi dabe,
 augwaligo nage dolali po odama,
 te augwali dwai noma mu salio.
 Tama augwaligo king dabe me wi umagi mu eyu,
 te augwaligo gesabidi gasagi yai mu hasegelali.
³⁶ Nage dwagila mu dolali,
 tama nage te t̄de mu ma bidigobeo.
 Tama nage te tigidali mone sabo
 bisnis şe ebo te tigidali t̄ pedaide
 bidibo bidigo nage sulama, te augwali wi mu eyu,
 tama augwaligo te homu yaibao,
 ‘Tiyu, te tiwai şe daba me pedalidali,’
 homu yaibao,’ augwaligo te balia po waibao.’^c

Godigo te po wali, Tair bulu king dolaibao po wali

28 ¹ Genuai Bidigo enabolo te po wali, ² “Tqde bidi, eno homugo nago Tair kingbolo ena God Genuai Bidigo eno po aga dali pusainogo ebo po pusigi pao. Eno po e dao.

Tair king bidi, nago naga nogi ugwaba siyu,
te po wali, nage god me deli dao, wali.

Tama nago bulu te god dabego bulu
yali gilama tamu ađi tomode elalubao.

Mu tama, nago te po wali,
tiali goli, nage god menio, nage olo bidi dao.

³ Awe, nago homugo nago wiegi yai homugo
Danelgo wiegi yai homu kolesaga edelai
da homu te ebao.

Tama nago homugo tigidali geme dualali po dabe
nago koneaiba homu te ebao.

⁴ Te nago genuai homu kolesagago
naga mone bidi pedaliyu,
me nago gol me silva hauwa mu
elaluyu, te homu ebao.

⁵ Tama nago wiegi yai bisnis se elama,
tama nago tede mone hauwa nago salio.

Tama tibaso, nago naga te mone dabe
me te nai hauwade homu elama,
tama nago hagoma genuai mu ebao,” wali.

⁶ “Tama tialima, ena God Genuai Bidi, eno nagebolo megı e obao.

Nago hagoma eyu, nago homugo nago homu kolesaga
te god dabego homu kolesaga
tiwai dao homu te ebao.

⁷ Tama tibaso, eno te homu dene
isađo boi bidi dabe dwai mu teba tagala palama,
tama nage dali boi hwımainogo yaibao.

Tama augwaligo nago naga homu kolesagago sali
wiegi wiegi yai nai dabe tigidali dolagasaibao.
Awe, nago gawebo nai dabe sese augwaligo dolaibao.

⁸ Tama augwaligo nage dolama, mu tagalama,
tama nage naga bulude elama
muaibao, te tamu ađi tomode.

Tama nage aiyaba isai bidigo buluba aiyaba dulaibao.

9 Te augwaligo nage elainogo ebode
 nago augwalibolo po weyu,
 ‘Te ena god me da,’ nago te po waiba homu eba, agawe?
 Mu menio.

Te nago koneaibao, nage olo bidi yabo homu yaibao.
 Tama nage te gasa t̄q kantridu asali
 bidi dabego nogode elalubadi,
 nage god menio homu yaibao.

10 Te boi bidi dabego nage dolama,
 tama nage dwai olo nai meni yai bidi
 tiwai isibo āq yaibao.

Ena God Genuai Bidi, eno po polo wali.”

11 Tama God Genuai Bidigo enabolo po genina ma weyu, te po wali,

12 “T̄qde bidi, nago te Tair king bidide hobedai balia po olama, tama
 agabolo e tama po wao.

‘Tair bulu king bidi, ena God Genuai Bidigo
 po nago odao.

Polobadu nage wiegi yai bidi mu bidiyu,
 tama nago tigidali bidi aiyaba elaluama bidai dao.
 Tama nago homu kolesaga genuai mu elama,
 tama nage tonobo sawi mu yai dao.

13 Te nage te Iden gide bidai bidi tiwai
 āq yai dao, te Godigo wiegi yai gi.
 Tama nage te wiegi yai sawi yai masigigo au yai dao,
 te augwaligo te masigi daganabo
 nai dabe te golgo nigai.

Te masigi dabe e dao,
 rubi, me topas, me daimon, me beril,
 me kanilian, me jasper, me sapaia,
 me emeral, me ganet dao.

Te nai dabe tigidali eno dodolagalali,
 te nage eno te t̄qde pedalobode somainogo eyu.

14 King, eno nage tonalubo ensel bidi
 tiwai sa muai dao, tama nage dolaluyu,
 tama naga bogo dinigalu dolaluai dao.

Tama nage eno bulu dude bidiyu,
 tama nage sawi yai udula pai masigi
 tomode bilai dao.

15 Te eno nage t̄qde pedelemainu yali sogo da,
 nago kolesaga te dwagi yai mu yali,
 tama nago nai mede me geda mubeo.

- Tiali goli, nago nosali dwai kolesaga elama,
tama nago eno gedude seęę elaluali.
- 16 Nago bisnis seę bulu hauwaba yali.
Tama nago te we bidi dabe dali hwınama,
tama nago bisnis seę tau somainogo yali,
tama nago seęę sali.
- Mu tama, nage tonalubo ensel bidi tiwai dao,
tiali goli nage eno gedude meda mu yai pedelai dao.
Tama eno nage sela şanama,
tama nago eno bulu du taga soali.
Tama nage te udula pai masigi tomode ma me bidibeo.
- 17 Nago homugo tiali,
nago gesabidi sawi yai mu dao homu yali,
tama nago hagoma mu elama,
tama naga nogi ugwaba salio.
- Nago genuai homu kolesaga elaluali,
tama nago homugo te homu kolesagago
te genuai nogi sabo dao homu yali.
- Tiali, te po page delide naga tama
eno nage aiyaba te tıba şawai dao,
te gasa meba king dabego nage sulama,
tama augwaligo nage gisugu dwai mu
momainogo yali.’
- 18 ‘Tair bulu king bidi, nago te bisnis seę yali sogo,
te nago dwai kolesaga hauwa mu yalio,
tama nago te seęęęo te lotu be dabe
dwai meda yai mu pedelalio.
- Tama tibaso, eno te isi te taun tomode
pedelemainu elama, tama sese ula silali,
tama te isi sisi dulu keli hali naga te elaluali.
- Tama gasa tigidali bidi hanigo suali.
- 19 Nage dolama, mu dolai elalubadi,
nage tıde munu me ma bidigobeo.
- Tama tigidali we bidigo
te dwai seę dabe nagede pedelali po odama,
tama augwali noma dwai mu salio.’

Nago te po te Tair king bidibolo pusao,” Genuai Bidigo enabolo te po wai.

Godigo te po wali, taun Saidon dolaibao wali

20 Genuai Bidigo enabolo te po wali, 21 “Tıde bidi, nago te taun Saidonba ugwa tonama, tama te po wao, te aga dolaibao po wao. 22 Nago te Saidon

dabebolo God Genuai Bidi eno augwalibolo yabo po pusao. Augwalibolo walao, ena God, eno augwali dali boi bidi homu elama, tama eno augwalibolo eno tedali gasagi yai kolesaga augwalibolo ola mawaibao. Tama augwaligo enabolo genuai nogi mawaibao. Tama gasa hani dabe mebago eno te Saidon dabebolo yabo te kolesaga augwaligo sulama, tama augwaligo eno bomo koneaibao. Tama te sogo naga te Saidon dabe augwaligo koneaibao, ena deli naga ena Genuai Bidi dao homu yaibao. ²³Te eno augwaliba genuai gasi dwai tagala palaibao. Tama eno tigidali badu boi bidi dabe hogodolama, tama augwali dali hwınama, tama augwaligo we bidi hauwa ela silmainu yaibao. Tama te Saidon dabego kaneme dabe te taun sunumi dabedu kegelsoaibao. Tama te Saidon dabego bugagia mu koneama koneaibao, ena deli naga ena Genuai Bidi dao homu yaibao,” wali.

Godigo Israel dabe dali wiegi yai şe yaibao

²⁴“Ena Genuai Bidi, eno po genina ma weyu, te po obao. Te bidi hani dabe augwali Israel dabe  ade bidalubo bidi dabego Israel dabe dali boi bidi mu elama, tama augwali dali dwai şe mu yali, te sesane yai bonogo bidi tigde enebo tiwai yali. Tiali goli, augwaligo te kolesaga nosali ma elamo dao. Tama te sogo te Israel dabe augwaligo koneaibao, ena deli naga ena God Genuai Bidi dao homu yaibao,” wali.

²⁵“Ena God Genuai Bidi, eno te po obao. Te eno wiegi yai doloba pai kolesaga te Israel dabe tomode ola mobaso, tama gasa hani bidi dabego sueibao. Te sogo eno te Israel dabe augwali eno te gasa gasa buluba sela şawani bage deli deli ma oda selama, ma odasa asaibao, tama eno augwa kantriba ma odasa asaibao. Tama augwali augwa t de mu tama mu bidaibao, te eno Jekopbolo mani, te t  dao, eno şe bidibolo. ²⁶Tama augwali bugagia bidiyu, augwa be dabe şe eyu, augwa wain gi buluyu yaibao. Tama eno gasa hani bidi dabebolo eno dene mawaibao, te augwaligo te Israel dabe dali dwai şe yali bage. Tama te sogo te Israel dabe augwali bugagia bidiyu, tama augwaligo e tama koneaibao, ena deli naga God augwaligo Genuai Bidi dao homu yaibao,” te po wai.^d

Godigo te po wali, kantri Isip dolaibao po wali

29 ¹Te da kalabus bulude bidibadi te kibu be nogo si, te 10 wabode, te polua nogo si, te 12 deide, Genuai Bidigo enabolo te po wali, ²“T de bidi, nago Isip king bidiba ugwaba tonao, tama te po wao, ena God eno aga dali, aga Isip we bidi dabe dali sese dolaibao po wao. ³Nago te God Genuai Bidi eno po agabolo pusuyu, te po walao,

‘Isip king bidi, ena nago boi bidi pedalobao.

^d 28:26 Jol 3:4-8; Sek 9:1-2; Mat 11:21-22; Luk 10:13-14

- Nage te pukpuk me genuai deli
 te Isip dabego wę dabede pila mubo tiwai dao.
 Nago te po wabo dao.
 Nago naga digi naga ma geselai dao olama,
 tama te ąi Nail te naga ąi dao wabo dao.
- 4 Tama tialima, eno huk nago penanede munama,
 tama te sugų dabe nago abolode
 dagana somainu yaibao.
 Tama eno nage kegelama,
 tama te sugų dabe dali dage ąi tagalama,
 dage buluba soaibao.
- 5 Tama eno nage te sugų dabe dali dage selama,
 te wa pai bulu besela şawaibao.
 Tama nago tigi te tųde pila mubadi,
 tama nago tigi pubulabo bidi meni yaibao.
 Tama eno te bulu hasa dabe,
 me ba dabego nago tigi tumainogo sula tagalaibao.
- 6 Tama tialima, dage Isip dabego koneagameo,
 ena deli naga ena God Genuai Bidi dao
 homu yagameo.’
 Te po te Isip king bidibolo wao,” wali.

“Te po me agabolo pusao, ‘Te Israel dabego homugo tiai da, dage Isip dabego augwali tau sogowe homu yai da, te boi hwı̄bode. Tiali goli, dagego augwali me tau sai menio. King, te Israel dabe augwaligo homugo tiali, nage te nogo tolasa pabo bomai dono tiwai dao homu yali. Tiali goli, menio.’^e 7Te augwaligo nage nogo tola selama, bilainogo ebode da, nage te sigi dili tiwai bomo togwa pelama, bidigo punali badu enebo tiwai yali. Augwaligo nage daų olama touwali, tiali goli nage togwa pali, tama augwali tula munama, augwaligo tudi dolali. Tiyu, nago augwali tau sabeo. 8Tama tibaso, ena God Genuai Bidi eno te po obao. Te eno boi bidi dabego dage Isip dabe dali boi hwı̄agasomainu odasa asaibao. Tama augwaligo te we bidi eleyu, me hasa dabe eleyu yaibao. 9Tama te kantri Isip dolama, tama te kantri te olo tų bulu mu elaluaibao. Tialima, dagego bugagia mu e tama koneaibao, ena deli naga ena Genuai Bidi dao homu yaibao,’ te po agabolo wao,” wali.

“King, nago te po wai dao, naga digi te wę Nail nigilai dao po wai dao. Tama nago te po wali, te naga ąi dao, wali. 10Te po te dwai mu dao. Tama tialima, ena nago boi bidi me te ąi Nailgo boi bidi pedalibao. Tama eno tigidali Isip bulu badu olo tų mu pedalomaiu ilaibao. Te taun Mikdol not

^e 29:6 Ais 36:6

badu gagalama, tama pelama, taun Aswan te saut badu usu nigi paibao, te Sudan t̄q d̄aj p̄aba usu nigi paibao. ¹¹Tama te kibu be 40, bidi sese si kibu bede, te nai dabe me deli te kantri Isip tomode me elalugobeo. Tama tede bidi ma hasa dabe tede me biligobeo. ¹²Tama eno e kantri Isip geninama mu dolaibao. Te Isip taun dabe, me te t̄q sese dali, mu dwai dolai elalueibao, te gasa dolali t̄q dali taun dabe dali aiyaba elalueibao. Tama eno te Isip dabego taun dabe mu dolama tagalama, tama augwali kibu te bidi sese si kibu be mu tiwai tama me bidaibao. Tama eno te Isip dabe augwali augwa kantride sela şawaibao, tama augwali gasa hani we bidi tomode bida bida paibao,' agabolo te po wao," wali.

¹³“ ‘Ena God Genuai Bidi, eno te po wali dao. Tama te 40 kibu be silibo si, teda eno te Isip dabe augwali eno sela şanama pali te kantride ma oda saibao, tama augwali augwa bulu t̄q muba ma odasa asaibao. ¹⁴Te augwali asela silama da, teda augwali u badu te saut badu te Isip dabego t̄qde bidaibao. Tama Isip bulu te polobadu bomai kantri bidali tiwai ma bidigobeo. ¹⁵Te eno augwali olo nai tiwai ilama, tama augwaligo polobadu te tobolu gagea pelama, meba kantri dabe tonaluali yali gilama me egobeo. Augwaligo te gasa t̄q pedai kantri tonaluabo bomo me elalugobeo. ¹⁶Tama te Israel dabe augwaligo te şe te Isip dabede pedelali şe suaibao, tama augwaligo koneaibao, augwaligo te Isip dabego augwali tau sao walide augwaligo şeşe sali koneaibao. Tama te Israel dabe augwaligo te kolesaga ma egobeo. Tama te Israel dabe augwaligo e tama bugagia koneaibao, ena deli naga ena God Genuai Bidi da homu yaibao.’ Esekiel, nago te po te Isip king bidibolo wao," Genuai Bidigo te po wai.

King Nebukatnesargo Isip bulu aiyaba elaluaibao

¹⁷Te deli wabo polua, te deli wabo dei te da kalabuside bidibadi kibu be 27 wabode, Genuai Bidigo enabolo e tama po walali. ¹⁸“T̄qde bidi, odao. King Nebukatnesar aga ami bidi dabe dali, augwaligo te taun Tair dali boi hw̄ibo şe te yali. Kingo aga ami bidi dabebolo şegai hw̄ibo nai dabe tolomainu ilama, tama te tialigo augwali tobolu wane ilama, tama augwaligo nage wali dagala palio. Tiali goli, king aga ami dali augwali olodali bomai şe yali. Augwaligo te hw̄ibode augwaligo wiegi yai nai me siyu ebeo. ¹⁹Tama tialima, megi da, God Genuai Bidi eno te po obao. Eno te Isip dabego t̄q te king Nebukatnesarbolu mawaibao. Agai dolama, tama Isip dabego mone dali, doado bage dali sese sela paibao, te aga ami bidi dabego bomai şe yali pe tiwai saibao. ²⁰Te eno Isip agabolo, me aga ami dabe, augwalibolo mawaibao. Te augwa bomai şe yali te pe tiwai saibao. Magi baso meni, te boi augwaligo hw̄janide te eno şe dao. Te da God Genuai Bidi eno po dao," wali.

²¹“Tama te şe pedalobo sogo da, teda eno Israel dabego bomo ma pedalumainu ilaibao. Tama t̄qde bidi, ena nago Israel tomode po

bomonama omainu ilaibao. Tama augwaligo bugagia koneaibao, ena deli naga te Genuai Bidi dao homu yaibao,” te po wali.

Genuai Bidigo Isip bulu dolaibao

30 ¹Genuai Bidigo enabolo e tama po walali, ²“Tq̄de bidi, eno homugo nago ena God Genuai Bidigo po pusomainu homu ebao. Nage gela bomonama mu olama, tama hobede mu dao e po wao, ³‘Pāde tama dwai sogo pedelaibao. Te da, te Genuai Bidigo tigidali we bidibolo dene mabo sogo pedelaibao. Te da te p̄q̄ pedalobo genuai sogo yaibao, tama te sogo te we bidi hauwa dolobo sogo pedelaibao. ⁴Tama te sogo te boi bidi dabego te Isip dabe dali boi hw̄ȳ yagasaibao. Tama genuai s̄ēq̄ te Sudan we bidiba pedelaibao, te Isip saut badu elalubo distrik dao. Te boi bidi dabego Isip we bidi hauwa elama, isila silama, tama te kantri dolama, tama Isip dabego mone me doado bage selama, tama augwa kantriba selasa paibao,’ te po wao,” wali.

⁵“Tama te hw̄ibode me Isip amigo abelali bage, te Sudan hani ami bidi hauwa, me Lidia, me Libia, me Kup, me gasa hani bidi me, augwali te hw̄ibode te Isip bage dali isaibao,” wali.

⁶“Tama ena Genuai Bidi eno po genina ma weyu, te po obao,

‘Te u not badu taun Mikdoldu gagalama,
tama taun Aswan te saut badu elalubo
buluba usu nigi paibao,
te boi bidi dabego te Isip dabe tau siyu,
hw̄ibo bidi dabe sese tama ela silaibao.
Te Isip dabe augwaligo augwa bomode
wiegi yai homu pemene mu ebo dao.
Tiali goli, te bomo te mu tama sia saibao.
Te da God Genuai Bidi eno po dao.

⁷Te eno Isip dabego tq̄ dolaibao,
te dolobo s̄ē genuai mu yaibao,
tama eno agai taun dabe mu dolaibao.

⁸Te eno Isip dabego nai dabe sese tama isi ulama,
tama te Isip dabe tau sabo s̄ē ebo
bidi dabe me dolaibao.

Tama te Isip dabe augwaligo e tama bugagia koneaibao,
ena deli naga ena Genuai Bidi te yaba
homu yaibao,’ te po obao,” wali.

⁹“Te Sudan dabe augwali bugagia bidiyu, augwaligo homugo magi s̄ē me augwalide pedalogobe homu te ebao. Tiali goli, eno te Isip bulu dolobode, teda eno te bidi dabe Sudanba te geba sipdu pomainu tagala

palaibao. Augwali te Nail i daide te sipdu pelama, tama augwaligo te we bidibolo eno te Isip dabe dali yali şe po pusaibao. Tama te Sudan dabe augwali noma dwai mu saibao. Te tamadi tama eno te te tama tiaibao,” wali.

- 10 “Ena God Genuai Bidi,
 eno po genina ma weyu, te po obao,
 te eno te king Nebukatnesar aga
 ami dali augwali aselama,
 augwali Isip dabego mone me tigidali nai dabe
 somainu sula tagalaibao.
- 11 Te Babilon dabe augwali te bidi hani dwai mu dao,
 te homu dene işabo bage dao.
 Tama augwali aselama, tama Isip
 mu tama dolagasaibao.
 Te augwaligo augwali te bainat hwago elama,
 tama isai bidi dabego tigi te Isip bulu
 tde mu paana paibao.
- 12 Tama eno te we Nail sula somainogo ilaibao.
 Tama eno gasa kantri bidi dabego
 Isip bulu sese dolomainu ilaibao.
 Tama bidi dwai dabego augwaligo
 te Isip dabego t saibao.
 Te da Genuai Bidi eno po dao.”

13 “Ena Genuai Bidi eno po genina ma weyu, te po wali. Te eno te taun Memfis te Isip bulude te tibo god dabe piksa noma sese tama mu silaibao. Te eno Isip dabego king sela şanama, tama Isip dabego king meni emainu yaibao. Tama eno te Isip dabe augwali wi dwai mu emainu ilaibao.

14-16 Tama Isip bulu sese tama isi ula silaibao. Tama eno u saut badu te Isip bulude te olo bulu pedalomainu yaibao. Tama taun Soan te not badu te bulu sese tama isi ula silaibao. Tama te boi bidi dabego te taun Tebes bagulali obo aluama, tagalaibao. Tama we bidi hauwa elama, silaibao. Eno taun Pelusium şee ebaos, te da te Isip dabego bomai taun dao, tama eno aga dene genuai menama, tama augwali şee me dene genuai mu saibao. Tama eno Memfis dabebolo şee sesemane sogo dene mawaibao.

17 Tama te boi bidi dabe augwaligo te taun Heliopolis me Bubastis taun gesi bidi dabe sese tama ela silaibao. Tama augwaligo te taun side we bidi dabe sese nogo bono dunama, tama gasa kantriba kalabus igi paibao.

18 Te Isip dabe augwa bomode augwali gana peyu yai da. Tiali goli, eno augwaligo bomosese silimainu yaibao. Tama te sogo naga te taun Tapanesde huliasaibao. Tama genuai pogo te Isip bulu tigidali tama

mesega saibao. Tama te boi bidi dabego te Isip bulude tigidali taunde we bidi dabe selama, tama augwali gasa kantriba kalabus igi peyu, odasa paibao. ¹⁹Tialima, te tama kolesagago eno Isip dabe dene mawaibao. Tama augwaligo e tama bugagia koneaibao, ena deli naga te Genuai Bidi te yabao olama koneaibao.” Genuai Bidigo te po wali.

Isip king bidigo bomo sia sali

²⁰Te hasia wabo poluade, te dei namba 7de, te kibu be 11 wabo, te kibu bede da kalabuside bidibadi Genuai Bidigo enabolo te po walali, ²¹“Tode bidi, eno Isip bulu king bidigo nogo aboai dao. Tama bidi mego agai nogo pobilibeo, me te ni name munama, kebeo. Te nogo bomo ma elama, tama te bainat ma nogo tulama hwjmainu me ebeo. ²²Tama tialima, God Genuai Bidi eno e po te obao, eno Isip king bidi dali boi bidi te ebao. Tama eno agai nogo si tama togolama tagalaibao, te hasia aboai nogo dali, te wiegi yai nogo dali tama togwa paibao. Tama te bainat agai nogode honoga pelama, tulaluaibao. ²³Tama eno te Isip we bidi dabe tedela palama, te gasa kantri dabeba sela şawaibao. ²⁴Tama tialima, eno Babilon king bidigo nogo si bomo ilama, tama ena bainat hwq te agai nogoba muaibao. Tiali goli, eno Isip king bidigo nogo si tama togwa şawaibao, tama aga genuai dene mu saibao. Tama Babilon king bidigo gedude aga hwqwa dwai mu waibao, te bidi me isainogo wabo tiwai yaibao. ²⁵Mu tamao, eno agai bomo sela şanama, tama eno Babilon king bidigo bomo emainu ilaibao. Eno ena bainat te Babilon kingbolo mawaibao, tama agai Isip bidi dabe elama isilaibao. Tama te sogo te Isip dabe augwaligo bugagia koneaibao, ena deli naga ena Genuai Bidi da olama, koneaibao. ²⁶Tama eno te Isip dabe sela şanama, tama augwali te tedela pelama, augwali te gasa kantri dabeba subigila bidigi paibat. Tama te sogo augwaligo bugagia koneaibao, ena deli te Genuai Bidi dao, te koneaibao,” wali.

Godigo te po wali, Asiria king bidi te wiegi yai ni sida tiwai dao po wali

31 ¹Te namba 11 wabo kibu bede da kalabuside bidali kibu bede, te sela wabo poluago deli wabo deide, Genuai Bidigo enabolo te po walali, ²“Tode bidio, eno homugo nago eno po te Isip king bidi dali, aga we bidi dabe dali, augwalibolo eno po pusumainu ebao. Te po da, e dao,

‘Dage Isip dabe, dage bomai bidi hani mu dao.

De mu dagego elalubo bomai bomo tiwai elalubowe?

³Te Asiria dabede homu kone palao.

Augwali te kantri Lebanonde elalubo

te bobobage ni bq o sida tiwai

bomonama mu dolaluai dao.

- Te nigo te wiegi yai bobobage
 nologo dabe elaluyu, me agai dologode
 wiegi yai kedau elaluyu yai dao.
- Te ni b̄q te bobobage mu elama,
 tama meba ni dabe aiyaba elaluai elaluali.
- 4 Tama t̄q tomode elaluali w̄go
 te ni sida genuai mu holomainu ilali.
 Te w̄ te t̄q daide ugwadu pedaliyu,
 tama te ni page p̄de te āi biliyu yali,
 tama tilama nosali te āi te gasa meba ni dabeba pali.
- 5 Te w̄ hauwa mu elaluyu,
 tama te ni genuai mu holali,
 tama gasa meba ni dabe aiyaba elaluali.
 Tama agai nologo dabe genuai mu elama,
 tama bobobage mu yali.
- 6 Tama te haniani ba dabe augwaligo
 augwa be te ni nologoba s̄ yagasai dao.
 Tama me te bulu hasa dabe augwali
 te ni nologo dologoba bidagaselama,
 tama augwaligo augwa ḡq̄
 te ni nologo dologode sai da.
 Tama tigidali kantri we bidi augwali
 te ni dologoba duayagasiyu yai dao.
- 7 Te mu tama dao, te ni da,
 te polalubo sawi yai mu dao.
 Agai te bobobage nologo mu elalubao,
 tama agai pedali te t̄q dologode
 elalubo w̄ba dulubo dao.
- 8 Te eno gi Idende te ni tiwai wiegi yai ni me elalubeo.
 Agai te tigidali te gide sida ni tiwai me edelai elalubeo.
 Tama te ni sidago nologogo te ni paingo nologo
 aiyaba elaluai elalubao,
 me te eno gide meba gasa ni dabe
 aiyaba elaluai elalubao.^f
- 9 Ena digi te ni nologo hauwa holomainu ilama,
 tama aga wiegi yai ni holomainu ilai dao.
 Tama tialima, eno te gi Idende
 tigidali ni dabe augwaligo te ni p̄ş̄ yalio,^g
 te po pusao,” wali.

^f 31:8 Gag 2:9

10 “Te bobobage ni sida bõ, te Asiria tõ kantri da, agai hagoma dogia pelama, tama aga tobolu gagea pabo şe ebo genuai mu yai dao. Magi baso meni, aga ugwanu bobobage mu holama, meba ni dabe aiyaba elalui baso. Tialima, megi God Genuai Bidi, eno agade pedelali nai dabe po pusaibao. 11 Eno aga tudi ola mawai dao. Tama eno aga gasa bomai king mego nogoba mani. Tama te kingo te ni agai yali dwai kolesaga wei ponoyu, dene mawai dao. 12 Tama homu dene işabo bidi hani dwai mu dabe mu aselama, tama te ni bõ gelama, tõba degelama, tama olo tõde elalumainu yali. Tama agai nologo dabe da, te bulu du dabeba, me malu buluba, me bulu bubiabi togoalui madi totogalui dao. Tama te we bidi hani augwali polobadu te ni nologode polobadu duala sagasiyu yali, te bage augwaligo tagalama, subigila pepelawai dao. 13 Te ni tõde pila mubadi, te ba dabe aselama, tama agaba ma duayagasai dao. Tama te bulu hasa dabe auwali me aselama, tama te ni nologo page te ni tigiba teba bidagasai dao. 14 Tama tibaso, nosali da, eno te ni tiwai bobobage me holomainu sula tagalogobeo. Te augwaligo we hauwa sobadi me tagalao, augwali ugwanu bobobage me hologobeo. Menio. Augwali sese isimainu yaibao. Te bidi dabe yali gilama tama augwali te isai bidi dabego buluba aiyaba dulaibao, te po te Isip bageba pusao,” Genuai Bidigo enabolo te po wali.

15 “Ena God Genuai Bidi, eno te po obao. Tama te ni isilama, tama te isai bidigo buluba polo pai digi da, te da eno te tõ dologode we dabego aga hobede emainu ilama, tama aga mesega somainu yaibao, tama eno te we dabe paliama, tama augwali ugwaba tõba ma holomainu egobeo. Tama tiyu, te iş dabe hauwa sula siyu yai dao. Tama eno te Lebanon bulu du dabede be hulua siyu emainu yali. Tama meba gasa ni dabego te nide hobede elama, tama augwali me sasia pai dao. 16 Te eno te ni te isai bidi dabego buluba polo şawai madi da, aga moni busugu wabo odama, teda tigidali kantri tõ mobodo yai dao. Tama te me gasa wiegi wiegi yai ni dabe te isai bidigo bulude polo bidali ni dabe, augwaligo te ni dolai sulama, tama augwali me wiegi yai homu dwasianu yai dao. Te augwali te iş hauwa sali ni dabe, augwali Iden gi ni dabe dao, me augwali te kantri Lebanonde wiegi wiegi yai ni dabe me dao. 17 Te ni bõ o sida nologo dologode dualalu yali bidi dabe augwali me, te ni tau siyu yali te bidi dabe dali, augwali te ni dali te isai bidi dabego buluba pai. Tama augwali te boi bidi dabego bainat hwaõ elai bidi dabe dali bidaibao, te po pusao,” wali.

18 “Te Isip king, aga we bidi umabo mu dali, augwali te ni bõ sida tiwai dao. Te Iden gide te ni bobobage wiegi yai te ni tiwai me holai menio. Tiali goli, megi da, te ni aga te Iden gide ni tiwai pedelama, tama aga te isibo bidigo buluba aiyaba dulaibao. Tama aga te wiegi yai kolesaga wali işabo bidi dabego bidi hani dali bidaibao, me te boi bidi

dabego boide elali bidi dabe dali bidaibao, te gų pagede.’ Ena God Genuai Bidi, eno po polo wali dao,” wali.

Isip king dolaibao

32 ¹Te hasia wabo dei, te namba 12 polua, te namba 12 kibu bede da kalabuside bidali sogo, Genuai Bidigo enabolo e tama po walali, ²“Tqde bidi, nago Isip king bidide hobedai gela weyu, e tama balia po wao,

‘King, nago homugo nage te meba kantri tomode
te boma pai laion yowi da homu ebo dao.

Tiali goli, menio.

Nage te moni pukpuk me deli te węde bidiyu,
şaşą subigila şayü ebode wę dunugu
ilibo pukpuk tiwai dao.

³Tama tialima, ena God Genuai Bidi

eno e tama po e obao,
te eno we bidi hani hauwa mu odasa asaibao.

Tama eno tola sabo wa nageba şanama,
tama nage tola saibao,
tama augwaligo nage wę kemi saneba ugwaba
kegasa asaibao.

⁴Tama nage eno tqba ugwa sana palaibao,

awe, te pepeli diliba muaibao.

Tama eno tigidali ba dabe,
me eno tigidali bulu tqde hasa dabe odasa aselama,
nage tumainogo yaibao.

Tama augwaligo haliga mu paşana paibao.

⁵Tama eno nago te tigi meba selama,

tama bulu duba şanama,
tama nago te mi dabe me dili dabego
te odogo malu bulu me paşana paibao.

⁶Tama eno nago kaneme digibuluba gea palaibao.

Tama te kaneme agai tigidali ađ dabe usu elama,
tama tigidali bulu du dabe mesega sigi peyu yaibao.

Tama te odogo malu bulu dabe
te nago tigi migo paşana mu paibao.

⁷Te eno nage silibo sogo da,

teda eno dagalu halua selama,
tama tigidali hq dabego ula sula somainogo yaibao.

Tama me eno te pogo te giliga mesega
somainu elama,

tama te giliga ula munu ma me egobeo.

- Tama te polua me ula me egobeo.⁸
- ⁸ Awe, eno tigidali dagalude ula dabe geme dualaibao.
Tama nago kantri mu hulua saibao.’
Te da God Genuai Bidi eno po dao,” wali.
- ⁹ “Te we bidi hauwago eno nage polo dolali po odama,
tama augwali wi dwai mu yaibao.
Tama te po da, te kantri dabe nago
susiama yali te bulu dabeba usu nigi paibao.
- ¹⁰ Te nage eno bainat hwaĝo dolobo sogo,
te king dabe, me te tigidali kantri
we bidi dabego sulama,
tama augwali wi dwai mu selama, didibili elama,
tama augwali noma mu saibao.
Awe, te sogo tama te king dabego te homu yaibao,
tiyu Godigo da dali te tiwai se da dali
idali homu yaibao.’ ”
- ¹¹ “Te po wao, ‘Isip king, ena God Genuai Bidi,
eno te tama po wali dao.
Te Babilon kingo nage dali hwı yagasaibao.
- ¹² Te eno te dwai kantrigo
te homu dene isiabo ami bidi dabe
dwai mugo nago we bidi dabe
sese ela silagasomainu yaibao.
Tama augwaligo dage Isip dabego
wiegi yai homu gana pabo
te nai dabe tigidali mu dolagasaibao.
- ¹³ Tama eno nago tigidali kau kibu dabe
augwali tigidali we tubo pesagede ela silaibao.
Tama te bidi me kau kibu te aıde biliyu,
te aı dunugu ilabo ma meni yaibao.
- ¹⁴ Tama tialima, eno te tigidali aı dabe
wiegi yai elaluyu,
tama bugagia soayu ilaibao.
Te God Genuai Bidi eno po dao.
- ¹⁵ Te eno nago we bidi ela silama,
tama nago kantride tigidali nai dabe
sela şana silai madi da,
teda te kantri te olo to mu pedalaibao,
tama da, dage Isip dabego bugagia koneaibao,
ena deli naga ena Genuai Bidi dao homu yaibao.’

⁸ 32:7 Ais 13:10; Mat 24:29; Mak 13:24-25; Luk 21:25; Ped 6:12-13; 8:12

Te tama balia po pusao,” wali.

¹⁶“Tama te gasa kantri we sibigo augwaligo te hobedai balia po waibao, augwaligo te dage Isip dabe homu dene eyu, gela wabode te balia po waibao. Ena God Genuai Bidi eno po polo wali dao,” te po wali.

Te isai bidigo bulude bidibo we bidi dabe

¹⁷Te da kalabus te Babilon bulude bidibadi, kibu be namba 12 wabo sogo, te namba 15 deide, te namba 12 poluade, te kibu bede God Genuai Bidigo enabolo e tama po walali. ¹⁸“Tode bidi, nago hobedai gela te genuai Isip we bidi hanide wao. Tama nago augwali te meba gasa bomai kantri we bidi dabe bidibo pesageba, te isai bidigo buluba talua sigi pomainu nago tagala palao. ¹⁹Te Isip dabebolo e tama po walao. ‘Dagego homugo dagego ugwaba ela holama, tama dagego gasa we bidi aiyaba elalui dao homu eba, agawe? Mu menio. Polo tama dage te gasa hani bidi dabe, te dwai kolesaga ebo we bidi hanigo bidi dabe bidalubo isai bidigo buluba bidigi pişo, te wiegi yai kolesaga wali pişabo bidi hani dali bidigi pişo,’ te po te Isip dabebolo wao,” te po wali.

²⁰“Tode bidio, bainat hwa te Isip tode ami bidi dabe polo elabo dola muai elalubao. Augwali isimainu sula tagalama, tama augwali te gasa hani meba te boide isali bage dali bidigi pomainu yao. ²¹Te isai bidi dabego bulude da, te boi hwişbode genuai nogi yai bidi dabego te Isip dabe, me augwali sali bidi dabe subode augwali wiegi yai homu yaibao. Augwali te buluba aiyaba dulama, tama augwaligo te Isip dabeba hae weyu, e tama po waibao, ‘Te wiegi yai kolesaga wali pişama ebo hanigo bidi dabe, te augwali e buluba dulama, tama augwali e bulude te bidibao. Te boi bidi dabego augwali elama, isilai dao,’ te gų pagede bidibo bagego augwalide te po waibao,” wali.

²²“Kantri Asiria aga ami bidi dabego gų page dali te bulude te elalubao. Te boi bidi dabego augwali boide ela silai dao. ²³Tama augwaligo gų page te bulu aiya badu mu elalubao. Tama Asiria kantri aga gų page te tomode, te Asiria dabe augwali isişama ebadi da, augwaligo hauwa we bidi wi mu emainu ilai dao,” wali.

²⁴⁻²⁵“Tama kantri Elam me te bulude naga te elalubao, me te ami bidi dabe te boide isali bidi dabego pesage badu te elalubao. Tama te Elam kantri ami bidi dabego gų pagego te kantri Elam bagua sai elalubao. Te boi bidi dabego te ami bidi dabe boide elai dao. Te Elam dabego wiegi yai kolesaga wali me pai menio. Tama me ma, augwali isişama ebadi da, augwaligo we bidi hauwa wi emainu ilai dao. Tiali goli, augwali megı da, isai bidi dabego buluba bidigi pali. Tama tibaso, augwali hale dwai mu eba,” wali.

²⁶“Te kantri Mesek me kantri Tubal si, me augwa ami bidi dabe dali, te buluba naga bidigi pali. Tama te kantri sigo gų page te ami

bidi dabego gu page tomode elalubao. Te boi bidi dabego augwali ela silai dao. Te kantri Mesek me Tubal sigo te wiegi yai kolesaga me yai menio. Tama me ma, augwali isişama işabadi, augwaligo kantri hauwa wi emainu ilai dao. ²⁷Te bidi dabego te ami bidi dabe augwali te dwai bidi dabe pubalobo tiwai tama pubalai dao. Augwaligo te polobadu bidali genuai nogi yai ami bidi dabe pubalobo tiwai kolesagago pubulai menio. Augwaligo te nogi yai polobadu bidali bage pubaluyu, augwaligo augwa bainat augwa tobolu dologode muyu yai dao. Te Mesek me Tubal dabe augwali augwa dagede augwali isalio. Magi baso meni. Te augwali bidibadi, augwaligo te we bidi hauwa wi mu iliyu yai dao,” wali.

²⁸“Tama kantri Isip me dolama, tama aga me te boi bidi dabego elali bidi dabe tomoba bidigi paibao. Te bidi dabe augwali te dwagi yai kolesaga işawai bidi hanigo bidi dabe dao,” wali.

²⁹“Tama kantri Idom me te isai bidigo bulude te bidibao. Aga te aga king dabe, me augwa tobolu bidi dabe dali te bidibao. Polobadu te Idom dabe augwali bomai ami bidi dabe mu bidai dao. Tiali goli, megi da, augwali isilama, tama augwali te hwı̄bode boi bidi dabego ela muai bidi dabe dali teba bidigi paibao. Te bidi dabe augwali te wiegi yai kolesaga wali pişama yai bidi hanigo bidi dabe dao,” wali.

³⁰“Tama u not badu king dabe me te bulude te bidibao. Tama me te Saidon dabe me augwali dali te bidibao. Polobadu augwali bomai bidi hani bidiyu, augwaligo bidi hani hauwa wi ilai dao. Tiali goli, megi da, augwali polo isila pelama, augwali hale dwai mu ebao. Magi baso meni. Augwali te buluba bidi meba dali bidigi pali, te boi bidi dabego boide elai bidi dabe dali bidigi pali. Te bidi dabe augwali te wiegi yai kolesaga wali pişama yai bidi hani bidi dabe dao. Augwaligo me te isai bidi buluba aiyaba dulali bidi dabego sali hale tiwai naga salio,” wali.

³¹“Te Isip king bidi aga ami bidi dabe dali, augwali te buluba dulubo sogo da, teda agai me te meba hani te hasia bidali bage bidibo suaibao. Tama agai homu dwasianu wiegi yai elama, tama aga hale genuai ganama egobeo, te aga ami dabe dali, te boi bidi dabego augwali elai bidi dabe dao. Te da God Genuai Bidi eno po dao. ³²Ena digi te Isip king bidi aga ami dali augwali hodolama, tama augwaligo we bidi hauwa wi dwai mu emainu ilai dao. Tiali goli, megi da, boi bidi dabego Isip dabe augwali boide elama, tama augwali te isai bidi dabego buluba bidigi paibao. Tama augwali te boi bidi dabego boide elai bidi dabe dali isai bidigo buluba bidigi paibao. Te bidi dabe augwali te wiegi yai kolesaga wali pişabo bidi hanigo bidi dabe dao. Ena God Genuai Bidi eno po polo wali dao.” Te po wali.

Godigo te Israel dabe augwali bugagia ma bidimainu ilaibao

(Daı 33-37)

Godigo Esekiel te bidi tonalubo bidi nigilali

(Ese 3:16-21)

33 ¹Genuai Bidigo enabolo e tama po wali, ²“Tode bidio, nago naga hani bage, te Israel bage dali, te Juda we bidi dali si, augwalibolo te bidi tonalubo bidigo ebo se po pusa mao. Te eno boi bidi dabe me te kantri me dali hwımainu taga palobaso da, teda te kantri we bidigo augwa tonaluabo bidi me deli sa mubo dao. ³Tama te tonalubo bidigo boi bidi dabe asobo sulama da, teda agai te biugel bu wabo dao, te we bidibolo boi asobao olama mayu, te po wabo dao. ⁴⁻⁵Tama tialima, te bidi me deligo te biugel bu wabo odama, tama aga wi pelama, tama duala sabo pesage gegegi pişama yai digi, tama te boi bidi dabego aga elama isilali da, teda te bidi aga dagede aga isai dao. Magi baso meni. Ma, aga duala sigi pigi sogo da, teda aga me isigi menio. ⁶Tiali goli, te tonalubo bidigo te biugel bu wasiama yali da, teda te boi bidi dabego te we bidi sese tama ela silaibao. Te mu tama goli da, te we bidi augwaligo dwai sege elama, isali goli dao. Tiali goli, eno gedude da, te tonalubo bidi dabego geda muanigo da, te augwali te isali dao. Tama eno aga dali te po tu yaibao,” wali.

⁷“Tode bidio, eno nage Israel dabe tonalubo bidi nigilibao. Te eno bomai po augwalibolo pusabo po elalubaso da, teda eno nagebolo menama, tama nago augwalibolo pusa magameo. ⁸Tialima, eno bidi mego dwai kolesaga ebo subaso da, tama eno aga isaibao obaso da, teda nago agabolo pusao. Nago agabolo agai homu kolesaga, me agai ebo kolesaga hasegeleyu yao po wao. Tialima, nago agabolo wasiama yali da, teda agai sege me tama elaluaibao, tama aga isaibao. Tiali goli, eno gedude da, teda nago dagede aga isaibao. ⁹Tiali goli, nago te sege sabo bidibolo po walai digi, tama agai te dwai kolesaga tagalisama ebaso da, teda te dwai kolesagago aga dolama, tama aga isaibao. Tiali goli, nago te se yalide sege me sogobeo, tama nage me isigobeo,” wali.

Genuai Bidigo homugo dwai kolesaga ebo bidi isibo hagela homu yali

¹⁰Genuai Bidigo enabolo po geninama ma weyu, e tama po wali, “Tode bidi, nago eno te po te Israel we bidibolo pusa mao, ‘Dagego e tama po wabo dao, ‘Dago sege hauwa sabo da,’ po wali, ‘tama tialima, da homu sege genuai mu ebao,’ po wali, ‘tama dago tigi dili pulu ha mu ebao, mena tama tiyu, da bugagia bidigowe?’ Dagego te po wabo dao.’ ¹¹Te Israel dabebolo e tama po walao, ‘Ena God Genuai Bidi, ena tigidali sogo

bidibo dao, tama mu tama dao, te dwai kolesaga ebo bidi dabe isibaso, eno tede wiegi yai homu pemene egobe dao. Menio. Eno te dwai kolesaga dabeba tudi ola menama bidibo bidi dabeba eno wiegi yai homu pemene ebo dao. Dage Israel dabego odao. Ma begasa asao. Dagego duga ebo dwai kolesagaba tudi ola menama, tama dage enaba ma asiào. Magi baso dagego isabo şe idu gebawe?’ Nago augwalibolo te po wao,” wali.

¹²“Tõe bidi, nago te naga hani Israel dabebolo walao, ‘Tialima, te doloba pai bidi mego dwai şe ebaso da, teda agai polobadu yali doloba pai kolesaga aga me bugagia bidimainu tau me sogobeo. Tialima, bidi me dwai şe iduai bidigo dwai kolesaga tagalama, wiegi yai kolesaga ebaso da, teda agai aga yali dwai kolesagaba tudi ola mayu te ebao. Teda eno aga dologobeo. Tama tialima, te doloba pai bidi me deligo dwai şe ebo gagalobaso da, teda eno agai yali doloba pai kolesaga koneama, tama eno aga bugagia bidimainu me sula tagalogobeo. Menio. ¹³Eno te doloba pai bidi dabebolo augwali bugagia bidaibao po wabo dao. Tiali goli, bidi mego homugo agai yali wiegi yai kolesagago aga tau saibao olama, tama agai doloba pai kolesaga tagalama, tama agai dwai şeş şeş eyu da, teda God eno agai polobadu te yali doloba pai kolesaga kone me egobeo. Menio. Megi aga dwai kolesaga yai baso da, teda aga isimainao. ¹⁴Tama eno bidi dwai dabebolo augwali isimainao po wabo dao. Tiali goli, te dwai kolesaga ebo bidigo aga yali dwai kolesagaba tudi ola menama, tama agai doloba pai kolesaga naga idu baso da, ¹⁵teda aga munu me isigobeo. Tialima, te bidi agai te bidi me delibolo agai te negeli yali te tonalubo nai ma wei mobaso, o agai wi sali nai ma wei ponobaso, me agai eno tigidali bomai po wali pelama, tama agai dwai kolesaga isaşma eyu da, teda te bidi munu me isigobeo. Menio. Aga bugagia mu bidaibao. ¹⁶Tialima, eno agai polobadu yali dwai kolesaga kone me palogobeo. Megi da, agai doloba pai kolesaga ebaso da, teda aga bugagia bidaibao.’ Te po augwalibolo pusao,” wali.

¹⁷“Tiali goli, tõe bidio, naga abagi dabego te po wabo dao, Genuai Bidi eno kolesaga dolo menio po wabo dao. Tiali goli, menio, te Israel dabe augwa kolesaga te dolo menio. ¹⁸Tialima, te doloba pai bidigo aga te doloba pai kolesaga tagalama, tama dwai kolesaga ebaso da, teda aga isaibao. ¹⁹Me ma, te dwai kolesaga ebo bidi me deligo aga yali dwai kolesaga tudi ola menama, tama agai doloba pai wiegi yai kolesaga wali peyu da, teda aga bugagia bidaibao. ²⁰Tiali goli, dage Israel dabego te po wabo dao, Genuai Bidi eno kolesaga dolo meni po wabo dao. Teda odao. Nosali eno dage po tş elama, tama dagego kolesaga osola sulama, tama dage deli deligo ebo kolesaga dagalaibao,” Genuai Bidigo enabolo te po wai.

Jerusalem dolalio

²¹⁻²²Te da kalabuside bidibadi kibu be namba 12 wabode, tama te dei namba 4, te namba 10 poluade, te sogo pio te eno Genuai Bidigo bomo ena tigiba asobo

gagama yali. Tama te sogo kigamu Genuai Bidigo eno pedauwali ma usu ilama, tama eno po ma wabo usu ilali.^h Tama elama, tama bidi me deli aselama, tama enabolo te po wali, “Jerusalem polo dolalio,” te po wali. Te boi bidi dabego te Jerusalem hanu dolobo sulama, tama te bidi aga ena bidibo madi asali.ⁱ

Te we bidi kantri Israelde bididuali we bidigo dwai kolesaga yalio

²³Genuai Bidigo enabolo e tama po wali, ²⁴“Tqde bidio, Israel dabego taun polo dolalio. Tiali goli, te we bidi te taunde me bidibao. Augwaligo e tama po wabo dao, ‘Abraham aga te bidi deli goli dao, tama Godigo te tq tigidali tama agabolo mawai dao. Tiali goli, megi da, dago we bidi hauwa te elalubao. Tama tilama, Godigo te tq mu tama dabolo mawai yali bogo.’ Augwaligo te po wabo dao. ²⁵Tama tibaso, megi da eno homugo nago te po augwalibolo pusa mao. Ena God Genuai Bidi eno te po e obao. Dagego dwai kolesaga hauwa ebo dao. Te dagego te hasa dabe tuainogo elebo sogo, dagego kaneme dabe sela şabo menio. Me, dagego tibo god dabeba lotu po weyu ebo dao. Me, dagego bidi dabe ela muyu ebo dao. Mena tibaso dagego te tq saiba homu ebawe? ²⁶Tigidali sogo dagego subigila hwıyu ebo dao. Tama me, dagego dwai damua pai kolesaga dabe ebo dao, me dagego duga abagi sologo we dabe dali penani şe eyu ebo dao. Dagego homugo mena tama tiyu, dagego te tq saiba homu ebawe? Dagego usu munu ma me egobeo,” wali.

²⁷“Tialima, eno homugo nago ena God Genuai Bidigo po augwalibolo pusa mao. Ena God dao, tama ena tigidali sogo bidibo dao, tama eno mu po e tama obao. Te boi bidi dabego te dolai taunde bidalubo we bidi sese tama ela silagasaibao. Tama me, te bulu hasa dabego te taunde bidisama, olo bulu badu bidalubo we bidi elama, tuagasaibao. Tama me, te dualaluabo pesage wiegi yai digi duala sali we bidi, me masigi dudulawede duala sali we bidi, augwali genuai gasi mu selama, isaibao. ²⁸Tama eno te tq dolama, tama te tq olo tq mu pedelaibao. Te Israel dabe augwaligo augwa bomode mu gana pabo dao. Tiali goli, eno augwaligo te bomu mu silaibao. Tama te Israel dabego bulu du te dwai bulu dasu mu pedelaibao, tama te bidi dabe augwali tede bilibo hagela yaibao. ²⁹Te augwaligo te dwai damua pai kolesaga ebaso da, eno te we bidigo bulu tq te olo bulu tiwai pedelemainu ilaibao. Te tiwai ilibo si da, teda augwaligo e tama bugagia koneaibao, ena deli naga te Genuai Bidi te yabo homu yaibao,” wali.

Te we bidi augwaligo te profetgo po wali pabeo

³⁰Genuai Bidigo enabolo e tama po wali, “Tqde bidio, te naga abagi dede augwali te taun obo pade sisinibo sogo, me augwa be sunumi pade

^h 33:21-22 Te Esekiel Daj 3:26 tede elalubo po suo. Te polobadu sogo gagalasa, tama e sogoba usu nama, Esekiel aga te po wabo usu isıayı, aga hamena begelai bidi bididuı.

ⁱ 33:21-22 2 Kin 25:3-10; Jer 39:2-8; 52:4-14

sisinibo sogo augwaligo nage koneama, augwaligo e tama po wabo dao. ‘Polo pinao, da pelama, Genuai Bidigo mena po aga profet bidibolo megi maniwe odigi pinao,’ wabo dao. ³¹Tama tialima, eno we bidi augwali nago po odainu sisinagasobo dao. Awe, augwali nago gesabidide dualama, nago po odobo dao. Tiali goli, augwaligo olodali tama odobo dao. Augwaligo te po wali pabo menio. Augwaligo te timainao po wabo dao. Tiali goli augwaligo te mone hauwa sabo homu naga ebo dao. ³²Augwaligo nago po odabo homu eba, te bidigo gita eleyu, te wiegi yai musik wabo tiwai odabo homu ebo dao. Tama me, te bidigo wiegi yai dogoni elaluyu, tama bidigo we godolo eyu, te wiegi yai balia po wabo odabo homu ebo tiwai ebo dao, augwaligo nago po tigidali tama odobo dao. Tiali goli, augwaligo dwasianu wali me pabo menio. ³³Tiali goli, mu tama, nosali nago wali po sese tama mu pedalaibao. Tama te sogo augwaligo koneaibao, te nago te pusali po dabe, te eno po mu te yabao homu yaibao.” Genuai Bidigo te po wali.

Godigo Israel dabego tobolu bidi dabe po tų yali

34 ¹Genuai Bidigo enabolo e tama po walali, ²“Tųde bidio, nago te Israel dabe tobolu bidi dabe po tų ela mayu, nago e tama po wao, ‘Dage Israel dabego tobolu bidi dabeo, odiąo. Ena God Genuai Bidi, eno po dage dali elalubao. Dage dolaibao. Te Israel dabe augwali da, te sipsip kibu dabe tiwai dao, tama dage da, te sipsip tonalubo sę elalubo bidi dabe tiwai dao. Tiali goli, dagego duga naga ma tonaluyu ebo dao, tama dagego te sipsip dabe tonalubo menio. ³Dagego te sipsip ame pę tuyu, te augwaligo sipsip kibu nisigo nigai gudubo ugwa gudubo dao, tama dagego wiegi yai tumona pai sipsip kibu elama, te ili dali mi dali tubo dao. Tiali goli, dagego te sipsip kibu tonalubo menio. ⁴Dagego te bomo meni yai sipsip dabe tau sabo menio. Tama me dagego te gasi yai sipsip dabe usu ilibo menio, me dagego te tigi selai sipsip kibu dabe keni dagego sışibo menio. Tama me dagego te hagawai sipsip gegegi pelama, tama dagego augwali ma oda sabo menio. Te dagego bomogo da, dagego augwali dali selebo sę eyu, tama sesanobo bidigo ebo kolesaga tiwai ebo dao. ⁵Te sipsip dabe augwali tonalubo bidi meniama, augwali augwa digi subigila bilibo tiwai ebo dao. Tama te bulu hasa dabego augwali elama tubo dao.’ ⁶Eno sipsip kibu dabe augwali te bulu du dabeba wi pobao, tama augwali tigidali tųba tigidali polo pepelawalio. Tama augwali gegabo bidi meni yanio. Mu menio.’ Te po augwalibolo pusao,” Genuai Bidigo enabolo te po wai.

⁷“Te po me pusao, ‘Tialima dage te tonalubo bidi dabe, dagego Genuai Bidi eno po odao. ⁸Ena God Genuai Bidi, eno tigidali sogo bidibo dao,

^j 34:5 Nam 27:17; 2 Sto 18:16; Mat 9:36; Mak 6:34

tama eno po mu tama e obao, eno sipsip kibu dabe augwali bugagia tonaluabo bidi menio. Tama tibaso, te bulu hasa dabego te sipsip kibu dabe ela wialama, augwali tuali dao. Tama te eno sipsip kibu tonalumainu sa muani bidi dabe augwaligo te hagawali sipsip dabe gegebeo. Augwaligo augwa naga ma tonalubo şe eyu, tama augwali te sipsip dabe tonalubeo. ⁹Tama tibaso, dage tonalubo bidi dabe, dagego eno po ođiao. ¹⁰Ena God Genuai Bidi, eno po te obao, eno dage dali boi bidi te ebao, tama eno dagede te po tu yaibao. Tama ena sipsip kibu dabe dagego nogode ma dobola selama, tama dage augwali tonalubo bidi me bidigobeo. Eno dage tonalubo bidi dabego duga digi duga ma tonalubo kolesaga silaibao. Te eno ena sipsip kibu dabe ma selama, tama dagego tuabo sipsip kibu meni yaibao,' te po pusao," Genuai Bidigo te po wali.

Genuai Bidi aga digi aga te wiegi yai sipsip kibu tonalubo bidi dao

¹¹“ ‘Ena God Genuai Bidi, eno te po te obao, te ena digi ena sipsip dabe gegelama, tama augwali ma oda selama, tama ena digi augwali bugagia tonaluaibao. ¹²Te eno te sipsip tonalubo bidigo te sipsip kibu tonalubo tiwai elama, tama eno te sipsip dabe subigila pali dabe gegaibao. Te eno sipsip kibu dabe augwali te genuai po elama, hulua sali sogo augwali subigila tedela pai dao. Tiali goli, ena pelama, tama eno augwali pali pesageba tigidali gegegi paibao. ¹³Te eno augwali gasa kantriba ma oda sigi pelama, tama augwali te kantri Israelba ma odasa asaibao, te augwa to mu dao. Tama augwali tigidali sogo bulu du dabede bidiyu, me we ęađe bidiyu yaibao. ¹⁴Tama augwali Israel dabego bulu du dabede bidiyu, te wiegi yai nosai dabe tuyu bidaibao. ¹⁵Tama ena digi te ena sipsip tonalubo bidi bidaibao, tama eno augwali toma tuabo bulu wiegi yai madi odasa paibao. Te da God Genuai Bidi eno po dao. ¹⁶Tialima, sipsip kibu meba hagabaso da, teda eno augwali gegegi pelama, tama eno augwali ma oda saibao. Ma, te sipsip dabe meba subigila pepelawai baso da, teda eno augwali gegegi oda sigi paibao. Tama meba dolama, keni elalubaso da, teda eno augwaligo keni sisaibao. Tama meba augwali gasi elalubaso da, te eno augwaligo gasi usu ma ilaibao. Tiali goli, eno te tumona pai boma pai sipsip dabe dolaibao. Magi baso meni, eno sipsip dabe tonalubo doloba pai kolesaga naga ebo dao,' eno te po te tobolu bidi dabebolo obao," wali.

¹⁷“ ‘Tialima megi dage eno sipsip hani, ena God Genuai Bidi, eno dagebolo e tama po e obao, eno dage deli deligo kolesaga osola suyu, tama dagalaibao, te dage meba te omai sipsip tiwai dao, meba te meme tiwai dao. ¹⁸Dage mebago wiegi yai nosai hauwa tulama, tama dagego tabi paęana pabo dao. Tama dagego te meba elalubo nosai dabe subigila agalama, tagalobo dao. Tama me dagego wiegi yai ađ subaso da, dagego tuyu ebo dao, tama nosali dage te ađe subigila bilama, tama te we

dunugu ilainu ebo dao. ¹⁹Tama eno meba sipsip dabego dagego te agayu yali nosai, me te dunugu iliyu yali aı tuyu ebo dao. Dagego te kolesaga dolo menio.’ Te po pusao,” God Genuai Bidigo te po wai.

²⁰“Tama dagego ebo kolesaga dolo meni baso, God Genuai Bidi eno te po obao, te ena digi dagego tumona pai me boma pai sipsip, me bomo meni yai sipsip dabego kolesaga dagala sueibao. ²¹Dage bomai sipsip dabego te bomo meni yai sipsip dabe gaıgo elama, buluba sela şabo dao. Me dagego duga tigigo augwali pogolobo peyu, tama augwali bogoba pomainu ilibo dao. Tama dagego augwali eno sipsip hanide sela şawai dao. ²²Tiali goli, eno ena te sipsip hani dabe ma oda selama, tama eno augwaliba te dwai nai dabe augwaliba ma asomainu sula tagalogobeo. Tama eno ena sipsip dabego kolesaga osola sulama, tama wiegi yai sipsip dabe meba muyu, me dwai sipsip dabe meba muyu yaibao. ²³Tama eno ena şe bidi Devitgo hanide bidi me deli sa munama, tama aga eno sipsip dabe tonaluabo bidi nigilama, tama agai eno sipsip dabe augwali bugagia tonalumainu yaibao.^k ²⁴Tama ena Genuai Bidi da, augwaligo God bidaibao, tama te Devitgo hani bidi te augwaligo king bidaibao. Te da God Genuai Bidi eno po dao.^l ²⁵Tama eno augwali dali deli homu eyu, augwali dali bidabo po daı walaibao, te augwali bugagia bidimainu. Tama eno te sipsip dabe elebo te bulu hasa dabe tigidali badu sela şanama, tama augwali te bulude munu me ma bidigobeo. Tama tibaso, te sipsip dabego te wa pai tı dali, te ni sili elalubo bulu dali si te sipsip dabe bidabo bulu wiegi yai tiwai elaluaibao,’ eno te po obao” wali.

²⁶“Tama eno te bulude wiegi yai şe iliyu, me eno bulu du bagualubo tı wiegi yai ilaibao. Tama tulubage side da, eno te tıba tulubage hauwa te tıba tulumainu yaibao, tama te tulubagego te tı wiegi yai mu pedelemainu ilaibao. ²⁷Tama te ni dabe te du walobo ni dabe augwaligo du dabe hauwa mu walaibao. Tama nai dabe hauwa gide holaibao. Tama eno ena we bidi te boi bidi dabego nogode ma dobola saibao, te boi bidi dabego augwali daı olama, augwali kalabus ilali pesagede ma oda saibao, tama eno augwali ma odasa asaibao. Tama augwali augwa tıde bugagia mu bidaibao. Tama augwaligo bugagia mu koneaibao, ena deli naga ena Genuai Bidi te yabao homu yaibao. ²⁸Tama te gasa kantri haiden bidi dabego augwali dali dwai şe munu me ma egobeo. Tama te bulu hasa dabego augwali munu me ma ela tugobeo. Te we bidi augwali bugagia bidibadi, te gasa we bidigo augwali wi me iligobeo, te meni yaibao. ²⁹Tama eno augwaligo tı ili hauwa emainu ilama, tama nai dabe hauwa tede holomainu ilaibao. Tama augwaligo kantri nai habuge me egobeo. Tama te gasa meba kantri we bidigo koneaibao, te kantride nai hauwa elalubao olama, tama augwaligo te posobo po me wagobeo.

^k 34:23 Ped 7:17 ^l 34:24 Ese 37:24

³⁰Tama te Israel dabe augwaligo e tama bugagia koneaibao, ena God Genuai Bidi, ena augwali dali bidiyu, tama augwali eno we bidi hani bidaibao. Te da God Genuai Bidi eno po dao. ³¹Dage eno we bidi, dage eno sipsip kibu tiwai dao, tama dage ena t̄de bidiyu, tama eno dagebolo nai mabo dao. Tama ena dagego God bidibao, Genuai Bidi eno po polo wali.’ Te po augwalibolo pusao,” God Genuai Bidigo te po wali.

Godigo Idom dabe dolaibao

35 ¹Genuai Bidigo enabolo te po walali, ²“T̄de bidio, nago kantri Idomba tonama, tama nago te po wao, te kantri Idom dolaibao po wao. ³Nago kantri Idombolo e tama po wao, ‘Ena God Genuai Bidi, eno dage Idom dabego bulu du dabe dali boi bidi homu ebao,’ po walao. ‘Te eno dage dali bomonama eyu, dolama, tagalama, tama dagego t̄o olo t̄o tiwai pedalumainu ilaibao. ⁴Tama eno dagego taun dabe dolaibao, tama dagego t̄o dwai olo elaluaibao. Tama tiyu, dagego koneaibao, ena deli naga ena Genuai Bidi yabao homu koneaibao.’ Te po wao,” wali.

⁵“Te po me augwalibolo wao, ‘Polobadu mu dage Idom dabego Israel dabe dali boi bidi elaluai dao, me eno te Israel dabe dolali sogo, me eno te boi bidi dabe tagala palama, augwali dali hw̄agasali sogo me, dagego te Israel dali boi bidi elaluai dao. Te sogo asali boi bidi dabe dage Idom bagego tau selama, te Israel dabe elama, isilai dao. ⁶Tama tibaso, ena tigidali sogo bidibo God eno mu po mu e obao. Te boi bidi dabego dage elama, isilaibao. Te augwaligo dage munu me ma geda mugobeo. Dagego bidi dabe ela mubo kolesaga ebode hagela homu ebeo. Tialima, boi bidi dabego dage ela mubo kolesagade gagamua sogobeo. ⁷Te eno te kantri Idom we bidi sese ela silama, tama te kantri Idom te olo bulu mu pedalaibao. ⁸Te eno te boi bidi dabego dage Idom dabe elemainu ilaibao, tama dagego tigi dabego te bulu du dabe, me odogo malu dabe mesega siyu yaibao. ⁹Te eno dagego kantri olo bulu elalumainu ilama, tama te tiwai tigidali sogo tama elalua paibao. Tama dagego taun dabede bidi munu me ma bidigobeo. Tama tiyu, dagego e tama bugagia koneaibao, ena deli naga ena Genuai Bidi dao homu yaibao.’ Te po me pusao,” wali.

¹⁰“ ‘Dage Idom dabe, dagego ena God Genuai Bidi eno te kantri si Israel de Judade bidiba homu me yai menio, te augwali eno we bidi dao. Megi da, dagego te po wali dao, dagego augwali hani sigo t̄o saibao po te wali dao. ¹¹Tama tibaso, ena God Genuai Bidi, ena tigidali sogo bidibo da, tama eno mu po tama dage dali obao, eno dagego dwai kolesaga wei ponaibao. Dagego Israel dabe godolo munu ma me ebeo, tama dagego augwali dali şeḅe elama, tama dage augwali dali haliga dwai mu yai dao. Tama tialima, eno dagego te augwali dali yali dwai kolesaga wei dolo ponaibao. Tama te Israel dabe augwaligo ena bugagia mu koneaibao. ¹²Tama dage Idom dabego e tama bugagia koneaibao, ena

Genuai Bidigo dage Idom dabego Israel t̄ba dwai po e tama wabo odali da homu yaibao, “Te Israel dabego bulu du dabe polo dolai dao. Tama megı da, da Idom bage dago te t̄ kantri selama, tonaluaibao.” Dagego te po wabo eno odali. ¹³Dage Idom dabego ena dali hagoma elama, tama dagego ena posobo po olama, tama dagego ena dali dwai po wai dao. Tama eno dagego te po odai dao. ¹⁴Tialima, ena God Genuai Bidi eno te po e obao, eno dage sese tama mu dolama, tama gasa meba kantri we bidigo sulama, tama augwali wiegi yai homu pemene yaibao. ¹⁵Dagego te eno we bidi Israel dabe dolobode dage wiegi yai homu pemene yai dao. Tialima, eno dage Idom dabeba me deli tiwai ş̄ naga elama, dage Idom dabe me dolaibao. Tama te bulu du Seir, me te gasa bulu dabe te kantride elalubo bulu dabe te olo bulu mu pedelaibao. Tama te Israel dabe augwaligo e tama bugagia koneaibao, ena deli naga ena Genuai Bidi dao homu yaibao.’ Te po te Idom bagebolo wao,” Genuai Bidigo enabolo te po wali.^m

Godigo Israel dabe dali wiegi yai ş̄ yaibao

36 ¹Genuai Bidigo ena dali e tama po wali, “T̄de bidio, nago te Israel dabego bulu du dabebolo eno augwalibolo wainogo ebo te poba bugagia olo saganama odao po walao. ²Ena God Genuai Bidi, eno e tama po wainu ebao. Te Israel dabe augwaligo boi bidi dabego e tama po wai dao, ‘Wiegi yai mu dao. Megı da, te genuai bulu du dabe dago bulu du dao,’ wai.”

³“Tama tialima, nago ena God Genuai Bidigo e po pusao, ‘Te gasa hani bidigo dage Israel dabe dali hw̄ıgasai dao. Tama te kantri tigidali badu mu tama dolama, tama te dagego kantri sai dao. Tama augwaligo te kantri Israel dwai po walama, tama augwaligo posobo po walai dao. ⁴Tama tialima, dage Israel dabego bulu du dabe, me malu bulu dabe, dagego ena God Genuai Bidigo po odao. Tama me dage dolali taun dabe, me te meba gasa te kantride bulu dabe, dagego me odao, te dage boi bidi dabego dolali bulu dabe, dagego odao.’ Te po pusao,” wali.

“‘Eno koneani, te dage p̄de elalubo kantri bidi dabego dage dali dwai ş̄ elama, tama dage dali posobo po wai dao. ⁵Tama tialima, God ena Genuai Bidi ena haliga ş̄b̄ş̄ posolo tiwai eyu, eno bomai po te kantri Idomba, me kantri dage p̄de elalubo, te kantri dabeba te obao. Augwaligo homugo ena te olo nai dao tiwai homu elama, tama augwaligo eno t̄ sainu homu mu gana pai dao. Magı baso meni. Augwaligo te t̄ me badu te augwaligo kau kibu dabe me sipsip kibugo nosai tede tumainao homu yali. ⁶Tama tialima, t̄de bidi, nago eno e tama po pusa mao. “Dage te Israel t̄de elalubo bulu du dabe, me odogo malu bulu dabe,

^m 35:15 Ais 34:5-17; 63:1-6; Jer 49:7-22; Ese 25:12-14; Amo 1:11-12; Oba 1-14; Mal 1:2-5

dagego ođiāo. Ena God Genuai Bidi, eno te meba gasa kantri dabe dali seḅe dwai mu ebaō. Magi baso meni, augwaligo dage dali hale yabo po wai dao. ⁷Tialima, ena God Genuai Bidi, eno mu po mu te obao, eno te kantri dabe aiyaba elaluama, tama augwali hale ilaibao. ⁸Tiali goli, te ni dabe te dagego bulu du dabede ma holaibao. Tama augwaligo yabe hauwa solama, tama augwali du hauwa walaibao. Dwasianu sogo mu tama, eno we bidi dage Israel dabe dage te kantri Israelba ma asaibao. Tama dagego te wiegi yai ni du dabe tuaibao. ⁹Eno dage bulu du dabe dali wiegi yai se yaibao. Tama tialima, eno te Israel dabe augwaligo dagede gi dabe ma emainu yaibao. ¹⁰Tama eno Israel we bidi hauwa mu pedelemainu ilama, tama augwali dagede bidimainu yaibao. Tama augwaligo te taun dabe ma geseleyu, me te boi bidi dabego dolali bulu dabe ma dodoliyu yaibao. ¹¹Tama te we bidi dabe me dagede bidibo hasa dabe hauwa mu pedelaibao. Tama te we bidi tigidali pesage badu polobadu bidali yali gilama yaibao, tama eno dage dali wiegi yai kolesaga mu yaibao. Tama te kolesagago da, eno polobadu yali kolesaga edelama mu yaibao. Tama dagego bugagia mu koneaibao, ena deli naga ena Genuai Bidi dao homu yaibao. ¹²Tama eno ena we bidi Israel dage bulu du dabede bugagia bidimainu yaibao. Tama dage augwaligo tō elaluaibao, tama augwaligo te tō augwa wai dabebolo nosali mawaibao. Tama dagego te Israel dabego wai bōḅ dabe munu me ma dologobeo.” Te tama po te bulu du dabe dali, me odogo malu bulu dabebolo tama pusao, ena Genuai Bidi eno te po obao,” wali.

¹³“Ena God Genuai Bidi, eno te po te obao. Te we bidigo te po wabo dao, ‘Dago kantri tōgo te bidi dabe siliyu, me te wai bōḅ dabe doliyu ebo dao,’ po wabo dao. ¹⁴Augwaligo te tama po obao, tiali goli, ena God Genuai Bidi eno te po obao, dage bulu du dabego Israel dabe dali dwai se ma elamo dao. ¹⁵Tama te gasa meba hani bidigo posobo po olama, tama dage Israel dabego bulu du hale me iligobeo. Tama dage bulu du dabego eno we bidi dwai seḅe me tulalumainu iliyu me egobeo. Ena God Genuai Bidi, eno po polo walio,” te po wai.

Godigo Israel we bidi gesi we bidi pedelemainu ilaibao

¹⁶Genuai Bidigo enabolo po ma weyu, e tama po wali, ¹⁷“Tōde bidi, te Israel dabe augwa tōde polobadu bidali sogo augwaligo dwai kolesaga meda yai mu yai dao, tama augwaligo te tō dolai dao. Tama augwali eno gedude meda yai mu bidai dao, te we me aga poluago elai we tiwai aḅ yai dao. ¹⁸Augwaligo bidi hauwa mu elai dao. Tama augwaligo tibo god dabeba lotu olama, tama tebogo augwaligo kantri Israel eno gedude meda dwai mu pedelai dao. Tama tibaso, eno augwali dali seḅe genuai mu elama, tama eno augwali dene genuai mu mawai dao, ¹⁹te augwaligo tigidali dwai kolesaga dabe wei ponainu. Tama eno augwali

gasa kantri dabeba sela şawai dao. ²⁰Te gasa meba hanigo Israel dabe augwali tomode dwai mu bidalubo suali. Tama te tialigo eno nogi aiyaba elalualio. Tama te hani augwaligo homugo ena olo nai dao homu yalio, tama augwaligo te po wabo dao, ‘Te Israel dabe augwali te Genuai Bidigo hani dao. Magi baso augwaligo agai tş taga soaliwe? Te agai augwali tau sabo usu işabaso yali, agawe?’ ²¹Eno te po dabe te Israel dabe pali bulu tigidalide wabo eno odali. Tama eno homugo tiali tiyu, te hani augwaligo eno nogi aiyaba elaluidalio,” wali.

²²“Tama tibaso, eno homugo Esekiel, nago eno te po Israel dabebolo pusa mao, ‘Ena God Genuai Bidi, eno po te tama te wali dao. Te gasa meba hanigo dage augwali tomode bidibo sulama, tama augwaligo eno nogi aiyaba elaluali. Tama tialima, eno te megi yainogo ebo şę dabe te eno dage Israel dabe kone palama, me yainu ebeo. Eno dage tobade te şę egobeo. Menio. Eno ena genuai nogiba kone palama, tama eno nogi tobade eno te şę yaibao. ²³Tama tialima, eno te gasa meba hani e tama kolesaga ola mawaibao. Te eno kolesaga wiegi yai doloba pai mu dao olama, ola mawaibao. Tama augwaligo enabolo genuai nogi mawaibao. Dage Israel dabego dagede te hani bidigo megi eno nogi aiyaba elalubao. Tiali goli, eno dage tau sabo şę bomai mu ebo si da, te gasa meba hanigo sulama, tama augwaligo te e tama koneaibao, ena tedali gasagi yai dao, tama eno kolesaga wiegi yai doloba pai te yabao olama, koneaibao. Tama augwaligo e tama bugagia koneaibao, ena deli naga te Genuai Bidi dao homu yaibao. Te da God Genuai Bidi eno po dao.’ Esekiel, nago te po pusao,” wali.

²⁴“Nago te eno po me augwalibolo pusao, ‘Eno dage dali yabo şę po da, e dao. Eno dage te bidibo te kantri sese tamade oda selama, tama dage duga tş muba ma odasa asaibao. ²⁵Tama eno wiegi yai meda meni yai aşı selama, dage tigiba gelaibao, te dage eno gedude wiegi yai ma pedalomainu. Awe, eno dagego dwai damua pai kolesaga, me dagego tibo god dabe me sela şawaibao, tama dage eno gedude wiegi yai pedelaibao. ²⁶Tama eno dagebolo gesi kolesaga me gesi homu mawaibao, te eno poba begi pabo homu kolesaga dao. Polobadu dagego tobolu te masigi tiwai dila pai dao. Tiali goli, eno te dwai homu kolesaga sela şanama, tama eno dagebolo gesi homu kolesaga mawaibao. ²⁷Tama eno dagebolo ena mobo bidi dagebolo mawaibao, tama aga dagego homude bidaibao. Tama eno dage homu hogodolama, tama dagego eno bomai po, me eno gasa po wali bugagia pomainu ilaibao. ²⁸Tama dage eno duga wai dabebolo mani te tşde bidaibao. Tama dage ena we bidi dolo mu pedelaibao, tama ena dagego God mu bidaibao.” ²⁹⁻³⁰Tama eno dage tau selama, tama dagego dwai meda yai kolesaga munu ma me egobeo. Tama eno dagego gide dabe nai dabe hauwa

holomainu ilaibao. Tama te ni du walobo ni dabego te ni du dabe hauwa mu walaibao. Tama tiyu, dage nai me habuge me egobeo. Tama tibaso, gasa meba hanigo dage posobo po te nai şaş pabode me wagobeo. ³¹Tama te sogo da, dagego duga yali te dwai damua pai kolesaga dabe seşe dabe kone palaibao, me te dagego yali eno godolo mu isawai se dabe kone paliyu, tama dage hale genuai mu yaibao.’ Te po me pusao,” wali.

³²“ ‘Awe, dage Israel we bidi, dagego God Genuai Bidi eno po bugagia odişo. Te seşe page mu eno yainu ebo seşe eno dage tobade egobeo. Menio. Eno homugo ena genuai nogiba kone palama yaibao. Tama eno te seşe dabe ebo sogo da, eno homugo dagego duga yali dwai kolesaga kone palama, tama dage hale dwai mu yaibao.’ Te po wao.”

³³“E po me augwalibolo pusao, ‘Ena God Genuai Bidi, eno po genina ma weyu, e tama po obao. Te eno dagego seşe sela şanama, tama dage eno gedude wiegi yai pedalubo sogo da, teda eno dage sula tagalama, tama dagego duga taun dabe, me duga bulu dabe bugagia ma dodolomainu ilaibao. Te boi bidi dabego dolali hanu dabe ma dodolama, tama dage te taun dabede ma bidaibao. ³⁴Te bidi dabe dagego tşde biliyu ebo dao, tama augwaligo dagego gi dabe dasu hola pai suyu ebo dao. Tiali goli, eno dagego te gi dabe ma emainu sula tagalaibao. ³⁵Tama te gasa hani bidi dabe augwaligo e tama po waibao, “Polobadu te tş dasu hola pai goli dao. Tiali goli, megi da, te gi Iden yali gilama wiegi yai mu te ilai yabo. Tama polobadu da, te taun dabe da dolama mu elalui dao. Tiali goli, megi da, te Israel dabe augwaligo seşe ma elama, tama augwaligo deli deli taun bagulama bomai obo te ma gesela silai dao. Tama te we bidi te taunde ma te bidibao.” Augwaligo te po waibao. ³⁶Tama dage Israel dabe duga tşde ma bidibo sogo da, te meba gasa hani dage paşe bidibo bidi dabe auwaligo e tama bugagia koneaibao, ena Genuai Bidi ena digi te dolali taun ma nigiyu, me eno te dasu dwai mu holai gi ma eyu yai dao. Ena Genuai Bidi eno te seşe yabo po daş walaio, tama eno te tama seşe yaibao.’ Te po tigidali nago te Israel bagebolo pusao,” Genuai Bidigo enabolo te po wai.

³⁷“Ena God Genuai Bidi eno te po obao. Te Israel dabe augwaligo enabolo te augwa we bidi hauwa ilao po hanalubo sogo da, teda eno augwaligo te gedu haluasa po wabo me odaibao. ³⁸Te augwali hauwa pedelaibao, te sipsip kibu dabe augwaligo te genuai sogo me eno augwalibolo sa muani te sogo te ofa yainu sesebo, te sipsip kibu hauwa tiwai yaibao. Tama te Israel dabe augwa ma te nigali te taun dabede bidigo paşana paibao. Tama te seşe dabe pedalobo sogo da, teda augwaligo e tama koneaibao, ena deli naga ena Genuai Bidi dao homu yaibao,” wali.

Esekielgo bidi dili dabe hauwa mu suali

37 ¹Genuai Bidigo bomu enaba aselama, tama Genuai Bidigo Mobu Bidigo ena oda selama, tama ena odasa pelama, odogo malu bulu

mede bidi dili dabe kisu delalubo madi odasa pali. ²Tama agai ena te bulu odogode odasa bilibadi suali da, eno bidi dili dabe hauwa mu suali. Tama tigidali dili dabe mu wa pai elalubo suali. ³Tama Genuai Bidigo enabolo te po wali, “Tõde bidi, nago homugo te bidi dili dabego we bidi mu ma gagabo usu yaibawe, ma meniwe?” Tiali goli, eno te po wali, “God Genuai Bidi, nagaduba deli naga koneanio, eno da, menio,” wali.

⁴Tama Genuai Bidigo enabolo te po wali, “Eno homugo nago eno po te dili dabebolo pusao. Te dili dabebolo e tama po pusao, ‘Dage dili mu wa pai dabe, dagego Genuai Bidi eno po odao. ⁵Ena God Genuai Bidi, eno te po e obao, eno dagebolo bidibo mobo menama, tama dage we bidi ma pedelaibao. ⁶Awe, eno dage kigibili ma mayu, me tigi mi dabe ma mayu elama, tama dage tigi waligo ma halua saibao. Tama eno dagebolo bidibo mobo menama, tama dage bidibo ula selama, tama dage ma bidaibao. Tama tiyu, dagego bugagia mu koneaibao, ena deli naga ena Genuai Bidi dao homu yaibao.’ Te po te dili dabeba pusao,” agai enabolo wali.

⁷Tama tibaso, eno Genuai Bidigo enabolo pusao wali po tiwai tama pusali. Eno te po pusubo şe idubadi, tama eno kilikili wabo odali. Te da te dili sibi kidagalo wabo po odali. Tama eno tonalubadi, te dili aga digi pãba kigigili pabo suali, te aga elaluali pesageba ma pabo suali, tama augwali bidi mu ma pedalobo suali. ⁸Tama eno suali, te tigi kigibili me tigi mi dabe te diliba ma wadoa selama, tama tigi wali ma halua sagaselama, tama augwali we bidi tiwai ma pedalobo suali, tiali goli augwaligo mobo kegebo subeo.

⁹Tama nosali Genuai Bidigo enabolo te po wali “Tõde bidi, nago eno po te walibolo e tama po pusao, ‘Godigo te po wali, wali, nage tigidali badu aselama, tama nago te boi bidigo elai bidi dabe te mobo mao, tama augwali bidibo mobo ma somainu yao.’ Te po wao,” wali. ¹⁰Tialima, eno Genuai Bidigo te po pusali, tama te wali te bidi tigiba dabe asali, tama augwali sese tama bidibo mobo selama, tama augwali sese tama hodalubo suali. Augwali te genuai ami bidi hani tiwai mu elaluali.^o

¹¹Tialima, Genuai Bidigo enabolo te po wali, “Tõde bidi, te kalabuside megı bidibo Israel dabe tigidali augwali da, te bidi dili dabe wa pai tiwai dao, tama augwaligo te po wabo dao, ‘Te dago dili dabe mu wa pai dao, tama bugagia munu ma me bidigobeo. Tama da mu tama mu hagawaibao.’ Augwaligo po da te tama goli dao. ¹²Tiali goli, eno homugo nago eno po augwalibolo pusulama, tama augwalibolo e tama po augwalibolo pusao, te ena Genuai Bidigo po, ena God Genuai Bidi, eno dagego gũ page tũ dalama, tama dage buluba odasa aselama, tama dage kantri Israelba ma odasa paibao, te duga tõ mu dao. ¹³Tama eno dage gũ pagede hodolobo sogo da, teda dage eno we bidigo e tama bugagia

koneaibao, ena deli naga ena Genuai Bidi dao homu yaibao. ¹⁴Tama eno dagebolo eno mobo bidi dagebolo menama, tama dage bidibo ula saibao. Tama eno dage duga t̄ muba ma odasa paibao, tama dage tede bugagia bidaibao. Tama eno te ş̄ ebo sogo da, dagego e tama bugagia koneaibao, te da ena po mu dao homu elama, tama eno ena po d̄a walali gilama yali. Ena Genuai Bidi eno po polo wali. Te po te Israel dabebolo pusao,” wali.

Israel dabe augwali kantri deli mu pedelaibao

¹⁵Genuai Bidigo enabolo te po wali, ¹⁶“T̄de bidi, nago ni dage me deli sigi pelama, tama nago te po ugwadu daide aş̄ao, ‘Te Juda hanigo ni dage, me te meba Israel hani we bidigo ni dage dali augwali deliba elalubao.’ Tama tialima, nago te ni dage me deli selama, tama nago te po tede aş̄ao, ‘Te Josep hanigo ni dage, me te Efraim hanigo ni dage dali, me Israel hani mebago ni dage dali deliba elalubao.’ Te si wali ni dagede te po aş̄ao,” wali.

¹⁷“Nago aş̄ena silama da, teda nago te ni dage sabi si deliba waloluyu, teda te ni dage si te deli ni gagawaibao, nago nogode. ¹⁸Tama naga abagi dedego nago te ş̄ yali page po hanalubo sogo da, ¹⁹teda nago augwalibolo e tama po walao, ‘Ena God Genuai Bidi eno obao, eno te Josepgo ni dage, te ni dage te Efraim hani, me te meba Israel hanigo ni me da, eno te ni me Juda hanigo ni dage si selama, deliba walolaibao. Tama eno te ni dage si te eno nogode ni dage deli elaluaibao.’ Te po wao,” wali.

²⁰“T̄de bidi, nago te po aş̄ani ni dage si nogo tola sao, tama te we bidigo sumainu ugwaba sao. ²¹Tialima, nago augwalibolo e tama po walao, ‘Ena God Genuai Bidi, eno te po obao, eno te tigidali Israel dabe augwali te bidibo te tigidali kantri dabede oda selama, sisinama, tama augwali augwa t̄ muba eno odasa paibao. ²²Tama tialima, eno augwali kantri deli te t̄de pedemainu ilaibao, te Israel dabego bulu dabede. Tama augwali king deligo augwali tigidali tonaluaibao. Tama augwali bugulama, king bidi si elalubo kantri si munu me ma bidigobeo. ²³Tama augwaligo tibo god dabeba ma lotu po weyu, me dwai damua pai kolesaga wali peyu, me dwai ş̄eş̄e sabo kolesaga wali me peyu me egobeo. Tama tiyu, augwali eno gedude meda yai me pedalogobeo. Augwali me habu badu bidi augwaligo ş̄eş̄e saibaso, tagalao, eno augwali tau selama, tama augwali wiegi yai pedalaibao. Tama augwali eno we bidi bidaibao, tama ena augwaligo God bidaibao. ²⁴Tama eno ş̄ bidi Devitgo hani bidi me deli augwaligo king bidaibao. Tama aga deli naga augwaligo tonalubo bidi bidaibao. Tama augwaligo eno bomai po me, eno gasa po wali peyu yaibao.^p ²⁵Tama dage hani bidi dabe tigidali sogo

polobadu duga wai dabe bidali te tõe bidada paibao. Te da, te eno ena se bidi Jekopbolo mani te tõe dao. Tama Devitgo hani bidi me deli augwaligo tomode king tigidali sogo bida bida peyu bidaibao. ²⁶Tama eno augwali dali kontrak po daş walama, tama augwali tigidali sogo bugagia bida bida peyu bidaibao. Tama eno augwali augwa tõe bidimainu sula tagalama, tama augwali we bidi hani genuai hauwa mu pedelaibao. Tama eno be augwali tomode tigidali sogo mu elalua paibao. ²⁷Tama eno bidibo madi augwali dali bidaibao. Tama ena augwaligo God bidaibao, tama augwali eno we bidi bidaibao.⁹ ²⁸Te eno be Israel dabe augwali tomode sesemane elalubo sogo da, teda gasa hani we bidigo sumainu yaibao. Tama augwaligo e tama bugagia koneaibao, ena Genuai Bidi, eno te Israel dabe augwali ena we bidi mu ilali kolesaga augwaligo sueibao.’ Te po te we bidibolo pusao,” God Genuai Bidigo te po wali.

King Gokde wali po

(Dai 38-39)

Genuai Bidigo king Gok dali po elaluali

38 ¹Genuai Bidigo enabolo e tama po walio, ²“Tõe bidi, eno homugo nago te Gokba tonao, te tõe Magok bidi dao, te kantri Mesek me kantri Tubal sigo polalubo king dao. Nago te Gok dolaibao po wao.” ³Nago agabolo e tama po wao, ‘Gok, Mesek me Tubalogo polalubo king, odao, ena God Genuai Bidi, eno nage dali boi bidi ebao. ⁴Te eno nage begelama, tama nago te saut badu edaba tonaibao. Tama eno nago penane dilide huk gebelama, tama nage dali, naga ami hani hauwa dali, eno edaba eba kegaibao. Nago ami bidi umabo tigidaligo hwibo ugwa gudiyu, me ni nami awa dabe dali, me sabele dabe dali toliyu, me bainat hwå dabe nogo tuyu ebo dao, tama augwali hos dabede duabo dao. ⁵Te kantri hauwago ami bidi geninama nage dali bidiba. Te kantri Persia, me kantri Sudan, me Libia ami bidi dabe nage dali te bidibao. Tama augwali sesego te hwibo kapa madi gudiyu, me hwibo ni nami sabele toliyu yaibao. ⁶Tama me te kantri Gomer me taun Togarma ami bidi dabe me nage dali te bidibao. Te taun Togarma te u badu not badu digibulu bulu badu mu elalubao. ⁷King Gok, nago hwibo kegaluao. Me nago te tonalubo te ami dabe augwaligo me te hwibo kegalumainao. Tama nago te polalubo bidi pedaliyu, augwali bugagia tonaluo. ⁸Nago kibu be hauwa tonaluyu bolo yao. Te Israel hani eno augwali polobadu te haniani gasa tõe kantri dabeba sela şawai dao. Tama augwali tede kalabus te kibu be hauwa bididubadi, te augwa page bulu tõe te dwai dolai elaluai

⁹ 37:27 2 Ko 6:16; Ped 21:3 † 38:2 Ped 20:8

dao. Tiali toli, eno augwali ma odasa aselama, tama augwali Israel bulude elalubo bulu du dabede bugagia te bidibao. Te we bidi augwaligo te augwa kantride nai dabe tigidali bugagia dodolama, tama augwali bugagia dulalubao. Tama te nosali kibu be hauwa silama, tama eno nage te kantriba hwigi pomainu tagala palaibao. ⁹Tama eno nage naga ami bidi dabe, me gasa kantri hauwago ami bidi dabe, dage te we bidi dabe dali hwimainu eno dage tagala palobo sogo, teda dage te genuai wali me tulubage tiwai elama, dagego augwaligo t̄o te p̄ogo mesega sabo tiwai yaibao.’ Nago te po te king bidi Gokbolo pusao,” wali.

¹⁰“E po me pusao, ‘Ena God Genuai Bidi eno te po obao. Gok, te nago augwali dali hwigi pabo sogo da, teda homu hogodama, tama augwaligo nai nai dabe sabo homu mu yaibao. ¹¹Te nago homugo tiaibao, te hani augwaligo hwisama eyu, me augwaligo magi dwai şe ebeo homu yaibao. Tama augwaligo taun dabe obogo bagua sai me elalubeo, te genuai sunumi paliabo nai me elalubeo. Me te augwali seselalubo nai dabe menio, te homu yaibao. Tama tialima, nago homugo augwali dali hwigi pabo homu yaibao, ¹²tama augwaligo wiegi yai nai dabe sabo homu yaibao. Te we bidi augwali gasa bulu tagalama, tama augwali ma aselama, tama augwa te taun dabe ma geselai dao. Tama augwaligo kau kibu hauwa elaluyu, me sipsip kibu hauwa elaluyu ebao, me haniani nai dabe hauwa tama elalubao. Tama augwaligo kantri te tigidali t̄ode kantri dabe tomode mu te elalubao. ¹³Tama te sogo te kantri Seba me Dedan hani, me te kantri Spen taun bisnis bidi dabe augwaligo dage asobo sulama, tama augwaligo dagebolo hanaluyu, te po waibao, “Te nago naga ami hauwa sisinama, tama augwali dali hwinama, augwaligo wiegi yai nai dabe hauwa sainogo yai da, agawe? Tama dago homugo dagego gol me silva hauwa saibawe, me augwaligo kau kibu, me te meba nai dabe hauwa sainogo homu eba, agawe? Te wiegi yai mu dao,” augwaligo te po nagebolo hanalu waibao.’ Te po king Gokbolo wao,” te po wali.

¹⁴“Tama tialima, t̄ode bidi, nago eno po te king Gokbolo pusa mao. Eno po da e dao, ‘King Gok, odao. Te God Genuai Bidi eno we bidi augwali augwa t̄ode bugagia bidibo sogo da, teda nago te koneaibao. ¹⁵Tama nage naga genuai ami hani dali, dage duga kantri u not badu tagalama, tama dagego te we bidi augwali dali hwj yagasaibao. Te ami bidi dabe augwali kantri hauwadu asaibao. Tama augwali sese tama augwali hosde dualama, tama augwali nage dali asaibao. Augwali umabo mu asaibao, bidigo augwali nedebaso, usu me egobeo. ¹⁶Te eno dage ena we bidi te Israel we bidi dabe dali hwigi pomainu tagala palaibao. Tama augwaligo dagego te t̄o te p̄ogo mesega sabo tiwai ebo augwaligo sueibao. King Gok, nosali sogode nago te şe dabe emainogo eno nage hodolaibao, te gasa hani dabego sulama, konemainogo, te ena tedali gasagi yai bidiyu, tama eno kolesaga te wiegi yai mu elama, tama doloba pai mu dao

olama konemainu. Tama augwaligo ena bugagia mu koneaibao. ¹⁷Ena God Genuai Bidi, eno po te ena şe bidi dabebolo polobadu mu mawai dao, te augwali te Israel dabego profet dabe dao. Tama kibu be hauwade augwaligo po pusuyu, e tama po wai dao, nosali God eno te bidi me seselama, tama te Israel dabe dali hwımainu yaibao. King Gok, te bidi te nage tama dao.' Te po te king Gokde pusao," Genuai Bidigo enabolo te po wai.

Genuai Bidigo king Gok dene mawaibao

¹⁸"Ena God Genuai Bidi, eno te po obao. Te king Gokgo te Israel dabego tıba aselama, hwıagasobo si, teda eno te Gok dali, te aga dali asali bage dali, augwali dali şeşę dwai mu yaibao. ¹⁹⁻²⁰Tama eno şeşę genuai mu pedelaibao, te posolai sia dabo tiwai yaibao. Tama Gokgo te Israel dabe dali hwıbode, ena te Israel dabego tıba asaibao, tama te tı mali dwai genuai mu yaibao. Tama tialima, tigidali suşę dabe, me ba dabe, me bulu hasa dabe, me bidigo negebo haniani hasa dabe, me te tigidali tıde bilibo gasa nai dabe, me te tigidali tıde bidibo we bidi dabe, tigidali wi elama, noma dwai mu saibao. Tama te bulu du dabe alua paibao. Tama me te sao pado bulu dabe te degaibao. Tama te tigidali taun obo dabe huşia pelama, tama degaibao. ²¹Tialima, ena God Genuai Bidi, eno te po obao, te eno te Israel dabego bulu du bulude dabe te eno genuai wıbi hwımainogo ilaibao, te king Gok dolainogo. Te aga ami bidi dabe augwali te augwa hasi ma hwınama, tama augwa hasi ma ela wialaibao. ²²Tama eno agaba haniani gasi pedalomainu iliyu, me boi agaba pedalomainu eyu yaibao, te agabolo dene mayu tama tiaibao. Te eno te tulubage, me talua ge tulubage, me posolai masigi te isi dabo te gea paliyu yaibao, tama te nai dabe aga tigiba tulaluyu, me aga dali asali ami bidi dabe tigiba me tulalueibao, me te aga dali asali haniani kantri bidi dabeba tulalueibao. ²³Tialima, eno te tebo kolesagago tigidali we bidibolo eno genuai bomo ola mayu, me eno kolesaga wiegi yai me doloba pai kolesaga mu ola mawaibao. Tama augwaligo ena mu konea paibao, ena tedali gasagi yai mu dao, te koneaibao. Tama augwaligo bugagia mu konea paibao, ena deli ena Genuai Bidi dao homu yaibao," wali.

Genuai Bidigo Gok aiyaba elaluaibao

39 ¹God Genuai Bidigo po geninama ma weyu, e tama po wali. "Tıde bidi, nago eno po te Gokbolo pusao Tama agabolo e tama po walao, 'King Gok, nage te kantri Mesek me Tubal bidi dabego polalubo king dao, tama eno nage dali boi bidi homu eao. ²Te eno nage begelama, tama nago edaba te sautba begelaibao, tama eno nage kegaibao. Tama eno nage naga kantri u not badu mu tagalamainu elama,

tama nage eno te Israel dabego bulu du buluba odasa aselama, tama nago Israel dabe dali hwımainu ilaibao. ³Tama eno nago enesigi te pobase nogo badu tuali te nogoba eno elama, tama te enesigi tulalueibao. Tama eno nago dolo nogo badu tuali ene dabeba elebo si, te ene dabe me tulalueibao. ⁴⁻⁵Tama nage me, nage dali asali ami dabe, te haniani kantridu nage dali asali bage me, dage sese tama te Israel dabego bulude bulu dude isaibao. Tama dagego tigi dabe te pepeli dili tde olo munalua paibao. Tama te ba kemodage dabe, me bulu hasa dabego dagego tigi dabe tuagasaibao. Te da God Genuai Bidi eno po dao.’ Te po king Godbolo pusao,” wali.

⁶“E po me agabolo pusao. ‘Tama eno isi te t Magok bulude pedalumainu ilaibao, me te tamu a pde dua bidibo we bidi tigiba me te isi pedalumainu yaibao. Tama te hani augwaligo te tama bugagia koneaibao, ena deli ena Genuai Bidi dao homu yaibao. ⁷Te s dabe eno ena we bidi Israel dabe dali yainogo ebo te s dabe da, te augwaligo gasa we bidi hanigo eno wiegi yai nogi konemainu ola mawaibao. Tama augwaligo eno genuai nogi munu me aiyaba elalugobeo. Tama augwaligo e tama bugagia koneaibao, ena deli ena Genuai Bidi, tama ena te Israel dabe dali bidiba homu yaibao. Tama ena te tedali gasagi yai da, te eno kolesaga te wiegi yai doloba pai mu dao, augwaligo te homu yaibao.’ Te po me pusao,” wali.

⁸“‘Ena God Genuai Bidi, eno te po obao. Mu tamao, te sogo mu pedalaibao. Tama eno wali s dabe sese tama eno te sogo yaibao. ⁹Tama te Israel we bidi dabe augwaligo augwa taun dabe tagalama, tama augwaligo te boi bidi dabego hwıbo nai dabe tde subigila tagalai wilalua pabo nai dabe sigi paibao. Te augwaligo te sabele dabe me te awa dabe siyu, me enesigi siyu, me ene dabe siyu, me hwıbo wbi dage dabe siyu, me te bobobage sesemone dabe siyu yaibao. Tama augwaligo te nai dabe sisinama, tama augwaligo te isi pulu dabe ulubo tiwai yaibao. Tama tiyu, augwaligo ulabo isi te kibu be nogo a naga olama, me badu nogo si, te ⁷ kibu bede nogabo isi usu elaluaibao, ¹⁰tama te kibu be a naga olama, me badu nogo si te kibu bede augwaligo buside o kala sili bulude isi gegebo s meni yaibao. Menio. Te augwaligo te hwıbo nai dabe naga augwaligo isi ulubo s eyu yaibao. Tama te kolesagago da, te Israel dabe augwaligo augwa boi bidi dabe augwaligo dwai kolesaga wei ponaibao. Te boi bidi dabego Israel dabe doado bage dabe wi sai, tama megı da, te Israel dabego te boi bidi dabego nai dabe saibao. Te da, God Genuai Bidi eno po dao,’ nago te po te bidi Gokbolo pusao,” wali.

Gokgo ami bidi dabego g page

¹¹“Ena Genuai Bidi eno po genina ma weyu, e po obao. ‘Te s dabe tıgidali pedalobo sogo da, teda eno te kantri Israelde te king Gok aga

ami dabe dali augwali pubulabo gų page tų deli me sa muaibao. Te gų page da, te Osogo Bidagasali Bidi Dabego Odogo Malu Bulude elaluaiba, te u badu te giliga asobo badu te tamu ađ Detsi te sigi ađ badu. Tama te we bidi augwali te badu munu me ma biligobeo. Magi baso meni. Te Gokgo ami bidi dabego gų page te bulu badu mu pağana paibao. Tama augwaligo te odogo malu bulu nogi e tama nogi nogi yaiba, Gokgo Ami Bidi Dabego Odogo Malu Bulu dao waibao. ¹²Tama te Israel dabe augwaligo te Gokgo ami bidi dabego tigi pubalobo şe idubadi, te 7 polua bidaibao. Tialima, augwaligo augwali polo pubala silibo si, teda augwaligo tų eno gedude wiegi yai ma yaibao. ¹³Te Israel dabe sese tamago te şe yaibao. Tama bidi dabego enaba genuai nogi mabo sogo da, teda augwali te şe yali bidi dabebolo me genuai nogi mawaibao. Te da God Genuai Bidi eno po dao. ¹⁴Tama te a naga olama, si, te 7 polua silibode da, te Israel dabe augwaligo bidi dabe sa munama, tama augwali tigidali Israel tųba pelama, tama te bidi dili dabe me munalubo gege biligi paibao. Tama augwaligo te dili dabe pubalaibao, te tų wiegi yai pedalomainu. ¹⁵Tama te bidi dabe augwali biligi pelama, te bidi dili dabe elalubo subaso da, te bidi dabe augwaligo te dili elalubo pađe sa munagaliyu yaibao. Tama gasa bidi dabe mebago te dili dabe sagaselama, tama augwaligo te Gokgo Ami Bidi Dabego Odogo Malu Buluba pubaligi paibao. ¹⁶Augwaligo te dabe sese pubala silibo si, teda Israel dabego tų sese tama wiegi yai ma pedelaibao. Tama taun me deli te gų page pađe elaluaibao. Tama augwaligo te taun nogi e tama nogi yaibao, Genuai Ami Bidi Hani nogi yaibao.’ Eno te po obao,” wali.

¹⁷“Ena God Genuai Bidi eno te po me obao. Tųde bidi, eno homugo nago e tųde ba dabe me bulu hasa dabe asomainu i ola kegelao. Eno e po augwalibolo pusao, ‘Dage te Israel dabego bulu du buluba dabe sisinagaselama, tama dagego eno dagebolo ofa nai mawainu ebo te ofa nai tuagameo. Te eno dagebolo tuabo mi hauwa mayu, me tuabo kaneme hauwa mu mayu yaibao. ¹⁸Te dagego te king hauwago bomai ami bidi dabego tigi mi me kaneme hauwa tuyu yaibao, te bidi dabego mi dabe te Basan bulude sabo wiegi yai tumona pai genuai sipsip kibu, me meme kibu, me kau kibu ofa ebo mi tiwai tueibao. ¹⁹Te eno te ami dabe te ofa tiwai elebo si da, dage te ba dabe me bulu hasa dabe dagego te tigi ili dabe tudubadi genama, dagego tabi pağabo tagalama, tama augwaligo kaneme tudu pelama, dage polobo bidi tiwai ebo si tagalaibao. ²⁰Awe, eno dagego genuai nai da mu mawaibao. Tama dagego te hos dabego tigi dabe tuyu, me te hosde duabo ami bidi dabego tigi, me te hwıbo bomai bidi dabego tigi me tuyu yaibao. Tama dagego tabi mu pağana paibao.’ Te da God Genuai Bidi eno po dao.”^s

^s 39:20 Ped 19:17-18

Genuai Bidigo Israel dabe ma oda saibao

²¹ Genuai Bidigo po bomonama ma weyu, te po wali, “Te eno te we bidi tigidali augwa dwai dwai kolesaga wei ponoyu, augwali dene mawaibao. Eno te tama tibo sogo da, teda augwaligo eno genuai bomo sulama, tama augwaligo enabolo genuai nogi mawaibao. ²² Tama tialima, te sogo me, nosali bidibo tigidali sogo me, te Israel dabe augwaligo te tama bugagia koneaibao, ena deli ena Genuai Bidi, tama ena augwa God dao waibao. ²³ Tama gasa t̄ kantride bidibo we bidi hani bidi eno te Israel dabe dali yali ş̄ page mu koneaibao. Te eno te Israel dabe digibulu buluba kalabus ş̄ emainu tagala palali sogo, eno te tama tiai dao. Magi baso meni, te Israel dabe augwaligo eno po sela ş̄nama, ş̄geş̄ sobaso tiai dao. Tama tialima, eno augwalibolo tudi ola mawai dao. Tama te boi bidi dabego augwali aiyaba elaluama, tama augwali sese ela isila silimainu sula tagalai dao. ²⁴ Eno augwaliba tudi ola menama, tama augwaligo dwai meda yai ş̄ dabe elama, ş̄geş̄ ş̄ dabe yali wei ponoyu, tama tiai dao, augwa dagede,” wali.

²⁵ “Ena God Genuai Bidi, eno te po obao, eno te Israel dabe dene polo mawai dao. Tama tialima, eno megi augwali ma homu dene ma yaibao. Tama bidi mego eno genuai nogi aiyaba elalubo usu me egobeo. ²⁶ Te augwali augwa t̄de bugagia bidiyu, tama bidi mego augwali wi ma ilis̄ama ebaso da, teda augwaligo augwa polobadu yali dwai kolesagaba kone palama, tama augwali hale dwai mu yaibao. ²⁷ Eno augwali augwa boi bidi dabego kantride selama, tama augwali augwa kantri muba ma odasa asaibao. Tama te gasa hani bidi dabego eno te Israel dabe dali yali ş̄ sulama, tama augwaligo e tama koneaibao, te ena tedali gasagi yai dao, tama eno kolesaga wiegi yai doloba pai mu augwaligo suaibao. ²⁸ Tama te Israel dabego eno augwali dali yali ş̄ kone palaibao. Te augwaligo eno augwali gasa kantriba kalabus igi pomainu tagala palali, me augwali augwa kantriba ma odasa asali kone paliyu yaibao. Tama augwaligo e tama bugagia koneaibao, ena deli ena Genuai Bidi augwaligo God dao homu yaibao. ²⁹ Tama eno ena mobo bidi augwalibolo mawaibao. Tama eno augwali tudi munu me ma ola magobeo. Ena God Genuai Bidi, eno te tama po te wali dao,” te po wali.

Godigo Esekielbolo nosali Israel bulude pedelabo wiegi yai nai dabe ola mani

(Dq̄ 40-48)

Genuai Bidigo Esekiel Jerusalemba odasa pali

40 ¹ Te da kalabuside bidibadi kibu be 25 wabode, tama te kibu bede te dei namba 10 wabo sogo eno Genuai Bidigo bomo enaba

asobo gagama yali. Te da te boi bidi dabego te taun Jerusalem selama, 14 kibu be polo pai nosali badu dao. Tama te sogo tama Genuai Bidigo ena tolasa pali. ²Tama te nade ebo şe dabe tiwai elama, Godigo ena tolasa pelama, Israel dabego t̄ba odasa pelama, tama bulu du ugwanu mu yai bulu duba me tagaligi pali. Tama eno u sautba tonobadi, eno be dabe elalubo suali, tama te ma te taun me elalubo tiwai subo aq̄ yali. ³Tama Godigo ena p̄ba odasa pali, tama eno bidi me bidibo suali, tama aga te bras ula tiwai ebo suali. Te bidi te taun obo sunumide dolaluali, tama agai te bobobage nai usu sabo haliga bono elaluyu, me te gasa nai usu sabo ni tolaluyu, dolalubo suali.⁴

⁴Tialima, te bidigo enabolo e tama po walali, “T̄de bidi, eno nagebolo waselainu ebo nai dabeba bugagia mu tonalua. Me nago odainu ebo poba bugagia olo saganama odao. Magi baso meni. Godigo nage odasa asali, te nagebolo eno te nai dabe ola momainu, tama nosali nago Israel dabebolo eno te pusa mani po pusao,” te bidigo enabolo te po wali.

Esekielgo giliga asobo badu elalubo obo sunumi suali

⁵Eno Godigo tempel be suali, tama masigigo nigai genuai obogo te be bagulai suali. Tama te bidigo te usu ni sabo eno suali. Te usu ni bobobage te 3 mita usu nama elaluali. Tama agai te Godigo be bagulali genuai obo usu sali. Tama te obo bobobage ugwaba te 3 mita usu nama elaluyu, me ugwade edasi dedawali te 3 mita usu nama elaluali. ⁶Tama te obogo bobobage sunumi sela elaluali. Tama te deli deli sunumi u badude te be habu dabe si badu elalua peyu, tama elaluali. Tama bidi dabe augwali Godigo beba painogo da, augwali te be habu elalubo sunumi me delidu peyu yao. Tama be sunumi tagalama, saboligi pao. Te deli deli sunumide te ugwa holoyu, eda asiyu yabo togobili te elalubao. Tialima, te usu ni elalubo bidi aga te giliga asobo badu elalubo obo sunumi badu pali. Tama te bidi aga te sunumi togobilidu ugwaba holoyu, agai te obo sunumi ugwanu dedawali usu nigo usu sesa holali. Tama d̄āi te usu ni da, te 3 mita usu nama elaluali. Te hasia wali sunumi d̄āi te 3 mita usu nama tama elaluali. ⁷Te be te sunumigo talua sai elaluali. Te be sunumide te u badu me e badu te tonalubo bidi bidabo be habu dabe me elaluali. Tama bilabo sunumi bobobage te tomode elaluali. Tama te bidigo te be habu genuai me bobobage usu nigo usu sabo suali. Tama augwali sese tama deli d̄āi yai naga elalubo suali, te 3 mita usu nama naga, tama agai tama te be habu tomode ugwanu edanu dedawali te usu nigo usu sali. Te be habu todogo pali tomode tama te dagago genuai d̄āi te 2 mita me hap mita elalua pali. Te pesage te genuai be habuba deli ugwa peyu, eda asiyu ebo pesage deli tama naga dao. Tialima, te bidi aga pelama,

⁴ 40:2 Ped 21:10 ⁵ 40:3 Ped 11:1; 21:15

te be habu sunumiba saboligi pali. Tama agai te sunumi sabi badu daga ugwanu edanu dedawali te usu ni sabo suali. Tama te badu te daga    te 3 mita usu nama elaluali. ⁸⁻⁹Tama aga te genuai be habuba pelama, tama agai te be habu usu nigo usu sabo suali. Te be habu genuai    te 4 mita usu nama elaluali. Te be habu u badu te gasa sunumi me elaluali. Te sunumi te Godigo beba pabo sunumi elaluali. Tama te bidigo te be habugo sunumi sabi badu daga usu nigo usu sigi pali. Tama agai    te wan mita usu nama elaluali.

¹⁰Te be tonalubo bidi dabe bidibo be habu dabe da, te 6 tama elaluali, te genuai sunumi bogo badu elalubo be habu dabe. Te me badu sela, me badu sela elaluali. Tama tigidali be habu dabe deli usu ni naga elaluali. ¹¹Tama nosali te bidi aga genuai sunumi dedawaliba pelama, tama agai te pesage usu nigo usu sesa bilali. Te sunumi dedawali te 6 olama hap mita tama usu nama naga elaluali. Tiali goli, augwaligo te be sunumi dabo si da, teda te    p  ba 5 mita tamaba usu nigi pali. ¹²Tama te tonalubo bidi dabego be habu gesabidi badu te p  wadage be daga ugwaba bobobage te 50 sentimita elaluyu, me ugwade eda si dedawali me te 50 sentimita tama usu nama tama elaluali. Tama te be habugo bobobage me genuai yali me te deli mita naga elaluali, te 3 mita tama naga elalua pali. ¹³Tialima, te bidi aga te tonalubo bidi me deligo be habu tomoba pelama, tama usu nigo usu siyu yali. Agai te be habu tudi badu dagade gagalama, tama pelama, te soabo sunumi ela solama, gasa dolo si be habu tudi badu dagaba pelama, te usu nigi pali. Tama te tiwai usu selama, te usu te 12 mita olama hap mita yali. Te da te bego genuai    namba dao. ¹⁴Tama nosali te bidigo te dedawali sabide elalubo genuai be habu usu nigo usu sigi pali. Te be habu aga bobobage da, te 10 mita usu nama dao. Te genuai be habu u badu te sunumi te Godigo be bagulai genuai sisinibo pesageba pabo sunumi dao. ¹⁵Te genuai sunumi bulu badu gagalama, tama te dedawali usu selama, tama te sabi badu elalubo sunumiba usu nigi pelama, te usu te 25 mita usu nama dao. ¹⁶Te tigidali be habu si si tomode te windo elalua pali. Tama te tonalubo bidi dabego be habu tudi badu daga elalua pabo, te daga dabede me te windo dabe elalua pali. Tama augwaligo te ni det noma te be dagade te windo p  de elalua pali.

Esekiel agai genuai sisinibo pesage te obo tomode suali

¹⁷Tama tialima, te bidigo ena oda selama, tama da sigo te be habu tagalama, tama te obo tomode genuai sisinibo pesage te Godigo be bagulama tomode elalubo, teba pesageba pali. Tama eno 30 be habu te sisinibo pesagede bogo badu elalua pabo suali, te sisinibo pesage bogo badu selade naga. Tama augwali te masigigo nigai genuai oboba ugwa mu dagana sai elaluali. Tama te be habu dabe gesabidi badude augwaligo masigi du dabe wasilama, tama bilibo pesage nigai suali, agai te pedu

elalubo suali. Te bilibo pesage te tigidali be habu gesabidi badu naga elalua pabo suali. ¹⁸Te bilibo pesage aiyadu elalubadi, te Godigo be bagulai sisinibo pesage te ugwadu tama elaluali. ¹⁹Te sisinibo pesage obogo te gasa obo me bagulai. Te da te namba 2 obo te Godigo tempel be bagulai obo mu dao. Te namba 2 obo tomode te gasa sisinibo pesage me elaluali. Tama te sisinibo pesage te ugwanu ganama elaluali. Te namba 2 obo te giliga asobo badu, te sunumi me deli elaluali. Tama te bidigo te obo si agebele tomode elaluali t̄q usu nigo usu sali. Agai te genuai obo sunumide gagalama, tama pelama, tama te namba 2 obo sunumiba saboligi pali. Tama te t̄q mita te 50 mita usu nama tama d̄aj̄ yali.

Esekiel agai u not badu obo sunumi suali

Tama tialima, te bidi aga u not badu pali, ²⁰tama agai te not badu elaluali be obo sunumi usu nigo usu sali. ²¹⁻²²Te tomo habu dabe te giliga asobo badu genuai obo tomode te be habu dabe tiwai mu dao. Tama tialima, te sunumi genuai d̄aj̄ te 12 mita hap usu nama dao. Tama te sunumi dedawali bobobage da, te 25 mita usu nama dao. Tama te sunumi togobili te agalama ugwaba te genuai obo tomoba pabo te a naga olama, si, te 7 te bede elalubao. ²³Te u badu not badu te Godigo be bagulali namba 2 genuai obode, te sunumi me deli elalubo. Te da te giliga asobo badu te sunumi tiwai si mu dao. Tialima, te bidigo te sunumi si agebele tomode te t̄q usu nigo usu sali. Te agai te giliga asobo badu yali kolesaga tiwai tama yali. Tama te t̄q d̄aj̄ me te 50 mita usu nama tama elaluali.

Esekielgo u saut badu elalubo obo badu sunumi suali

²⁴⁻²⁶Tialima, te bidigo ena u saut badu odasa pali. Tama dadi si te obo sunumide beba sabolali. Te genuai obo sunumiba tama agai te be usu nigo te be usu sali. Te be habu dabe te deli tiwai si naga elalua pali, te gasa me be si tiwai yali gilama naga elaluali. Tama tialima, te be bobobage te 25 mita elaluali, tama te aga genuai da, te 12 mita olama hap mita tama elaluali. Tama te sunumide te ugwa genuai be habuba holobo togobili te a naga olama si, te 7 agabo madi elaluali. ²⁷Tama te e saut badu me te 7 namba 2 obo badu te sunumi me deli elaluali. Tama te bidigo agai giliga asobo badu te yali kolesaga tiwai te obo sunumi si tomo agebele t̄q usu nigo usu sali. Tama te t̄q d̄aj̄ te 50 mita usu nama tama elaluali.

Esekiel agai namba 2 obo sunumi suali

²⁸Tama tialima, te bidigo ena te namba 2 obo sunumi elalubo madi odasa pali, te saut badu. Tama dadi si te sunumidu tomoba pelama, te sisinibo pesage, te Godigo tempel be gesabidi badu elalubo, te pesageba saboligi pali. Tama te namba 2 obo sunumide me be elaluali. Te bidigo

te saut badu te sunumi usu nigo usu sali, tama te be habu dabe sese tama te gasa genuai be habu te usu sali tiwai si tama naga elaluali. ²⁹Te tempel be tonalubo bidi dabego be habu dabe me, te genuai be habu me, te be habu tomode daga dabe sese tama te gasa meba be habu usu sali usu ni tiwai naga elaluali. Tama te sunumi dedawali bede me te windo dabe me elaluali. Tama te dedawali bobobage magi te 25 mita usu nama elaluyu, me ugwanu edanu dedawali te 12 mita olama hap mita elaluali. ³⁰Tama te be tomode te genuai be habu te si dali si badu elaluali. Tama te be habu bobobage te usu ni te 12 mita olama, ugwadu hap mita dao. Tama te be genuai ugwanu dedawali da, te 2 mita olama hap mita dao. ³¹Te bede genuai be habu aga gesabidi te genuai sisinibo pesage badu elalubao. Tama te tempel be tonalubo bidi dabego be habu dabe te Godigo tempel be  ade elaluali. Tama te ni detgo piksa dabe te windo dabe  ade elalua pali. Tama te be sunumi te a naga olama sela, te 8 agabo togobili ni aiyaba te genuai sisinibo pesageba dulubo digi elaluali. ³²⁻³⁴Tialima, te bidigo ena te giliga asobo badu te namba 2 obo tomode elalubo sisinibo pesageba teba odasa pali. Me te tonalubo bidi dabego be habu te Godigo be gesabidi badu  ade elaluali. Tama agai te namba 2 obo badu elaluali be sunumi usu nigo usu sali. Tama te be habu dabe, me te tigidali nai dabe te meba be habu dabe usu ni sali tiwai naga elaluali. Te bego genuai be habu te genuai sisinibo pesage  ade elaluali. Tama te tonalubo bidi dabego be habu dabe te Godigo be  ade tama elaluali, te Godigo be gesabidiba polobadu. Tama te ni detgo piksa noma te windo  ade dabe elalua pabo suali. Tama te be togobili te a naga olama sela, te 8 aiyaba te genuai sisinibo pesageba dulubo digi elalubo suali.

³⁵⁻³⁷Tialima, te bidigo ena oda selama, tama not badu te namba 2 obo sunumi beba odasa pali. Tama agai te be usu nigo usu sali. Tama te be habu dabe usu sali, te gasa meba be habu dabe tiwai si naga elalua pali. Tama tede te ni detgo piksa noma te piksa tama elaluali. Tama te tonalubo bidi dabego be habu dabe te Godigo be  ade elaluali. Tama te be sunumi togobili te aiyaba genuai sisinibo pesageba dulubo madi te togobili ni te a naga olama sela elaluali.

Esekiel agai te ofa nai dabe dodolobo pesage suali

³⁸Te not badu te bede te gasa be habu me elaluali. Te be habu te genuai be habu sesege badu elaluali. Tama te be habugo sunumi te genuai be habu dedawali sunumi badu elaluali. Tama te be habude augwaligo te iside mu dela silabo ofa yabo hasa dabego mi  igo telabo digi dao. ³⁹Te genuai be dedawali bogo badu si badu te tebol sai elaluali. Te me si u badu elaluyu, me si te me badu polo badu elaluali. Tama te tebol sai dabede augwaligo te iside mu dela silabo ofa yabo kibu eleyu, me se e sela sayabo ofa yabo kibu eleyu, me se e dabe dodolabo ofa yabo kibu

dabe tama eleyu ebo tebol dabe dao. ⁴⁰Te bulu badu te genuai be habude te genuai be habu muba pabo te togobili pagede te me si me si tebol tede munaluali. Te tebol me si te togobili elalubo badu elaluyu, me si te u badu elaluyu yali. ⁴¹Tialima, te ofa ebo kibu dabe elebo tebol te a naga olama sela, te 8 tebol elaluali. Te me si me si te genuai be tomode elaluali, tama me si me si te bulu badu elaluali. ⁴²Tama gasa me si me si tebol me elaluali, te augwaligo masigigo nigai. Te tebol dabe ugwaba    te 50 sentimita dao. Tama agai bobobage elama, genuai te usu ni da, te 75 sentimita dao. Tama te tebol daide augwaligo te sese dela ulubo ofa yabo kibu dabe elebo ka o hwa dabe tede munalubo dao. ⁴³Augwaligo te be habu dagade te genuai huk dabe munama bagulai elaluali. Te huk bobobage usu ni te 7 hap sentimita dao. Tama augwaligo te ofa ebo kibu mi dabe te tebolde myu ebo dao.

Esekiel agai pris dabego be habu suali

⁴⁴Tialima, te bidigo ena te namba 2 obo tomode elalubo te bidi dabe sisinibo pesageba odasa pali, te Godigo tempel be gesabidi badu. Tama eno te balia po wabo bidi dabego be habu si suali. Te be habu me te not badu be sunumiba polo badu elaluali, tama u sautba tonoyu ebo suali. Tama me be habu te saut badu obo sunumi be sesegede elaluali, tama u notba tonoyu ebo elaluali.

⁴⁵Tama te bidigo enabolo e tama po walali, “Te not badu te elalubo be habu te Godigo be tomode se ebo bidi dabego be habu dao. Tama te saut badu elalubo be habu te altade ⁴⁶se ebo bidi dabego be habu dao,” wali. “Te tigidali pris dabe te Sadok hani wai, tama augwali te Livai hani dao. Te Sadok hani pris bidi dabe naga te Genuai Bidi pageba paibao, agai se yainogo,” te po wali.

Augwali Godigo tempel beba sabolali

⁴⁷Tama tialima, te bidigo Godigo be gesabidi badu sisinibo pesage badu usu nigo usu sali. Tama te sisinibo pesage tigidali badu te deli tiwai    naga elaluali, te 50 mita usu nama naga elaluali. Tama te alta te Godigo tempel be gesabidi badu te sisinibo pesage tomode elaluali. ⁴⁸Te usu ni tolalubo bidi agai ena te Godigo be sunumidu odasa pelama, tama dadi si te be mabo tiwai habuba me pali. Agai te be sunumi ugwanu edanu dedawali te usu nigo usu sali. Te sunumigo bobobage tama te    te 2 mita olama, hap mita elaluali. Tama agai te sunumigo genuai te usu nigo usu sali, tama agai magi te 7 mita usu nama elaluali. Tama te dwasianu daga te be habu badu elaluali te daga usu ni da, te mita deli olama, hap mita yali. ⁴⁹Te sunumi dedawaligo bobobage te 10 mita elaluali. Tama agai genuai te 5 mita olama, hap mita elaluali. Tama te sunumide togobili elaluyu, tama aiyaba te sisinibo pesageba dulubo

togobili elaluali. Tama te togobili bogo badu si dali si badu te genuai pos si dolaluali.

41 ¹Te Tedali Gasagi Yai Be Habu te be mabo tiwai be habu tudi badu elalubo. Tama te bidigo ena te Tedali Gasagi Yai Be Habu sunumiba odasa pali. Agai te sunumi usu nigo usu sali. Tama te sunumi sesege te obo ugwanu dedawali te 3 mita elaluali. ²Tama te sunumi aga te dedawali te 5 mita elaluali. Tama me te obo dage te bugai te sunumi habu badu gagalama, te me habuba te 2 mita me hap mita elaluali. Tama te obo dage me te be sunumi me badu pedai badu te usu ni si te tiwai si naga yali. Tama agai te Tedali Gasagi Yai Be Habu usu nigo usu sali. Tama te be habu te bobobage te 20 mita usu nama elaluyu, me te be habu genuai te 10 mita usu nama elaluali.

³Tialima, nosali aga te Tedali Gasagi Yai Be Habu tudi badu te gasa be habu sunumi me deliba pali. Tama agai te be sunumi usu nigo usu sali. Te sunumi sesege badu obo ugwanu dedawali te wan mita elaluali. Tama te be sunumi mu da, te 3 mita usu nama elaluali. Tama te be sunumidu te obo te sunumidu gagalama, te be habuba te 3 mita olama, hap mita elaluali. Te obo me badu sunumi sesege badu te deli tiwai daı naga elaluali.

⁴Tialima, agai te be habu usu nigo usu sali. Tama te be habu tigidali pedai badu te deli tiwai daı naga elaluali, te 10 mita usu nama naga tama elaluali. Tama agai enabolo e tama po wali, “E da te Tedali Gasagi Yai Mu Be Habu mu dao,” wali.

Esekiel agai te Godigo tempel be sesege elalubo be habu dabe susa pali

⁵⁻⁶Te Godigo tempel bede te Tedali Gasagi Yai Be Habu, me te Tedali Gasagi Yai Mu Be Habu, augwali si te dwasianu dwasianu be habu dabego bagua sai mu elaluali. Tama te usu ni tolalubo bidigo te be habu tomode elalua pabo obo dabe genuai yali usu nigo usu siyu, me Tedali Gasagi Yai Be Habu, me Tedali Gasagi Yai Mu Be Habu te usu nigo usu sali. Te daga dabe aiya badu te daı te 3 mita usu nama elaluali. Tiali goli, te habu tomode me te daga tomode te daı te deli tiwai si menio. Magi baso meni. Augwaligo te be daga bulu badu te habu sugunani si daganani. Tama te be habu dabe te sai yali selade wasilama elaluali. Te aiyadu be habu lain te aiyadu tıde elaluali. Tama me te tomo ugwadu be habu dabe te tomo menename ni daide elaluali. Tama te menename ni te hasia manani kau ni daide elaluali. Tama te ugwadu daide te be sai ni te si wabo manani kau ni daide elaluali. Augwaligo te tobage kolesagago nigai elaluali. Magi baso meni. Augwaligo Godigo be dagade dedage nigibo hagela ebaso, te soiame ni aiyadu be saiba muainogo. Tigidali be saide te be habu 30 elaluai. Tama aiyadu be habu dabe te 2 mita usu nama elaluali. ⁷Te

tomode be habu dabego te 2 mita genuai edelama elaluali. Tama ugwađu be habu ɗaj dabego tomode be habu dabe edelai elaluali. Tama te be tomoba holobo togobili me, te ugwaba holobo me, te togobili elaluali.

⁸⁻¹¹ Te Godigo be obo genuai me te habu u badu elaluali. Te obo dedawali da, te 2 mita usu nama elaluali. Tama te obode te sunumi si te bidi dabe ugwa eda yabo elaluali. Te sunumi me te saut badu elaluyu, me te not badu elaluyu yali. Tama eno suali, te bilibo pesage te Godigo be bagulama elalubo suali. Te ugwaba genuai yali da te 2 mita olama, hap mita elaluali. Te ugwađu te bilibo te be sai te ugwaba te Godigo be habu ɗaj tiwai elaluali. Tama te ɗaj da te 3 mita usu nama elaluali. Tama te bilibo pesage aiyadu te olo pesage me elaluali, te Godigo be bagulama elaluali. Tama agai genuai usu yai te 10 mita elaluali. Te olo tɔ elalubo digi te be dabe meba te bogode elaluali.

Godigo be usu sai

¹² Te giliga dega sabo badu te Godigo be tui badu genuai be me deli elaluali. Tama agai edaba te Godigo be bagulama elalubo te olo pesage o tɔ elalubo digi edaba tonaluali. Te be bobobage te 45 mita usu nama elaluali. Tama te be ugwanu edanu dedawali te genuai te 35 mita usu nama elaluali. Tama te be daga dedawali da, te 2 mita olama, hap mita elaluali. ¹³ Tialima, te be tagalama, te bidigo Godigo tempel be bobobage usu nigo usu sali. Tama te ɗaj te 50 mita usu nama elaluali. Tama nosali agai te olo tɔ, me te giliga pabo badu te be dali si agai usu nigo usu sali. Agai Godigo tempel be tui badu gagalama, tama te be tui badu tagaligi pali. Te ɗaj me te 50 mita tama yali. ¹⁴ Tialima, agai Godigo be gesabidiba usu siyu, me olo tɔ dabe u badu elaluali, me e badu elaluali olo tɔ elalubo pesage agai usu nigo usu sali, tama te ɗaj me te 50 mita usu nama naga elaluali. ¹⁵⁻¹⁶ Tama agai te tempel be tui badu elalubo be bobobage me te be habu bobobage si u badu me elaluali, te tama usu nigo usu sali. Tama te ɗaj me te 50 mita naga elaluali.

Esekielgo Godigo tempel be tomode be daga tigidali au yali agai suali

Augwaligo te Godigo tempel be sunumi dedawali dali, te Tedali Gasagi Yai Be Habu dali, te Tedali Gasagi Yai Mu Be Habu dali, augwali sela te dodolai masigi dabego nigai dao. Tama te be habu selago tomode elaluali be daga dabe augwaligo te ni namigo dagawani. Me te sunumi pađe elalubo daga dabede, me dwasianu windo dabede, me te be sunumi genuai pesage badu me, te ni namigo daganai elaluali. Te ni nami dabego te daga mesega sai elaluyu, te aiyadu soiyamedu gagalama, tama holama, te windoba usu nigi pali. Tama me te windo halubo ni nami dabe me elaluali. ¹⁷ Augwaligo te Tedali Gasagi Yai Be Habude augwaligo piksa togobadi, me te Tedali Gasagi Yai Mu Be Habu me ugwa badu be habu

badu daga, me te be habuba pabo sunumi daga me augwaligo te piksa togwai elaluali. ¹⁸Tama te piksa dabe te ni det piksa, me te bogo me si me si yai ensel dabe piksa dao. Tama te deli deli ensel bidigo piksa te ni det piksa tomo tomode elalua pali. Te ensel dabego gesabidi si te e tama tiwai si elaluali. ¹⁹Te me da, te bidigo gesabidi, me te laion yowigo gesabidi elaluali. Tama te piksa sigo te ni det u badu elalubo me e badu elalubo piksaba ugwa tonoyu, edaba tonaluyu yali. Te tiwai tigi poai piksa te tigidali be daga elalubo madi elalua pali, ²⁰te be aiyadu gagalama, tama te sunumi ugwadu toboluba tama usu nigi pai elaluali. ²¹Te Tedali Gasagi Yai Be Habu badu te sunumi pos te me si me si badu elaluali. Tama augwali daı te deli tiwai si naga elalua pali.

Genuai Bidi pagede elalubo tebol Esekielgo suali

Te Tedali Gasagi Yai Mu Be Habu pađe augwaligo ²²ni namigo nigai alta sai elaluali. Te nai ugwa badu daı te 1 wan mita olama, hap mita elaluali. Te nai dage badu me, bogo badu me, page badu me, augwaligo ni namigo nigai elaluali. Tama te usu ni tolalubo bidigo enabolo e tama po walali, “Te nai da, te Genuai Bidi gesabidide elalubo tebol sai dao,” wali.

Godigo be sunumi dabe

²³⁻²⁴Te Tedali Gasagi Yai Mu Be Habuba tula pabo sunumi si elaluali. Te be sunumi si deliba ununu pelama, elalua pali. Tama deli deli sunumi te ununama, deli sunumi elalubo tiwai yali. Tama me te Tedali Gasagi Yai Be Habu badu me te deli tiwai be sunumi naga elaluali. ²⁵Tama te Tedali Gasagi Yai Be Habu sunumi bulu badude me augwaligo te ni det piksa, me te ensel piksa tiwai si naga togwai elaluali, te be dagade elalua pali piksa tiwai naga elaluali. Te Godigo be tomoba pabo be sunumi bulu badu mabode te be pedu dwasianu deli elaluali. Augwaligo te be pedu te ni namigo nigai. ²⁶Tama te be mabo u badu me, e badu me, te dagade te dwasianu windo dabe elalua pali. Tama te be mabo dagade te ni det piksa elaluali, te windo dabe bogo badu side elaluali.

Pris bidi dabego be si

42 ¹Tialima nosali te usu ni tolalubo bidigo ena u not badu odasa pali. Tama da si te genuai sisinibo pesageba saboligi pelama, tama eno u not badu te Godigo be not badu te be me elalubo suali. Te be te Godigo be tudi badu te not badu te genuai be tudi badu pađe elaluali. ²Te be sunumi te u not badu gesabidi elaluali. Te be bobobage te 50 mita elaluyu, me agai genuai te 25 mita usu nama elaluali.

³Te be tudi te olo tı dage te Godigo be bogo badu elaluali, te tıba dagana sai elaluali. Tama te be gesabidi te genuai sisinibo pesage elalubo,

tama ugwaba te bidi bilibo sunumiba ugwaba tonaluali. Tama augwaligo te bede sai sela yai elaluali. Augwaligo namba 2 me namba 3 plua be sai ugwanu tomoba pelama, gana nigai elaluali. Tialima, te bego agabo togobili sela elalubo aq yali. ⁴Tama te bede te bilibo pesage bobobage te namba 3 saide elaluali, te olo tq dage pađe. Te bilibo pesage ugwanu dedawali da, te 5 mita usu nama elaluali. Tama te bilibo pesage me te be bagulama pelama, tama u badu te not badu sunumi dabeba saboligi pai elaluali. Tama te bilibo sunumi te 50 sentimita usu nama elaluali. ⁵Te namba 3 be sai te namba 1 wan me namba 2 be sai magi magi genuai usu nama tiwai si menio. Magi baso meni. Augwaligo namba 3 plua sai ugwanu mu nigai dao. ⁶Augwaligo te be sai dabe augwaligo pos saide ugwadu nigai menio. Te meba sisinibo pesagede be dabe tiwai menio. Menio. Te badu tq te dwasianu bulu du tiwai dao, tama tialima augwaligo te be sai dabe te tqde nidigili pai dao. Tama tialigo te namba 2 me namba 3 sai ugwanu mu gana pai elaluali.

⁷⁻⁸Te namba 1 be sai usu sali bobobage te 25 mita tama naga usu nama elaluali. Tiali goli, meba be sai dabe te 50 mita usu nama elaluali. Tama augwaligo namba 1 wan be saide augwaligo be daga deli yai elaluali. Te daga bobobage te 25 mita usu nama dao, te namba 1 be sai tiwai mu dao. ⁹⁻¹⁰Te obo tomode bilabo sunumi elaluyu, me te namba wan be saide me tiwai si elaluali, te bilabo pesage. Tialima, bidi te be tomoba painogo da, teda te bidi agai giliga asobo badu aselama, tama aga te bilibo sunumidu aselama, tama te be tomoba pomainao.

Tama u saut badu te Godigo be elalubo pađe te be me deli elaluali. Tama aga me te genuai be Godigo be tуди badu elalubo be pađe elaluali. ¹¹Te saut badu te be gesabidi badu te bilibo pesage me deli elaluali. Tama te da te not badu elalubo te bilibo pesage tiwai dao. Tama te be si dađi deli tiwai si tama dao, tama te be sunumi me tigidali nai dabe deli tiwai si naga dao. ¹²Tialima, bidi u saut badu elalubo beba painogo yali da, teda aga giliga pedalubo badu aselama, tama te bilibo sunumi wali pelama, te be tomoba pao, te not badu elalubo be dali tiwai si tama dao.

¹³Tialima, te usu ni tolalubo bidigo ena dali te po wali, “Te be si te Godigo be mu dao, tama tedali gasagi yai mu dao. Te pris dabe augwali te Genuai Bidigo beba augwa şę igi pabo dao. Augwali da te be siba pomainao, tama augwaligo te we bidigo Genuai Bidibolo mani te wiegi yai tedali polalubo ofa yali nai tumainao. Te be si te Genuai Bidigo be si mu dao, augwali tedali gasagi yai mu dao. Tama tialima, te pris dabe augwaligo te we bidigo mani tedali polalubo ofa nai dabe te be side muyu emainao. Te da te wit ulubo ofa, me we bidigo şęę sela sabo ofa, me dwai kolesaga dodolobo ofa yali, te ofa mubo be si dao,” wali.

¹⁴Tama agai te po me wali, “Te pris dabe augwali Godigo bede şę yali bidi dabe, augwaligo te be side augwaligo gudubo ugwa hasegelebo ugwa

te be side hasegeleyu emainao. Te pris şe yabo gudubo ugwa te Genuai Bidigo nai ugwa dabe naga dao. Tama tiyu, augwaligo pris şe ebo ugwa hasegelama, tama augwaligo meba olo ugwa hasegelama, gudumainao. Tama elama, augwali te be si teda solama, genuai sisinibo pesageba pomainao, te da te olo we bidigo pesage dao,” te usu ni tolalubo bidigo te po wali.

Bidigo Godigo be bagulali obo usu nigo usu sali

¹⁵Te bidigo Godigo tempel be dali, me te genuai obo tomode elaluali te nai dabe sese tama usu nigo usu sali. Tama agai ena te giliga asobo badu te genuai obo sunumi badu odasa pelama, tama te genuai obo usu nigo usu sigi pali. ¹⁶Agai te usu ni selama, tama agai te badu te obo usu nigo usu sali, te giliga asobo badu. Tama agai usu sali te 250 mita usu nama elaluali. ¹⁷⁻¹⁹Tama nosali agai not badu obo usu nigo usu siyu, me saut badu, me giliga dega sabo badu obo usu nigo usu siyu yali. Tama augwali deli deligo daşı te 250 mita usu nama naga elalua pali. ²⁰Te Genuai Bidigo tempel be bagulali obo te me si me si bogo badu elaluali. Tama te daşı tigidali bogo badu te deli tiwai si naga yali, te 250 mita usu nama naga yai yali. Te genuai obo te Genuai Bidigo tedali gasagi yai nai dabe dali, te olo nai dabe dali si tomode daşı elalubo obo dao. Te Godigo tedali gasagi yai nai dabe te obo tomode elaluyu, tama te olo nai dabe bulu badu elaluyu elaluali.

Genuai Bidi aga beba ma asali

43 ¹Te haniani nai usu sali bidigo ena te giliga asobo badu obo sunumiba odasa pali. ²Tama eno Israel dabego Godigo moni ula elalubo suali. Tama te ula te giliga asobo badu asobo suali. Tama te ula pedalobo si da, eno agai po wabo dogoni te genuai tamu aşı kulukulu wabo tiwai tama eno odali. Tama Godigo ulago tş ula genuai mu yali.^v ³Tama te şe yali eno nade megi ebo eno subo aş yali. Te da te eno polobadu suali te na yali te na tiwai mu ma yali, te aga te Jerusalem dolainu asali sogo, tama te eno te Babilon bulu aşı Kebarde polobadu suali na tiwai ma suali. Eno te ula sulama, tama eno bogoli sugunama, tama eno gesabidi tşba pogulama elaluali. ⁴Tama Genuai Bidigo te ula te giliga asobo badu te sunumiba dula pelama, tama Genuai Bidi Godigo be tomoba dula pali.

⁵Tialima, Genuai Bidigo Mobo Bidigo ena ugwa dabo selama, tama ena odasa, te dwasianu sisinibo pesage Godigo be gesabidi badu te sisinibo pesageba odasa pali. Tama eno Genuai Bidigo boma pai ulago te be paşana pai suali. ⁶Tama te bidi ena pagede me dolalubadi, eno

^v 43:2 Ese 10:3-4, 18-19; 11:22-23

po me te Godigo be tomode po wabo odali. ⁷⁻⁸Te da te Genuai Bidigo pedauwalidu po wali. Tama agai enabolo e tama po walali “Tqde bidio, eno sia king te be tomode te elalubao. Tama te pesage da, te we bidi augwali aselama, enaba lotu wagasabo madi dao. Ena tigidali sogo ede bidada paibao, te ena we bidi Israel dabe tomode. Tama nosali Israel dabe, me augwa king dabe, augwaligo nosali eno wiegi yai nogi aiyaba munu ma me elalugobeo. Polobadu te we bidi dali, te king bidi dabe dali, augwaligo ena tagalama, te tibo god dabeba lotu po odu geai dao, we bidigo dwai penane şe ebo tiwai yali. Tiali goli, megi da, te augwaligo te tibo godiba lotu po te ugwanu elalubo madide me weyu egobeo. Tama te king dabe augwaligo eno tempel be pade mu augwaligo be me ma şe yagasiyu me egobeo. Polobadu augwaligo be te tama elaluai dao, tama te king dabe augwali augwa bede isibo sogo augwaligo eno be meda iliyu yai dao. Tama me augwaligo dwai damua pai kolesaga eyu, augwaligo eno nogi aiyaba elaluyu yai dao. Tama tibaso, eno augwali dali şeşe elama, tama augwali dolai dao. ⁹Megi da, te Israel dabe augwaligo tibo godiba lotu me wabo tagalao. Tama augwaligo augwa king eno be pade isimainu sula tagalamo dao. Tialima, augwaligo eno po wali peyu da, teda ena augwali dali tigidali sogo mu bidaibao,” te po wali.

¹⁰Genuai Bidigo ena dali po genina ma weyu, e tama po wali, “Tqde bidio. Nago Israel dabebolo po weyu, ‘Godigo tempel be e tiwai elalubo eno suali,’ te po olama, tama nago te tigidali suali naide po pusao. Tama augwaligo te be te tiwai elalubo bugagia konemainu eyu, tama augwaligo augwa yali dwai kolesagade hale dwai mu emainu yao. ¹¹Augwali hale eyu da, teda nago augwalibolo eno bede tigidali be habude, me te doado bage dabede po augwalibolo wao. Augwalibolo tigidali te nai dabe magi po weyu, me te sunumi dabe muabo pesage ola mayu, me te be şe ebo kolesaga sese ola mayu yao. Tama augwalibolo te be tomode şe yabo bomai po dabe ola mao. Augwaligo te be te nago suali tiwai dolo mu şe yainogo eyu, me augwaligo te bede elalubo bomai po dabe bugagia wali pomainu eyu, nago te po sese te bukude aşenama, augwali mao.”

¹²“Eno bego bomai po da e dao. Te be da, te aga pesage te bulu dude tama elalueibao. Tama te be mesalo bagulama elalubo te tq te eno tq mu elaluaibao, tedali gasagi yai mu elaluaibao. Te eno bego hage yai bomai po dao,” wali.

Te alta sai usu sai

¹³Genuai Bidigo po genina ma weyu, te po wali, “Te alta dabego daj dabe da, te e tama dao. Te we gamiago e alta bagulai elaluali. Te we gamia ayanu dulali te 50 sentimita usu nama dao. Tama aga genuai yali me te 50 sentimita usu nama tama dao. Te we gamia te dwasianu obogo bogo badu bagulai elaluali. Te obo ugwaba bobobage te 25 sentimita usu

nama dao. Te alta dabe nigibo magi te ugwaba mu holai dao. Augwali te e tama tiwai dao. ¹⁴⁻¹⁵Altago bugai sela elalubao. Te aiya badu bugai badu te wan mita usu nama tama dao. Tama tomode te dađi ugwaba holobo te dađi te 2 mita usu nama dao. Tama dage ugwa badu te ofa ebo nai dabe ulabo alta sai dao. Te ugwanu holali te 2 mita usu nama dao.”

“Te tomo tigi genuai me bobobage yali, te aiyadu bobobage me genuai tiwai si menio. Magi baso meni. Tomo tigi te tomoba te 50 sentimita usu tomoba ugwa pai dao, te aga tigidali bogo badu. Tama ugwa badu tigi te uganu mu genina 50 sentimita usu nama mu pai dao. Te tigidali bogo badu usu nama, tama te alta ugwadu saide te me si me si dage badu da, te kau kibu gađi tiwai nai te dolalubao. ¹⁶Te alta ugwadu daide te genuai yali me, bobobage yali me, te deli tiwai dađi naga yali, te 6 mita usu. ¹⁷Tama te alta tomode te genuai yali me, bobobage yali me, te deli dađi usu nama naga dao, te 7 mita usu. Tama te alta tomo tigi bogo badu te dwasianu obo dolalualali. Te obo ugwaba bobobage te 25 sentimita usu nama dao. Te obo te alta tomo tigde te bagulali te ađi gamia bogo badu elalubao. Tama te gamia te genuai te 50 sentimita usu nama dao. Tama te giliga asobo badu te alta daiba ugwa holobo te togobili me deli elalubao,” wali.”

Augwaligo alta te Godigo nai dao olama, sa muani

¹⁸Genuai Bidigo enabolo e tama po wali, “Tode bidi, nago ena God Genuai Bidigo po odao. Augwaligo te alta nigibo se silibo si da, tama augwaligo tede te sese delabo ofa yainu, tama te hasa kaneme dabe te daiba sađo si da, teda nago e tama bomai po wali pao. ¹⁹Nago kau kibu omai me deli selama, tama Sadok hani pris dabebolo mao. Ena God Genuai Bidi eno te po obao. Te Livai hani bidi dabego naga augwali deli naga ena pageba aselama, tama augwali eno se emainao. Tialima, te pris dabe augwaligo naga te kau kibu elama, tama augwaligo naga te sege sela sađo ofa uluyu emainao. ²⁰Tama nago te kau kibugo kaneme meba selama, tama te altago gađi me si me side munama, tama me alta me si me si dage badu tomode, me te dwasianu obo te alta tomode bagulali tede mubadi yao. Tama nago te ebo kolesagago te altago meda sela sayu, tama te alta eno gedude wiegi yai pedalaibao. ²¹Tama nago te kau kibu tigi mi selama, tama nago augwaligo te sa muani te pesagede ulao, te eno tempel be bulu badu elalubo, te pesage. ²²Tama pilama, nosali te si wabo sogo da, te sogo da, teda nago meme kibu omai kenigo agai tigi me dolisawai selama, tama sege sela sađo ofa yao. Tama nago te meme kibugo kaneme selama, tama nago kau kibu kanemego yali te kolesaga tiwai ma yao, te alta meda sela somainu yao. ²³Nago te se polo elama

^w 43:17 Sai 27:1-2; 2 Sto 4:1

da, teda nago gesi kau kibu omai me deli, me sipsip kibu omai me deli te kenigo augwaligo tigi me dolisama yai selama, ²⁴tama nago augwali si ena pageba sesao. Tama te pris dabe augwaligo tamu te ela muani kibu si tigi miba nogogo telala pelama, tama augwaligo isigo mu dela silibo ofa ulumainao. ²⁵Tama te sogo gagalama, te dei namba 7 wabo sogoba usu nama, nago te meme omai me deli sesao, te seęę sela sayabo ofa tiwai. Tama me kau kibu omai, me sipsip kibu omai deli me te isigo mu dela silabo ofa tiwai sesao. Nago wiegi yai hasa dabe naga sesao, te keni dabego augwaligo tigi dabe me dolisama yai dabe sesao. ²⁶Te a naga olama si sogo te pris dabego te tobage ofa idubadi geaibao, te alta meda sela sayu, te eno gedude wiegi yai pedalobo siba usu naibao. Tialima, augwaligo te ebo kolesagago te alta te eno mu dao olama, augwaligo sa muaibao. ²⁷Tama te Sarere silibo si da, teda te alta aga seę yabo polo kegalubao. Tama te dei namba 8de te pris dabe augwaligo dage Israel dabego ofa ebo gagalomainao. Augwaligo te isigo mu dela silibo ofa eyu, me ena dali haliga deli ebo ofa eyu emainao. Tama augwaligo te tama tibode da, teda eno dage dali wiegi yai haliga yaibao. Ena God Genuai Bidi, eno po polo wali dao,” te po wali.^x

Giliga asobo badu sunumi palialuaibao

44 ¹Tama te bidigo ena te lotu be tempelgo te giliga asobo badu genuai sunumiba ma odasa pali. Tama eno sunumi paliai elalubo suali. ²Tama Genuai Bidigo ena dali e tama po wali, “Te sunumi palialuama, tama bidigo dabo usu me egobeo. Tama bidi me deli te sunumidu tula asobo usu me egobeo. Magi baso meni. Ena God Genuai Bidi, dage Israel dabego Genuai Bidi, te sunumidu tula asai sunumi dao. Tialima, te sunumi tigidali sogo me palialuaibao. ³Tama king deli digi agaduba naga te be sunumi elalubo dolo naga asomainao. Tama aga eno gedude te ofa nai tumainao. Tama aga te sunumidu tula aselama, tama aga te be sunumidu buluba ma tula pomainao,” wali.

Godigo we bidi naga aga te be tomoba tula pomainao

⁴Tialima, te bidigo ena odasa, te not badu te obo badu sunumidu odasa pelama, tama te Godigo be gesabidi badu doligi pali. Tama eno Genuai Bidi Godigo ulago te aga be paęana sai suali. Tama tibaso, eno bogoli sugunama, tama eno gesabidi tþba elama basi giluali. ⁵Tama Genuai Bidigo enabolo e tama po walali, “Tþde bidio, nago eno nagebolo ola mawainu ebo te nai dabe bugagia tonaluao. Tama eno nagebolo wainogo ebo te po bugagia odao. Eno nagebolo te eno tempel bego bomai po, me te bego kolesaga po nagebolo pusaibao, eno te bego po dabe. Bidi meba augwali te eno tempel be tomoba

^x 43:27 Sai 29:35-37

pabo te usu yaibao, tiali goli gasa meba eno habu mu selai dao. Tama eno tede po wainu ebao, tama nago te po waboba bugagia olo saganama odao,” wali.

6“Nago te hagoma ebo Israel we bidibolo e tama po walao. Ena God Genuai Bidi, eno te po dage Israel dabe dali te elalubao. Dagego te dwai damua pai te kolesaga yali mu tagalao. Dagego te dwai damua pai kolesaga elama, tama dagego e dwai kolesaga me yali dao, 7dagego te gasa meba kantri bidi hani dabe eno be tomoba asomainu sula tagalai dao. Te dagego te kibu ili me kaneme ofa eyu, te eno nai mu dao olama, ulubo sogo tama tiai dao. Te Israel hani isawai bulu badu bage, augwaligo augwa tigi hale ebo nai togisawai bidi dabe dao. Tama augwaligo ena homugo me konebo menio. Augwali eno be tomoba aselama, tama augwaligo eno gedude te be meda ilai dao. Dagego te dwai damua pai kolesaga tama yaligo dao, teda dagego eno daw walali po huşia sawai dao. 8Tama elama, dagego duga digi eno bede seş yai menio. Menio. Dagego te Israel hani isawai bulu badu bidi dabego dagego seş emainogo sula tagalai dao,” wali.

9“Ena God Genuai Bidi eno te po obao. Te gasa meba kantri bidi dabe augwali te augwa hale ebo nai wali togisawai bulu badu bage dao. Tama augwaligo enaba homu daw me wabo bage menio. Te bage augwali eno tedali gasagi yai beba me tula pelamo dao. Augwali Israel dabe tomode bidai me tagalao. Augwali te be tomoba me pogobeo,” wali.

Te Livai dabe augwali pris seş igio

10-14Genuai Bidigo enabolo e tama po walali, “Te Israel dabe augwaligo ena tudi ola mani sogo te Livai dabe augwaligo ena tagalama, tama augwaligo tibo god dabeba lotu po wai dao. Tama augwaligo te we bidi te tibo god dabeba lotu omainu tau sai dao. Tama te kolesagago te we bidigo homu hogodolama, tama augwali dwai kolesaga yai dao. Tama tialima, ena God Genuai Bidi eno mu po mu e obao, eno te Livai dabe dene mawaibao, augwaligo te dene dali seşeş dali tolaibao. Megi eno te Livai dabe augwali pris seş emainu me sula tagalogobeo. Augwali ena pageba me, ma eno tedali gasagi yai nai mu dabe pageba augwali asomainu me sula tagalogobeo. Eno augwali pris seş idali weyu habu selebao. Tama augwaligo augwa damua pai kolesagade hale dwai mu yaibao. Tiali goli, eno augwali eno tempel be sunumi dabe tonalubo seş emainu sa muaibao. Tama me te tempel be tomode meba seş dabe emainu sa muaibao. Tama me augwaligo isigo mu dela silabo ofa yabo hasa dabe eleyu, me te we bidi dabego sesebo ofa ebo nai dabe meba augwaligo eleyu emainao. Tama augwaligo we bidi lotu wabode tau siyu emainao,” te po wali.

Pris bidi dabego seş po

15“Ena God Genuai Bidi eno e tama po e obao. Te gasa Livai hani bagego te eno pris seş me egobeo. Tiali goli, te Sadok hani Livai dabego

naga te pris şe emainao. Te Israel dabe augwaligo ena tudi ola mani sogo, te hani deligo naga eno be tomode şe dolo idu geai dao. Tialima, megi da, te Sadok hani deli naga ena p̄aba asiyu, me eno şe dabe eyu, me hasa ili dabe me kaneme dabe seselama, tama enaba ofa yagasiyu emainao. ¹⁶Te Sadok dabe augwali naga ena be tomoba asiyu, me eno tebol p̄aba asiyu, me eno şe eyu, me eno nai dabe tonalubo şe eyu emainao. ¹⁷Te pris dabe augwali eno namba 2 obo tomoba eno be bagulali obo tomoba pabo si da, augwaligo te pris ugwa wiegi yai name ugwago nigai ugwa gudumainao. Te augwali te obo tomode bidibo sogo augwaligo te sipsip kibu nisigo nigai ugwa guda magio, te habu selai dao. ¹⁸Augwaligo trausis, me name ugwa tobolude gudubo gudumainao, te augwaligo wiegi yai name ugwago nigai. Tiali goli, augwaligo kukulu gudamo dao. Tiyu posologo augwaligo tigi dolabuo.^y ¹⁹Tama augwaligo te pesage tagalama, tama augwali genuai we bidi sisinibo pesageba painu da, teda augwaligo eno bede şe yainu, te gudubo ugwa dinama, tama gasa olo ugwa guduyu emainao. Tama augwaligo te ugwa dabe te Tedali Gasagi Yai Be Habu p̄ade elalubo be habu side dinama mumainao. Magi baso meni, te we bidi augwali te prisgo te ugwa dabe p̄aba asama, te we bidi tede dene sidali weyu tama tiao,” wali.^z

²⁰“Te pris dabe augwali augwa tobolu nisi togobo sogo augwaligo tobolu nisi sese togwa şanama, tama augwaligo tobolu wane diliba nigilamo dao. Me ma, augwaligo tobolu nisi bobobage mu holomainao sula tagalamu dao.^a ²¹Te pris dabe augwali namba 2 obo tomoba painu peyu, augwaligo wain aḡ tulamu dao. Te eno tempel be bagulali obo tomoba painu te wain tulamu dao.^b ²²Tama me pris bidi dabego te we aga bidigo sela şawai we selamu dao. Augwaligo te we bidi dali pişama yai deli naga somainu yao, ma augwaligo te pris bidi me isai bidigo we siyu tama emainao. Tiali goli, augwali gasa olo bidi dabe isai bidigo we me somainu elamuo,” wali.^c

²³“Te pris dabe augwaligo te we bidibolo mena nai dabe eno gedude te tedali gasagi yai meda meni yai nai mu augwalibolo ola mayu, me mena nai dabe eno gedude te olo da wabo nai dabe augwalibolo ola mayu yao. Tama me augwaligo mena nai eno gedude meda yai augwalibolo ola mao.^d ²⁴Te we bidigo nai me delide wado po weyu ebaso da, teda te we bidi augwaligo po te pris bidi dabe augwali tomode bidiyu eno bomai po wali peyu, augwaligo po osola sumainao. Te pris dabe augwaligo eno bodolu muani genuai sogo dabe augwaligo te bomai po wali peyu emainao. Te eno lotu wabo sogo bodolu muani bugagia wali peyu emainao. Tama me te pris dabe augwaligo Sabatde bugagia koneama, tama te sogo te eno si mu dao olama, sa mumainao,” te po wali.

^y 44:18 Sai 28:39-43; Prs 16:4 ^z 44:19 Prs 16:23 ^a 44:20 Prs 21:5 ^b 44:21 Prs 10:9

^c 44:22 Prs 21:7, 13-14 ^d 44:23 Prs 10:10

²⁵“Te pris bidi dabe augwali te isai bidi pageba pigio. Tialima, augwali paşa pali da, teda augwali eno gedude meda yai pedelaibao. Tiali goli, augwa deli kaneme bidi me isali da, te aga aya, ma ida, ma wai boş, ma ama, ma abe bidigo sisşama yai isibaso da, teda te deli kaneme bidi aga te isai bidi pageba pomainao. Tiali te ebo kolesagago augwali eno gedude meda yai pedelaibao.”^e ²⁶Tialima nosali augwaligo te wiegi yai ma pedalobo kolesaga wali pelama ma yao. Tama te pris bidi me ma wiegi yai ma pedelai yai baso da, teda aga a naga olama si, 7 sogo bolo ma tonalumainao. ²⁷Tama nosali aga te eno be bagulali namba 2 obo tomoba pomainao, te eno Tedali Gasagi Yai Be Habude ş emainu. Tiali goli, agai bolo hasia aga ş eşe sela ş ayabo ofa bolo deli me emainao. Tama nosali agai eno tempel be tomode ş emainao. Te da God Genuai Bidi eno po dao,” wali.

²⁸“Te pris dabe augwali te meba hani dabego yali gilama te kantri Israel tomode tş dage me sogobeo. Menio. Ena da, te augwaligo wiegi yai nai dabe augwaligo tigidali sogo tolaluainu sabo nai dabe tiwai dao.”^f ²⁹Te pris dabe augwaligo te we bidigo mabo wit ulubo ofa tuyu, me ş eşe sela ş awainu ulubo ofa me tuyu, me dwai kolesaga geda muani dodolobo ofa tuyu emainao. Tama augwaligo te we bidigo eno nai mu dao olama, sa muani te nai dabe me tuyu emainao. ³⁰Te we bidigo te gide hasia inayali nai dabe te pris dabebolo magasomainao. Me te pris dabego meba tedali gasagi yai nai dabe te we bidigo ena magasabo, te nai dabe me augwali tumainao. Tama te we bidigo bret ulubo sogo da, augwaligo hasia ulali te bret selama, tama te pris dabebolo te ofa tiwai momainao. Tialima, te we bidi augwaligo te tama tiali da, teda eno augwaligo be me we wai dabe dali wiegi yai ş eyu yaibao,” wali.^g

³¹“Tiali goli, te ba o hasa dabe me olodali isiyu, ma te bulu hasago me ela muai baso me, te pris dabe augwaligo te ba o hasa dabego mi tulamu dao,” Genuai Bidigo te po wai.^h

Te Israel dabe augwaligo Genuai Bidigo tş pedai me deli sa mumainao

45 ¹Genuai Bidigo po ena dali genina ma weyu, e tama po wali. “Te dage kantri Israelba ma peyu, tama deli deli haniba tş dobabo sogo da, teda dagego ena Genuai Bidibolo tş genuai pedai me daş ilao. Te tş bobobage te 12 kilomita usu nama, me genuai yali te 10 kilomita usu nama daş ilao. Tama te tş pedai te eno tedali gasagi yai tş dao. ²Tama dagego eno te tş tomode deli me daş yao, te eno tempel be tede ş yabo digi. Te tş me si me si bogo badu te deli tiwai usu naga emainao, te 250 mita usu nama. Tama dagego te tempel be ş yabo pedai tş bagulali tş me daş ilao. Tama agai genuai te 25 mita usu nama magi yao. Tama

^e 44:25 Prs 21:1-4 ^f 44:28 Nam 18:20 ^g 44:30 Nam 18:8-19 ^h 44:31 Prs 22:8

te namba 2 t̄q pedai te olo t̄q elaluaibao. ³⁻⁵Tialima, dagego eno pedai genuai si pedao, tama te si te deli usu tiwai si naga emainao. Tama te t̄q bobobage si te deli deli te 12 kilomita usu nama, me genuai yali te si te 5 kilomita usu nama dāi emainao. Te t̄q pedai te me te pris dabego t̄q dao. Te ena be elalubo pesage te t̄q dao. Te pris dabe augwali ena pāba asobo dao, augwali eno be tomode s̄q yainogo, augwaligo augwa be te t̄qde s̄q emainao, te eno augwali dāi ilali te eno t̄qde. Tama te t̄q pedai te ena obode dao. Te da te ena t̄q mu dao. Tama te t̄q te tedali gasagi yai mu dao. Tama eno t̄qgo namba 2 pedai te eno Livai dabego t̄q dāi ilibao. Te Livai dabe augwaligo eno tempel bede s̄q meba ebo dao. Tama augwaligo augwa taun tede nigimainao, te t̄q pedaide,” wali.

⁶“Dagego pris dabego t̄q bogo badu gasa t̄q me ma dāi ilao. Te t̄q bobobage te 12 kilomita usu nama dāi iliyu, me agai genuai te 2 olama, hap kilomita usu siyu yao. Te t̄q da, te tigidali Israel we bidi dabego t̄q dao. Te augwaligo genuai taun te t̄qde nigimainao,” Genuai Bidigo te po wali.

Godigo kingo t̄q sa muani

⁷Genuai Bidigo po genina ma weyu, e tama po wali, “Dagego kingo t̄q pedai si dāi ilīqo. Te hasia wabo t̄q pedai te giliga asobo badu elaluaibao. Te eno t̄q me dagego genuai taun bogo badu t̄q bogode tama pelama, te giliga asobo badu tama usu nigi paibao, te kantri sabi simanigi paliba usu nigi paibao. Tama si wabo pedai te giliga dega sabo badu elaluaibao. Te eno t̄q me genuai taun pedai bogo badu, tama te kingo t̄q pedai sigo te kantri mesegela saibao. Te giliga asobo badu gagalama, tama te giliga dega sabo kantriba tama usu nigi paibao. Te t̄q pedai te deli deli Israel hani dabego augwa we bidi dobabo t̄q pedai dao. ⁸King aga t̄q tali elaluaibao, tama agai te we bidi dali dwai s̄q me egobeo, te king dabe augwalibolo eno polobadu mani king dabego yali gilama, tama agai Israel dabego t̄q sidali weyu,” wali.

⁹“Ena God Genuai Bidi eno te tama po wali. Dage Israel dabego tobolu bidi dabego dwai kolesaga tagalīqo. Dagego we bidi dabe dali bomonama dwai s̄q elama, tama dagego augwali aiyaba elaluai dao. Tama tialima, dagego te dwai kolesaga dabe tagalama, tama dagego doloba pai kolesaga naga dolo iȳqo. Tama dagego eno we bidi augwa t̄qde sela sābo kolesaga tagalao. Ena God Genuai Bidi, eno te tama po wali dao,” wali.

Te Israel dabe augwaligo tigidali nai dolo dobola somainao

¹⁰Genuai Bidigo po genina ma weyu, e tama po wali, “Dage Israel dabego tigidali nai dabe dolo tiwai si naga dobola sīqo. ⁱ ¹¹Efa te wa pai

ⁱ 45:10 Prs 19:36

nai dabe skel ebo nai dao, tama bat te aï dabe skel ebo nai dao. Tama te efa me bat si te deli tiwai usu si naga elaluyu emainao. Tialima, nogo si efa te homa nogi wabo usu sabo nai me deli usu nama dao. Tama te nogo si bat te homa ma kor usu nama dao. Homa te tigidali haniani nai dabe skel ebo nai dao. ¹²Te nai nai dabego seęę skel ebo skel da, e tama da. Te 20 gera te skel deli usu nama dao. Me te 60 sekel te mina deli usu nama dao,” wali.

¹³“Te dagego te nai dabe enabolo ofa tiwai sesebo sogo da, dagego te tama nai dabe skel eyu yao. Dagego tigidali 60 kilo wit me bali bugwai deli ofa eyu yao. ¹⁴Tama me dagego 100 lita ni oliv du wel bugwai deli ofa eyu yao. ¹⁵Tama me dagego te tigidali 200 sipsip kibugo dagego we hauwa elalubo tõe nosai tubo te sipsip bugwai, me deli dagego ofa eyu yao. Dagego te nai dabe te wit ulubo ofa yainu, me isigo mu dela silabo ofa yabo nai, me ena dali haliga deli yabo ofa yabo nai tama seseyu yao. Dagego te ofa eyu da, teda eno dage Israel dabe sesego seęę sela şawaibao. Te da God Genuai Bidi eno po dao,” wali.

¹⁶“Tigidali we bidigo te ofa yabo nai dabe tigidali tama Israel dabego king pageba sesiào. ¹⁷Tama kingo te sesali naigo te isigo sese dela silibo ofa mayu, me wit ulubo ofa mayu, me wain gelebo ofa mayu yao. Kingo te ofa dabe te genuai sogo dabe, te gesi polua nanibo sogo, me Sabat side, me gasa meba genuai bodolu muani sogo eno Israel dabe augwalibolo mani, te si pedalobaso augwaligo te ofa yabo nai dabe seseyu yao. Tama me, agai Israel we bidigo seęę sela şayabo ofa me mayu emainao. Te da te seęę sela şabo ofa dabe, me wit ulubo ofa dabe, me isigo sese dela silibo ofa, me ena dali deli haliga ebo ofa mayu yao,” te po wali.

Te lotu po wabo genuai sogo

¹⁸“Ena God Genuai Bidi, eno e tama po obao, te hasia wabo dei te hasia wabo poluade nago te gesi kau kibu omai agai tigi kenigo me dolişama yai selama, ofa yagasao. Te ofa ebo te eno tempel be te eno gedude wiegi yai pedelemainu yaibao. ¹⁹Tama pris bidigo te seęę sela şabo te ofa ebo te kau kibu kaneme selama, tama eno tempel be ni posde pilaibao. Te eno be sunumi si badu elalubo pos nide, me te alta me si me si te dage badu piliyu, me te eno be bagulali te si wabo obo sunumi te pos ni dabede piliyu tama yao. ²⁰Tama nago deli tiwai kolesaga naga te hasia wabo poluago te 7 wabo deide nago te tiwai kolesaga naga yao. Tialima, bidi mebago augwa kolesaga bugagia homu kone palişama, tama augwaligo seęę saibaso da, ma augwaligo augwa seęę sali konesiawai baso da, teda te augwaligo te kolesagago eno be meda ilibo dao. Tama te ofago eno be wiegi yai ma pedelaibao,” wali.

²¹“Te hasia wabo poluago 14 deide da, dagego Godigo Israel Dabe Augwali Olo Bugagia Bidimainu Sula Tagalali Sogo daï ilao, te Pasova

bodolu muani sogo dao. Tama a naga olama, si sogo bididubadi, dagego te yis musiawai bret tuião.^j 22 Te genuai sogo dabego hasia wabo deide da, dagego kingo te kau kibu omai me deli te pris dabebolo menama, tama te kingo me te tigidali we bidigo seęę sela şabo ofa emainao. 23 Tama te Yis Meni Yai Bret tubo sogo da, te Sarere me deli dao, te kingo ena Genuai Bidibolo agai a naga olama, si kau kibu omai, me a naga olama, si sipsip kibu omai mayu emainao, te isigo sese dela silibo ofa tiwai dao. Agai wiegi yai hasa dabe naga somainao. Te hasa dabe augwaligo tigiwali te kenigo me dolişama yai sao. Tama me tigidali sogo kingo meme kibu omai te seęę sela şabo ofa tiwai eyu yao,” te po wai.

24 “Tama me kingo 14 kilogram wiegi yai plaua, me 3 lita oliv wel te deli deli kau kibu me sipsip kibu dabe dali mayu yao. Tama te pris bidigo te kau kibu o sipsip kibu ofa ebo sogo, agai te plaua me, wel me ofa eyu emainao,” wali.

25 “Te Osogo Bidabo Bede Bidibo Genuai Sogo te 7 wabo poluago 15 deide gagalama, tama a naga olama, si sogo tama bidaibao. Tama te sogo te king agai te Yis Meni Yai Bret tubo sogo sesebo ofa tiwai mu sesemainao. Te tigidali sogo agai deli namba tiwai kau kibu me sipsip kibu ofa yabo sesemainao, te isigo sese dela silabo ofa, me te seęę sela şayabo meme kibu deli. Tama agai deli tiwai skel yai witgo nigai plaua me, oliv wel me sesao, te ofa yabo,” God Genuai Bidigo te po wali.^k

Godigo kingo yabo ofa po wali

46 1 “Ena God Genuai Bidi eno te po obao. Te tigidali wikde te giliga asobo badu te namba 2 obo sunumi te a naga olama, deli, te 6 tama sogo te seę ebo sogo te be sunumi palialumainao. Tiali goli, augwali te sunumi te Sabat side, me gesi poluago genuai sogo naga dayu emainao. 2 Tialima, te lotu po wabo sogo te king aga eno obo tomoba tula asomainao. Tama king aga genuai sisinibo pesage tagalama, tama aga te giliga asobo badu te si wabo obo sunumi tomoba pomainao. Tama aga sunumi pađe dolaluyu, tama agai altaba ugwaba tonomainao. Tama te pris dabe augwaligo kingo sesali te nai dabe ofa emainao. Te da te isigo sese dela silabo ofa, me homu ena dali deliba yabo ofa dabe dao. Tama king aga bogoli sugunama, tama agai mage basi gilutama, tama enaba lotu po omainao. Tama nosali agai te pesage tagalama, tama genuai sisinibo pesageba pomainao. Tiali goli, te pris dabe augwaligo te sunumi dalalubadi, be pioba usu nigi pomainao, tama piode ma paliao. 3 Tama te lotu wabo genuai sogo dabe te we bidi augwali te bede sisinibo pesage genuai te si wabo obo bulu badu sisalumainao, te eno gesabidide. Tama augwali bogoli sugunama, enaba lotu omainao,” wali.

^j 45:21 Sai 12:1-20; Nam 28:16-25 ^k 45:25 Prs 23:33-36; Nam 29:12-38

4“Te tigidali sogo Sabatde kingo a naga olama, deli, 6 sipsip kibu wai, me sipsip kibu omai te isigo mu dela silabo ofa eyu emainao. Agai te sipsip kibu dabe te augwaligo tigiwali kenigo me dolişama yai te wiegi yai kibu naga sao. 5Agai te 14 kilogram wiegi yai plaua te sipsip kibu omai dali seseyu emainao. Tama me agai te sipsip kibu goç dabe dali aga homugo plaua sesemainao. Tama agai te plaua sesali tiwai skel te oliv wel me sesemainao. Tialima, agai 14 kilogram plaua seseyu da, teda agai 3 lita oliv wel dali sesemainao,” wali.

6“Te gesi poluago genuai sogo te king agai te e tama ofa yabo nai dabe naga seseyu emainao. Te kau kibu omai deli, me a naga olama, deli, 6 sipsip kibu goç, me sipsip kibu omai deli tama seseyu emainao. Agai te hasa dabe te keni dabego augwaligo tigiwali dabe me dolişama yai seseyu emainao. 7Agai te 14 kilogram wiegi yai plaua te kau kibu omai dali seseyu, me 14 kilogram plaua wiegi yai te sipsip kibu omai dali sesemainao. Tama me agai aga homugo plaua te sipsip kibu goç dabe dali sesemainao. Tama agai te sesebo plaua skel usu te oliv wel me agai sesemainao. Skel da e tama dao. Ma, agai 14 kilogram plaua seseyu da, teda agai 3 lita oliv wel seseyu emainao. 8Te king agai enaba lotu po wainu da, teda aga te genuai sisinibo pesage tagalama, tama aga te giliga asobo badu be sunumi namba 2 obo badu tomoba pomainao. Tama pelama, te sunumi paça bidigi pomainao. Tama agai lotu ola silama da, teda aga te asali te sunumidu ma teda solama, tama aga te genuai sisinibo pesageba ma asomainao,” wali.

9“Te we bidi augwali ena Genuai Bidiba augwaligo te lotu wabo sogo naga lotu wagasiyu yaibao. Tialima, augwali u not badu genuai obo sunumi badu tomoba asai baso da, teda augwali lotu ola silama, tama augwali u saut badu te genuai obo sunumi badu buluba ma pomainao. Tialima, augwali saut badu obo sunumi badu tomoba aselama, lotu wagasai baso da, teda augwali te not badu te obo sunumidu buluba ma somainao. Augwali augwa te asali sunumidu deli naga augwali ma pelamo, menio. Augwaligo te obo gasa sunumidu taga pao. 10King aga eno obo tomoba te we bidi tomoba tula pabo sogo tula peyu emainao. Tama agai te we bidigo te obo taga soabode, agai me taga somainao. 11Te lotu po wabo sogo dabe da, te we bidi augwaligo ofa nai mawainogo da, augwaligo 14 kilogram wiegi yai plaua te kau kibu omai deli deli dali mayu, me te sipsip kibu omai deli deli dali te 14 kilogram wiegi yai plaua dali mayu emainao. Tama augwaligo augwa homugo plaua meba selama, tama augwaligo te sipsip kibu goç dabe dali sesemainao. Tama augwaligo te sesebo plaua skel usu nama, te oliv wel me tama sesemainao. Te skel da e tama dao. Ma, augwaligo 14 kilogram plaua sesaibaso da, teda augwaligo 3 lita oliv wel seseyu emainao,” wali.

12“Tialima, king aga homugo ena Genuai Bidiba ofa yabo nai dabe sesebaso da, te isigo dela silabo ofa, ma ena dali homu deli yabo ofa yabo

nai seseyu da, teda te pris bidi dabe augwaligo te giliga asobo badu te si wabo obo sunumi badu sunumi dayao. Tama king aga te pris dabego agai ofa ebode te obo sunumide bidimainao, te agai te Sabat side ebo tiwai tama yao. Agai lotu ola silibo si da, aga te be taga solama, tama te pris dabe augwaligo te sunumi ma palimainao,” wali.

Godigo tigidali bubuga side ofa dabe po wali

¹³Genuai Bidigo po genina ma weyu, e tama po wali, “Tigidali sogo kigamu dagego sipsip kibu g   deli agai tigi kenigo me dolis ama yai, tama agai kibu be deli yai tama seseyu yao. Tama dagego ena Genuai Bidibolo te siago mu dela silibo ofa mayu yao. Dagego te tama tobage ofa tigidali be posobo sogo eyu yao. ¹⁴Tama me ma dagego tigidali sogo kigamu dagego wit ulubo ofa te siago mu dela silabo ofa dali uluyu yao. Dagego 2 kilogram plaua selama, tama 1 lita oliv wel dali begelao, te wit ulubo ofa yainu. Te tigidali sogo kigamu ofa ebo bomai po te tigidali sogo nosali me ma elalua paibao. ¹⁵Tigidali sogo kigamu dagego sipsip kibu g  , me plaua, me oliv wel seseyu yao, te siago sese dela silabo ofa tiwai tama,” te po wai.

King bidigo t  po

¹⁶“Ena God Genuai Bidi, eno e tama po obao. Tialima king aga ogwa me delibolo aga t  me togwa mani da, teda te t  te wai aga t  elaluyu, tama aga hani we wai t  nosali me elaluaibao. ¹⁷Tiali goli, kingo agai t  meba aga s  bidibolo me mani da, teda te t  kibu be 50 wabode te t  king aga t  ma gagawaibao. Te kibu be da, te nai dabe ma wei ponobo kibu be dao. Te t  te king aga wai puluba dali augwa t  dao. Te king aga hani mu augwali te t  aya mu dao.¹ ¹⁸Tama me ma king agai te we bidigo t  wi me selamu dao. Tialima, agai aga wai puluba bolo t  pedai me mawainu da, te agai aga t  pedai mu naga momainao. Tama tiyu da, eno we bidi augwa t  elaluyu, tama augwali t  s   pai me elalugobeo,” God Genuai Bidigo te po wai.

Esekiel agai ofa ulubo pesage dabe suali

¹⁹Te bidi agai ena odasa, te pris dabego be gesabidi badu bilibo sunumiba odasa pali, te Godigo tempel be not badu. Tama te bilibo pesage te pelama, te t  dage me te giliga dega sabo badu elalubo suali. ²⁰Te bidigo enabolo e tama tiwai po walali, “Te da, te pris dabe aselama, tama te kibu mi senede uluyu yabo digi dao, te s   sela s yu, me dwai kolesaga dodolabo ofa nai uluyu yabo pesage dao. Tama augwaligo wit ulubo plaua ofa siyu elama, tama augwaligo tede ulaibao. Te pris dabe

¹ 46:17 Prs 25:10

augwaligo te ofa te genuai sisinibo pesageba sela pigio. Tiyu, augwaligo te ofa maiabo naigo te we bidi dolidali weyu,” wali.

²¹Tialima, te bidigo ena te tempel be bulu badu elalubo te bidi sisinibo pesage genuaiba odasa pali. Tama dadi si te sisinibo pesage me si me si dage badu odasa pali. Tama eno te dage badu deli deli badu te t̄ dage elalubo suali. ²²Tama te t̄ dage te deli tiwai usu ni naga elaluali, te bobobage te 20 mita usu nama, me genuai yali te 15 mita usu nama dao. ²³Tama te t̄ me si me si deli delide te masigigo nigai sai bagulai elaluali. Tama te sai dologode te sia nogobo pesage dabe elaluali. ²⁴Tialima, te bidigo enabolo e tama tiwai po walali, “Te Godigo tempel bede şe ebo bidi dabe augwali te kibu mi ulubo te pesage dabeba te we bidigo ofa yabo nai sesebo teba ulugi pomainao,” wali.

Węgo Godigo be tagalama pali

47 ¹Tialima, te bidigo ena Godigo tempel be polalubo sunumiba ma odasa asali. Tama eno te āi te sunumi dologodu pedelama, tama giliga asoboba geasa pabo suali. Magi baso meni. Godigo be giliga pedaloboba gesabidi tonalubo suali. Tama te āi te sunumi saut badu pedelama, tama te āi te saut badu te alta sesegedu peyu, te alta edelebo suali.^m ²Tialima, te bidigo ena te u badu not badu elalubo sunumi elaluboba da si pali. Tama da si Godigo be bagulali genuai obo bulu badu pali. Da si biligi pelama, tama da si giliga asobo badu sunumiba saboligi pali. Tama eno te āi te saut badu te sunumi dologode pedelama, tama pabo suali. ³Tama te bidigo aga usu sabo haliga bono selama, tama te āi wali peyu, usu sesa pelama, te 500 mita usu nigi pali. Tama agai enabolo āi nogeao po wali. Tialima, eno āi nogelama, tama te āi ugwanu eno sāa aiyadu sāa sawali bogoli dāi yali. ⁴Tialima, agai te āi wali 500 mita ma pali, tama agai enabolo te āi ma nogeao po wali. Tialima, eno te āi nogeali. Tama te āi gebo delama, tama eno bogoli ugwadu dāi igiluali, te ena sāade. Tama agai te āi 500 mita ma pali. Tama te āi tede eno tigi tomoba ugwa holama, tomo dāi yali. ⁵Tama agai te wēj dulu ma dulama, tama 500 mita ma pali. Tama te wēj gebo dāi elalubaso, tama ena nogeabo usu meni yani. Te pesagedu te bidi dabe wēj paluama, nogeabo usu elaluali. ⁶Te bidigo enabolo e tama po walali, “T̄de bidi, nago te şe yali dabe po sula silaliwe?” Agai po ola silibo si, da si te āi dulu ugwaba ma holali.

⁷Te da si ma geasa pabo sogo eno te āi u badu me, e badu me, te ni dabe hauwa dolalua pabo suali. ⁸Tama agai enabolo e tama po walali, “Te āi te giliga asobo badu pelama, tama Jordan āi odogo malu badu pelama, tama sigi āi Detsiba dolo pabo dao. Megi da, sigi āi Detsi tamu hauwa

^m 47:1 Sek 14:8; Jon 7:38; Ped 22:1

elalubao. Tiali goli, te aşıgo te sigi aşı wiegi yai ma ilaibao. ⁹Tigidali haniani aşı hasa dabe te aşı pabo pesagedu tama bidaibao. Tama te aşıde şuşı hauwa mu bidaibao. Magi baso meni. Te aşıgo sigi aşı Detsigo tamu aşı wiegi yai ilaibao. Tama te aşı pabo pesage tigidali badu da, te tigidali nai dabe holoyu naga yaibao. ¹⁰Te şuşı sabo şe ebo bidi dabego te sigi aşı Detsi kemi sane badu dolaluyu, şuşı sabo wa te aşıba şanama, tama şuşı saibao, te bulu Eneklaimdu gagalama, pelama, bulu Engediba usu nigi paibao. Tama augwaligo şuşı sabo şe siliyu, augwa wa dabe aşı kemi sanede muaibao, te wa dabe te kemi sanede omainogo. Te Detsi aşıde elalubo haniani şuşı dabe te Mediterenian tamu aşıde bidibo şuşı tiwai mu bidaibao. ¹¹Tiali goli, te sele pu aşı dabego aşı dabe te sigi aşı paşe elalua pabo te aşı dabe wiegi yai me egobeo. Menio. Te pu aşı dabe te tamu sabo aşı tiwai elaluaibao. ¹²Tama te Godigo tempel bedu pedelali aşı bogo si badu te wiegi yai ni du walobo ni holaibo. Te ni yabe dabe te me sasi egobeo. Tama augwaligo gesi noma nai tigidali poluade waliyu yaibao. Magi baso meni. Te aşı te Godigo bedu asobo aşı da, tama te aşı pagede elalubo ni dabe sa weyu, tama tiaibao. Te bidi dabego te ni du tuaibao, tama te ni yabe dabe selama, tama augwa haniani gasi dabe usu iliyu yainu saibao,” te bidigo te po wai.

Te kantri Israelgo tş daj dabe

¹³⁻¹⁴God Genuai Bidigo e tama po wali, “Eno dage Israel dabego waj dabe dali bomai po mu daj walai dao. Te eno dagebolo te Israel tş dagebolo menama, tama te tş dagego tş tigidali sogo elaluaibao. Dagego te tş dage Israel hani nogo si olama, şaş şe badu si haniba dobola şaş. Tigidali waj hanigo te tş pedai deli badu siyu yaibao. Tiali goli, Josepgo hanigo da, te tş pedai si badu saibao. Te tş daj da, e tama dao,” wali.

¹⁵⁻¹⁶“Te u not badu te tş daj te genuai tamu aşı Meditereniande gagalama, tama pelama, giliga asobo badu te taun Hetlon usu nigi pelama, tama taun Hamat me taun Sedatba pabo sunumiba usu nigi pelama, tama ma pelama, taun Berota me taun Sibraim usu nigi pabo dao. Te Sibraim te tş pedai Damaskus me tş pedai Hamat si tomode elalubo dajde elalubao. Tama dagego tş daj pelama, taun Tikonba usu nigi pali dao. Te taun te distrik Hauran tşde daj dao. ¹⁷Tialima, te kantri Israel tş daj te genuai tamu aşı Mediterenian badu gagalama, pelama, taun Enon usu nigi pali dao. Te not badu tş daj te daj te saut badu te Damaskus me Hamat tş dajde elalubao,” wali.

¹⁸“Tama giliga asobo badu tş daj te Damaskus taun me distrik Hauran tşdu pelama, Jordan aşı dulu pelama, tama saut badu Israel dabego tşdu me distrik Gileat tşdu pali dao. Tama pelama, sautba saboligi pelama, te sigi aşı Detsiba usu nigi pali,” wali.

¹⁹“Tama me te saut badu tş daj te taun Tamardu gagalama, tama giliga degebo badu tama peyu, te aşı elalubo bulu du peyu, te bulu

augwaligo Kades Meriba wabo buluba usu nigî pali. Tama obanu gana holama, tama aî dulu holama, Isip dabego daîdu pelama, genuai tamu aî Mediterenianba usu nigî pali dao.”

²⁰“Tama giliga dega sabo badu tî daî te not badu pelama, tama genuai tamu aî Mediterenian kemi sanedu pelama, tama u not badu te daî gagalali pesageba usu nigî pali,” wali.

²¹“Dagego te daî dabe tomode elalubo tî duga deli deli hani dabeba dobola şaîo. ²²Tama te deli deli hanigo tî te augwa wai dabe nosali pedalobo bagego tî elaluaibao. Tama dagego tî daî elama, dobayu da, teda dagego gasa hani bidi dabe augwa we dabe dage dali bidiyu, wai ame nani bagego tî me daî elama maiîo. Dagego homugo e tama tiaio, te bidi dabe augwali te Israel dabe naga dao olama, tama augwaliba me te tî togwa maiîo. ²³Te deli deli Israel hanigo augwa dali bidibo gasa hani bidi dage dali bidibo bage tî togwa maiîo. Te da, God Genuai Bidi eno po dao,” te po wai.

Augwaligo te not badu tî Israel haniba dobola sali

48 ¹Genuai Bidigo po genina ma weyu, e tama po wali, “Te kantri Israel tî daî te genuai tamu aî Mediterenian kemi sane paîde te not badu gagaibao. Tama giliga asobo badu pelama, taun Hetlonba tama peyu, tama te taun Hamatba pabo sunumi toboluba tama paibao. Tama te daî pelama, te Damaskus usu nigî peyu, me Hamatba usu nigî peyu yaibao. Tama daî pelama, taun Enonba usu nigî paibao. Tama Damaskus hanudu peyu, Hamatba usu nigî paibao. Te Dan hanigo te not badu tî saibao. Te kantri daî sabi badu augwaligo tî daî te kantri daî dagedu tama gagalama, te giliga asobo badu gagalama, pelama. tama a badu giliga dega saboba aselama, tama genuai tamu aî Mediterenianba usu nigî paibao. ²⁻⁷Te Aser hanigo te saut badu te Dan hanigo tî badu saibao. Te Naptali hanigo te Aser hanigo tî saut badu saibao. Te Manase hanigo te Naptali hanigo tî saut badu tî saibao. Tama te Efraim hanigo te Manase hanigo tî saut badu tî saibao. Tama te Ruben hanigo te Efraim hanigo tî saut badu saibao. Tama me Ruben hanigo tî saut badu te Juda hanigo saibao. Te tigîdali hanigo tî daî te giliga asobo badu gagalama, pelama, genuai tamu aî kemi sane Mediterenian nambisba usu nigî peyu yaibao,” Genuai Bidigo te po wali.

Godigo genuai tî pedai kantri tomode elalubo po wali

(Ese 45:1-8)

⁸Genuai Bidigo po genina ma weyu, e tama po wali, “Te tî pedai te Juda hanigo tî saut badu elalubo tî te gasa şe me elalubao, te tedali gasagi yai tî dao. Te tî genuai daî te not badude gagalama, saut badu usu nigî peyu, te 12 olama, hap kilomita usu nama dao. Tama te tî te kantri

daıdu gagalali, te giliga asobo badu gagalama, tama pelama, genuai tamu aı Mediterenian nambis kemi sanedu tama pali dao. Te deli deli Israel hanigo tı daı tiwai tama dao. Tama Genuai Bidi eno tempel be te tı pedaide elaluaibao,” wali.

⁹⁻¹⁰“Te tı tomode dagego eno tı mu deli me daı iyaı. Te tı u not badu me saut badu te bobobage dao. Tama te si dali si badu te deli tiwai daı naga elalumainao, te 12 kilomita usu nama elalumainao. Tama me badu bogo badu si badu me, te deli daı tiwai si naga elalumainao, te 5 kilomita usu nama. Te da, te pris dabego tı dao. Tama Genuai Bidi eno tempel be te tı tomode mu elaluaibao. ¹¹Te tı tedali gasagi yai mu dao. Tama te tı te Sadok hanigo pris bidi dabego tı dao. Te Israel dabe augwaligo ena tıdı ola mani sogo, polobadu mu, te sogo te Sadok hanigo augwali wali pai menio. Te Livai dabego yali tiwai me yai menio. Menio. Te pris dabe augwaligo ena wali mu pelama, tama augwaligo eno se mu yai dao. ¹²Tama tibaso, eno ena te tı pedai te pris hanibolo te mobao. Te wiegi yai nai presen tiwai te olo mobao. Tama augwaligo te tı te tedali gasagi yai mu dao,” wali.

¹³“Te Livai dabe augwali te pris dabego tı pedai me badu bogo badu saibao. Te tı bobobage daı te 12 kilomita olama, hap kilomita usu nama, tama te tı genuai dedawali te 5 kilomita usu nama dao. ¹⁴Te tı dabe dagego eno tı daı yali te wiegi yai polalubo tı mu dao, tama tedali gasagi yai mu dao. Tama tialima, te pris dabe, ma Livai dabe augwaligo te tı te gasa hani mebago te tı mayu o abelemainu me sula tagalama dao,” wali.

“Tama te pris bidi dabe tı bogo me badu dagego tı pedai me ¹⁵daı iyaı. Te tı bobobage te 12 kilomita olama, hap dao. Tama te tı genuai te 2 kilomita olama, hap kilomita dao. Te da, te we bidi augwaligo tı dao, tama te we bidi augwaligo genuai taun tede nigaibao, te tıde. Tama augwaligo augwa be te tıde se eyu emainao. Tama me badu bugai te olo tı elaluaibao. ¹⁶Te taun me si me si bogo badu te obogo bagulai elaluaibao, tama tıgdali bogo badu deli tiwai daı naga elaluali, te 2,250 mita usu nama elaluaibao. ¹⁷Tama te taun te olo tıgo te taun bagua sai elalumainao. Tama te tı genuai te 125 mita usu nama elalumainao. ¹⁸⁻¹⁹Augwaligo augwa taun te we bidigo tıde nigimainao. Tama tiyu, te taungo te tı tomode togwai elaluaibao. Me badu pedai te giliga asobo badu elaluyu, me badu pedai te giliga dega sabo badu elaluaibao. Te tı pedai si te taun we bidigo gi tede eyu emainao. Te tı pedai si bobobage te deli tiwai si naga dao, te 5 kilomita naga dao. Te tıgdali Israel hani we bidi augwali te taunba se yagasiyu da, augwaligo te tıde gi eyu emainao,” wali.

²⁰“Te we bidigo tı, me eno tı pedai te pris dabe me Livai dabe augwali bidibo, te tı te genuai tı tiwai me pedelali. Te tı daı me si me si badu

te deli daı tiwai naga dao, te 12 kilomita olama, hap kilomita usu nama naga dao. ²¹⁻²²Eno tı me, te we bidigo tı te genuai tı tomode te elalubao. Te da eno gasa se me yainogo daı yai dao. Tama tı me badu pedai badu elaluyu, me badu pedai badu elaluyu, te ebao. Te da, te kingo tı dao. Tı pedai me deli te giliga asobo badu te elalubao. Te da te eno tı daı bogo badu gagalama, pelama, giliga asobo badu te kantri daı badu daı igi pali dao. Tama me badu tı pedai te giliga dega sabo badu te elalubao. Te da eno tı bogo badu gagalama, pelama, genuai tamu aı Mediterenian nambis sesegeba tama usu nigi pali. Tama tialima, te we bidigo tı, me eno tı si te kingo tı tomode mu elalubo. Te eno tı me badu te eno be elalubo, tama te tı me badu bogo te eno Livai dabebolo daı ilai dao. Tama te we bidigo tı te genuai taun te elalubo badu dao. Te Juda dabego tı te kingo tı not badu te elalubao. Tama Benjamin hanigo tı saut badu te elalubao,” te po wai.

Augwaligo Israel hanigo tı gasa hanibolo doba yali

²³⁻²⁷Genuai Bidigo po genina ma weyu, e tama tiwai po wali, “Te Israel hani mebago tı e tama dao. Te Benjamin hanigo tı te gasagi yai se elalubo tı saut badu saibao. Tama Simeon hanigo tı te Benjamin hanigo tı saut badu saibao. Tama Isakar hanigo tı te Simeon hanigo tı saut badu saibao. Tama te Sebulun hanigo tı te Isakar hanigo tı saut badu saibao. Tama Gat hanigo te Sebulun hanigo tı saut badu tı saibao. Te tigidali hanigo tı daı te giliga asobo badu gagalama, tama pelama, genuai tamu aı Mediterenian nambis kemi saneba usu nigi peyu yaibao. ²⁸Te Gat hanigo tı dage badu te kantri daı dao, te Gat hanigo tı saut badu. Tama te taun Tamaru gagalama, pelama, te giliga dega sabo badu tama peyu, te aı elalubo odogo bulu augwaligo Kades Meriba wabo buluba usu nigi pali. Tama ugwanu dwasianu holama, tama te aı dulu te Isip dabego bulu daıdu pelama, genuai tamu aı Mediterenianba usu nigi pali. ²⁹Dagego ena God Genuai Bidi eno po wali piıo. Te dagego te tı Israel hani duga hasi dobola sabo side tama tiao. Te Israel hani deli deli duga hasi dobola sabode tama tiao,” Genuai Bidigo te po wali.

Godigo genuai taun dabe sunumi po wali

³⁰⁻³⁴Genuai Bidigo po genina ma weyu, e tama po wali, “Te genuai taun bagulali obo sunumi nogo si olama si sunumi elaluaibao. Te deli deli obo bogo badu te sunumi sela sela elalua paibao. Te deli deli sunumi dabede te Israel hani deli deli waıgo nogi elalua paibao. Te sunumi nogi Ruben elaluyu, me nogi Juda, me nogi Livai elalubo sunumi sela te not badu elalua paibao. Tama te sunumi nogi Josep, me nogi Benjamin, me nogi Dan elalubo te sunumi sela te giliga asobo badu elaluaibao. Tama me nogi Simeon elalubo sunumi, me nogi Isakar, me nogi Sebulun elalubo

sunumi sela te saut badu elaluaibao. Tama me nogi Gat, me nogi Aser, me nogi Naptali elalubo sunumi sela te giliga dega sabo badu elaluaibao. Te obo deli deli badu te obo bobobage te 2,250 mita usu tama elaluaibao.”³⁵ Tialima, te taun sese bagua sali obo te bobobage daı te 9,000 mita usu nama dao. Tigidali sogo augwaligo te taun nogi e tama nogi eyu yaibao, ‘Genuai Bidi ede bidibao,’ te nogi waibao,” Genuai Bidigo te po wai.

ⁿ 48:30-34 Ped 21:12-13